

雪橋詩話續集

森叟署檢

丁巳孟夏南林
劉氏求恕齋刊

雪橋詩話續集序

留垞楊先生既成雪橋詩話十二卷雕板訖旋又成績集八卷屬贅一言弁厥首竊以謂聖清二百數十年之間 聖祖 高宗籠百學以啟文治弘才異智輩出踵起尤以博雅通經術擅校讐絕業幾追漢宋睨元明而遠過之而發爲詩歌派別亦盛卽非以自名者零章斷句不失爲純雅之音蓋涵濡悠久之澤氣機才思之所自闢皆有不可掩焉者也留垞所爲詩話掇拾所及比類事跡甄綜本末一關於政教學術風俗及其人行誼遭遇網羅放失彰闡幽隱儼然垂一代之典備異日史

官之采擇漁者際於海魚龍鼉鼉萬族之所託鱗爪之光怪濡沫之迴旋有異焉者萬仞之山量馬牛之谷樵子躑躅而歷焉鳥獸之叫音卉草之華實有異焉者咸詫而播之以狀某海某山之有以身爲漁樵聞見所極固有不得而忘也留垵所蓄不可際涯辛亥之變避亂滬瀆跼天躋地儼然安之但取故紙殘帙託之山海日漁樵於其中獲而獻獻而自憇不知日月之相代乎前也姑寄其哀窈窕思賢才以默契聖尼郁郁乎文哉吾從周之志沒吾身而已矣後之論者攷其世而察其所尙其諸有哀於此歟丁巳六月陳三立

雪橋詩話續集序

吾嘗讀春秋外傳至衛彪傒之咎萇劉而歎周人之詩自周人說之而失其意者固已多矣天之所支不可壞也其所壞亦不可支也武王克殷作爲此詩蓋謂天命靡常周之受殷用天人之和非以彊力云爾若夫保世滋大祈天永命凡見於三百篇者何其殷且摯也天道可而省不水火之所犯猶不可救誠如所言將天下興亡皆委之於天運而已無與焉彼夫憂天夾日之誠皆所謂違天反道而爲萇叔劉文公之續者也豈不謬哉後世之說詩者不揆其時之所遭志之所存而欲得

作者之意皆衛彪叟之類也聖遺居士所爲雪橋詩話
旨遠詞文不爲空綺大意所在欲使讀本朝之詩者有
以見詩中之人詩外之事而已丙辰之夏復成績集八
卷一如前旨或有獻疑於承幹者曰古人之詩多矣居
士概不之及而獨取本朝之詩窮年累月屏棄人事簪
迹之而未有已子亦不憚煩役爲之賡續刊行不其贅
乎嗟乎此王仲任之所由興歎也家人子弟學問歷幾
歲人問之曰居室幾年祖先何爲不能知者愚子弟也
儒生不知漢事世之愚蔽人也周人著書多說周人之
詩得失雖殊其致一也又何疑焉丁巳夏四月續集旣

數工遂書其語以爲之序吳興劉承幹

This image shows a blank ledger page with 11 vertical columns and a header row. The columns are of varying widths, with the first column being the widest and the last column being the narrowest. The page is otherwise empty of text or data.

雪橋詩話續集卷第一

求恕齋叢書

遼陽楊鍾義撰集

吳興劉承幹參校

漁洋癸亥稿與趙秋水話申鳧盟遺事感賦云淦水去

涓涓東流繞墓田忽驚辰巳夢重憶甲申年謂鳧盟尊人節愍公

甲申殉節夜雨唳山鬼青春叫杜鵑平生趙元叔白首話鐙

前鳧盟嘗作毛穎後傳略云自楚漢遞興能者皆起效

一技而穎獨以老病自全挺立不屈豈慕孤竹之遺風

歟然身晦而子孫用使富貴不絕可謂善處名實者矣

文雖滑稽自有寄託其哀流民和魏都諫云流民自北

來相將南去問南去何處言亦不知處日暮荒祠淚下
如雨飢食草根草根春不生單衣曝背雨雪少晴老稚
尪羸喘不及喙壯男腹雖飢尙堪負戴早春糧夕牧馬
嫗幸哀憐請宿茅簷下主人外至長鞭驅走東家誤留
軍人殺戮流血禍及雞狗日淒淒風破肘流民掩泣主
人搖手聶夷中之所不及陳鄭一拂之不能繪者詩能
曲爲寫出此詩江西詩徵作安福康若生作當是誤收
其元夕云百戰山河異春鐙舊俗存魚龍張紫燄鐘鼓
動黃昏到處能看月今宵亦閉門歡娛思宿昔嗚咽罷
開尊則易代之感也鳧盟截句最佳已見前集茲復錄

其燕京卽事四首山前兔急雁飛號黑霧黃塵落毳袍
獵罷歸來催夜飲江南少婦解弓刀漢時秦原罷曉鐘
黃綃牙軸市塵封畫圖往往多隆準傳是先朝舊御容
日暮垂鞭過畫樓市旁舞女木絲裘歌聲尙帶殊方語
半是揚州半潞州郭外香車錦作圍順城門下馬爭飛
獨憐貧女無顏色拾得殘花首戴歸

西安張炳璿儀昭癸未夏日卽事感懷云租吏徧鄉縣
銀鐙滿署前囊頭人似鬼候比日如年篋已甘離并羈
當苦鸞男宰官寧忍此無力可回天兩月全無雨秋禾
半已枯況當軍餉急無日不追呼剛了添丁債旋催隔

甲逋心頭肉已盡能復顧臀膚可以想見明季賦役之重龔晉之詩金矢每敲亡命髓城髡半屬富民頭皆指事直陳不嫌其言之近俚

明莊烈帝葬鹿馬山關中王宏撰嘗於三月十九日匍匐山下泣奠自稱鹿馬山人陽山李沂爲作鹿馬山人歌沂字子化一字艾山號壺菴映碧廷尉從弟也著鸞嘯堂集丙寅元日云老屋河干漸不支年來河伯故相欺頽垣缺壁還風雪濁酒辛盤自歲時浪把一生供敝帚獨留雙眼看殘棋陽回少慰幽人意檢點殘花放幾枝壬子一閏三月十九日詩云感此今何日敷天有閏

愁

周斯二菴悲歌集有燕山三老詩云圓冠方領漢衣裳
地偏燕山倍感傷三老何如商四皓不從太子事差強
三老一居良鄉縣南五里一居商家林一居單家橋惜
不詳其姓字他日得歸丙舍當訪之土人不知能有言
之者否

張覆輿豁村卽事云羈懸樹中行潺湲石瀨清野花開
閒色秋鳥落寒聲家住愚公谷書傳老伏生鄰人自來
往日見不知名當時北地詩人皆不涉鍾譚一派覆輿
嘗南至襄州有昭明臺孟亭諸詩磁州沁水皆其游履

所經其七里峽長律不減小長蘆釣師

張蒿菴長亭林一歲亭林與汪鈍菴書云張君稷若所作儀禮鄭注句讀一書根本先儒立言簡當使朱子見之當不僅謝監獄之稱許也又嘗言獨精三禮卓然經師吾不如張稷若蒿菴歿亭林以詩哭之云厯山東望正淒然忽報先生赴九泉寄去一書懸劍後貽來什襲絕韋前衡門月冷巢鷲室墓道風枯宿草田從此山東問三禮康成家法竟誰傳

王山史山志青門七子皆宗室之賢而篤於學者也各有詩文集卓然成家余所及與之游者子斗翁而已亂

後數往省之翁亦喜余嘗對人有松柏之譽翁子伯嘗
存杠年長於余以翁與余善而待余以執友之禮甚恭
然余固尊事翁不敢以雁行進也嘗與顧亭林言及亭
林入青門特訪其家時翁已歿見伯嘗索翁著作讀之
今伯嘗亦歿其子孫冒楊氏蓋從翁之母姓也亭林集
有朱子斗詩序伯嘗變名楊謙住西安府南八里大塔
堡內大塔者慈恩寺塔也其子烈及甥王太和皆受業
於亭林亭林將去關中別中尉存杠於慈恩寺塔下云
廓落悲王子棲遲愛友朋荒郊紆策馬獵徑傍鞬鷹土
室人稀到衡門客少鷹傾壺頻進酒散帙每挑鐙歎息

嘗憂患仙人獨戰兢薄田遺豆粃童阜贖薪蒸疾病嗟
年老虔恭尙夙興芋魁收蜀郡瓜種送東陵世業爲奴
有空名任盜憎幸餘忠厚福猶見子孫承渭水徂年赤
歧山一夜崩低頭從竈養脫蹟溷林僧毒計哀阮趙淫
刑虐用鄧忠魂依井植碧血到泉凝賊陷西安令弟
存柘投井死困
鬣時防罟驚禽早避繒屢捫追駟舌莫運擊蛇肱謬忝
師資敬多將氣誼憑深情占復始積德望高升子建工
詩早河閒好學稱堂垣逾舊大國邑與前增九鼎知猶
重三光信有徵沈薤隨劍璽變化待鯤鵬樹落龍池雪
風懸雁塔冰更期他日會拄杖許同登丙午有得伯嘗

書郤寄並示二門人詩

亭林題李先生矩亭詩序德州東二十五里矩亭故鄉
舉思伯李君誠明讀書處天啟中權奄柄國聞君通陰
陽象緯之學遣使徵之辭疾不就潔志以終其子源修
是亭以表遺躅余爲之詩源字江餘一字星來順治丙
戌進士授河津令有能稱罷歸後築退菴因以自號植
花竹購圖籍和易好讀書至老不衰亭林聞其談易數
歎曰今之管輅也亭林戊戌赴東手蹟所謂北李家卽
此甲寅有過矩亭拜李先生墓下詩

孫觥本衡藩之後名慈愍字火西曾舉崇禎壬午山東

榜甲申後易今名自稱大觚道人終於揚州陵母廟云
太公安鼎上陵母置軍時得失俱無幸君臣若有辭兩
事並舉使劉季聞之何以自解

張承胤祥符人世襲指揮使以功加都督同知國變後
與弟承訓種瓜三里岡絕跡城市馬之驪字冲漢杞人
諸生曾應劉澤清之聘冀以有爲察其志趣有異拂衣
竟歸國初自計當應歲薦避地於密之超化砦每當莊
烈諱辰必蔬食閉門伏謁涕泗沾衿有動以首正之思
者慨然曰予之當死久矣吾鄉夏申屠諸公身遭黨錮
尙亦穴樹毀形予所遭爲何等尙牽情兒女耶後竟死

於密仁和陳宜振嘗爲作種瓜叟避地翁二詩宜振字
載詵蔣拙存之甥而桑棧甫門人也有石屋磨茨稿十
二卷野菜箋一卷

韓經正雨中送春云綠草疏籬映水濱清谿寂寂四無
鄰一簾細雨仍飛燕幾日殘花又送春多病翻愁今日
酒傷心如別故鄉人明年客跡知何處早向天涯慰苦
辛九日云聞道東籬菊已黃無因移向酒尊旁西風忽
起野煙暮落葉亂飛山樹蒼雁帶寒聲歸渚急江含秋
色與天長浮雲遮盡登高眼不許愁人望故鄉含情絲
邈詩之以韻勝者也

霜紅龕集飲馬詩云馬驚人不奇芻豆日在阜馬良人
過求飛馳常不飽惡馬逢少年磬控長安道采條金月
題辟人誇姣好踏殺良家兒如同踐蒿槁烽臺夜火明
將軍事征討傳令選上駟駑惡各自保良者三兩騎左
右將軍燾沙漠萬里程安得善水草長嘶西北風筋力
不奈老苦樂旣已殊駕馭無顛倒生氣鬱勃自有包孕
睿忠親王致明史忠正書乃李雯舒章捉刀荅書則侯
朝宗之筆或云王綱或云黃日芳未知孰是舒章舊與
陳臥子齊名爲雲間六子之一以薦授內院中書乙酉
在京作東門行寄臥子其詞甚哀柳子厚所謂立身一

敗萬事瓦裂吳騏日千書舒章詩後云胡笳曲就聲多
怨破鏡詩成竟自慚庾信文章真健筆可憐江北望江
南蓋深惜之日千詩如尊前無計留殘臘天外遙傳有
漢庭莫道偏偶非勝地福州亦是舊長安捫蝨未干依
塞北會牛只是老牆東志節矯然與舒章殊科其詠漢
昭烈云名儒盧鄭久周旋正值黃星受命年龍種已移
三統歷蠶叢還闢半隅天金甌付託耕莘佐玉几彌留
顧命篇一代英雄生死際銅臺遺令最堪憐慨明裔之
無人也

吳日千感時書事寄計子山陸孝曾云十月寒風急浮

雲暗大荒客行愁過路時事慮蕭牆冀北非吾土秦中
亦異鄉空憂天欲墜未見日重光廟略慚靈武軍聲謝
朔方元臣誇定策列帥許勤王好爵娛姻婭官評視篋
筐簾編青鳥骨玉斲辟邪香冠蓋晨先集笙歌夜未央
冰蠶裁寶帳墮馬鬪新妝營窟謀初遂憑城氣轉揚荆
牛烹可往國狗噬何狂鐵券封蘇峻丹書錫董昌中朝
容桀梟羣醜益鷗張百里無煙火千村絕稻梁軍行咸
擁婦鬼哭暗聞殤朽索飢難馭開籠飽欲颺先須憂輦
轂莫道劃沮漳每作蛇蟲鬪深虞鵠蚌亡內睽戎伏莽
外侮剝侵牀劇盜鋒初退函關勢尙強霧迷黃帝陣彗

集紫微房造次分旄節安危作棟梁諸公咸倚重吾意
獨徬徨厚寵離三錫雄圖媿一匡藩籬殊未固肘腋況
難防邯敗惟降楚溫強且叛唐養蛇將螫手筦庫遂探
囊下士棲蓬室無因叫帝閭詩題蕉葉徧風到葛衣涼
濁酒醜難醉悲歌激不妨私心圖國是未敢告明堂同
社多英俊居貧更慨慷華陰終拂拭霄漢自飛翔壯志
清河洛交情重太行風濤惟砥柱冰雪見松篁縱使三
靈改無移百鍊剛累朝皆養士努力念前皇此福王時
作目擊南都蓋知其無能爲矣與亭林金陵雜詩用意
略同而此尤披露錄之以爲鑒戒

葉聖野喜康小苑孝廉至兼弔楊機部閣學云萬里清
江浪拍天故人消息動經年重來麋鹿長洲苑歸去荒
蕪彭澤田虎帳角殘辭部曲龍沙旗折偃歌船盧諶流
落劉琨死回首章門一惘然中秋日游柯山夜集祁奕
喜東書堂分賦云江潭秋淨晚潮過乘興扁舟意若何
斜日樓臺千嶂合西風鴻雁白雲多杯長坐看燈花落
歲宴愁聞蟋蟀歌底事驅馳江海上祇今霜髻易蹉跎
和廣陵鄧孝威秋日送姜如須赴吳兼承見懷之作云
蟲氣蕭蕭春雨餘茂陵終日病相如宮花冷落芙蓉岸
籬豆斜牽薜荔居萬里烽煙迷北渚千帆秋色下南徐

何當共載西園酒醉爾青州紫蟹胥高臺落日喚棲鳥
幾處炊煙起荻蘆客夢已迷歌吹路舊游還記酒家壚
滄江歲晚眠漁父絕塞音書待雁奴露槿風杉秋思滿
月明閨闔共提壺蒼涼感喟有王原吉戴九靈之遺響
嶺南關漢述懷句云每呼鸛鶴爲家令直以雲山作酒
徒似楊廷秀

憚正叔雙鸚鵡詩同夢可曾歸隴樹呼名爭擬變吳音
可謂體物入細其五絕澹遠七絕時有幽怨之思曉起
云連夜深山雨春光應未多曉看洲上草綠到洞庭波
月夜步城北故園云煙月鎖荒園空臺夜鳴珉不見歌

舞人梨花落如雪送楊生之無爲州云山郭春深聽夜
潮片帆天際白雲遙東風未綠秦淮柳殘雪江山是六
朝送周翼微入蜀云滿眼風塵一劍囊錦江難浣陣雲
黃豈知岷嶺峨眉上也有田栽海上桑五律如薜荔愁
中鬼桃花劫外身等聯厲太鴻錄入東城雜記且稱其
在東園東毛稚黃詩風致俊逸可奪昌谷玉谿之席正
叔與楊起文宗發胡芋莊香吳董大倫叔魚及陳鍊道
柔唐杜芑野稱竹谿六逸芋莊詩所謂隨地徂徠舊竹
谿酒乾坤借易爻齊陶潛小寄篇篇有不著山王不阮
稽也諸人詩清而薄不及甌香館遠矣

陳允倩擬古詩序云世徒知漢魏古詩不知其體有二其深而永雋而多思言有盡而意無窮者古詩也纏綿太息低昂以盡情曲折以盡變者樂府也漢之樂府沿襲楚風蘇李五言沂源三百自嗣宗太沖之流激昂恍爽窮態極妍浸淫至於少陵率以樂府爲古詩聲繁而詞雜兩京之風蕩如矣數百年來惟淵明最爲近古惜其體弱不足以起其文康樂雖復蘊藉自矜而慚趨排偶又其別派不更孔公誰知風雅此序可謂洞見本源其謂變風變雅之君子非不能爲平中之音其所激然也尤足爲古詩發微其贈吳孟舉云論詩莫爲昔人圍

中唐以下共鄙後何代何賢無性情時哉吳子發其覆
亦是通人之論

宋鞏仲至炊熟日有愴松楸云小樓吹斷玉笙哀春半
餘寒去復來五載不燒墳上土望江心折刺桐開哀慕
之忱感發真至陳伯璣爲明御史本子家豫章避亂流
寓蕪江其拜先大夫墓下述云母氏望門閭已是苦寒
日兒今別翁墳悲風飄淚溼墳前萬松樹樹樹兒子植
十載過人長能作青蔥色再拜告主人人誰非子職但
願護根株慎勿肆戕賊兒行多迴顧夢繞松楸泣來歸
當有時早晚難自必將欲游東南又思去西北傭書與

授經庶幾近食力骨肉永相保此身任通塞翁靈無不
之兒哀難罄述與仲至詩同一沈痛沁入心脾先君官
荆湖北路逾四十年庚子留葬於武昌魯家巷之楓墩
菊前臨南湖藍太淑人以壬子冬棄養癸丑四月合葬
焉久滯春申未能歲時展拜讀伯璣此詩不知涕泗之
橫集也

許友介米友堂詩律句如蓄藥先知病藏茶不爲醒趁
春樵筍髻候雨卜山中絕句如漁家竹裏聞簫管閒抱
兒孫看畫船芭蕉葉下閒來往一卷殘書斷續看不得
議其淺率

祁忠惠居梅市寓山園堂名四負傅補堂明經謁忠惠
祠云騎箕人去賸祠堂遺像堪爭日月光無復牲牢修
漢臘空留城郭夢遼陽兩京沒後煙塵滿一水秋來蒞
若香報國有心臣力竭還將四負問蒼蒼公著有越郡
園名記四卷劉澤清附馬阮上疏攻劉忠介并及其三
大弟子謂忠惠及章公正宸黃公宗羲也 大清兵至
貝勒以貂參聘越中遺老六人忠惠忠介章格菴及商
冢宰周祚姜宗伯逢元其一則寓公膠州高文忠也李
愛伯寓山四負堂謁祁忠惠像詩云嗚呼忠惠天人姿
門第高華文采奇二十登科作司李蠻陬滑吏無敢欺

報最俄鷹諫垣擢惠文腦後尤嶽嶽駕湖選郎手障天
一疏披雲折其角三吳地大多疆家白晝擊鼓驚吏衙
繡衣少年美如玉驄馬一出人無譁中臺入長十三道
逆黨汗流觀諫草倉皇請急歸倚廬四負名堂待終老
南都草創吳民驕公還持斧鋤其豪三弊上言僅報可
擢公開府蘇臺高揚州鎮帥本名賊花門大縱南塘出
駸駸略地窺丹陽公檄要盟克以日大江鼓浪高崔嵬
傳呼單舸中丞來通侯跪接健兒拜轅門醜酒歡如雷
奄兒案翻水火急副相出都國人泣彈章並列三賢名
師弟相隨返鄉邑同文獄起城社傾 興朝帝子安車

迎殉國義同高劉死觀時恥逐姜商生一泓清絕寓園

水角巾屹然水中止講學同源幸得人柳橋攜手王元

趾畫江猶子更從戎

魯王監國時公從子鴻孫將兵北上

巢覆孤兒繯繼

同故舍幸留施捨後藏書散盡亂離中承平回首閒居

福月榭風亭看不足夫婦清閨品畫詩弟兄別墅從絲

竹夢醒人世已滄桑終古山川對影堂青袍尙志孤臣

痛

像服青袍

黃帛長頰

御府香園名記在誰能續平泉花

石鄰家驚客過還憑礎認亭僧負只縛籬爲屋野菊寒

泉薦一尊魏莊耕稼幾人存當筵莫奏湘纍曲我亦公

家七葉孫

原注太高祖母爲公女孫

忠惠與王正義先生毓著同受

業忠介門忠介絕粒時聞正義投柳橋死曰近年講學
惟得此人忠惠臨命時見隔池山色歎曰山川人物皆
爲幻境今山川如故而人生又一世矣

永嘉林子強春日同王篤蕃林梅生集郭疇生先生出
所著北征草見示感賦四首云江城梅柳度芳菲旅館
清尊坐夕暉北郭誰憐齊士困東方還說漢臣飢詩成
牛背留風雪夢入燕山溼翠微聞道渡河曰望處烽煙
猶傍五陵飛都門風月幾經過回首繁華奈晚何異讖
尙書朱雀闕寒笳自咽白狼河千門蒲柳悲歌起三閣
煙花感詠多曾憶班彪北征賦長途霜雪共婆娑白馬

青袍事遠征一時京洛共知名雲沙色暗長楊館煙雨
舟迴櫓李城冶女春風開絳帳仙人曉露憶金莖懷中
猶有三年字贏得兒曹說正平蕭蕭門逐翠嵐開北海
尊延作賦才彼美自投金錯至奚奴徒負錦囊回元稹
五夜梅仙嶼珠鶴三春子晉臺我亦野耕茅季偉風流
曾侍角巾來他如高臺笙鶴尋王子大海波濤弔秀夫
玉塵好談天寶事銅駝猶憶洛陽宮擬之吳子華羅昭
諫庶乎近之同縣徐凝幼發泉村集中佳句如時來屠
販功名易道厄風塵物色稀谷口遺民依虎豹道旁古
道坐鶻鶴出關歌續梁童子哀郢騷傳楚大夫四海安

危哀獨苦一時家國事俱難時時送客腸俱斷日日言
歸臘已過經亂通莊遺箭鏃轉輸下里括雞豚皆夕社
之哀音而獨絃之苦調也

朱近修平陵東云平陵東松柏起秋風行人徬徨悲義
公義公奮臂擊巨君事雖不成大義伸孔光之徒顏安
存四十萬人何足論憶得真人與白水漸臺斗橫巨君
死雲臺將相功巍巍義公白骨成飛灰其詞甚偉其義
甚正非以成敗論人者子願爲字不爲亦能詩

張力臣山陽諸生號亟齋以賣書畫爲生亭林所著書
多屬其校刻精六書之學貧而耆古多集金石文字有

昭陵六駿圖贊焦山瘞鶴銘攷濟寧學宮漢碑釋文亭
林寄張文學韶詩冬來寒更劇淮堰比何如遙憶張平
子孤鐙正勘書江山雙鬢老文字六朝餘愁絕無同調
蓬飄久索居時淮上有築隄之役也音學五書力臣手
自繕寫二子叶增叶箕與校刻之役李天生寄力臣詩
一代儒宗同所向印須金石正皇初徐健菴題力臣小
像云奇字揚雲末渺茫茂先家法在中箱對君轉復思
元歎灑淚風前誦渭陽力臣亡其子以板質於李安溪
卷首有曹能始序作於崇禎癸未蓋亭林纂輯此書幾

三十年

華亭王玠右光承有聲幾社遭亂與弟烈奉父居天台
雁蕩間歸里躬耕不入城市者踰三十年生平好爲人
作序時有以文字賈禍相戒者曰生不喜存死不悲歿
宋纖之言也以義自處卒亦無害對酒云撫劍對尊酒
低頭無一言三年大梁客孤負信陵恩非忘情世事者
也漁洋詠玠右草書云逃名東海上時復帶經鉏自是
高人筆非關餓隸書烈字名世亦能詩有終然不得意
莫負百年心之句玠右無子所著鎌山堂集外孫楊日
徵慶門爲之收輯付梓

董亦樵寄懷孫石書云非關學稼憂時早半是悲歌借

酒狂沈崑銅無題云老去頓成彈指事憂來難覓斷腸
方史弱翁過亡友沈君服故居云三徑薜蘿空午夢一
春風雨賸桃根邢孟貞黃州寄杜子皇云十年紅樹辭
鄉去八月黃州見雁飛萬年少草堂前舊梅一枝放花
卻賦云百年冰雪身仍在十日春風花已生閻古古戊
申稷日詩云漁樵各有傷心事天地常如中酒人均別
有懷抱者也

錢飲光古詩直接陶杜律句如橋邊雨過初無路宅後
人稀早閉門鄰牆曬網漁人屋獨樹維舟處士家估客
暮占風腳喜漁家晝逆浪頭眠近井婦喧爭早汲合村

人起說難眠荒路行愁逢牧馬舊交老漸變高僧荷葉
直錢須護早棗仁炊飯覺春難痛入箭創陰雨夜夢回
鼙鼓海潮聲掉頭帽爲看山側勒馬韁因戀草依麥隴
離披傷雨葉菜田零落隔冬花大抵於張王及長慶集
爲近

錢飲光閩江卽事有云響高灘漸至招定柁如飛人自
瀑中下舟從巖際穿風雨何曾作聲聲在耳邊癸巳冬
余送適胡氏姊至尤溪往返經行情景如繪至鄉思何
處訴人語聽全非必親至其地乃能知之

飲光行腳詩三十首多彼教語然如往事是非難說夢

新年憂喜但書空野狐到底歸槽廠貧女安心賣箴罷
倦來那覺繩牀短飽後還嫌夜飯麤但容折腳親支爨
得覆匡牀手縛柴爲覓因緣穿酒肆欲傳心事畫鑪灰
古廟有鑪權過夜老僧無婦慣傷春推倒泥神尋佛拜
收來牛骨煥香焚飢寒總被婆心誤嘯傲嘗防冷眼看
幾處權歌傳北調數株枯樹說南朝放生有願收蟲網
續火無心落鳥巢佛座半敲無力正龕鐙欲暗幾時明
多悟道之言非裝金抹粉者所能夢見

鮑夢斗客蕪城乙酉四月兵屠城子輝祖在宛陵聞赴
時方九歲往蕪城尋夢斗屍不得笥中得父敝衣抱歸

歲時泣祀奉母守節母死哀毀成疾因卜地以徹衣置
棺中招魂同厝於南梁栽樹左右日夕攀樹枝哀號灑
泣踰年死聞者莫不悲之吳野人有輓鮑念齋詩云獨
遭傷心禍應爲早死人魂招衣當骨淚盡子隨親孤稚
遺天末三棺客海濱手栽原上樹黻黻野陰新頸聯以
十字隳括其事頗見詩筆

吳野人僻壤云僻壤無春至安知春已殘海雲千里黑
塞雁一聲寒老去謀生拙時危作客難直西是鄉路日
日出門看水退後同戴岳子晚步因過季園時季秋九
日云水中微徑出沙石白粼粼枯柳不棲鳥空亭始受

人東淘漁火聚西寺磬聲新吹帽風何急蕭蕭落葉頻
初冬云海桑還落葉田舍始休農暖日窮人得行雲老
雁從地偏欣事少廬做畏鄰春歲月踟躕過中原正舉
烽途中贈吳子遠云雪止川原合茫茫中夜情倦身臨
岸側僵足揣途行渚凍雁難下村光雞易鳴三塘桑樹
近僮僕計歸程泊船觀音門云卽以山爲郭堅完世所
稀雲鴻應得度塞馬竟如歸隴雨耕時大人煙戰後微
年年禾與黍養得駱駝肥寒潮看又落漸漸見山根拾
蚌澗沙輒打魚江水渾飢民春滿路米店晝關門吾亦
餬吾口愁來祇自言吳介茲謂讀野人詩如入冰雪窖

使人冷畏可謂塙評

遂寧呂半隱太常潛爲東川老人大器子鼎革後自歸
安移家海陵費此度贈詩有云近渡南徐藏巷陌久從
西塞狎煙波隱居凡四十四載扶母櫬歸蜀賣書畫自
給嘗有句云多難惟存骨居貧不墮名弟溥字卿藻亦
工詩

王說作燕臺云亦知七首無成事只重荆卿一片心送
魏和公歸里云要知鄉國無多路只是梅花隔一山句
法皆相似

錢邦芭開少丹徒人隱於釋號大錯鸚鵡曲云漁陽櫬

音何妙雖小有才未聞道鸚鵡賦詞何麗才高自炫應
招忌居才未聞徒媢罵况當衰世誰能下大兒孔文舉
小兒楊德祖如公所許曾觸阿瞞忌先後駢戮亦何補
鸚鵡能言爲舌誤莫倚善題鸚鵡賦黃祖不敵讐主簿
正平遭時不造見戕暴人雖曰命之不辰抑亦充以招
禍此詩固是正論其反覆子云反覆子何足取當年反
覆祇爲汝于今大物已我歸此輩反覆終我侮莫云反
覆多厚利劉昉極刑鄭虔廢君不見反覆臣多殺身前
成濟後張衡筆端犀利無前尤足以警世之徒爲小人
者

蔣易前民工畫詩句如鳥挾風歸樹江流月到亭浪危
山改色虹見雨吞聲皆佳

李杲堂散懷詩云山居萬事幸相便老僕家僮盡可佃
秋後豫編新鹿柵年來催種舊蚶田只充衣食餘從儉
敢藉詩書自謂賢最喜歲收真有穀市中五石一千錢
莫道當春春可憐初冬秋末亦能妍飄深紅柏東谿路
餐過黃橙小雪天坐廢微涼鄰竹借朝來新霽寺鐘傳
始知逸少高懷妙不獨蘭亭風日偏右軍帖末秋初
冬當快共爲集
中一徑養苔衣莫笑經年但掩扉性與鷓鴣俱畏出才
如家鴨不能飛只圖天使枯楊發所望春生病草微日

照檐東新盥罷衰顏應亦有光輝
臬堂古體沈鬱奇奧
偶爲閒適之作乃復娟秀如此才人學人固自無所不能

漢陽許承欽德州渡浮梁云土風兼漢魏河勢隔燕齊
界河驛云河聲吞鉅野地勢抱蘭陵皆能不攝於楚人之咻

眞定大悲菩薩高七十三尺紀伯紫有詩頌之其題僧
壁云萬事多無老衲閒松窗日見鳥飛還鄰僧只在煙
鐘外拄杖高懸孺過山被九堂夜集和送閣古古云錦
帳珠懸四角平玉童飛徹紫鸞笙花前酒進清平曲中

有陽關變徵聲伯紫隱不違親貞不絕俗客京師十年未嘗輕謁一人輕投一刺

太倉陳確菴卒於康熙乙卯門人私謚安道先生確菴自崇禎丁丑與陸桴亭盛寒谿江藥園爲遷善改過之會以天下多故講求經濟謂全史浩繁乃編爲四大部以政事人文別之分類掌錄乙酉以後長逝於崑山之蔚邨七十二潭紅蓮綠稻之區躬耕水鄉霽體塗足與蓬厯牧豎伍三旬九食突煙蕭然邀滇南文介石住尉遲廟詩所謂我有寒潭依古廟不妨老死竟忘歸也著書講學有蓮社之約所居田瘠而窪導里人圍岸禦水

用兵家束伍法不日而成方數十里歲得稔次韻劉天
成夏日雜興三首云綠波渺渺暗荒郊日與忘情草木
交蘆葉一灣圍鷺宅蓮花千歲老龜巢移牀就樹雲爲
枕倚竹懷人月滿梢不用勞勞叩詹尹十年前已決誅
茅采蓮新社仿天池物外同心學道宜止酒久懸根矩
介盜牛羞畏彥方知一潭雲淨波生處十里香來月上
時我欲忘眠客忘去幾回潦倒碧筒絲扶疏荔當籬
垣颶母風吹雨打門碧浪似雲翻白晝青鐙如夢照黃
昏兵戈未定書巢破煙火才通土鏗存今日落花誰作
主卻令消盡黯然魂黍離麥秀之感涌見行墨其學一

洗明季心宗之陋博觀多通不爲空言淵明西田穫稻
詩曰人生歸有道衣食固其端孰是都不營而以求自
安梁太子統序其集因以爲安道苦節安道之謚蓋取
諸此文介石謚貞道陸桴亭謚尊道皆發自確菴見張
溯顏私謚議

海寧布衣許箕字巢友有捫膝軒詩月夜感懷寄繆天
自云惆悵東林月淒涼故國同不堪仍對酒祇自感飄
蓬江遠魚龍夜天高鴻雁風還歌桂枝樹招隱小山叢
時梅里周青士好結客而巢友韜精蘊照閉戶獨吟人
爲之語曰與爲熱周寧爲冷許

繆天自有句云深巷落花來暮雨傍門流水上春潮李

尋壑愛其幽澹遂與定交其送人之代郡云前年相見

裴休宅

裴休故宅
卽清暉閣

秋水城南月華白今年相見昭王臺

邊風颯颯吹塵埃憐君家在番禺縣音書無復隨陽雁

塞北天南去復來馬邑城中歲將晏應知裘褐可安居

遠結新婚萬里餘秋來已見迎河鼓早晚相將挽鹿車

揚鞭八月飛狐道客思隨君徧衰草燕山昨夜雪花飛

聞道雁門寒更早主人有酒莫辭頻悲歌擊筑傷心神

百年聚散會有日深媿東西南北人此送屈翁山詩翁

山游秦隴時固原某守將妻以甥卽華姜也自固原攜

至代州上谷有詩云同棲紅翠三花樹對寫丹青五岳
圖蓋少室作也

嘉興王介人南山雜興云長城萬里羨當年楚澤軍容
蓋世傳三月晴風高戰鼓九江春水下樓船韓彭心事
應難論李郭功名不易全復道勤王師獨正江南處處
起烽煙投袂無端只讀騷傷心野老屬吾曹干官遠扈
思秦駐一旅先驅作董逃周道秋風吹黍稷漢宮春雨
蔽蓬蒿化龍五馬知何處海燕東飛問伯勞前一首詠
左寧南後一首則行朝記中事也

平湖錢軾稚農初名士馨嘗偕俠少五人至慶陽薄暮

微雨五虎躍出稚農曰不盡殺何以見諸君勇乃人發
一矢當者立斃一少年矢貫虎額尺許虎入林莽中追
割其舌以報至旅店縱飲獨不酌少年酒責之曰發矢
不中要害不足多也初以崇禎壬午貢入南雍見知於
吳駿公賊犯近畿中允李明睿密請南遷稚農私謁之
曰賊盡得秦隴晝夜行四五百里儻繞出畿南以抗警
蹕公將何辭以謝天下李慚懼又曰不如死守以待勤
王之兵先遣太子南行繫人望李難之及京城陷稚農
往來河朔閒輕財好施盡交其豪傑無所成或勸以仕
不應比還貧甚每不能舉火其歸去詩云柳深迷晉士

松老賤秦官馮秉恭輓稚農詩北地登樓罷還鄉未十年一編傳井史百結上花船人事詩名誤天真草聖傳松楸卽長夜猶恐出談元秉恭字子近亦恢詭士也

黃太沖製新茶詩兩筥東西分梗葉一鐙兒女共團圓
寫來質樸

綏安布衣丁之賢字德舉少厭帖括刻意學詩涉獵孫吳頗以知兵自負崇禎中流寇四起棄家走都門欲獻書不果短衣匹馬循賀蘭出長城與其豪傑交爲擣賊計謀甫合而明社屋不復干預世事與王將軍所贈妾海蠻居故里桃花谿上窮老以終棫林七夕云風急炎

蒸遠河明秋色新雙星移北斗片月下西秦守拙從人
巧忘歸任婦嗔華州今夜露和淚溼羅巾征雁驚寒題
贈孟見田社兄云秋氣藹關西秋鴻足別離荷枯湘水
夜雪滿賀蘭時冒雨銜蘆重衝風出塞遲相看兄弟好
不識在天涯自靈寶之陝州云不憚晨征遠連鑣度羣
微驚風隨壑轉殘雪撲鞍飛戰地人煙少積垣雉兔肥
從來軌弔古不禁淚長揮大中丞黃四維先生乞養被
讒近蒙昭雪志喜云近得金明報遙聞玉節回天心終
感孝讒口不成雷雪白孤峰霽春從萬里來喜深人未
識忽盡掌中杯佳句如亂水平沙外孤城落照閒平沙

含月迴遠火雜星明河流當晉曲山勢出秦平皆北游
時作其再至營寮句云經餐小犬能迎客攫食飢鳶不
避人寫景亦復真切

安正劉直齋名源淥字崑石明季諸生以力耕致富爲
鄉人置義倉儉歲煮粥以食饑人嘗曰人與我一天而
已何畛域之有焉早歲謝人世閱道書求長生久視之
術寢食俱廢其梅龕詩云春草堂居二十年天雲漠漠
月涓涓徜徉不問寒暄事獨坐黃梅學坐禪嗣得咯血
疾遂棄去讀宋儒書篤行朱子之學嘗曰學者居敬窮
理二者皆法文王而已矣小心翼翼昭事上帝居敬之

功也不識不知順帝之則窮理之功也登勞山絕頂望
海云飽看人閒七十秋滄桑幾度鬼神愁到來咫尺蓬
瀛路一片蓑衣一葉舟卒年八十二

番禺黎美周孝廉得韓孟郁先生書卻寄云驛使梅歸
臘正寒尺書長跪慰加餐交游小友慚稱孔國子先生
信是韓豐鎬地開周社稷橋門人領漢衣冠相思輒復
憑雙鯉六代陵園望氣看格調甚高不徒以黃牡丹詩
遂稱才士其別李煙客鄺湛若句云烽煙照天地形影
各山川則亂後作也

查伊璜崇禎癸酉舉人魯王徵爲兵部郎中晚年講學

鐵冶嶺下學者稱敬修先生有先甲後甲等集未刊王
子久館於其家搜得遺稿爲裝潢俾其嗣子保守並目
錄一冊藏之其海若爰書一首蓋爲魯王入海而作與
顧寧人海上行同意知其終於淪沒也詩云海若能無
賴姑容荒遜兒箕狂作客後連蹈帝秦時浪拍窮邊動
風衰水族疑長才無不可竟爾畔時宜望歎汪洋在鯨
人故不平生魂依屈子死黨結田橫犯法逋蓬鬢癡心
待鼎烹匹夫不解事溝壑欲成名虞兮久不臘天祐尙
存年孤竹原無粟蓬萊不見仙爲貪一是字錯讀六韜
篇此案安能沒由他百世傳權歌六合外痼疾一身中

潮弩終無力蜃樓久自空氣曾踰北固天不與東風未
審王磐句誰存雍齒功求藥三山去俄揮落日戈人雖
工擊楫海竟不揚波顛覆從崖島從容共汨羅黃冠如
可活其奈古人何自負潢池大不知雨露寬天南誰起
霸波底欲偏安或附睢陽譜私題武穆看十年流水事
東望祇漫漫睢陽句謂張蒼水康熙元年魯王卒于臺
二年桂王亦滅吳日千詩云魯王遺殿獨亭亭梁上苔
痕一寸青何處忽聞聲窸窣蛇銜雛雀下窗櫺三年蒼
水解散部伍居南田之懸山舉門有兩獐守之有警獐
必跳躑哀鳴趙清獻得蒼水故校使居翁洲之補陀爲

僧以伺之獲其告糴舟駕以往夜半出山背攀藤而入
遂執以歸九月初七日受刑自是海事乃定顧景范甲
辰九日感懷云蕭颯西風動客愁停尊無處漫登樓赭
衣天地驪山道白袷親朋易水秋征雁南飛無故國啼
猿北望有神州茱萸黃菊尋常事此日催人易白頭正
是年所作景范爲柔謙子方輿紀要一序深致陸沈之
痛證以此詩深情如揭

應潛齋與虞峻民張伏生蔣與恆結狷社居杭城威乙
巷甲申後棄諸生不復出自爲无悶先生傳春游詩云
乘輿理春衣行游擴情素雲物散芳暉延賞隨所赴山

拗草木長鬱鬱展生趣披覽古人碑靜言如所遇俄聞
鐘磬音已出前谿路

宣城葛士元文學貞與邢孟貞顧與治善送與治歸白
門云春風尊酒夕陽斜無計留君祇自嗟明月孤篷聽
杜宇輕風雙槳逐桃花六朝雲物遲游客一路江山看
到家爲報北山猿與鶴敬亭高閣靄煙霞

上元王漢字元倬先世東浙人中崇禎丙子鄉試嘗以
賢良徵不就世亂親老賦南陔詩以見志養親著書日
羹蔬飯糲不給所知或遺之酒粟固不受有南陔集辛
卯仲春望日服禫愴焉有作云小宛鳴鳩亦戾天每懷

遺訓涉冰淵守株未改三年道負耒聊耕百畝田老許
破愁寬酒醜狂虞衝口慎詩篇放翁絕筆猶堪憶家祭
無忘尙杳然丙申時令詩四首元日出南郭云卑樓常
藉一枝巢不用稽疑玩六爻鏡裏白惟存斷髮城邊綠
已徧荒郊年因旦改還初服星到晨稀感故交共惜衰
遲風景駛好春從此莫輕拋立春云東郊殘雪踐芳晨
屬事編年在丙申吹管土牛初應律鳴笳鐵馬尙飛塵
雲霄未必逢三素風俗猶然薦五辛自笑君平真棄世
等閒又見一回春三月云晚出宮車覲聖顏蒼梧猶望
白雲還乾坤萬里成三戶虎豹千羣失九關鶴馭已升

神未遠烏號雖墮邈難扳江南花落鵑啼候野老年年
哭蔣山閨五月初十云鬱蔥自古帝王阡寢殿巍然倍
黯然西望長陵新莽日南尋禹穴少康年山盤龍虎含
朝氣草蔓齊梁宿暮煙鑄鼎乘雲逢再閨獨抒蘋藻拜
堯天顧寧人稱其詩深婉和摯不失三百篇溫柔敦厚
之旨居金陵東郭門外丙申亭林寓金陵嘗與同詣孝
陵行香游柵洪橋越十年亭林客山東有詩云草穿新
壘綠花發舊京紅更憶王符老飄零恨不同蓋至是徵
君年七十七矣其酬王處士九日見懷之作則爲松江
王煒煒自松江來拜陵畢遂往蕪湖故有是日驚秋老

相望各一涯之句張石舟以爲卽徵君蓋未之審也
亭林賈倉部必選說易云昔年清望動公車此日耆英
有幾家古注已聞傳孟喜遺文仍許授侯芭竹牀排硯
頻添墨石室支鐺旋煮茶更說都城防寇事至今流涕
賈長沙必選字徒南上元人萬厯己酉舉人官戶部雲
南司古義自律不假人詞色筦西新倉以同官倪篤無
罪被繫七年白其冤謫九江幕遷桂林司李升南工部
虞衡司未任歸杜門著書有松蔭堂學易卒年八十七
見江寧志

亭林寄楊高士瑀云廿載江南意愁來更渺茫友朋嗟

日損雞犬覺年荒水厯書池淨山連學舍長但聞楊伯
起弦誦夜琅琅瑤字雪臣武進人少日好立奇節旣而
厚自刻厲率諸子鍵戶讀書自經史而外分授天官地
理厯律兵農之書出則與惲遜初講學南田及東林書
院如是者餘三十年有飛樓集亭林廣師稱其讀書爲
已探蹟洞微李二曲荅雪臣書亦傾倒甚至年七十餘
卒

黃晦木懷西谿云窮村晚焙茶婆賣遠隰新抽竹子齊
弟澤望秋望云柿暗荒村蒸麴候秋高寒隰榨油聲皆
與南雷詩體相若晦木有詩十二首以杖爲執友族弟

道傳爲老友寬甸石印爲信友夏天錫琬炎二視爲石
友陸文虎萬履安爲死友持以易粟之紅雲端硯宣銅
乳鑪爲亡友忠端公所遺銅鑪爲同心友酒爲畏友茶
爲損友治烏木客爲益友所作憂患學易六書會通爲
端友各爲七言律詩一首系以小序其於家國興亡之
故塵根好惡之緣言之綦爲沈痛吾獨於其末小友一
章讀之尤爲神竦其序云今之求友者不能得耄耄之
人而事之亦必尋斑白者以定交或十百千萬中有一
二可信者若夫少壯之人與弱冠童子之屬其舖肝吮
血不持寸鐵而得當上觀下獲無非陷人殺人之機穽

吾故曰老而不仁者多矣未有少而仁者也然而爲日
已久其可從游者始而閭閻相望繼也晨星落落今則
絕無而僅有矣如縣延數載童子皆少壯少壯盡斑白
矣寧復有十百千萬之一二耶吾能求之孩提之間以
爲肺腑心呂乎子曰後生可畏先虛心小友之席以待
之預贈以詩每讀此文輒撫今思昔而歎哲人之先得
我心也世亂之生皆由於人心之死後生小子其設心
愈不可問而陂復之理來者難誣吾又安能不爲之延
頸企踵哉晦木小友詩云貧賤荒蕪子若孫傳經傳道
與誰論一番乖沴推移過三代人民醞釀存種在田疇

仍不匱學成人我自同根伏生何必憂遲暮老發書倉
授及門可謂語長心重聲與淚并晦木善畫所居曰白
雲莊

黃百家依韻荅范國雯云憶我家山有洞天短垣闕處
引蘿牽書翻土牖松風至茶沸沙鑄竹火傳尺蠖泥蟠
甘久屈丈夫木強自難憐而今出處都無著笑殺梅花
照水眠百家字主一梨洲季子能讀父書擔於仕進徐
崑山以梨洲不就徵延主一入史館續修令攜歸乞梨
洲點定嘗選明文授讀亦梨洲志也

南雷嘗稱金若水淵能於忙迫世界稱閒人其寄諸弟

何云別後池塘猶有夢到來鄉井恐無家孝感張文時
無枝可棲篇云黃金卽天命赤地總危途風雨飄搖同
一悽惋

德清沈漫士謂楊武陵與父鶴俱勤王事相國以陷藩
服毒死後賊發其父冢殊顛焚骨乃見血焉楊氏兩世
可謂以身死國者矣而廷臣抗疏不公不平宜其魂魄
之歸訴思陵也楊公子山松有孤兒顛天錄被難紀略
幼在軍中有楊家小飛將之號後遁於浮屠別號忍古
頭陀其次陸辛齋魏水村見贈原韻云事干君父不單
行自命人閒孤孽名妻子已能忘漆炭友朋何事識音

聲莫猜側翅投門忌肯信飛鴻踏雪輕青眼感君來物
色賣漿屠狗亦移情我有存亡兩世書天涯搜搆廿年
餘孤桐野火愁焦尾細字青鐙辨魯魚忠武出師原利
鈍魏收穢史孰騷除東南夜氣煩公等圭臬今看南指
車試叩陽秋杞宋閒明妃誰爲惜雲鬢肯留頰上毫三
在不妒娥眉黛一彎史局自當憑月旦國門原不敵名
山向隅垂死孤兒淚今日逢君一破顏亭林楚僧元鑊
談湖南三十年來事四絕之三云督師公子竟頭陀詩
筆崢嶸浩氣多兩世心情知不遂待誰更奮魯陽戈
邢孟貞家石臼湖取石臼水爲酒沽之以自給水清酒

醕高滄酒由此名其詩清真古澹前集已采錄之律詩
如瓜洲兵亂送顧子粲歸杭州云危城同子住鼙鼓隔
陣聞早歲知幾少還家去路分鶯藏垂地柳燕逐過江
雲欲別還相訂西谿待我殷爾止自余已寄詩次韻答
之云君猶歸未得那復問余歸雖各有身事知同賦命
微舊山田不薄久客貌難肥鄉夢催帆發相隨一雁飛
聞亡女赴寄內去垂老常嗟別書傳江漢稀青鬢憐弱
息秋草忽同歸多病愁難共還家興轉微尙餘殘淚在
相對灑牛衣九日登冶城山望鍾阜作云九日傷心盡
登高極望孤菊知荒寺有雁入斷雲無一拜將軍墓重

看元武湖近來臨眺者不敢道蒼梧哭式之弟云南山
萬古宅零落爾先歸自有平生淚能禁此度揮蒿原孤
女送雪隴凍禽飛青草荒阡路傷心過欲稀宜阮亭愚
山稱賞不置也阮亭官祭酒時鄉人李松客注令高瀆
特屬訪其後人李至問之則老妻稚孫熒熒孤寡餽粥
恆苦不給松客脫贈三百金爲置腴田百畝阮亭素未
識其人具徵古道

孫量如謂雲林山水不畫人所南畫蘭不畫土兩公宜
並祀一堂過倪雲林祠句云應與所南同俎豆遺民心
事畫中傳李靜山贈戴南枝詩熱血難消白髮新滄桑

閱歷幾番塵獨書甲子依彭澤老向乾坤哭富春畫裏
無人元隱士井中有史宋遺民一竿何處堪垂釣流水
桃花護舊津

故國遺臣追詠先朝之事懷舊思古不應動涉微詞況
語及宮闈事關君后親北面事之者乎內江王範慕吉
崇禎辛未進士官巡按浙江御史蜀亂不仕流寓青陽
其崇禎宮詞云小殿風搖楊柳絲先皇朝罷獨憂時抽
豪卻寫賢臣頌面敕中涓賜主兒慈寧宮禁老莓苔元
日驚傳法駕來上下隔簾遙拜畢六龍飛輅一時回以
宏光之荒淫而錢飲光宮詞六首猶謂宮中蔬布辛勤

如一日也

遂寧李如石以故吳縣令寓居蘇間凡三十年著有蜀語吳語其春閨曲云碧玉堂前柳絮飛白狼河外信音稀征夫不及營巢燕歲歲春風一度歸

彭縣趙子明丙申秋日費滋衡甥省墓卽事云避秦先世去無聞省墓秋來尙有君故國江山新入眼幾家嫺姬舊同羣潁邊流寓思蘇轍吳下詞人壓陸雲猶有前朝碑碣在明春誰到薦春芹

番禺王鳴雷夜尋容道士云水流通礮藥風度隔窗琴
廣安王璣蕪湖宴集云鳥定猶驚月螢高欲亂星皆善

寫夜山圖者

文與也爲文肅公孫隱於竹隲工山水幼卽能詩從長者汎石湖有長橋連月涌遠水隔山分之句晚自號南雪山樵其題曹叔則照云形容莫謂吟詩瘦曾見銅仙泣露盤湯文正嘗訪之於慧慶寺詢爲政之要不報謝人兩賢之

海鹽何園客元日云老畏今朝至貧看去日長嘉興屠爾除臘日云鄰翁能借酒谿女解留魚平湖沈中琛晤允培訂明春入山之期云歲時從漢臘耕鑿詠堯年皆隱居終身有蠱上九之義

桐鄉沈機字爾仕居濮川之上自號梅花逋客甲申後
棄去子衿有梅涇草堂集鷓笑軒遺懷二首云膏肉來
青蠅膏火來鬼蝶燈殘蝶不飛盤空蠅當別請看翟公
門雀羅爲誰設作歌勿作商商聲主激烈較弈勿覆劫
一劫生死快刻深鬼所忌百巧不如拙頗有古意

嘉興巢端明崇禎丙子舉人甲申歲有哭君親師友四
詩築室於墓次堂曰永思閣曰止閣裹足不入城府癸
丑三月十九日詩有云爨桂有餘香藟沙認遺鐵引領
望西山草莽永如結康熙十九年卒年七十私謚正孝
先生海鹽陳苞竹墅輓端明詩云隔歲相逢話苦辛秀

眉綠鬢舊綸巾每攀柏樹雙垂淚偶著荷衣一見人安
坐從容知繕性高翔寥廓得閒身少微星墮慚難借翡
翠蘭苔空自春憶昔追隨游碧沼同儔今有幾人存披
帷心折編三絕漬絮神傷酒一尊子弟籃輿辭白社王
孫瓜瓞散青門不須更作山陽賦反覆遺箴已斷魂竹
墅以父慄死於兵棄諸生有平山堂集志節相同宜其
言哀入痛如此魏冰叔嘗訪端明於永思草堂信宿別
去他日致書端明述端明之言曰所云錯認時務以趨
時爲務者此人本心且不識安閒時務固不足道獨有
志俊傑而無澹泊寧靜之學雖出處得正而嗜欲名譽

擾其心則器不遠人將來措置設施必有坐受其病而不自知者此語鍼砭最切禱終身佩之端明朋友之間直諒如此竹墅反覆遺箴之句亦非泛語

周子佩芳蘭故吏部忠介公順昌長子忠介旣罹黨禍崇禎改元子佩與同難諸家後人伏闕鳴冤得褒卹故事追贈不及三代子佩引會典例凡死忠諫者贈先世如其官疏上可其奏魏忠節公大中亦蒙恩給三代誥命乙酉之變子佩避亂荅中封誥盡失呼天自責以爲宗社旣淪先人誥命不可復得矣居無何有武人縵纒雙鞬從甲騎至門請見子佩度不可謝延之入曰僕某

標將領也慕足下義甚高部下卒從某處得封誥數通
欲歸足下久矣今幸得謁因出持授子佩執禮甚恭子
佩大喜酬之以金不受而去魏允桺作寶綸篇以紀其
事允桺字交讓忠節孫孝子學泚子忠節被逮過吳門
忠介慰之舟中以女許字其孫卽交讓也甲申後隱居
不仕柳州詩社奉爲主盟夜壑流清磬春雲護石牀爲
集中雋句

徐元歎宿弁山積善寺同周虛生作云霜蔓懸瓜重風
庭聚葉圓深秋程非二偕東陽見過不值云靜院雙扉
叩不開涼陰養就一庭苔主人不帶松聲出留待高情

洗耳來贈天台石泉洞主惺然云定僧宴坐面寒泉落
葉紛飛滿膝邊半夜東風殘月上始知潭底是青天均
極幽澹

葉襄聖野十二月念四日作云洛蜀分爭日君王宵旰
時內朝私鬪急河北捷書遲此朝堂之水火也呂光輪
謁輔潛齋先生墓云末學日崩潰支流細分塗嗣法于
告子而陽附子與一花開新建攻鏃及于朱誰非含乳
兒出門空彎弧此講學家之門戶也處堂憂未審角力
日偏工意氣相爭賢奸相溷而明社屋矣余增遠詩從
來朋黨能貽禍可恨羣儒多倒行亡國敗家古今一轍

袁州張爾公自烈有黨戒錄惜未之見

青浦布衣趙緘齋天延謁陳黃門墓云報劉令伯生前
淚哀郢靈均死後心

毘陵龔策晉之明季官州同有玉隄近著俟菴詠史諸
集古詩如探龍湫云入門卽聽泉泉出中峰頂石上自
經行聲外發人省石寒泉自溫泉喧石還靜風過亦無
言吹落秋潭影近體如石屋云陰壑通何處悠然靜者
存夢回雲下榻坐久月迎門石髓疑花乳苔衣上竹痕
寒泉明似眼應共摘星捫西山月云秋風埽石牀黃葉
墮復起一片翠微煙月照如空水以幽蒨爲宗讀史漫

詠四十首作於崇禎癸未句如逃世伯鸞甘庶下倦游
司馬念壚頭身常自下嚴繚尉治不相因襲李斯都護
錦襦丁上舍冠軍紫袖霍青童唯見畫龍穿幕次不煩
題鳳到江干其甲申小除思宗挽詞燕臺懷古諸作皆
多變徵之音子士薦字復園亦工詩句如正平爾汝交
何在貢父詼諧老漸除有道清狂巾可墊無功沈湎醉
爲鄉皆佳彭城陳有量妻海氏淑而美陳以訪舊挾海
質傭糧艘轉徙毘陵海事女紅佐給焉適運卒大猾林
顯瑞者見而悅之故暱有量勿之悟猶依倚爲北還計
因別遣有量稍稍狎海海峻拒屬歐媪婉導之色愈厲

縫其裋衣偵媪出竟投繯死林懼泄袖白金令長年藍
九往賊有量藍遂詣郡白狀廉得實按置之法復園作
彭城曲紀其事凡六百餘言其芙蓉泣則爲孫鍾元先
生女孫李貞烈作也客游幕府卒於康熙甲午年七十
二無子弟子趙桐數刻其父子之詩爲二龔先生集

順德梁漸子佑遠思歸引云仗劍萬里游崎嶇高步
中懷多不平于焉思返顧獻策會無成不如守墳墓折
劍鑄爲鏡鑒予襟與索引鏡比張良狀貌同好婦番禺
屈葆士士燦喜翁山弟還自塞北云布衣思報國十載
託雙林行乞姓名隱逃禪道力深郢吟憐寡和騷賦少

知音許爾過蘿薜元亭秋草侵香山何皇圖鞏道南莊
偶成云積水化雲天路白斷虹收雨海門深皆見廣東
詩粹東莞張璩子家珍年十六從其兄家玉身歷戎行
騎黃馬衝鋒陷陣馬死璩子哭之慟葬之龍門山中旣
十年忽夜夢馳馬如昔悲鳴躑躅覺而爲詩弔之有句
云年來生髀肉夢爾淚頻揮其事甚奇

沈歸愚別裁集陶窳字苦子順德人世襲錦衣刻苦如
寒素肆力於詩不襲牙慧語詩無刊本爲其戚竊爲已
作卓子任遺民詩陶葉字苦子南海布衣性誠篤自食
其力眞素位之士廣東詩粹陶璜字苦子一字握山番

禹人有慨獨齋遺稿三人名各不同皆字苦子當是一人丹徒王拱宸詩所謂觸世姓名隨地變者不足異也詩有云入水苦匏思共濟其字苦子之意蓋取諸此

甲申五月高膠州拜相語海寧談遷孺木曰近日草搦須置中書亦徇情否孺木對曰中興方始何言徇情相國曰若然當薦足下孺木曰國家之禍書生之榮萬不敢當相國色沮孺木乃曰某歲貢亦近何藉此爲相國曰中書應舉亦不礙也自後相國屢以爲言屢辭謝相國曰足下憂貧耶裘馬之費當少助歲潤亦可得二百金毋憂匱矣至八月屬孺木草疏旣脫稿語孺木曰今

日且填足下名孺木力辭相國曰不佞雖去國必以足
下屬相厚者毋虞日後孺木曰士固有志向嘗言之矣
某在幕少効尺寸非敢有他望相國曰足下亦爲家計
乎對以貧骨一具第安之耳因泣不自勝相國默然而
退因作詩四首以見志亡何相國野死孺木亦棄諸生
北走昌平哭思陵西走陽城欲哭張太宰未至而卒時
丙午冬十一月也孺木初名以訓字觀若明亡易今名
著棗林外索棗林雜俎海昌外志棗林集國權諸書其
柳枝詞云東風旖旎到新城南國煙消幾變更欲認前
朝枝上淚長江三月載浮萍章臺綽約鬪纖腰隴上遼

陽一望遙南北春風非有異含恩含怨總難銷借題發
抒自是柳枝變調

白榆山人徐真木字士白嘉興布衣孤行獨立詩亦幽
秀戍削如飲服侯齋中云川月白盈路竹煙寒及扉秋
夜寄懷嚴四嬾民云蛩疏時續響螢溼漸微明皆有九
僧遺意有贈云細麥如絲醉暖煙刀環空約暮春前何
時化作山頭月夜夜高樓照獨眠亦時見風致梅會詩
選稱其工小楷善篆刻

金道隱絕句明月冷如水我冷復如月不聞飛雨聲蛟
龍纏古鐵語極森峭

秀水俞汝言字右吉朱竹垞稱其研精經史尤熟明代
三百年典故有明大臣年表詩古文曰漸用集句如明
月猶在懸白日已不東託興極遠

詩僧顯鵬永嘉人字彬遠號嘯翁又號鶴使隱於杭之
東郊棲禪院有詩八冊曰蘋洲集蘋洲詩略嘯翁近稿
肅翁雲外稿半篙堂近稿村居以後詩所與往還者爲
徐狷菴周敷文吳志上錢右玉徐紫凝翁超若翁尹若
施贊伯沈方舟丁茜園諸人形貌奇古與人語未嘗言
詩而其詩昭彰跌宕具體翁山古體如雜詠云太阿不
輕割大海無停流日月爲文字以我天際游金陵興善

寺歌云天上紅橋一百五中有仙人解歌舞南極無光
東海枯明星珠斗化塵土近體如獨坐云草莽衣冠舊
桑麻歲月新遣悶云亂草心偏健孤雲氣不揚尋白雲
菴云葉落不知處鐘聲都在山幽屋云入門秋滿屋傍
水竹爲山奇氣空出亦有託而逃焉者也其讀屈翁山
集云東風吹雨滿柴關日暮空林獨往還李白已亡工
部死眼前留得一翁山可以見其師資之所在矣

平湖諸生趙泖天來性狷介不苟言笑於詩刻意宗唐
韓石畊屈翁山咸推重之有資真集度嶺言古詩如聽
王孫談孫駙馬舞劍歌羊城行皆有關繫之作王山人

詩云爾父昂藏俠丈夫散金結土竟捐軀世情誰顧朱
家客天意終全趙氏孤去國采薇深涕淚壯年彈鋏臥
江湖由來潦倒多奇士劇孟何曾是酒徒子夜元宵歌
云儂是三五年月亦三五夕三五月長圓三五年難得
贛江歌云候風候水始行舟大湖小湖愁莫愁黃石灘
頭無數石白頭嶺下白人頭皆能自出機杼

平湖陸埜我謀與趙佃陸棻沈皞日陸世栻陸來章沈
隆峴有當湖七子之目著曠菴集其七哀詩序云抱病
閉門幾絕人世追思曩日交游道兼師友者半已凋謝
德音猶在而墓木已拱不禁涕之欲墜也友道日非好

學積行之士不可復見以此思哀哀可知矣作七哀詩
七人爲錢南邨士馨吳仲子蕃昌沈孝廉日焜孫西陵
之琮蔣文學琢馮涌齊秉恭黃麗農子錫

常熟陳芳績字亮功處士鼎和之子著有歷代地理沿革表四十七卷道光癸巳其鄉人張兵備大鏞爲刊行之順治初元顧亭林避難語濂涇時與鼎和比鄰亭林詩十載江邨二子偕相逢每詠步兵懷謂亮功暨歸生晟也亮功兩尊人先後卽世適皆以三月十九日有追痛詩詞旨哀惻亭林依韻和之云一生愁恨集今晨尙有微軀繫五倫淚盡宛詩言我日悲深魯史筆王春山

頭馬鬣封孤子天上龍髯從二親留此一絲忠孝在三
綱終古不曾淪帝后登遐一忌辰天仇國恥世無倫那
知考妣還同日從此河山遂不春宏演納肝猶報主王
哀泣血敢忘親人寰尙有遺民在大節難隨九鼎淪

陳喬生給諫清遠峽云軒轅二帝子弄笛向禹陽江岸
扁舟客聞鐘到上方仙靈今闕寂雲水空青蒼欲遣愁
心去歸猿聲正長吳縣楊焯俊三秣陵雜詠云城南臨
眺處傳是雨花臺野曠城陰合山空積翠開吳雪連海
動朔雁暗江來坐覺煙霄外風聲戰角哀橫塘堪戲馬
馳道指牽牛結客過三市鳴鐘動五侯花翻桃葉渡人

醉木蘭舟莫更看秋色風煙發旅愁愁心吳苑客短鬢
帝城邊二水孤帆外三山落日前翠屏江障夕碧樹海
門煙歲月天涯晚音書易隔年正學祠邊路沈吟木末
亭雨飛垂薜荔臺古落丹青夜火歸游騎寒城沒曉星
蒼蒼空霧裏應見哭青冥哀怨之音比於霜空鶴唳
亭林謂陶徵士韋蘇州非直狷介實有志天下者陶詩
惜哉劍術疏奇功遂不成韋詩秋郊細柳道走馬一夕
還何等感慨何等豪宕至於逢楊開府一詩則少年之
才氣與中年之砥礪大略可見矣大凡伉爽高邁之人
易與入道夫子言狂者進取正謂此爾吾謂亭林身負

沈痛不忘恢復知時之不可爲負經世之略不得一遂
其擬唐人五言八韻六首卽先生言志之作申包胥乞
師云辰尾垂天謫亡人碁寇兵舟師通大別獵火照方
城九縣長蛇據三關鑿齒橫君王親草莽微命託宗祊
彳亍終南近閒關繞雷平張旛非聘客躡屨一書生雀
立庭柯暝猿啼夜柝驚秦車今已出誓死必存荆高漸
離擊筑云神州移水德故鼎去山東斷霓夫人劍殘煙
郭隗宮身留烈士後跡混市兒中改服心彌苦知音耳
自通沈淪餘技藝忼慨本英雄壯節悲遲晚羈魂迫固
窮一吟遼海怨再奏薊上風不復荆卿和哀哉六國空

班定遠投筆云少小平陵縣蕭然一布衣讀書傳父業
握管上皇畿太乙藜初降蘭臺露未晞生涯憑筆札甘
旨爲慈闈忽見天弧動聊將電鋏揮于闐迎轡勒疏勒
候旌旗凍磧軍營轉秋山奏捷飛封侯來萬里老見錦
衣歸諸葛丞相渡瀘云火山橫日幕銅澗互天徼亂樹
雲南國交繩夔外橋枕戈穿偃仄帶甲上岵巖地汁生
淫霧流煙入斗杓七禽依算略一戰定蠻苗信洽炎荒
永恩宣益部遙深思危大業隆眷切先朝更有親賢表
宮廷告百寮祖豫州聞雞云萬國秋聲靜三河夜色寒
星臨沙樹白月下戍樓殘擊柝行初轉提戈夢未安沈

幾通霧表高響入雲端豈是占時運要須振羽翰風塵
懷撫劍天地一征鞍失旦何年補先鳴意獨難函關猶
未出千里路漫漫陶彭澤歸里云結駟非吾願躬耕力
尙堪咄嗟聊綰綬去矣便投簪望積廬山雪行深渡口
嵐芟松初作徑蔭柳乍成菴甕盎連朝濁壺觴永日酣
秋籬尋菊蕊春箔理桑蠶舊德陳先祖遺書付五男因
多文義友相與下村南始以沈鬱悲慨終以放達閒適
亦猶柴桑之志也

亭林五律直接少陵其得於詩之本者同也督亢云此
地猶天府當年竟入秦燕丹不可作千載自淒神野燒

村中夕枯桑隴上春一歸屯占後墟里少遺民昌黎云
彈丸餘小邑固守作東藩列郡誰能比雄關賴此存霜
槎春砦出風葉夜旗翻欲問嬰城事聲吞不敢言龍門
云立地黃河出開天此一門千秋憑大禹萬里下崑崙
入廟焄蒿接臨流想像存無人書壁問倚馬日將昏自
大同至西口四首云舊府荒城內頽垣只四門先朝曾
駐蹕當日是雄藩綵帛連樓滿笙歌接巷繁一逢三月
火惟弔國殤魂落日林胡夜南風盛樂春地當天北極
山是國西鄰冠帶中原隔金縉異域親武靈遺策在猶
可制秦人駿骨來蕃種名茶出富陽年年天馬至歲歲

酪奴忙蹴地秋雲白臨墟早耐香和戎真利國烽火罷
邊防舊說豐州好於今號板升印鹽和菜滑掬乳入茶
凝塞北思脣齒河東問股肱獨餘京洛叟終日戍樓憑
應州云灑南宮闕盡一塔挂青天法象三千界華戎五
百年空旛搖夜月孤磬落秋煙頓覺諸緣滅臨風獨灑
然尙憶沙陀事明宗此郡生艱難當亂世太息軫遺氓
鳳綵留荒井龍文照古城焚香祝天願果得見昇平介
秋云淡霓生巖際奔泉下石閒龍蛇方起陸雀鼠尙爭
山雨靜前村事秋凋故國顏介君祠廟在風義復難攀
亭林世籍江南而老於西北諸詩皆大河以北所作每

言馬伏汲田疇皆從塞上立業欲居代北嘗曰使吾澤
中有牛羊千則江南不足懷也其阜帽一首云阜帽冬
常著青山老自看烏搖池樹靜雲近嶽天寒澹食隨人
給藜牀任地安閒來過道院不爲訪金丹以康熙辛酉
卒於華陰徘徊渭川以畢餘年驗矣

杜于皇正月十七日生黃岡鄉人每於是日祀之陶鳧
薈詩所謂羸得鄉鄰留社約梅花開日薦清泉也少個
儻角藝南雍與余澹心白仲調有魚肚白之目旣不得
有所試遂一意於詩嵇康人中龍義不可當世視彼盜
國臣伎倆如兒戲吐辭薄湯武千載有生氣臨命索琴

彈聊示不屑意骨力堅卓獨有千古龔芝麓稱其詠蘇
子瞻二十字似尙不逮此作眞州雨泊因傷亡友金沙
于子秬云江路逢秋雨客衣增暮寒眞州山不斷瓜步
酒猶殘歸雁寧辭溼蘆花覺自乾故人今宿草白首憶
交歡冬夜宣城梅杓司過訪留宿寓齋云北風今夜急
吹月已成霜愛月嫌風色開尊閉草堂故人宛陵秀襍
被況相將經歲纔同夢寧知更漏長崎嶇喪亂久客金
陵其秋日登周處臺云半生老作金陵客訪古今登周
處臺疏樹萬家秋更落夕陽千里暗還開虛傳戰伐能
揮劍如此江山更舉杯寂寞草堂遙在眼蒼茫指點朔

風來嘗有句云馮將骨與青山誓老號詩人杜水東往
來維揚則主蔣前民其前民草堂云闊別無端至五霜
知君新有授經堂數莖白髮環童稚一朵黃葵向夕陽
書檢禁餘留漢史人嫌衣敝免時妝興來欲話隋家事
只學漁樵聚蜀岡康熙初幾以文字得罪顧黃公寄余
澹心詩有往來可有茶村在之句方靈皋謂其峻廉隅
孤特自遂遇名貴人必以氣折之於眾人未嘗接語言
用是叢忌嫉然名在天下詩每出遠近爭傳誦之靈皋
復爲其弟蒼略作碑志其詩如和牧翁贈舊校書二首
云朱樓十里起雙扉物換星移似鶴歸怪底新人多婉

嬾老來能著水田衣北里閒提舊話長句闌處處說焚
香於今瓦礫風榛地祇斷橫刀蕩子腸亦復無慚家督
林茂之有青山欲渡大江來及青山將霽出雲遲之句
某人句云浪裏青山勢欲飛皆極生動

儀徵布衣魏衛廓功山居句云草長山無徑林深鳥自
家古田舍三汲水同一井山花隔柴荆生兒共嬉戲至
老呼其名極尋常語乃極岸異

翁山詠菜云菘芥初生摘未稀窺園不及下書幃能知
歲月惟青草解讀春秋有白衣子母三冬瓜蒂苦君臣
一代蕨花肥桔槔亦是忘機者引得流泉下翠微雙關

寓意非尋常詠物詩也第四句卽從來天下士只在布衣中之意

山陰徐緘伯調魁梧自負施尙白比之徐青藤其詩如水精簾外梧桐月幾度黃昏便白頭逢君滿酌玻璃瓊北榦松聲似往時俱見匠心非放手頽唐自矜神會者也

曾青藜淮陰釣臺云漢高櫟釜羹劉毅子鵝炙古人恩與讐遂乃在飲食至今漂母祠朱蕘耀霜日崑山徐季重開任詠史云丈夫何所貴所貴在堅忍一爲俗情牽聲名從此隕馬融辭鄧氏始志亦寧靜遇困不自持終

以豪侈逞盧植侍其旁目中已灰冷卒抗董卓威節與
天壤炳視彼草奏人未可同車並聲色能移情何況兵
在頸其言可以厲世磨鈍不嫌其以文爲詩

汪魏美陳際叔柴虎臣沈甸華孫宇台皆以盛年高蹈
毛會侯爲作西冷五君子傳虎臣妾薄命云西家處女
玉顏三五二八之間遺世獨立盤桓複襦輕裾羅紈繡
帶微風自還見者彷彿神靈擇嫁無媒爾馨塗修之鳳
青青喏彼賢雄窈冥春華夕月秋螢深閨撫枕涕零迨
其謂之齟齬要以匹雙致殊云是大夫秋胡又云馮氏
子都卻還明月徑珠賤妾猥辱泥塗已矣無復沈吟豈

不懷歸好音竽笙簫管瑟琴倡予和汝同心望望山高
水深薄命差池至今此明志之作也其哭覺上人句云
江南花草渾閒夢不道文通是恨人上人卽江道閭號
夢破

彭仲謀螺川聞黃文侯共談家難感憤書懷云干戈滿
地接山城所在流亡苦甲兵游子那堪天北望孤舟應
共雁南征俱傳欒布收彭越相對黃公哭阮生惆悵莫
須論往事嶺猿應過第三聲仲謀尊人觀民太僕殉節
江西仲謀聞變不避兵革往求其屍僧人指以墮垣之
下發之不識也刺臂血驗之得實遂奉歸葬其後十餘

年又有義士曾堯昶送太僕骨歸海鹽厯言太僕殉節事甚悉舉家驚異以滴血法驗之良是始知前所葬者蓋未眞也陳乾初聞曾義士送太僕之骨歸特作彭觀民先生歸骨記樂布句卽指此事而言

和州戴重敬夫明季貢生廷對第一授湖州府推官亂後歸里和含山張不二秉純絕命詞同不食而卒鄉人私謚文節先生子無忝移孝荅人述先君舊事云莫道吳興事酸風刺骨寒相知皆死別無處問平安故鬼千家哭孤城百戰難當時衣上血今日與誰看陳迦陵序無忝詩云吟成越弄依稀莊舄之哀曲奏楚音彷彿鍾

儀之調與兄鷹阿山樵俱老於布衣其訓子云已入愚
公谷甘爲鄭子眞兒孫猶漢臘晉魏有秦人讀易無如
損遺安一味貧更嫌名累汝筆硯不須親牧牛云吾道
已滄洲黃冠學放牛有書時挂角作畫笑籠頭短布逢
長夜逃名得上流一聲何處笛吹盡古今愁惜誓云萬
古刀鏤赤手磨休將劍術責荆軻一明爭死無完卵三
戶傷生作楚歌不信青蠅還賜弔堪悲黃雀自投羅行
看滄海揚塵後纔見西山木石多

寶應陶徵季深挈妻子避亂吳趨詠歌自適顧黃公稱
爲二百年來山林無此作者其傳聞一首云故人消息

是還非每夜占星指少微何事蘄州江上信十年前直
到今稀卽爲黃公作也登恆山四首云恆陽地與塞垣
通山勢紆迴接大同黑霧不消陰礪雪翠微時下石壇
風燔柴有制思虞典持節無人出漢宮幽渺嶽雲何所
寄巋然碑版綴苔紅異草靈源不可尋舊時松柏正蕭
森雲屯鳥道晴俱溼雨過龍湫碧自沈極望豈同王粲
意竭來眞慰向平心遙思太華三峰矗尙隔關門莫苦
吟不盡浮雲起北隅離離城郭望中孤荒原白草還今
古戰骨青燐半有無委伏萬山連抱犢嶺嶢岼一道隱飛
狐憑高莫問探符事昔日諷秦亦已殂磨笄山下夕陽

開一片寒流直北來蕪沒不聞青草墓蒼茫何處白登
臺春歸楊柳懷千里酒泛蒲萄醉滿杯沙磧有人連突
騎紛紛知是射生回自來北嶽詩較少四詩可稱傑作
季深絕句如樵風涇云若耶谿邊秋思多南風北風吹
素波行人往來不知處日暮深山聞權歌惜紅云樓心
明月到方塘醉倚深叢爛漫香我欲自持銀燭照只愁
清露溼衣裳聞笙云促柱參差十四行誰家清怨叶清
商不復更起烘銀甲才聽三聲已斷腸勞勞云勞勞南
北歲杵因自笑華顛旅食人無限閒愁似春草一番除
卻一番新意致高閒無寒瘦枯槁之態其三月十九日

雨中云暮雨空山生草萊杜鵑啼血數聲哀長安不記
逢寒食侍宴干官盡醉回與鄧孝威一似東風能解意
韋祠不放海棠花之句用意同一悽惋

程穆倩當明崇禎時已爲黃石齋諸公所重取友甚嚴
馬阮爲東林所擯斥數招致穆倩始終落落莫與合王
文簡治春詩云白嶽黃山兩逸民謂穆倩與孫默無言
也風雨出郭云焦飯空懷哺奇温竟御縣除夕書壁云
帝王輕過眼宇宙是何鄉倪閻公以爲胸懷結曲不減
少陵

宣城唐髻孫念祖詩如茆屋村煙留老樹大江帆影入

殘曛長夜鐙昏殘雨後疏林夢醒落花前似大庾十子
丹徒談伯棟明經兆隆江南曲盤餐新麥翦芹芽玉梳
香浮顧渚茶莫向江頭望江北最愁人處是楊花

趙雪江題畫詩漠漠江天雪霽時曙光雲影半參差柴
門初起寒鴉噪已有漁人理釣絲懸崖琪樹靜垂陰流
水何人解聽琴獨坐石枰觀始作晚風吹雨過前村布
袍攜杖訪山家宛轉層岡不厭賒相見主人渾一笑豆
花棚下飯胡麻雪江名澄一字湛之博學能詩工山水
潑墨細謹兩擅其長從王孟津游孟津云雪江布衣老
畫師也晚年得漢銅章曰趙徵凡得意之作皆用此章

讀書錄記宋荔裳之言曰往歲丁丑雪江訪先大夫於山園時方秋也夜坐谿上命童子撲螢火數十納紗巾中遙望之火齊明珠飛光燭路雪江行歌自若余澹心題其飛雪圖云趙翁老矣好穿紅衣攜杖行雪中此幅殆自寫照也其風格高邁類如此

董雨若首陽詠云草笠古鬚眉首陽一樵子擔柴入都城閒話青峰裏云有兩男兒飢死西山陞白髮齊太公淚滴青蘋水還顧召公言采薇人已矣余謂當日之爲太公者雖出處異趣或尙有念舊之思若在今日則盜憎主人方謂二子爲好名而胡不遄死也錢辛楣所爲

兩若傳稱其詩清淡荒遠有云孟郊不在唐聲在吳山
雨又云沈珪對膠法象先湔絹理俟其物性窮始得浮
氣死蓋自評其詩云爾所著書甚眾辛楣得其手稿數
百葉皆志乘所未及舉者稍次第之合題曰補樵書補
樵南潛漏霜皆雨若自號

顧亭林贈郝將軍太極云曾提一旅制黔中水蘭諸囚
指顧空入楚廉頗猶未老過秦扁鵲果能工風高劍氣
蛉川外水沸茶聲鶴湖東橋畔相從不相識漫將方技
試英雄自注太極滇人天啟中守霑益余於敘功疏識
其姓名今爲醫客於吳之上津橋言及舊事感而有贈

彭仲謀弔黃谷詩序云滇人黃谷棄千戶侯印以丹青
自誤侍御朱公按滇攜之來海上二十年矣游經世亂
棄家不歸知交所贈隨手付酒家子貧病依其門下士
張遠以老無疾死張經營其喪人咸義之余作詩弔黃
兼以美張張甬東人詩曰一代黃公去無人識故侯錢
刀浮白盡山水點蒼留久臥嗟蟲臂前身是虎頭獨憐
門下士負鏡葬南州

厲太鴻題鶴澗畫松云萊陽姜仲子矯矯清節後獨持
滄海身畫松只畫瘦矮紙氣屈蟠疏影漏巖竇勿矜干
霄意乃爲般爾宥題字不滿百筆勢如篆籀對之神魂

驚慘澹見寒秀裝堂沒骨花遠笑筌熙陋仲子名實節
學在其字以工詩善書畫聞於吳中所居藝圃蓋文文
肅公故居所謂清瑤嶼者也其先爲袁憲副醉穎堂於
此建眞率會學在購其畫冊存焉學在詩如天山白草
路橫分日暮悲笳不忍聞想得玉關方轉戰阜雕風起
欲盤雲音節頗壯晚年建二姜祠於虎工又築諫草樓
於祠後人稱鶴澗先生兄安節以貞毅遺命葬戍所家
宣州貞文子曰寓節字奉世亦居吳

蔡忠襄殉闖賊之難藁葬晉陽城外順治戊子子方炳
始偕弟方斡往負柩歸方炳字九霞號息關世其家學

兼工篆草繪有著書圖朱竹垞題詩有云中年巾柴車
起應鶴書召人多留囂塵君乃返蓬藿立意在千秋肯
貽北隴誚母顧太夫人年八十時于清端節制兩江聘
九霞纂修通志因賦詩四章以贈之距忠襄甲申殉節
已四十年矣兄方嬉涵之亦絕意人事隱居以老

秀水鍾恕雯上舍于宮二京詩云山河開日月元氣發
金陵一統屏藩列中天弼輔興鉞虔南國靖旗整朔方
膺拜手歸皇極生成德實宏兩階干乍舞中谷葛垂成
不悟井田法原同封建行破巢全骨肉折足任公卿尙
有西山豕春來蒲柳情北狩旋歸蹕南城誓奪門聖明

方復巨羣小屢孤恩葉落同時事棋殘後日言西泠煙
雨暮猶自泣忠魂采仗班初換金門淚未乾杯占延壽
氣七合駐顏丹畫戟張行幄青藤起醮壇乍驚盤劍下
河套賸狂瀾除惡不能斷還緣冀北空可憐朝黨異竟
與賊謀同麥秀離宮碧鶯殘上苑紅天王貞世守慟絕
鼎湖弓江左存終始倉忙祚幾旬水寒空失檝風動各
思葦効死臙脂并希生玉樹春不須千日醉從欲得蒙
塵於有明一代興亡之故得其大要

樵李詩繫五律如魏允枚寄六弟云作客頻年慣今偏
憶故鄉老親能恤緯稚子醉扶牀夢入清宵短雲看白

畫長愁心逐江水日夜下潯陽蔣玉章南國雜感與余
澹心林衡者同賦云故國芳園在垂楊落日邊不知金
谷變還聚竹林賢向秀聞孤管嵇康廢五絃傷心歌舞
散花鳥若爲憐七律如吳祖錫信陵君墓云六國安危
只繫君握符兩度却秦軍一丸幾徹函關土五色徐飛
芒碭雲未見特牛陳大姐暫將醕酒酌高墳可憐異代
存手僻徒倚夷門到夕曛沈嗣選感時云長安車馬競
通津西市衣冠血尙新白首同歸成底事青山獨往竟
何人華亭夜月堪聞鶴水國秋風好憶萼竊歎當年朱
長史可能重負會稽薪雜感二一首云當年曾結竹林盟

邑里爭傳月旦評，意氣直教周士貴。文章能使古人生，
一從歲有龍蛇厄。幾度春聞鶡鴒聲，此日相思弔嵇阮。
酒壚鄰笛不勝情，少年聲氣接羣英。湖海飄零異死生，
偶簞姓名堪墮淚。傳來事跡總關情，春風玉樹先賢塚。
秋露金莖故國城，垂老瑟居無客至。滿庭衰草候蟲鳴，
蔣玉章午日拜陳軼符夫子墓云。富林白草暗蒙茸，孤
客傷心望九峰。五日龍舟荆俗事，千秋馬鬣漢臣封。詠
文未擬工潘岳，碑頌何須假蔡邕。卻憶會稽同難者，夜
臺吟眺獨相從。于琳輓陸青侍御云。慷慨徵兵獬豸冠，
沙中一擊志恢韓。歸闈自效秦庭哭，入越還登漢將壇。

往日旌旗搖水上今年花草恨江干最憐君死原非戰
浪拍高天不忍看絕句如周宏藻玉樹後庭花云玉樹
新聲斷深宮青草生可憐揚子月猶照石頭城沈煌寄
贈止岳弟粵東云笏竹城邊試錦衣爛柯山下草初肥
春風幾夜吹鄉夢逕傍天南一雁飛摘句如馮允恭苦
熱云消磨茶焙春前雪潦倒魚餐雨後醫吳麝士初度
日酬友云從游每負常因病知己難留始覺貧相質披
文有徐鮑貝程之遺風南疑博學工詩故能擢英攜逸
較後來續集爲勝

吾彘集舉錢遵王莫取琉璃籠眼界舉頭爭忍見山河

爲壓卷他若黃子羽江明無月夜猿喚不眠人鄧孝威
金甲御溝芳草路銅駝故里落花聲廬山光熊獵火亂
燒無蒂草林霜不殺有心松身經刀過頭方貴尸不泥
封骨始香舊京孤臣一是何事春陵猶未見最憐靈武
竟無望皆怨慕悽惋之音王文簡敘篋衍集以是集與
施愚山藏山集葉訥菴獨賞集並稱而惜其未之見也
近人劍川趙藩鈔自周季貺齋頭唐西川刻入怡蘭堂
叢書

錢牧齋先與韓敬爭狀元韓尋罷官後與溫體仁爭枚
卜溫許其典試事錢亦罷官韓溫皆吳興人也牧齋在

東林中有浪子之目林居久之頗負時望甲申史忠正
等議立君江寧東林諸人陰推戴潞王牧齋與其謀乙
酉五月豫親王定江南首倡迎降者錢與忻城伯趙之
龍也時潞王在武林牧齋復遺書誘之降焉華亭王澐
僧士虞山行云虞仲山上柳垂絲虞仲山下唱柳枝行
人折柳相視笑借問道旁唱者誰爲言山中舊宗伯吳
越瓊林名藉藉藝苑敦盤狎主盟江左風流光奪席漢
家下詔徵賢良公孫鼂董羣翱翔春殿傳臚榜花發吳
興占得狀元郎吳興早恨江潭放虞山獨立鳳池上禁
苑驚看蛺蝶飛清流笑逐桃花浪鳴珂委佩登玉京一

點青蠅白壁輕東國人倫疑月旦西州豪傑漫齊名世
路險巖羊腸狹宦海風濤起茗雪世儀滿腹空精神太
眞行酒多鱗甲明王有夢行旁求好將名姓覆金甌雷
霆一震白麻壞胥靡仍向巖閒游巖閒高臥休惆悵且
在山中作宰相絲竹亭臺別樣新虞山頓負東山望閒
來畫舫五湖濱煙月風花是主人長把清尊傾北海自
開東閣傲平津門前忽有停車客羣玉山前未曾識安
仁擲果何處來叔寶神清欣入室室中幻出天女花粲
然一笑摩登伽天花不落柳花落飛來飛去到君家君
家紅樓矗天起畫棟珠簾高莫比安妃攜得絳雲歸紫

薇喜唱齊牢禮樓上眉嫵雲欲浮樓下新歌雲不流夜
珠遠自鮫宮至鴻寶先從蛤枕收朝朝暮暮歡未了温
柔鄉裏真堪老仙舟惟見望塵多龍門共幸登堂早夢
斷春明十七年靈光此日尙歸然吳興狀元歸宿草吳
興宰相隨寒煙軒轅臺崩天柱折金陵王氣半明滅未
及江干奉代來已見秩宗躋九列舜華有女賦同車正
是河東舊校書桃葉渡頭來迎汝莫愁湖上欲愁予烏
啼啞啞白門柳博山香暖長攜手蜃市樓臺曾幾時青
谿小姑復何有一朝鐵騎橫江來熒惑入斗天門開羣
公蒲伏迎狼燾元臣拜舞下鸞臺推冠戴笠薰風裏耳

後生風色先喜牛渚方蒙青蓋塵更向龍潭釣龍子名
王前席拂朱纓左拍宗伯右忻城平吳利得逢雙僞報
漢何曾有少卿靡靡北道歲云暮朔風吹出蚩尤霧趨
朝且脫司空履洛中那得司空坐回首先朝一夢中黃
扉久閉沙隄空終朝褫帶嗟何及掛冠歸去及秋風風
景不殊紅顏在重吟白頭雙鬢改南國當年國已傾佳
人今日人難再再到山中間草堂猿悲鶴怨生淒涼麻
姑有爪堪爬背碧海無塵誰種桑虞山復舉東山燕巢
由稷契重相見拂水巖前洗耳塵芙蓉莊上分嬌面晚
年攜杖照青藜梵夾詩籤次第齊校讐偏紀詞臣字形

管纖纖手自題路旁女子歛相遇云往東海糜家去雨
師風伯動地來絳雲飄緲歸何處吁嗟盛名古難成子
魚佐命褚淵生前莫飲烏程酒死來休見石頭城死
生恩怨同蕉鹿空向興亡恨失足詩卷終當覆酒甌山
上何用嗟華屋可憐薄命度殘春終隨飛絮委芳塵山
上雖無望夫石谷中還有墜樓人泉路悠悠朝露重宗
伯前行少婦送他日應題燕子樓從今醒卻巫山夢君
不見東皋草堂千載悲嶺頭碧血啼子規年年柳枝怨
離別惟有虞山似舊時東皋草堂瞿忠宣別業忠宣牧
齋門人也朱厚章觀柳河東初訪半野堂小像云薜蘿

脈脈柳疏疏想見文君放誕初誰識秋風搖落後獨將
一死報尙書收齋媿柳是多矣

王僧士爲陳忠裕弟子忠裕殉節僧士潛收其屍葬之
所著輞川集多紀事之作其瀨上篇爲溧陽陳百史作
也詩云昔日伍大夫乞食過楚關道逢瀨上女一飯沈
朱顏水犀三千覆楚還大讐已報恩如山鴟夷投江江
濤怒至今瀨水悲潺湲我來渡水增歎息路旁淒涼故
相宅當年漢帝徵賢良金門前獻天人策奉詔常校東
觀書殊恩兼攝黃門籍至尊揮淚御平臺論兵夜半猶
前席一朝國事誤黃巾鼎湖龍去哭風塵勸進不煩新

佐命啟事仍看舊侍臣待當少卿思報漢敗來賊賊竟
奔秦銅駝陌上風雲別朱雀桁前氣象新此日南朝初
擁立此日新亭堪飲泣歸國誰憐庾信哀鉤黨方求張
儉急亡命交游孫趙稀望門兄弟褒融執丈夫一身將
安之搖搖萬里嗟何及吳山楚水何繇連狐號鬼嘯黃
河邊江左未傳建武號北地新編居攝年鬚如蝟毛鬢
半禿故人握手情依然使相歸來臨魏博侍臣重去到
幽燕案順治二年七月百史抵大名投誠以保定巡撫王文本疏薦復原官燕京風景今
朝變親王自御光明殿有旨傳呼上殿來滿朝爭識南
人面紫貂手解稱身裁杏酪親調催賜宴昨歲閒關去

國人今日迴翔少陽院三臺旬日貳孤卿王師已報江
南平聞道妻孥尙無恙不堪回首痛分羹上書請急辭
淒惻詔給鋒車許獨行先朝黨籍銷金匱故國烽煙暗
石城石頭城下江流急瀨水無人更嗚咽華表重驚遼
鶴飛墨纒盡點孤兒血已嗟松柏付平陵無奈江湖懸
魏闕當門誰令種芳蘭留賓空自談風月攝皇七載握
太阿入則造膝出鳴珂諺擬新豐樂事少晚出宮車遺
恨多廟中尙議追崇禮地下先操同室戈外廷那識漢
宮事南人塌翼北人歌官家冲齡矜睿智温室綢繆恩
不異入筦綸扉侍御書出掌文昌掄大吏侯王把臂盡

交歡豐沛羣雄皆執轡龍門競望李膺塵牛衣獨灑王
章淚君家兒郎亦太奇少年任誕靡不爲論交濁世佳
公子走馬長安輕薄兒程李一錢曾不值屈宋衙官更
有誰門生爭頌山公度狎客旋吟韋氏詩自謂千秋垂
帶礪那知轉盼多崇替姬旦勲勞野草荒盧縮親臣請
室繫數卷圖書一軸車宰相承恩歸賜第朝內猶頒令
尹祿門前已失翟公勢官家聖度如天崇嘗稱裴令本
清通有詔統均還會府有日傳宣入禁中市交悔結蕭
朱綬蜚語還飄蘇暴風勢成騎虎終難下時無狡免莫
論功可憐都市橫屍日十載君恩一旦失

案百史以十一年會勘論

斬世祖以其久任近密改處綾子掖臣逮治杖戍田宅曾無半頃餘縣官符下

誅求密既遣狂兒戍樂浪復見寡妻輸織室讐家噉嗜
尙未消故舊咨嗟自此畢土牆三尺晝掩扉風吹簌簌
雨霏霏殘卷半鈐故相印易粟聊充并日飢誰其叩門
鄰家子昨日新從遼左歸寄得兒郎書半紙阿母開緘
淚滿衣門前八駟呵殿者揚鞭不下青驄馬昔日公卿
皆掃門今日賓客成飄瓦高堂有夢到元菟旅殯無魂
歸白下自是蠅營怨毒多非關烏喙君恩寡古來恩怨
幾時平覆楚復楚皆成名晁公死後亡袁盎田相生前
見竇嬰君不見天壽山前飛鬼火蔣陵枯樹起秋聲世

人漫說投金瀨滄海茫茫塵亦生當始得罪時解宏文
院任給俸如故所謂朝內猶頒令尹祿也吳駿公絕句
云投金瀨畔敢安居覆楚奔吳數上書手把屬鏤思往
事九原歸去遇包胥亦感溧陽之事而作百史初自史
館立擢少宰寵遇爲天下第一順治五年正位冢宰八
年授大學士既職論思復兼銓政緣事伏辜無敢斂者
山陽張吏部新標時爲中書舍人慨然曰溧陽死於法
固未嘗禁斂葬乃集同志釀金命老僕張臚製棺衾具
斂云顧黃公詩盤劍養牛同日賜殘甃做笈暮年悲蓋
弱冠有論文之雅也吳漢槎贈陳心簡詩王章有子稱

遷客李燮無家託酒傭心簡百史子不知卽披臣否

五公山人詩如倚馬心猶壯屠龍技已貧後世人難問
先憂計總疏寧子不離牛口下石生何事馬蹏閒平生
飛動之意時復流露其逢人只合長緘口避客終當諱
讀書則閱歷語也

余潛心吳門雜感詩搔首紅闌七十橋鬪雞陂下草蕭
蕭無端醉擊雷門鼓潛向花陰哭海潮興到語亦自有
意

梁公狄與彭然石札云要當向龐公牀下孺子橋頭尋
取經世本領世閒粉本英雄區區虎膚蛙質不足學也

語極到地然石名歎孝感人其哭公狄詩云五噫誰念
出關窮廿載吳門託伯通牀下龍鸞煩勸勉世閒粉本
亦英雄憂時淚涌心如石罵坐髯張氣似虹家世霸陵
空漢史要離豕畔起悲風

彭然石贈王而農詩大雅誰陳擅代興衡湘風動一挑
鐙袁徐去後風流絕愛聽而農罵竟陵而農學派吾從
未究心其詩如墟煙小困雙灣樹砌葉全低一徑莎卷
幕棋終歸燕緩敲尊歌闕薦魚肥不失雅音

鄒大孝直爲孤山慵隱仲錫之長子居西谿泊菴嘗同
陳康侯晉明被劫質在盜中僞與康侯爲兄弟稱請先

辨贖卒就兵閒營救得歸康侯未能償金賦詩言謝云
豺虎巢中那長策脊令原上賴深謀無錢欲乞朱家買
讓死非關趙禮留竟自黃金酬部將遂令黑索免纍囚
執勤但可身居作廡下從君學飯牛康侯與兄貞倩允
倩誅茅偕隱選有八代詩鈔初盛唐詩其論詩謂王李
但揭高華鍾譚專搜冷僻兩者均失亦持平之論也

桐城周岐需菴司李開封嘗參孫白谷軍事國變歸里
以所居舍旁餘址築土室嘯詠其中吾鄉蔡魁吾尙書
巡撫江州嘗應聘西征其嫠女吟荅陳百史云蟾魄旣
西蝕烏羽亦東藏烈烈驚風吹壁冷鐙無光中有獨居

女唧唧聞悲傷問女何所悲不字稱未亡豈悲衾與裯
竊恐人無良有客何方來將書委筐箱偏諸緣繡黜明
珠綴琳琅開緘讀書意姊妹舊稱行上慰顏色好下言
夫婿當疊書置筐中卻拜歸空房孤鸞戀枯澤彼鳳自
有凰感君纏絲意還君明月璫寄謝諸姊妹勉事新姑
嫜志節皜然可見也新安金生始鸞身以養老母繼割
股以愈主人司李爲賦義僕行比諸李善存孤杜亮愛
才謂可媿巍然當世之衣冠意在以敦薄俗

上元趙客菴起元居鐘鼓樓前聚徒講學兼通陰陽握
奇之術悉天下形勢詩如寄懷常惕若云矯矯塵壒外

獨立閱萬化山靈蓄風雨黑夜供歎咤寄懷門人應智
回云爲憶達心人不受功名降遯身覽化元智勇莫可
雙均極奇詭同里胡徵靜夫以九峰白沙自期許錄有
舊京風雅六卷詩如離騷有命同嚴忌損卦何必感向
平家存大被人俱老門有高軒業更貧亦復獨存風旨
其過亡友丁菡生潭居云未輟彌年痛林園已自荒曲
阿張祐宅衰柳斜斯堂遺躅空潭影無人話夕陽野風
吹淅淅使我獨神傷菡生名鴻飛江浦人與黃俞邵以
收藏名積書數萬卷多祕本每出必擔篋囊載以歸居
烏龍潭心太平菴作古歡社著書九十餘種烏龍潭竹

枝詞云一匝潭邊三里多儂家亭館綠陰窩三更鐙火
寂如許猶有書聲出薜蘿釣竿收起倚書牀春草灘邊
小閣涼驚起鷺鷥波萬疊浣衣帶有芰荷香其風標如
此

錢慈伯讀張楊園先生備忘錄詩仇香抱潛德郭泰爲
之拜徐穉但躬耕風節自高邁楊園隱君子困學不言
億孝弟更力田心地殊灑灑一二質慤語至味終不壞
寄語浮華子幸勿輕見怪楊園師事戴山戴山之學於
程朱有出入楊園輯劉子粹言於師門有補救之力劉
伯繩纂輯遺書亦多折衷於先生隱約闡修以授徒爲

業時黎洲以紹述戴山鼓動天下先生曰此名士非儒者也陸清獻見所著備忘錄等書而心折焉雷翠庭爲刊楊園全書并以理學眞儒表其墓其親炙者有張佩璠嘉玲姚夏大野姚瑚蟄菴私淑者陳梓古銘蔣元大始錢馥廣伯李汝龍海門陳璋奉峩徐棖虞風輯年譜者爲嘉興丁子復見堂同志友則顏士鳳凌渝安何商隱

張思哲字邁遠家北平崇禎閒官鄧州知州遭亂去官挈家至錢唐隱於湖上及鼎革於重九日以栗餠黏藥服之暴卒嗣是世世不食栗餠諸生鵬翮靜公其曾孫

也能詩有句云峰前竹送晴檐翠江上霞依晚渡舟

松江金天石名是瀛望重四方知名之士爭求見之錢
牧齋往謁匿不見伺錢他出往荅之貽詩三章云畫舫
青谿載酒行山川滿目不勝情漢宮一閉千官散無復
尙書舊履聲錢歸見之慙默竟夕命舟急歸終君世不
復至松時有金德洪者明亡棄諸生子然自守詳沈子
大光祿金癡小傳

雲閒幾社李舒章與陳臥子承復社而起要以復王李
之學共七十二人王矜右爲首青浦邵景悅梅芬繼之
與張處中徐桓鑿王勝受業於臥子時稱四子少受知

於知府方岳貢歲科累試第一弟子問業者甚眾同時
入學至十七人王卻非司空日藻張蓼匪布政安茂皆
出其門與方密之陸講山陸鯤庭皆訂文字交當陳夏
壬申文選後幾社日擴多至百人蓼匪卻非與宋直方
互相長雄直方與臥子舒章刻雲間三子詩時在庚辰
辛巳閒直方少臥子十歲少舒章八歲嘗共選明詩行
世其詩聲詞格法宛然臥子華亭翁歷逸伶曹思邈魯
元姚子清世靖青浦王萼求九徵唐鉉玉汝蘭泉司寇
之高祖思岡布衣均有聲幾社中壬申文選外另有幾
社會藝初集杜甲春與其叔騏徵駿徵楷郡中子弟如

徐武靜張子退錢子璧並在較課幾社諸君子主盟風
雅高會處在披雲門外濯錦巷主人彭燕又與其兄彥
昭鼓吹唱和燕又祖汝讓居郡西金沙灘有春藻堂至
是移舊額署之甲申後景悅與玠右堅臥不出逸伶遷
居當湖不返以詩學傳借山和尚有義僕紀長亡命後
爲葬其父母徐闇公在幾社中唐歐治談公敘章宗李
輩皆奉爲師詩文略見壬申選中海外所著又有海外
幾社集鄞陳士東與焉乙未四月初十夜渡河南還泊
舟白洋河夢陳黃門握手話舊因拉往曲廊小閣云是
俞彥直內室俞出講賓主禮時黃門著單葛衣汗浹襟

袖款延移時始晤因感成二律云吾友真成別心期枕
上論一抔慚葛恪百鍊感劉琨細雨故人夢扁舟獨夜
村茫然大河曲何處可招魂終古孤臣夢偏隨逐客過
好辭餘繡虎遺恨滿銅駝談笑疑宣室衣冠動汨羅靈
風應肅肅日夜繞黃河臥子湛淵之後星霜九移邂逅
夢中幽明不隔如此朱灝宗遠園亭在西陸村有定尋
堂爲幾社中人游賞處宗遠在魯王時爲待詔殞身海
島閻公詩園村知畫理詩句有清才雖已紆麟紱猶然
養鶴胎又有自到三山日看君杜德機及留得仙棺在
難從海舶歸之句蔣馭閣平階初在幾社中事唐王授

兵部司務晉御史闖破亡命戴黃冠假青鳥術浮沈轉徙遂奔會稽斫石兄弟又與閻公別爲求社亂後蜚遯荒村與韓友一金天石吳日干何次張吳六益聯詩社稱雲閒七子燕又少登壇坫 國初兄子孝緒讀書春藻堂燕又講論文藝結詩古文詞之會盧文子與王伊人顧見山陸星聚等俱爲社中翹楚順治壬辰癸巳閒顧偉南陶冰修莫次延復舉幾社之會文章氣誼之盛可概見焉楊猶龍送彭燕又旋里兼訊顧偉南云光熹之際龍在野人文往往歸復社當時陳徐最知名君也犄角不相下十數年閒歎沈淪俊及廚顧俱埃塵短衣

破帽子尙在流落誰悲失路人云云偉南名開雍初與
陳李結社 國朝嘗一應京兆試偉南賦得五月十三
日云新蒲苑柳綠茫茫五月天涯望國殤博浪烽沙韓
將相巫陽天地楚滄浪春迴大澤乘潮怒花落江關入
夢長一自西州雲散後幾經凝碧冷吳霜萬年珠樹晝
鷗鳴宿莽孤臣草夜生黃鵠九州飛不到杜鵑三月怨
難平名因魯仲游秦薄客有田橫蹈海輕終古淒涼猶
望幸桓郎笛裏不勝情爲臥子而作也上海李延昱初
名彥貞後更今名字辰山闇公弟子隱於醫晚居平湖
侑聖宮自稱道士詩如柴扉明落日漁艇暗春蒲江聲

依枕急山色滿船輕皆來往婺州時作閩公沒於潮州
其過宣和嶺至義烏界追憶先師相期卜居處云聞說
烏傷界前期似夢中四圍青嶂合一道白雲通棲隱終
難遂飄零轉易窮門生頭白盡無路哭遺蹤

梅湖在懷寧西北鄉與桐城西南境相際其水入桐城
練潭以趨江明季諸生汪平子之順築宅湖側故號梅
湖鼎革之後自匿以老死姚夢穀序其詩謂與錢田閒
琦田閒交游較廣爲世盛稱而梅湖伏處草澤僅陳伯
璣知之而復不盡選詩者哀錄遺老梅湖終不與夢穀
甚愛其詩曾鈔一冊置笥中五言如滿邨黃葉路一笠

白鬚人老愁書卷暗寒戀土鑪温村移歸路火廟掩對

江扉

泊青山舟中看月

明光生暗水清氣養新禾七言如百年

一葉隨秋意十里孤筇見友情童子持茅權補屋老夫

折竹自煎茶閒因養病妨來客懶畏添愁特閉門鄰人

漸覺相親老世事無如自在耕夢穀所稱清韻悠邈如

輕霞薄雲依空映日不必廣博而塵埃濁翳無纖毫可

入自是知言其夢闢試有感云年少幽燕一健兒毬場

走馬眾爭奇虎頭老媿通侯相鷺跼深下澤知妙手

射生閒捕鼠陰符勝敵且圍棋何來更有天山夢月落

鐘鳴出塞時長平驛云秋風颯颯又黃昏古驛煙消晝

掩門慚媿武安非壯士可憐馬服少兒孫沈沙折戟干
年物嗚雨青燐萬劫魂舊史尋思推案起令人痛恨是
平原激越悲壯亦淵明述酒荆軻等篇之意春日田居
有云出處各有道拂性非所任其客來及老女歎諸詩
皆言志之作句如儂自不看花誰道花開惡千斤弩牙
折鼯鼠寧足酬斷木被丹黃何如委壑溝抗志肥遯蓋
思之熟矣

雄縣王忻茨菴高陽孫文正公孫壻隨父喬棟歷官閩
浙旣而流寇陷武昌喬棟以湖廣督糧道參議殉城死
茨菴慟哭嘔血絕而復蘇卜居六合之西圩老屋三間

訓課諸子暇時教兩女爲詩其山莊麥秋云偃臥向南
林鶯哢眾壑陰聊將田舍意寄此故鄉心薄暮山花落
斜陽江樹深元龍如見讓不是願浮沈宛平王文靖章
武劉端毅皆少年好友官皆貴盛未嘗以片札走長安
也同時逸民有天津李友太靜海杜依中大名劉六德
故城沈嘉客友太字仲白隱於黃冠餉司赫公以農部
督榷津關以束帛求致不可乃躬造廬以請踰垣避卒
不見依中字遜公明末嘗陳書獻十七策甲申後棄諸
生召用遺逸以疾辭不應六德字智侯蟬蛻功名城內
西北隅有匿園創自董見心先生偃仰其中肆力於詩

有句云沽酒遲來客無鐙早信鄰亦三拜四靈之亞嘉
客字無謀自號西谿生性孤迥居鄭口杜門著書送客
不出籬落與盧德水汪未央以詩相倡和時東光馬辰
次之驟有墨隱詩草亦爲德水所稱辰次子韋菴進士
孔懷詩亦洗削有數畝薄田惟種秫幾間破屋只堆書
之句其與申鳧盟游者南和周鑄茗柯有葭里集皆燕
趙閒隱君子

故懷遠侯常延齡字喬若晚號蒼谷爲開平王十二世
孫立朝慷慨遇事敢言曾疏劾馬阮明亡與夫人徐氏
於湖墅灌園終老徐夫人中山上公之愛女也其從孫

執桓繪圖徵詩姚念慈題七律四首云中原瀕洞起塵
沙大運將移廟算差南郡飄零春社燕東陵寂寞故侯
瓜庸才誤用堪亡國滄海橫流合破家留得六朝松石
在閒居襟袖滿煙霞身是開平幾葉孫荷鋤抱蠶苦心
存世稱鄂國標麟閣天護龐公隱鹿門嘉耦百年同白
首古原一望近黃昏人間豈少蘇翁圃莫作尋常灌溉
論黯黯斜陽照古槐連雲第舊傍秦淮驚傳鐵騎長干
入忍見銅駝廣陌蕙紅袖氍毹同日散綠章閭闔幾回
排晚菘早韭疏籬臥夢踏天衢十二街豈獨滄桑感甲
申建康龍虎賺君臣宮中正唱無愁曲世外猶存未醉

人四鎮干戈誰用命一畦蔬菘自含辛丹青寫出遺民
態圓笠方袍穩稱身王文簡謂其妻先逝未知孰是
宋疇字又韓集名詩歷與黃南雷同顧黃公寄又韓句
云杜宇日垂血靈鸞何苦飢

華亭張昊東若羲唐藩建號司李泉州逮奉母東還居
白龍潭號如菴躬自灌園朱竹垞其中表兄弟也嘗訪
之方荷鋤帶笠在紫瓜白莧閒老屋數椽僅下一榻吳
日干至則留與倡和焉庭前有斷藤峽石一蓋其祖祚
爲廣東僉事時從韓雍討峽蠻所得也薤髮僧服蕭然
終老外雖頽唐內實沈照性愛酒每浮白大呼意氣甚

壯其謝董蒼水惠酒云臆聞猶記老狂生翠釀春鐙眼
倍明世事悠悠交態變綠楊呼處儘蕪名發病嘔血自
謂此萇弘之血千古不化者也卒年七十有六同里張
洮侯彥之王屋工部之象元孫幼與弟漢度九荀有三
張之目其讀書山在細林與陳徵君白石相望盡讓田
宅於弟託於酒狂以自廢嘗客武昌憶漢度舍弟山中
云故園四月落楊花倦眼昏昏客夢賒夢裏九峰煙色
在青山兩岸是吾家寄錢開少滇南一首陳迦陵采入
篋衍集有淵明感晉亡幼安憫漢促之句弔靖南侯黃
山虎公有云輓季輕武弁動卽受裁制功罪勢莫定刑

賞恆倒置三軍鋒刃餘樞輔濫恩被人心具解體責賂
猶孔亟侵漁過十六實支無十四上與下相蒙中與外
俱蔽流氛倉卒起朝亡普如醉疇昔諱言兵奚從講武
衛青徐暨楚豫在在債厥事督臣及帥臣矐目漫長哨
寶劍出尙方徒虛明主賜於明季戎政言之最爲明瞭
冷秋江憶往事偶成云十年推轂賦元戎旰食宵衣歲
歲同當空詎曾忘一飯持衡端的負三公司農餉絕猶
催戰大將兵驕罔立功廿載憂勞誰不戴至今人泣鼎
湖弓尙方手自誅常侍底事令之復典戈此輩趙高元
不少從來承業豈能多祇緣宮豎干兵柄竟使關門倒

太阿南北兩司皆負國至尊孤立獨如何詩雖不工自
是正論汪梅湖述史云陸沈黃海遂如斯荆棘銅駝事
早知劍客潛過丞相府石工痛哭黨人碑封椿庫滿還
籌餉納款書通始出師徒使至今思聖主蜀山萬點月
明時龍種王孫泣路隅盤根仙李日荒蕪玉魚何幸薶
幽骨泥馬安能渡險途永巷久傳非病已中山又說是
狂夫天涯游徧無芳草細雨枕榔叫鷓鴣高門甲第勢
連雲列戟簪纓舊戚勳屢世遠蒙金券約六師親典羽
林軍自從出郭投降表誰見沿途揭祭文爲喜西川縣
竹戢死綏端不媿庭聞履轍相尋古今一致可慨也夫

永巷二句指弘光天涯芳草歎王孫之無人也

賀黃公讀空同滄溟弇州三集云藝苑榛蕪久不除瑯
琊才調亦難如揚雄本讀千人賦倚相曾窺八索書自
有粲花流齒頰堪銷錦臂襲衣裾翩翩濁世佳公子不
待同時已起余元美良友聯翩調不孤濟南身世勝吾徒

直看沈約如奴隸宵讓張絃作大巫周鼎商彝當日譽
黃金白雪後賢辜小遭驅策旋投檄莫笑雕蟲匪壯夫
于北地當年亦可哀焦音愈顯碧梧材身搜龍領丹霄
墮手拔鯨牙碧海回韓愈文章興八代張衡爵祿歎三
臺寄言餘子休驕語此是當時大雅才三詩可爲王李

吐氣其兩賢詩則誠意新建兩文成七哀則方正學鐵
司馬景大夫太傳于公許忠節楊忠愍蓼洲先生詩皆
溫雅甄妃詞云公子西園共賦詩酒闌相促出重幃筵
前有客依稀認憶得袁家草檄時讀之令人失笑讀書
處曰載酒園在蔣墅園中四時之花畢備喜賓客花開
宴客至花落未已而餘花復開花盡則賞月隆冬則賞
雪無雪則圍鑪煮酒出名畫懸而賞之一歲無虛席焉
諸葛程詩愛客開筵爲賦詩午橋別墅繞花枝名園載
酒尋常事載得圖書到處隨可以想見高致

吳趨朱瞻字二慎舊名陵字月石有句云依人秦粲老

戀國楚儀貧嘗北出塞垣厯嵩高泰華南極於海詩曰
中露集粵之高興郡有雲鑪龍湫鑑江龐瀑南巴下宮
灣之勝嘗與郭臯旭屈翁山蔣左箴中秋之夕泛舟雙
渚洲閒持觴引滿懷女將軍繡旛臨戰之風流溯潘仙
人紫煙出井之舊跡夕霏始散華月流空月石輒賦詩
以先賓客翁山稱其詩清音亮節正變不窮其鑑江亭
和吳明卿先生韻云亭上仙人去不迴江邊樓閣若爲
開潺湲鑑水煙霞繞寂寂觀山風雨來爛漫瑤華消瘴
癘依稀海市見蓬萊登臨猶是懷句漏日落寒原楚客
哀蕭爽和適有得於山川之助去高涼城北三十里巖

谷民居悉藝相樹秋冬閒朱實纍纍四望爛然月石游
柑園作初冬寒氣薄山木微銷落堂前森玉樹薦蘿共
參錯長風萬里來零露相盤礴投分慕容光慷慨重然
諾結隊野游行郊原張翠幙平陸引長流岡巒列丹雘
珍木鬱菁蔥橘柚盈巖壑朱實徧川原纍纍繁華萼晚
風拂茂草涼月乘飛閣清景相輝映賓從咸和樂舉觴
展嬾婉怡情欣有託好鳥鳴深林潛魚縱游躍歸來漾
月明扁舟從李郭清湍含藻景高崖鳴鸛鶴孤舟泛寒
波怒焉傷飄泊翹首奮翱翔徘徊望寥廓

潘江如劍津云城下三谿合當時七校齊曾聞朱鷺出

復見杜鵑唳碧草年頻換蒼梧路總迷向來消息斷淚
盡浙江西包驚幾夜過云故人寒夜至風雨暗東菑不
忍論前事還同哭所知住山多病後學佛破家時猶念
飄零者殷勤重有期望亭道中云西風仍細雨孤櫂暮
何依古驛人家盡寒潭野篠稀浦雅昏自集朔雁近還
飛鄉國來朝見三年此路違潘稼堂稱其詩如老將用
兵縱橫揮霍紀律森嚴要其轉客江湖何心天地詩外
別有事在也子鏐字雙南著飲人集丹徒集沈竹西孝
廉贈詩云但逢酒伴稱雄長每到詩壇讓老成稼堂謂
無隱以詞賦妙天下江如繼以詩顯至雙南而三世矣

雙南恃才使氣如鷹翮橫秋劍光出土與二公不甚似
惟獨詣乃可並傳其揚州秋感有云將軍闔外空專鉞
丞相營前竟墜星寄顧茂倫先生句云著書歲月窮愁
老對酒湖山感慨多

曹能始題板橋吟詩圖云兩岸人家映柳條元暉遺蹟
草蕭蕭曾爲一夜青山客未得無情過板橋

李杲堂錄甬上耆舊詩謂從來錄閩秀詩每與方外同
集且雜收女倡所作有志者恥之余此集獨定以三從
之義若王太淑人附應鵬是以母從子也陳恭人附后
岡先生則以婦從夫也屠瑤瑟附儀部以女從父也於

義爲甚正然後閨中之音仍足列於國風矣其記先哲
言行如謝按察瑾戒屬吏曰治民在順其常性而已能
順之則俗不擾而易安景泰朝宮中頗事奢侈嘗以銀
豆金錢等物撒地使近侍爭拾爲笑楊文懿守陳作銀
豆謠諷諫王定齋應鵬眎學畿內誠諸生以爲學先立
志不得輕議正人長者自絕於名教文章無徒仿摹句
字其中索然致貽學術之禍陸布政銓論詩專以性情
爲主嘗曰宋不能唐唐不能漢魏其似者宋之唐唐之
漢魏耳高志齋先生士修郡乘謂鄭清之余天錫附權
臣陷濟王竝得罪名教程徐爲元大臣失節三人俱不

宜立傳范堯卿侍郎欽性喜藏書於舍中起天一閣盡
購海內異本列爲四部尤善收說經諸書及先輩詩文
集未傳世者與吳門王鳳洲家藏以書目取較各鈔所
未見相易故浙東藏書家以范氏天一閣爲第一因人
傳詩因詩傳人多足采者

章皇帝每大怒必笑每大笑不止則必有大處分深陽
海昌或盤水加劍或竄死窮荒皆由乾綱獨斷海昌相
國宮詞云玉壺清漏夜沈沈永巷傳呼法駕臨月裏離
宮三十六一時傾耳聽車音紫殿鐘傳五夜時朱扉猶
未鎖葳蕤君恩圓缺如明月再照長門未可知宮怨云

荷香槐影滿南宮玉殿高雲暑氣空已自君心厭絢扇
簾前猶未起秋風芙蓉花落冷銀塘鴛瓦長凝五夜霜
秋老不知傷寂寞入宮元未識君王相國由前代詞臣
躡居政地機智敏練時政因革多出其手順治癸巳調
任司農乙未再相未一歲以原官發遼陽居住是年冬
令回京入旗己亥以賄結內監吳良輔下請室全家徙
遼左家產籍官吳駿公詩所謂君恩未許誇前席世路
誰能脫左驂也初獲譴時猶有長門再照之望丙申賜
環時有入塞詩云已分沙場骨今朝入漢關功高惟計
殺身貴卻愁閒手扶邊雲出髯攜塞雪還中宵驚夢覺

擊鼓震陰山入爲宿衛再經遷謫以康熙丙午歿於戍
所後五年德配徐燦湘蘋疏請歸骨湘蘋吳人工填詞
有拙政園詩餘拙政園者故大宏寺基在婁齊二門之
閒林木絕勝嘉靖中王御史獻臣侵之以廣其宮沈石
田文衡山嘗爲作圖衡山圖凡三十一葉各繫以詩最
後有記後歸徐氏中有寶珠山茶最奇爲江南僅見相
國買得此園在政府十年不歸旋遭遷謫從未一日居
也加剝墜淵愆咎自積悟彈指功名之幻貽相韓家世
之羞湘蘋病中永遇樂云翠帳春寒玉墀雨細病懷如
許永晝悄悄黃昏悄悄金篆添愁注薄倖楊花多情燕

子時向瑣窗細語怨東風一夕無端狼藉幾番風雨曲
曲闌干沈沈簾幙嫩草王孫歸路短夢飛雲冷香侵佩
別有傷心處半暖微寒欲晴還雨銷得許多愁否春來
也愁隨春長宵放春歸去回曲隱軫可以怨矣比翼連
枝十載餘暫分香袂亦躊躇那堪茂苑愁中月接到雲
陽道上書彥升懷湘蘋作也

王覺斯書宗米法兼采顏行險勁沈著有錐沙印泥之
妙課一日臨帖一日應請索以此相閒終身不易有學
書法於覺斯者覺斯云每字須寫至一萬嘗言書法之
始也難以入帖繼也難以出帖又云凡作草書須有登

嵩山絕頂之風有擬山園帖行世郭蘭石芳堅館題跋
謂孟津相國於古法耽玩之功亦自不少其詣力與祝
希哲正同如天神波旬固非正等覺然不可不謂之大
神通也棗花寺有楊忠烈大書無塵別境四字扁額寺
僧雪鵑藏覺斯草書一卷王樓村有句云孟津聲價當
時重未抵楊公千載人可謂深致然其詩如壬申秋入
雒經却山云初霽西風響石田山山落木下秋煙太行
人老軍城戍牧野河沈估客船舊土蝦蟇吞漢月壞牆
頽甍載秦年誰知萬古銷沈後閒殺浮雲夕照邊近望
牛頭寺云漢西郊野望牛頭袞袞寒雲萬頃流鐘磬不

關興敗事藤蘿猶挂古今愁人從山氣低秦岫水帶軍
聲到閩州割據雄圖憂後日夕陽無語下寒正自未可
以人廢

趙清止太原作云漠漠寒沙映戍樓亂餘烽火未全收
天清句注連雲起木落汾河抱郭流白草晝閒吹角晚
黃榆風冷射雕秋亦知萬里輕行役歲暮旌旗發旅愁
冬夜集梁園水堂云千門初月動笳聲秉燭書堂夜氣
清大漠風雲乘塞入危檐星斗落尊明交情四海誰懸
楊天意中原未厭兵亦有一正堪自老故園東去虎縱
橫廣陵懷古云爭奉華林翠輦游空傳宰相領揚州青

巾結陣兵先破白水臨江氣已收五馬荆榛迷晉渡千
家鎧火亂隋樓遺民猶自歌袁粲日暮烽煙接石頭不
廢摹擬自有性情其論詩稱徐昌穀風致故自相近長
短句亦工望月醉落魄云木樨小院碧雲夜靜孤輪滿
亂虹送影湘裙展六曲屏山翠幕深深卷麴塵韞薄苔
痕軟畫樓咫尺清光遠水沈香燼歸仍嬾繡被人寒不
共金鳧煖

明桂恭王子永明王據滇凡四大戰一保寧爲劉文秀
被吳三桂大創而奔一廣西爲李定國定南王敗績死
之一草橋亦定國兵我師復少挫時孫可望主兵肉俎

所事與李不睦爭爵爭地兩雄接戰交水自相殘殺孫
敗來歸我兵因入貴陽入永昌破磨盤嶺入緬甸而三
桂之功成矣彭禹峰嘗作四戰歌其一云褒斜左擔蜀
山路杜鵑嘯血鬼哭雨錦江玉壘叢蝨蟻割據白帝藏
金虎平西十萬走成都內江外江一時渡是時孫渠據
南中拔劍斫案氣如虹爲遣三軍穀甲冑鑿出凶門劉
文秀晝夜兼行三百里塹山堙谷築壁壘窮追麀戰保
甯城千山落日草木腥南兵帶甲卷土來黃金匱匣錦
雲堆北軍籜箄呼風雷虎豹戰栗終南摧元戎搦馬親
接戰朔方健兒好弓箭西洋火礮武剛車迅埽南兵如

飛電南軍象馬積如陵夔門劍閣積屍平君不見甲申
大戰山海日唾手堪禽李自成嗚呼一戰兮戰正酣應
憑長劍埽雲南其二云獨秀參天天尺五黃沙白晝飛
霹靂羅羅跨象涌山東一隻可當萬人敵飛弩毒矢如
風疾銅騎金甲山銜日名王劇戰鐵衣紅宮人火烈星
流空孤城援絕城已摧寶王金章付劫灰左嬪右嬙同
時死嶺南真見鐵漢子嗚呼二戰兮戰數奇千古英魂
百粵陞其三云祝融南去雁峰回蒸湘水對寺門開月
冷草枯霜華夜白骨烏烏逼人來使君問前路乃是南
北交鋒舊戰處我馬躑躅掘地鳴我僕膽悸不欲行使

君子細聽耳邊微聞刃槩劍戟百萬金鐵人馬踏藉之
行聲憶昔兩軍相當時旌旗閉天閃躩踞南鬼煩冤北
鬼哭交趾母象大如屋百粵烏槍三韓箭師子吐火元
黃戰飛鏃蝗霧卷長沙烏食人肉亂如麻東珠璀璨嵌
兜鍪千金竟購大王頭嗚呼三戰兮戰不利南楚賴有
長江蔽其四云郭李自相傾陳張乃終隙二物不並大
神位生巨慙中原自失咸陽鹿么麼餘子相徵逐西川
割據彼何人腰領灰滅空碌碌孫李抱頭如竄鼠穴此
西南一塊土不甘老死棘纒中假借朱陵拱共主牂牁
江上豎壁壘十年喝斷五谿水人謂葛相將復生豈知

朱温特未死囚繫安籠空怨嗟後世莫生帝王家刎頸
忽爾結深仇二子治兵交水頭大兒側目雲南府手屠
龍孫炮龍子次兒揮刀板橋東誓死不肖誤乃公虎豹
股栗天地黯秦王晉王來酣戰一成一敗彼此分十萬
枯骸人命賤遺矢斷戟沙場鐵斑花土繡壯士血停車
下馬繫長亭道旁遺老爲我說是日東南風正急秦軍
大衄寶刀折秦王帳下曹無傷夜半曾將軍情洩秦王
場翼望東行晉亦跋馬回昆明嗚呼四戰兮戰相戕滇
黔萬里歸職方四詩微涉粗獷錄之以見當時事實大
王頭句謂敬謹親王尼堪以輕騎沒於陣卽莊親王三

桂坐蠹爲黑太乙旗

淄川高念東司寇詩辦香在香山放翁如譬如馬失寧
非福便作牛呼亦甚平哀樂都來惟月影古今何物入
秋聲峰爲王維添畫本鳥如宋玉有微詞客何方至分
嘗酒鷗汝來前共聽歌錯錯欲同批頰鳥羞羞應笑叩
頭蟲皆宋調也菜圃絕句云綠綻垂楊百鳥嘯雨餘菜
甲醮香泥桔槔聲靜園公醉自在春流已滿谿詞意最
爲蘊藉

宜賓宗凌霄通政卽事云寒夜挑鐙檢做囊客心無奈
轉旁皇只存一幅胡威絹拭得酬恩淚數行

孝感程端伯以書畫名入本朝累官工部侍郎有句云
請上迴廊看煙樹許多慚媿對青天卽梅村早患苦重
來千疊之意其孟冬詞云鐘鳴鳳閣午門開鼓樂聲闐
動地來萬國車書頒玉厯一人黼繡上瀛臺宮雲五色
出長楊旌旆風搖日月光馴象兩班乘大駱官蝦一簇
擁諸王朝衣蜀錦覆羊羔金爪龍鱗海獺毛萬歲山高
風色冷夜來親賜講官袍中左門前挂寶弧將軍翠羽
坐紅氍紫磨金色提梁注稽首呼嵩飲酪酥想見國初
太平氣象不遠

長沙胡石江爾愷故太平推官詔起隱滯以洪南安薦

官至禮部侍郎其感懷和趙洞門韻云披裘長避世賣
藥亦逃名未具蛾眉倩終難學步成樵漁魂夢穩冷暖
世情明自是瀟湘客含悽弔屈平掩扉常寂歷厭聽擣
衣聲難逐尊羹願羞牽蝸角名拋書呼酒至看劍繞牀
行門徑蕭疏裏何妨棘與荆山林隱逸之士匿跡惟恐
不深此詩全是熱中宜其輕於一出也

孝感嚴方公司農正矩望廬山詩入望多殊色徐觀無
定容自是超心鍊冶之句他如金壇曹惕成苑丞宗璠
句云白鳥時引權迴崖水遂深忽聞落葉響乃是山僧
吟詩境亦極幽細

九月十九日宋人亦以爲重九吳冠五鎧下偶得花寒
今十日酒冷古重陽之句周櫟園頗爲擊節走筆和之
有云兵戈猶故里風雨更重陽王阮亭乃以吳句爲櫟
園自作此誤記也

櫟園五律如白蓮驛云古驛藏山曲兵戈不盡焚一鎧
隨雨亂半榻向僧分瘠鳥嘯枯樹寒狐舞敗墳砦門看
早閉虎跡近紛紛獨臥驗夢菴云靜裏籌歸計寒霜透
薄衾萬山連夜雨獨客五更心鳥宿川光暮龍歸海氣
森何當一枕上九九盡遙岑龔半千移家云倦鳥無高
翼卑飛又一林小心過逆旅大意失黃金硯亦移將破

山猶入未深空間買字者曲巷費追尋七言如東武懷
古云更遣雲門客渡濰泆淇東下盡荒陂秋風野水韓
王霸落日高臺李相碑石吐垂鞭山鬼骨桑田亂墾海
龍皮當餐頗憶如瓜棗幻渺仙人不可期江行雜感云
逐客江干夜寂寥無端鐵笛起中宵深秋梁苑新沙積
明月清谿舊板橋萬里夢回千嶂雨一帆風動五更潮
草堂空有農書在桑柘如今盡已凋畏使炎方卑溼侵
危檣可奈雨淋淋江邊見塔知城近郡裏看山覺寺深
老樹銜波迷故道疏鐘引客上遙岑囊書再借龍谿櫂
斷岸孤舟夜夜心靖公弟至云荒城兀首對燈殘歸計

先愁百八灘爾又遠來余又去高堂清淚幾時乾類皆
沈雄堅峭亦復婉約纏綿黃俞邵嘗稱其孺慕終身友
愛無閒敦篤友朋信心不欺遭讒被謗坎壈挫折然射
烏樓之捷宣諸 天語因以道吏議未爲不遇王僧士
淝水歌韋虎中山付樂羊之句指此

曹秋岳記誦淹博收宋元人文集至三百餘家明三百
禩詞學失傳搜集南宋遺集表而出之與朱竹垞郵亭
官舍更唱迭和晚自蜀歸築倦圃自號種菜翁輯學海
類編唐宋祕本綜四百餘種生平著述上之史館者崇
禎疏鈔五十宰相傳藏之家者續獻徵錄六十卷起萬

麻中葉訖崇禎甲申古林金石表靜惕堂詩古文詞其
韜光菴和高忠憲公韻云喧寂兩無染乃得還其初荅
顧寧人云汲古沃其根枝葉倍妍好憫荒云生長不識
布石灰暖我寒誠恐失初心展轉成盜賊律句如吳關
霜雁外社屋海桑前時名尊雁塔鄉夢落漁竿露冷春
星低草閣更殘悲角動山樓兵後幾人無白髮尊前此
地卽滄洲塵埃天倦彈冠客鼓角宵橫拊髀心李天生
所謂意取其厚詞取其自然者殆謂此種

公安袁述之方伯韶年爲中郎長子有草閒詩稿喜門
人程周量舉南宮第一云豈是吳平先獲陸須知奚入

定空秦

吉水李少司馬元鼎字梅公家有古硯五辨如梅花質如黃玉相傳爲灌嬰廟瓦故以灌研名齋因以名集

益都孫文定世居顏神鎮在銓曹與曲沃衛文清公周祚同爲溧陽相國所推重文清入相代爲冢宰嘗疏請與屯政崇恬退明禮讓正人心及枋大政與文清德望相埒撰有顏山雜記漢史億歸厚錄琴譜指法南征紀略其挽船行云中流振簫鼓云是貴人船挂席滄江上弭櫂春城邊城邊何蕭條空屋澹無煙征帆遲不發錦纜須人牽州府下四郭悉索其做屨父老帶丁男腰鑣

往麥田但有寡妻存力不任牽連來騎一何怒飛鞚走
闐闐鞭撻縱橫下不得少遲延銜索似枯魚什伍且俱
前裏糧不及夕往返動盈千聲勢若雷霆道路競喧傳
皆云江南來東人投浙川微軀誠自惜寧爲問募錢長
吏且被縛長跪乞見憐蠲除雖有詔趨起未敢言哀哀
挽船行時命亦已然文定於順治初嘗分司天津此詩
當爲是時所作

宋尙木徵璧句云黃金赤羽驅風電白日青春爛斧柯
此乙酉年作

李舒章經東阿懷曹子建云角弓愁勢險玉食恨才多

語極名秀

癸丑撤三藩梁蒼巖奉使南海平南王尙可喜將有不測安全成禮而還包孝肅祠云孝肅祠堂劍佩閒香花墩畔聽潺湲嚴霜落後瞻遺像濁水澄時見笑顏異代姓名童語習中宵風雨鶴飛還古今此地無關節白日孤城冷蜀山張許六王祠云名城喋血共安危道左飛塵見古祠六矢當年知號令千秋爲厲見旌旗江淮力障孤軍日睥睨風生苦戰時每讀昌黎書傳後傷心南入是男兒皆奉使道中之作當鼇拜輔政與之不協以大司馬自陳革職鼇拜敗特還原官其三河縣云叢爾

三河縣何堪傍帝京丁稀愁役重里瘠視官輕白日收
村市黃蒿閉古城五陵人已沒芳草爲誰生掌中樞時
嘗疏言地方官藉兵馬往來應用米豆薪芻濫派民間
借端取貨賠累無窮可爲此詩作證喜書畫古器精鑿
別唐宋名蹟充牣几案刻有秋碧堂帖以辛未八月朔
卒於位漁洋輓詩有蕉葉銀鉤字棠村錦瑟詞之句蕉
林棠村皆相國所居其秋碧堂石刻後爲族人所毀甚
至以爲礎云

孫北海春明夢餘錄記歐陽圭齋之言曰明宗詔修遼
金史揭公侯斯與其選人間修史之道何先公曰收書

用人又問用人何先曰用人先論心術心術者修史之本也心術不正其他雖長不可用此千古篤論北海卜築西山得退谷而居焉榜其亭曰黨山博古精鑒毫而好學有明一代典故尤瞭如指掌圖書之富時比之宋田氏嘗謂理學先生詩惟劉靜修極工

甦翁方拱乾有何陋居草嘗以事謫戍關外與子樓岡學士邵村侍郎俱其廣寧詩云鑿巫閭是望中山指點殘黎落照閒北鎮祀誰憑享殿南冠人尙戀榆關光熹往事傷心久劉杜征魂帶血還慚媿高岡祠李靖紀功碑斷蘚花斑劉杜謂劉縝杜松天命四年我兵敗明兵

於薩爾滸山劉以山海關總兵沒於陣大破明兵於棟
鄂路杜以遼陽總兵戰死康熙元年邵村兄弟自塞外
以修前門城樓自贖赦歸華亭周釜山贈以詩曰獄中
拔取雙龍劍天上修成五鳳樓顧黃公稱其工切樓闕
名孝標邵村名亨咸

楊猶龍布政思聖鉅鹿人惜梅云粉褪梅心帶淚痕支
離誰解護花魂煙沈湘浦香生夢月暗羅浮影到門畫
閣有情愁歲暮綠窗無語怨黃昏何人一夜吹長笛零
落江南雪滿邨雄縣王苾遠中丞企晉嘗編猶龍與清
苑郭棻任工龐塏文安紀昞之詩爲四家詩鈔二十八

卷苾遠康熙二十四年進士

新建熊雪堂司寇少居金陵其題王翰卿書目云乙丑
丙寅余方年少從師金陵值風日晴朗輒步至三山街
徧閱書肆是時閩賈蔡弈所藏書甚富敬余耑勤許借
書翔覽互旬日半月則雇一小驢負書而去閱畢復還
晚年解組遂與林道生黃城五羅篁菴朱遂初先後入
籍和龔給諫句云春光將盡不成春風雨江城一愴神
猶有禾黍之悲焉偶書云敲枕閒眠午夢新拋書清坐
暗傷神東風釀得愁如海多少憑欄倦繡人

寶坻杜文端官刑部日每讞重辟反覆爲求生路一日

入奏退

世祖嘗顧左右曰爾等識此人乎此新授刑部尚書杜立德也不要一錢亦不妄殺一人康熙八年入相二十一年以疾陳請未與昇平宴

聖祖念之特頒玉饌馳賜其第予告歸里 御製五律一章有方倚鹽梅略難違正壑情之句並賜怡情洛社圖章以榮其歸嘗謂閣臣如杜某真不媿古大臣桐城姚士堂詩十載憂勞天下計一生精白聖人知蓋紀實也玉田王豐垣明末諸生與文端有舊國初屢致書豐垣欲徵起之豐垣不出竟披髮髻曇菴以終老菴在玉

出治東二里許雙桐其手植至今尚在

義烏吳之器賜如所居曰大元家有抱甕園與同郡斯
一緒龔士驥徐應亨陳達德章有成諸人爲元暢樓社
述一郡前哲言行隸以史法成藝書八卷游兩京數陳
大計有尼之者拂衣歸暮春過朱中丞卽事有云筵閒
餽飭不可數頻婆之果來朔土馬上裹馳箛竹封攜歸
爲作賓祭供是時流燹入秦趙大河以北無堅墉從今
此物尤難致玩色矜香還再四主人無言忽揮淚撫時
感事具見胸襟與弟之文叔簡遯跡山林老於著述一
緒字惟武有句云晏歲景光須自愛繁華多少到今萎

士驥字季良偶成云吳女城頭望越鄉夜寒潮落水蒼
蒼生憎東岸初生月隔著煙波下女牆有深婉之致應
亨字伯陽嘗從胡元瑞游有成字無逸楓山先生曾孫
明亡與趙淳吳鯤范開文爲詩酒社吟嘯以終有句云
花移難借影琴在可無弦無雨半春堪載酒有山一畝
卽爲家惟陳達德入仕本朝賜如詠物寄招社中過集
云藻井雕梁故壘微春泥落盡舊烏衣湘江留滯誰爲
主碧草重來苑路稀翠領金衣蹴柳輕上陽嗁盡百花
明那知睨睨風中調競作嚶嚶出谷聲有招隱之思焉
宛平王文貞公爲明癸未進士其山游道經灰厰甲申

初夏避寇過此云難言今日重經路不是當年痛哭人
戒壇憶天啟乙丑秋金卿非于司直偕游云卻幸重游
存白髮相看不老是青山猶有滄桑之感大名成青壇
相國爲明大學士文穆公基命子舊第有素園爲文穆
別業青壇晚歲田居重加葺治草木欣榮樓臺高聳有
詩云第後園林依水灣城隈雉堞帶煙鬟幽谿鶴步苔
痕靜深樹雲留鳥語閒畫錦重霑新雨露天章分映舊
湖山花晨月夕優游處手澤書香俯仰閒綠野平泉若
忘其爲易代事者青壇及掖縣張文安寶坻杜文端皆
敬哉宗伯同年也時薊州李光四處士孔昭奉母隱於

盤山當道徵辟謝病不出與杜文端少同學長同年而
出處異趣自號潛翁門人私謚曰安節先生梁蕉林登
盤山訪同年李光四不遇留詩云憶昔看花傍帝畿十
年避弋羨鴻飛登山欲問湘江叟風雨冥冥冷釣磯他
若曲周玉清有體健清苑高淵穎亦振奇慕義之士
金壇張明弼字公亮號琴張子爲顧黃公丈人行文章
悍肆嘗爲赤方文集作序謂赤方年甫弱冠賓伎雜集
壺傾觴罷輒援紙作數千字皆今之自稱文士閉戶三
日所不能就者推許甚至赤方所稱琴張七言警聯如
已傳雒里騰蒼雁未見河流下木鷲見客先觀無反氣

閒談切莫道遺民人游日下偏憐鶴家住峰頭不羨魚
西施山云六千君子何無舍一代佳人獨有山皆可覘
其志節一日黃公取其文改之琴張曰何爲者曰偶改
先生集耳琴張愕然遽呼家僮向舟中取所自訂者相
校十九合乃歎曰某老矣文章利病乃今知之雖悔少
作何及吾子年富才豪蚤歲已超騰而入其可限耶老
輩虛心自下正不可及

王鎰鄧列皆金壇人王隘而鄧不恭鄧字秦釭爲張公
亮中表以詩文自雄一日索扁於顧赤方赤方濡墨曰
天荒天隨蓋秦釭居天荒湖赤方以陸甫里推之也書

未畢秦釘至爲下拜王先卒赤方寄懷秦釘詩云王鑑
耽癖任天真鄧列題詩詫有神酒徒已失斛斯六蔥菜
誰邀井大春

顧云美廬閭門外半潭繞屋引水自隔莊烈帝御書松
風二大字云美得之某司香遂揭於齋中顧黃公爲賦
詩四首卒章有云奇峰名淑景御坐正當中五粒皆銀
鬚雙珠倚玉童謂萬歲山淑景峰有石刻御坐二白松
覆焉

雪橋詩話續集卷第一

雪橋詩話續集卷第二

遼陽楊鍾義撰集

吳興劉承幹參校

上虞王梅林德璘東皋草堂詩馮山公爲之評定送季
弟清獻出游云身欲許人須念母書頻寄我莫忘家
蘭州郝壁仲趙有崑岑集寄懷舍弟陞兼柬石若玠云
有弟蘭山守墓田別來西極數經年關河鐵馬仍留牧
荆棘銅駝已盡遷升屋招魂空社鼠還家說夢對唳鵑
痛深杼眼難高望記到良朋各黯然蓋避地懷鄉之作
客廣陵有竹枝詞云紅香堆裏雪光明一簇芙蓉淺暈

生共戲鵝兒拋彈子見他條脫臂砂輕臨潼王孫蔚茂
衍赤壁云溪上青楓江上山西陵秋色有無閒小航商
略琴尊具如此月明須往還早發峽石驛云西巖馬首
下層霄秋樹平明煙未消寂寂空亭人不見霜吹紅葉
過山橋湘行云何處當年洗筆池藤梢橘刺暗篔簹輕
舟自向青溪過一路空山叫畫眉詩情婉約西北詞人
之翹楚也

謝方山刑部爲清義相國子漁洋序其所著杏村集曰
去膚存骨去枝葉存老幹其賞甚稀存之以待元次山
杜清碧其人定相賞於絃指之外臨清汪灝送方山告

歸詩真得意時惟嘯詠不如人處是功名潘次耕之試
鴻博由左諭德盧琦及方山薦舉亭林至都嘗主其家
祁縣戴廷弢楓仲博學好古家多藏書所居丹楓閣圖
書鼎彝羅列左右人方之倪迂清閔顧寧人乙卯至祁
縣主其家將築室祁之南山楓仲力任之李子德答楓
仲見懷詩所謂漢室聞遺老君爲築草亭者也亭林因
之置書堂取所藏經史暨明累朝實錄插籤於架竹垞
分書題柱卽此地

郭傳芳字九芝一字獻素大同威遠衛人由選貢授威
寧縣佐攝邠陽長安篆俱有聲遷富平令滇逆之變涼

寇竊發九芝偵賊將入境乘霧擣巢斬獲有功輸輓旁
午民不告勞亭林以康熙十七年由大原入關中迎之
於二十里外亭林與潘次耕書云頻陽令郭公旣迎中
孚僑居其邑今復遣人來迎可謂重道天生遂欲爲我
買田結婚之計雖未可必然中心願之矣天生陳情歸
賦雲中曲呈郭明府有云晨起呼童秣吾馬爲公親介
初度觴前年是日杯相屬左有東吳右二曲亭林出游
嵩少九芝又迎傅青主入關天生是詩有今此二妙跡
稍遠太原徵君聲光續之句華陰令遲屏萬維城又字
闡生廣寧人亭林因朱子曾主管雲臺觀謀爲建祠屏

萬任其事捐俸爲倡亭林朱子祠堂上梁文有云重邀
茂宰贊此良圖萃人力以作新捐緡錢而倡導天生詩
云靈臺樹接紫陽祠適館陶潛附一枝隔代虛傳提舉
祿新宮兼致草堂資謂此事也兩君好賢之風不可以
無紀

渠縣李璿梅岑片石齋集佳句如泉石近知何處隱風
煙遙接故園愁漢廷近詔寬三甲蜀道何年鑿五丁將
軍自許標銅柱長吏誰曾過石壕久客未聞生馬角累
人何止媿豬肝時巴蜀用兵多憂生念亂之意其弟珪
公執說劍齋集聞官軍收漢中成都云天險誰終踞先

聲已不支傳聞收宋建遂已殪姜維王者師無戰流人
喜可知翻愁雲棧路雨雪擔簷遲已分歸無計朝來涕
淚新誰傳今日信吾是再生身月冷創夷色花殷鼓角
春安危爭撫虐跂望轉傷神此順治九年作公執以丁
酉舉人宰閩之寧德其三山雜感云珠簾繡柱城西路
父老猶誇未戰前他日尉陀專璽綬幾年楊僕擁樓船
春城晝閉飛飛燕野水晴看跼跼鳶只有無諸臺畔草
東風依舊綠芊緜青絲珠絡散平蕪二月春郊草尙枯
宛馬自來甘苜蓿魯人今復峙菱芻空村夜釀傭身值
廣陌晨飛趣市符蒿日遺民成痛哭五年剜肉給征輸

時耿氏王閩重斂勞怨徐興公以布衣致書數萬卷建
偃曝樓聞亂樓書無恙至是徙其家書遂散失讀此詩
及陳份石獅歌皆哀憫創夷可見國初三藩之爲民患
陸翼王徵士學本陶菴晚益精實已未舉鴻博抵京夢
陶菴手書碧血二字以示入試遂不終卷以不入格而
罷徐健菴贈句云早年講舍依黃憲壯歲生徒似李膺
周子倣贈翼王詩君是左徒門下士謁來相對哭途窮
遺孤袁粲纍愁日亡命王成賃保中書館三餘淹夜雨
客顏一瘦怯秋風結交世上黃金滿四海何曾及此翁
沈埭士謂翼王當有保全遺孤之事故專及之考張樸

村所撰翼王墓誌先生少師侯廣成之弟雍瞻陶菴致
命雍瞻亦被逮先生急排闥挾其孫檠與俱且視所藏
書搜取侯氏先世及廣成父子遺文與夫雍瞻所作凡
數十束載小舟潛去閒道入越中事平乃與檠俱返子
俶詩卽指其周旋侯氏之難而言陳其年贈陸菊隱序
略云粵以龍蛇之年遂應魚羊之讖普天瓦解列鎮茅
靡羸芋盡作俘囚樂卻悉班氓隸庾開府著傷心之賦
五福無徵馮曲陽製自序之文三靈獲譴斯時也齊國
忠臣猶稱王燭楚邦義士尙說包胥落落戈船雨暗吳
江之棹蕭蕭戰艦煙迷歇浦之帆惟我膠城獨推上谷

釀酒而談登陴以誓袁本初子弟俱願相從庾元規賓
從皆能自效三日哭於都亭六軍盟于別館當年夏馥
曾聞媼姪之親此日黃瓊亦有門徒之誼共爲犄角相
與藩維然而烏頭未白河水難清空埋地下之愁不救
天公之醉痛龐涓之箭盡兩曜無光悲項籍之途窮三
川流血一門爭死七尺無歸藐爾諸孤行將焉及又曰
自稱擊筑之傭謬作賣珠之客重關半夜私出田文複
壁三年深藏張儉閒關亡命猶授孝經涕泣避仇每傳
論語齊朝才士半知袁粲之孫晉室諸卿漸錄趙衰之
後將謂少孤不死庶幾亡者復生詎意遺珠又成破鏡

王規玉折時事可知徐悱蘭摧天心已矣又日照隣失意居惟病梨蕭悰去國歌成落葉弔棠梨而無館臨酸粟而非臺湘水三閭假餐英以適志溇陽五柳聊采秀以攄懷仙人餌以長生潔士因之玩物芋絲悽惻翼王自號菊隱之志昭然矣翼王館京師久文學侍從之臣每被 顧問徵用故實考所從出有未能對者輒退而訪之翼王爲具道某書某事舉其詞與其首尾卽檢書以驗無一誤者人各如其意所欲得購宋元明人經說輒爲題跋經義攷多取其言爲据李湯孫送翼王南歸有出中大隱徵宏景海內奇書問鄴侯之句有菊隱集

其送文介石學博歸滇南云嶺客頻年賦式微今朝纔
見理征衣三江日月孤臣老六詔風煙萬里歸山過碧
雞多戍鼓星窮朱鳥近親聞好音爲寄東來驛莫道南
天少雁飛

周子俶病中元夕有感云逢年漫媿天人策涉世寧諳
長短經顧伊人閱江樓云碧草自生宮寢路青山仍遶
帝王州王虹友張文獻公祠云只道主由金鑑致豈知
兵爲玉環來許九日過廢園有感云到公死後空存石
謝傅亡來久廢琴王異公贈杜于皇云人驚夔府貧來
句世重樊川亂後名王懌民揚州次梅村韻云百年洛

蜀關時運六代煙花兆甲兵王次谷端午先忌云三閭
怨在餘香草九地恩深廢蓼莪太倉十子之詩大抵專
尙風華梅村之所熏習也其三人則王端士黃庭表王
惟夏

嘉善魏坤禹平送少司馬楊以齋先生予告終養歸里
次悔餘韻云行詣誰從末俗論性情今見衮衣人喜當
海宇銷兵日許乞林泉將母身得失不須分出處去留
總是戀君親馬蹏篤速行何亟肯待河流泮早春以齋
早以諫獵受

世祖知歷三垣三載疏前後三十上明季東南文士倡

爲復社海內應之著錄者二千餘人其後十室之邑三家之邨莫不立有文社蒞牲以盟張樂而宴與者結路人爲弟昆道不同則親懿視同仇敵凶終隙未靡所不有公上言朋黨之禍釀於草野欲塞其源必先杜絕盟社得旨敕學臣嚴禁初釋褐知高要以幣聘朱竹垞課其子中訥世所稱晚研先生也官中允工草書孫卽次也太守

丹陽湯寅贈筮江上柱史云由來勝地自林泉卻憶金門已十年狂酒牧之眞御史著書宏景是神仙韭花作字春移榻桃葉迎歌夜泊船祇是避名居谷口論詩今

更萬人傳江上工書畫精鑿賞官御史直聲震朝野棄
官去不知所終鬱岡埽葉道人其別號也嘯亭主人謂
有金氏子隨舅氏某之官甘肅遇道士於漢龍山年九
十餘作江南語狀貌偉然頗善書法自云曾爲諫職以
劾權相去官自稱繡髮山人不言姓字里居金氏子屢
叩之不告也及歸告諸士大夫皆云其狀彷彿侍御然
終無左證

康熙閒明史開局天文志爲吳志伊所修徐敬可劉繼
莊各有增定敬可名善秀水諸生明亡儉德韜晦著有
流寇紀年莊子七篇周髀密法會通弧矢六宗諸書燼

於火詩曰藹谷遺稿初夏偶作云細數韶華覽鏡邊頭
須不信已皤然休教遠憶銅臺日便可虛張柏寢年生
亦有涯吾分定春今何事夢猶牽衰殘只合忘機去更
結青山未了緣江郊幾度喚提壺果喜高陽尚有徒泛
宅豈宜論去住酒天從此入虛無箏人倚處垂楊裊雉
子斑時小麥枯擬趁麴車花外駐夕陽城闕又荒蕪春
來稍喜塞烽遲文酒爭開罷戰時一夕西園留勝賞千
秋東觀接風期支離媿享三鍾逸鞠膾終非二斗宜城
角尙悲花欲盡莫教征夢更天涯城南半畝舊柴關碧
蔓丹葩露井殷容膝有樓非百尺冥心無夢不干山溪

流四注蓮花巷

所居在四蓮花橋

雉堞平臨楊柳灣疏懶未諳

邀轍迹席門苔繡正斑斑

楊柳灣在舍西百餘步

審其詞意係史

局感興之作嘗杖策徧歷名山水其過泰山詩云豈意
神靈宅衰年得躋經風沙三百里一片馬頭青空曲蟠
龍虎觚棱挂斗星白雲朝暮起常護漢臣銘

嘉興曹偉謨秦淮竹枝詞輕輕斷送南朝事一曲春燈
燕子箋自是快語桐鄉沈中棟隆九秣陵雜詠云浪游
未得買歸船料理春寒旅思牽閒補秣陵風土志新年
門戶貼花箋長千古寺墦峻嶒乘興搵衣一再登不管
人間興廢事孤僧日禮佛前燈此江南初定時作漢陽

羅世珍魯峰秦淮竹枝詞云露溼雲林筍正肥家家買
得半籃歸榴花沽酒鱗魚饌可是能消婦子飢翠幌青
槐面面風涼篷艇子碧波中當年長樂煙花盡猶贖城
南半夜鐘周櫟園見之屬幕中諸子和作令書爲冊題
半生明月夢秦淮之句於冊端魯峰秦淮後游詞有云
一代風流恨絕縱留賓無復舊司農半生明月秦淮夢
付與西州一慟中其感知之意深矣

華亭田髯淵少受業於夏彝仲善屬文陳黃門謂夏考
功此子才氣卓犖他日必成偉器黃門歿子幼貧墓傍
荒田數十畝髯淵代納官租二十年復與友人梓其遺

集會試入都與王敬哉魏環極諸公相倡和授新城知縣不赴嘗與同郡董蒼水編當代詩曰十五國風高言集以鴻博徵不遇晚築水西草堂觴詠以老其孤兒行一首感懺嗚咽惜南海太守不詳其人徐南州懋勳亦考功門人以秋興詩幾蹈不測秦中田雪崖司李力救得釋堯峰山訪汪鈍翁云峰高沈日月樹古識春秋美輝發過訪云遠道漫羈徐穉榻到門空辱呂安車

鄧孝威淹洽通敏爲勝流推重絕句如歸舟偶感云青茅春瘴逐山流細雨高帆漾客愁聽徹猿聲江更濶祇疑天上是韶州過江州琵琶亭云江州遷客未歸秦絃

索初聞淚滿巾今日善才風調盡蝦蟆陵下總新人江
行雜詠云江州解纜客途長三日西風逼建康試問誰
人鎮姑孰青山牛渚滿斜陽皆極渾脫律詩如萬安道
中病臥至章門小差時值清明云過嶺風花陌上狂冥
冥細雨入孤航客中人病經寒食愁裏鶯囀入豫章垂
柳軍城殘日動新煙漁浦戰雲荒不知麥飯江村路寂
寞誰來弔國殤巴河鎮登太乙閣云平津賜第久荒蕪
傑閣巍然瞰楚都高處衡廬天外伏到來雲夢雨中無
千家煙火猶洲渚幾葉風帆自畫圖曾是赤眉燒不到
奎光深照斗牛孤詞妍調響亦梅村芝麓之亞所輯詩

觀皆同時輩流之作以布衣舉鴻博齒已高授中書舍
人游天寧寺詩有十年親酌曹溪水我亦江湖破衲僧
之句鉢叟其別號也

昆明布衣朱子眉本名源字禹源擔公和尚甥闔門遭
流寇之難擔公攜子眉至雞足山從學詩畫名把茅後
返初服更名昂有借菴詩草如孤鐙寒夜客殘雪異鄉
山斷嶺分秋色高松落梵聲谷暗天常兩山寒夏亦秋
爲客十年江上雨立春七日雪中酒中語別家何在
客裏逢人感易生白首論交煙瘴裏青春握別亂離中
語皆清脫

順治季年奸民捏詞詐害在南方不曰通海則曰逆書
在北方不曰于七賊黨則曰逃人台郡守郭日燧凌虐
搢紳臨海諸生忿具退狀禍起被逮者六十八人潘震
雷玉虎陳大捷霞西何志清若漣張人綱晤蕉蔡礎芥
軒皆戍尙陽堡二十年始得赦歸章亦至讀晤蕉集茵
草云謁來貫索妒文星慧業齊教隸北庭六十八人同
放逐九千餘里各飄零生還屈指身誰健死瘞傷心骨
尙停檢罷遺編增浩歎專諸何事劍鋒青太平謝國隆
寄董少尹句云未聞黃綬嚴鉤距不許蒼生效質成則
冀董之援手也仙居張木生明經贈鬼薪吳道文云落

葉蕭蕭風晚急愁雲怨霧爭相泣忽聞剝啄啟柴扉有
客倉黃隨雨入客自新安千里行飛語遭誣遣赤城赤
城新經百戰後惟見山高共水清朱家俠氣今何有柳
車空載山中酒如我鷓鴣棲未安新炊僅摘荒園韭憶
昔當年相識時耳熱樽前唱柘枝檀板輕敲雲度緩銀
箏慢撥月歸遲世上風波真莫測鴻飛冥冥人猶弋赭
衣忽爾作黥徒江南花鳥俱無色新安家學教商山節
義文章不等閒胥靡已入君王夢莫遣青衫淚盡斑此
詩語苦而氣不衰自是能者

汪鈍翁小詩極有宋賢風味納涼云衡門兩版掩松風

葵扇桃笙偃仰中就與孫劉相濶絕不過令我不三公
期與昭茲出游近邨會風雨不果云數里松筠刺空碧
千章楓柏著霜明暮年十事九敗意恰欲杖藜風雨生
醉中漫興云爛作清談爛賦詩也羞騎馬覓交知今年
較覺風情少惟到尊前似舊時看梅雜詩云打瓦翻盆
夜半聲幽人孤負愛花情梅花與雨何嫌怨願向東皇
乞快晴刺眼繁花惱病翁未妨排日醉春風異時莫葬
陶家側溝兆香梅萬樹中屏跡山邨是一奇斬新梅萼
裏邨扉任渠親故瞋疏濶不到花飛不合歸邨居二首
云風色微暝日影疏倉庚戴勝迭相呼數家楊柳垂垂

接寫出幽風小樣圖柴門半掩綠楊新門外呼聲聽未
眞出見兒童謹繞擔分明寒食賣餠人初置山莊云縛
帚旋除蛛網淨插籬每護藥苗新老夫到老不曉事能
幾何時作主人閒行云門前山色迴蒼蒼松鬣成陰躡
躡芳欲索解人那可得自支桃竹立斜陽鈍翁應詔曰
得一圖署曰堯峰外史尤悔菴送其南歸詩云布帆無
恙返吳閫西院東齋重伴行莫羨山中前宰相堯峰外
史有新堂其文章出入歐陽子李香子讀國初名家文
斷句云早歲清名薄草元玉遮碑版繼前賢由來三禮
編摩久不僅源流自震川謂其熟精三禮也顧茂倫吳

漢槎撰絕句詩國朝祇牧翁阮翁鈍翁三家子衡字禹
吹亦能詩漁鑑云月落空江露氣浮蘆花深處宿漁舟
寒鐙映水繁星亂夜半潮迴帶影流

後懊鳥類杜宇鄔陵以西多有之汪鈍翁寄弟摺九一
絕云梁公祠畔草萋萋王霸池邊日又西後懊不知行
客恨隔花猶學子規嗁摺九時游中州也摺九名珪以
博雅自許不多作詩說鈴錄其絕句云汝水東流馬向
西仙雲峰畔躡雲梯丹泉汲罷楓林晚亂聽深山後懊
嗁

麟閣參政詩多從征紀行之作其閨情云柳色青青淡

寫煙悶來無力戲秋千徘徊獨立紅亭下林外聲聲叫
杜鵑雲收風靜戲池魚閒步空庭出綺疏不分游鱗故
相對雙來雙去遶芙蓉亦復極有風致王文簡言滿洲
文學之開實自公始先世居長白山鄂莫和索絡之地
遞傳至其曾祖瓜喇始遷輝發祖代薩布祿又遷葉赫
南地名張尼和樂居焉幼善騎射稍長卽嗜經史崇德
戊寅拔一等秀才賜布帛

太宗不時召見講譯經史辛巳初設制科應舉居第一
賜頂帶入內院校譯會典

世祖入關與扈從授祕書院侍讀奉命編纂兩朝實錄

譯通鑑及詩禮二經卒于順治十八年葬盧溝橋西之
太平橋張文貞稱其有文武大略嘗從豫親王追擊李
自成於關中平江南兩浙從征南大將軍多羅貝勒征
閩說降鄭芝龍從鄭親王征川湖辰沅九溪十二土司
暨生苗搖獠先後受撫從安親王出塞征喀爾喀部落
復從鄭親王世子進討閩海多羅信郡王取雲貴通兵
家言以經術贊軍務馳驅兵閒者十餘年行閒飛書草
檄以及牋表露布皆磨盾立辦集中人日詩所謂尊前
綵勝煙塵外夢裏鄉園羽檄中其感時物紀風土者常
在萬里之外讀其詩亦可以知其人矣

三原杜蒼舒恆燦歷參郎紫衝賈膠侯軍府梁敏壯化
鳳鎮崇明招致之旣至以隄成出獵蒼舒卽事作平洋
沙十章立命譜入鏡歌持千金起爲壽平洋沙者懸隔
海中順治乙未秋爲張名振所據迎擊復之就海築壩
長十餘里使接入內地便戍守捐修金山衛隄得孺田
千餘頃己亥鄭成功入犯用三千人破賊數萬海氛旣
靖賓客日陪副乘飲酒賦詩蒼舒多爲敏壯捉刀注銓
通判未仕卒魏叔子李子德皆惜其才

蕭山張邇可詩如社酒寒桑落山花煖杜鵑蟲語含秋
氣龍歸來晚雲汲冢未遭秦氏火武陵豈識晉時衣愁

添白髮非春事留得朱顏是醉鄉皆見作意

傅濟菴作楫起家廣文知良鄉能於其職行取御史洊陟副憲有雪堂燕山西征南征等集陳家峪云白髮楊無敵三關轉戰勞殘生騎虎背一擲等鴻毛峪水聲猶壯陰風晝不消夕陽沾酒處有客話前朝夜發瀚海云北斗正當天明河挂馬前露沾銀甲重月照角弓圓薄伐懷周績西征憶漢年從來敵愾者兒女不纏繇烏泥圖得雨云炎征戈筆道渴極飲污泥好雨一朝得歡聲萬帳齊風清駝益健水足馬無嘶明發申軍令王程不敢稽秋雲云久客悲秋常臥病今年初起見秋雲翻將

北海魚龍氣變出南山虎豹文晚樹陰從天外合寒江
色向雨中分五陵裘馬情如許舊說荒唐不可聞永安
宮云當年此地遺明詔賣履分香一字無嗣子不才君
可取老臣如此罪當誅艱難力盡三分鼎終始恩酬六
尺孤今日西陵撫松柏青青依舊鳥空呼健筆清製可
冠蜀才

平湖陳國政紀聞詩云分茅胙土錫恩殊異姓眞王近
代無出鎮梯航供翡翠歸朝薏苡似明珠忽嘶戰馬雲
中草競棄書生塞上繻誰料九重親作詔猶煩嚙暗護
兵符粵王原繫漢廷臣復領貔貅作漢賓扉屨已聞過

庾嶺巢烏猶自噪羊城饒歌休賦遼東曲舞隊空思樂
浪春試聽海濤疑戰鼓令人千載笑盧循無諸臺畔促
戎裝猛士歌風入建章甌越江清歸漢吏烏桓海濶鎮
名王承恩舊日聯宮禁賜履新教食帝鄉莫怪榕城多
寂寞三千歌吹在遼陽元功歸國萬人歡威重名全自
古難戰伐幾年開六詔提封今日屬三韓帆揚巴水波
濤濶兵到營州宇宙寬遠卻瀘江煩熱地松山五月朔
風寒此康熙十二年徙藩時作

王輔臣本姓李氏河南人明末在流賊中號馬鷄子後
入姜瓖營順治六年英親王阿濟格克大同以輔臣爲

蝦隨入都

章皇帝親政知其才勇拔于儕伍之中授一等蝦命隨
洪南安進取雲貴爲右營總兵駐曲靖遂隸吳三桂藩
下康熙九年特擢陝西提督駐平涼十三年舉發三桂
逆書遣義子繼貞馳奏予三等子留繼貞于朝授大理
寺少卿吳日干塞下曲云固原城郭控西秦久戍經今
二十春家在洛陽城下住經年不見雒陽人使者乘輅
出玉門詔持繒帛賜烏孫爲言侍子今無恙初在京師
讀魯論爲輔臣作也三桂反大學士尙書莫洛經略陝
西四川檄隨征輔臣懷叛志是年十一月行次寧羌糾

眾逼莫洛營莫洛中烏槍沒反狀聞數出使者馳赦詔
遣繼貞齋敕諭意輔臣痛哭不願生爲左右持之而止
雖具疏謝罪而負嵎不下留繼貞不遣隴右各郡相繼
陷于賊黎媿曾詩一夜軍聲潰兩河秦亭詔下肯回戈
韓皋竟自歸江表陸賈安能說尉佗紀其事也十五年
二月以都統大學士圖海爲撫遠大將軍征輔臣賜御
用衣帽團龍補服黃帶邵子湘書事云帝京六鷁退飛
勞自注都門近有風異狼角依然紫極高肅慎幾時供楛矢離宮
何處種蒲萄孤兒躍馬驕珠勒相國行邊賜錦袍自古
秦關誇百二驚心烽火過臨洮肅慎句謂時詔百官出

弓矢戰馬也四月靖逆將軍張勇勦賊通渭復其城五月圖海大破賊于平涼城北之虎山墩輔臣窮蹙乞降復原官隨圖海駐漢中擢繼貞太僕寺卿二十年雲南平輔臣隨圖海入覲至西安以厥死聞廣陽雜記紀其事頗詳圖海字麟閣馬佳氏卒諡文襄贈一等忠達公荆門周培公嘗參戎幕有圖公輓詞極奇崛莫洛伊爾根覺羅氏諡忠愍與米思翰明珠力主撤藩者也顧黃公有紀鶴一首亦爲輔臣作王文靖夜聞秦警有感云共道祭遵憂國久驚傳來歎隕星新爲忠愍作也
惲正叔嘗謂及門曰我身後汝等宜師黎眉黎眉無錫

鄒顯吉字也號思靜晚號城南老圃善寫生兼繪山水人物少學詩於吳駿公著湖北草堂及北游山居詩秦淮句云青蕪十里嘶宛馬明月三秋聽釣歌與顧景行華商原丁西文夜話兼寄顧華峰云一座嘯歌皆有淚百年零落竟無端倪高士祠梅花云世閒那識雲林筆當日還書至正年弟卿森字衡湘顯臣字惟良顯文字衣言均工詩衡湘號犇齋宿田家句云秀眉稚子知難字折臂村翁愛夜碁以國子生終子小山宗伯貴贈如其官顧景行名景文號匏園雜言云太古斷鼇足用以立四極義固有取諸乾坤無反側四序遞乘除日月互

盈尺維皇司幹旋偏黨定於一奉行者或過於物則軒
輒急須持其衡海內得寧息卑之無高論吾言可追憶
此洞達治體之言少日作汗漫游及歸父愠甚啟篋見
楚游草有風吹鴻雁兼天下露滴茱萸滿地開之句爲
之霽顏其潤城晚泊感興示同舟諸子云十日飲酒一
日醉醉來苦憶平生歡市中屠狗盡長者東陵種瓜皆
大官時偕山僧狎鐘磬羞與俗子同衣冠且復歌呼理
懷抱公無渡河行路難志傳稱其爲詩有奇氣尤嗜飲
每飲必醉蓋有託而逃者也華商原名長發卽事云世
道茫茫未敢論每思往事便驚魂千檣影裏宵鳴柝萬

馬聲中晝閉門官路半淹三月雨人家全寄五湖村白
虹自散悲歌客阜帽于今幾箇存時蓀友對巖同入都
門有招之北游者賦詩謝之同邑陳集生布衣大成亦
菰中振奇人也有句云日月旣代謝俄頃有故新陸鐵
莊贈詩有睥睨高冠長劍客歌呼屠狗賣漿人之句

林健字子強爲永嘉五子之一贈樂成陳君云何處高
軒過弓車賁海涯賜袍唐殿使誦賦漢宮娃霧入銀章
澀霜飛白簡斜曾將憂國淚霑灑上陽花輓昆陽鄭太
和先生云吾里失歸依星躔暗少微虞翻蠅共弔丁令
鶴孤飛哭世言猶在收京事已非酌君何所薦應擷首

山薇均有沈摯之致他若王爾椒篤蕃春懷云下瀨盡
持楊僕節度關欲請尉陀纓李元發穎少同梅贊臣游
江心寺云屠沽懺悔堪參法魚鳥忘機亦聽經林占春
梅生寄懷陸麗京云桑苎翁留姓煙霞叟匿名皆佳

溧陽吳穎見末由刑部主事出知潮州輯潮州府志詩
曰萼羹堂集嘗輯閩史及溧詩選爲邑中文獻所關兄
子環字象樞少警敏從受易子嘉稷幼子大臨均工詩
向邑馬章民侍讀幼工書畫有二右之目謂右軍右丞
也與見末及史忠琇錢士偉唐明獻史燧趙綸費達芮
城彭旭彭新兄世傑忠琇之子洽聞爲瀨水十三子溧

詩選之役章民之子宥與焉宥有硯疇集宥弟容有谷
含集同時兄弟齊名者如彭爰琴彭建初皆有雙丁兩
到之目

烏程董兩若三子樵字裘夏末字江屏舫字閻仙均能
詩裘夏句如滿川風雨公無渡一軸圖書忽不貧讀騷
醉便呼奴僕看竹狂思策子孫對句皆用孟東野語江
屏哭兒二首云峽猿清晝雨沈沈病憶孱羸痛愈深誤
把三生捐故紙纔餘一骨裏秋衾煙銷劉蛻埋文塚魂
結方干及第心博得斷腸碑一統影堂哀輓字南金汲
古鉏經枉自勞藥鑪聲裏煮莊騷抱來膝上王文度看

殺江東衛馬曹友許傳文能橐稿弟思慰母諱焚膏病

夫不作多時別新點秋霜入鬢毛眞摯之思出以雅切

自是詩人之詩

原序兒名士驢字鳴遠學制舉業鏤心病羸而死時纔十九耳宗文一去長

愁之杜甫奚堪熊子重來垂老之

其寄子深云晴窗淡

墨箋朱子草閣孤燈點杜詩會取通儒舊風格唐音宋

理一莖絲蓋自道其得力之所在也裘夏登朝元閣次

韻云雲移樹影南唐畫雨洗山容北宋詞春閣捲簾人

語寂青梅如豆燕來時碧澗磷磷走白沙風迴丙舍埽

松花拈毫欲繪芝山景黛色雲巒似米家江屏雜言云

縱縱破墨點金焦意氣橫生十丈綃餘瀋別成秋數筆

小窗微雨急蕭蕭界破青山到眼詩驚人華頂句誰攜
雌黃難徇時嘖笑只學毘邪杜口詩繁哇一洗舊箏琶
解穢頻將羯鼓搗玉茗紅泉重按拍雪蕉眞本落誰家
挾髓披肝語自豪丹青贗鼎目難逃丰標縱或輸崔琰
橫槊英雄肯捉刀談天炙輠小齊州蒙叟荒唐快溟游
大塊浮青煙九點古今何處著窮愁宣和帝子六朝僧
臙馥殘膏冷畫屏步履好尋蕭寺壁楊芝羅漢鐵樵鷹
諸詩皆通畫理張鐵橋名穆善劍術畫入神妙裘夏贈
鐵橋詩有燈前宛轉公孫劍筆下驂騑韓幹圖之句嗚
遠詩如石如傲客當軒立風解留花著樹輕買得文魚

添藻養摘來春茗折松烹雛鳳聲清亦自可誦

丹徒談劬懷兆隆爲明大京兆自省長子其登滕王閣
云江流不盡古今情滿日煙嵐百感生舊勝墨痕隨草
宿新亭風景入簾明長洲非復仙人館高閣空留帝子
名三十年來幾興廢閒聽杜宇作春聲蓋自天啟甲子
三次來游故址旣移求京兆題詠不可得感懷之作也
詩如芭舞尙傳憐楚客菱歌何處引吳歛十年春草池
生夢萬里南溟海運人皆粵游時作長垣王似軒元烜
爲明兵部侍郎家楨子大梁過先司馬舊署誌感云西
風落葉下孤城一望高牙百感生河北風喧新鼓角門

前霜冷舊霓旌兩朝日月餘忠烈萬戶謳歌說姓名彷彿襄陽尋故事峴山碑下淚縱橫詩意與談略相似孫夏峰嘗爲家楨作傳故其輓徵君詩有淚溼先臣傳猶驚字字珠之句

黎媿曾秋行句云催雨寒煙當立馬投林荒鳥急遮人開春五日飲胡與叔宅云謫來天上還同隊選得名山待補人兩押人字皆響

季滄葦贈丁繼之云駐顏不信君臣藥好客偏無子母錢送祝子堅云豈有鬼巫驚夏統何勞女子識韓康

武進呂長音相國丁亥狀元授修撰順治十年以吏部

右侍郎超授宏文院大學士初大學士員缺閣臣援前
明枚卜事例次第推諸尚書督臣

世祖硃筆書其名付閣遂掌樞要恃恩偃蹇錢唐姜圖
南時官御史劾其表詞淫褻無人臣禮且庸輒不可尸
鼎席由是予告而去姜字滙思其秦亭句云怪人野鴨
聞聲沒戀子沙雞接翅回頗饒野趣

閒來結得小茅亭但識煙雲月露形
歷日不書籐葉紙
年年只記柳條青
錢唐頂去浮少司馬題畫詩也
去浮
乙未進士侍從
兩朝秉筆纂修進講經筵
歷三十年
康熙己未刑部欲改五流之例
應遣者概戍烏喇烏喇

去京師四千二百里渡黑龍江經那木色出兩窩稽號
極險遠苦寒無人居去浮時在內閣因會議力爭以爲
罪有輕重則流有遠近此地以處減死罪一等可耳奈
何欲槩施之他犯辨析數四終不能止會星變陳言已
副夏官申言之九卿仍執前說且有曰烏喇雖邊實舊
京地徙有罪以實舊京何爲不可去浮曰果爾則當用
公侯貴臣出鎮之何乃爲投禦魑魅地言者語塞乃止
不行子溶字霜田性愛滑稽族某躡禮闈爲顏其室曰
佳士軒某曰奔走公車安得爲佳曰佳士之所以未成
進士者尙欠一走耳嘗自維揚兼程十日抵京人問何

急事乃爾曰吾向未嘗包程聊試爲之然能讀書嘗于
瓶花齋見蟹錄一編客舉以問卽疏七十二條多錄所
未載者

盧文子建業懷古詩臺城繫馬一長嗟屈指興亡幾歲
華暗想靈和來植柳那知叔寶去無家銅駝雨急聞嘯
鳥玉樹春殘有落花江總銀魚依舊佩幾人能種故侯
瓜

義烏金光原名漢綵字公綯少好游偶訪故人登州游
覺華島時平南王尙可喜方舉兵略長山諸島挾土眾
航海來歸公綯陷焉一見異之欲置幕府逸去可喜追

還乃與同事三十餘年康熙甲寅可喜上其功授鴻臚
寺卿可喜子附逆夜召公絢至私室脅與共議不從囚
之逼以刃唾而詈之遇害公絢負不羈才談諧風涌善
爲詩有驛路秋雲江上雁鄉心夜月夢中山之句子以
桐十三年舉人扶柩歸絕意富貴終于鄉

義烏陳達德大孚與吳賜如諸人結八詠樓社負詩名
國朝定鼎遼陽置縣下令能招百人往者官之大孚應
募率百人者出關而東授遼陽令勤墾關招商賈興文
學卒于官詔其子瞻遠承襲亦異數也詩如詠邊二云驚
飈馬首搏沙去寒月烽邊點雁來題關壯繆廟云中原

陵寢全無漢西蜀英雄獨有髯爲吳賜如所稱賜如又
稱其甥盧士雋彥生詩雅暢清遠有隨州考功之響愁
夜云帷卷偏無月牀空覺有寒減懷思強寐起坐轉凭
闌葉墜秋風暗星懸夜雨殘朝朝長若此霜鬢不須看
送逸次兄之閩云此去君游舊從軍歎所依路歧何所
贈別淚祇潛揮山色霞關險人煙瘴海稀故園梅信好
莫待隔年歸語苦景眞自非尋常物色

洪亨九詩橫秋看劍氣躍馬渡金波坐策連雲騎親揮
指日戈氣勢甚壯孫朝宗都尉奔沔固山額駙有長虹
齋集夏日冒雨游西莊云攜來銅盞催詩思折得青蓮

當酒籌西莊蓋亨九舊業也不知卽崇文門外金魚池
洪莊否

南昌喻嘉言崇禎中以選貢入都卒無所就往來靖安
間後寓常熟所至以醫術名著有尙論篇醫門法律等
書錢受之贈嘉言詩公車不就幅巾徵有道通儒梵行
僧習觀湛如盈室水煉身枯比一枝藤管來草別君臣
藥拈出花傳佛祖鐙莫謂石城還遁迹千秋高獲是良
朋高獲遁迹江南見後漢書方技傳

歛汪舟虛中亂後清明云亂後流離賸一身歸來桃李
不知春空山白骨成新冢皆是前年拜墓人

肅武親王取碩特塔收察哈爾汗降洪承疇破流寇定
陝蜀順治五年班師以事爲睿忠親王所誣陷論死幽
繫薨

世祖親政雪其誣復爵 敕賜碑文加謚曰武墓在沙
窩門外墓上有松一株老本直上柔枝四垂周圍架以
朱欄廣可數畝俗呼架松黃竹雲有七言長古

顧赤方平西王寶牀詩沈香若山積楠梓非其儔紫花
及紅豆瘦絲交綢繆連舟入吳會徵匠來東甌造爲百
寶牀詭狀窮雕鏤回旋鳳鸞死蜿螭蛟龍愁明珠選答
納火石搜丹丘煎膠勝麟角深釭皆精鏤一柎費百萬

兩程千萬餘音叶由昆明五百里宮殿居上頭玲瓏啟八

牖靛黷飛層樓下建五丈旗欄牙拂飛旂春風送脆管
散落蓮花洲連幘作武帳紘合如雲浮縑金縷孔翠映
曜珊瑚鉤君王且端坐寶燄生琳球銜色射壁月綵女
光中游妖姬奉祕藥照骨黃銀樞有時玉如意誤破臙
脂頰平明令旨出風火馳蠻陬邊功動天子逸氣凌諸
侯當時七星關黑旆前滂滂將軍實僇力相國多奇謀
眾寶儘莊嚴不足爲汝酬朝廷正寬大少僭不見尤侏
胄宋小臣微財皆賂賅一牀奉阿母何用官家收人生
恣行樂性命同蜉蝣爲權盡今日遑惜他年憂仰看梧

桐色俯視芳草稠杜宇何處來哀聲滿林幽君王有賜
樂玉手彈箜篌請歌入塞曲莫唱吳宮秋此詩作於康
熙戊申時吳三桂勢方盛也其樂府豔歌何嘗行云何
嘗快獨無憂父爲王子爲侯五月渡瀘水不流炎蒸箐
瘴猿揉愁手闕三府開兩州日南底定歸黃圖賜傾天
府意未足錦標錢庫持牙籌水莊三百餘六十日食其
一歲可周昆池周遭五百里敕賜離宮連洱水西南君
長獻奇琛豹尾龍亭迎令旨後宮眉黛可千人翠鳳織
衣黃錦茵闈奴鷄扇從雕輪貂蟬右插金鐙橫駝雞犛
尾猩猩脣晶杵硃籜赤玉罌羅番銅鼓懸兩楹妖姬起

和春鶯聲辟邪假獸師子纓蠻兒鞞舞不得停行省中
丞昨舌語十萬強師如禁旅販商徵匠滿江湖執政不
許長秋許麓川烽火接騰衝偏師偶蹶捐成功紅旗陣
陣催金齒白旄翩翩出楚雄獨無憂何嘗快鐵瓦金書
復誰在苴蘭古道杜鵑啼時有行人下馬拜此首雖爲
明定遠王沐晟作亦以儆三桂序謂晟功高驕僭土酋
事之無異人主片紙下具鹵簿迎之曰令旨也歲時奉
獻不絕晟又興販江湖置莊田圃墅三百六十所曰吾
日食其一歲可一周珍寶充物敵天府後宮美人百闈
奴亦數百人通遺執政善事中貴卒以驕敗可不鑒哉

語極深切著明

赤方梁汾過訪句云摘詞黃絹妙封事綠牌齎謂綠頭牌也

于清端以順治辛丑由副貢令羅城其忍苦和民以至誠相感具見告親黨書康熙丁未總督盧興祖疏稱羅城在深山中獠狺頑悍成龍潔已愛民建學宮創養濟院任事練達堪列卓異遷四川合州再升黃州府同知駐岐亭署通山縣庚戌入覲辛亥大旱賑饑攝糧捕事民甚德之甲寅盜起麻城以撫勦功擢守黃州發奸摘伏有神明之目書檄申移曲盡區畫軍興旁午洞悉機

變顧黃公贈于太守四十韻云戡亂思元老時艱產異
人門閭公自大廊廟策應新書爲蒼生讀才眞席上珍
起家官象郡勦力定獯民開闢邊隅重迍邇物望伸量
遷還濮熨易地展經綸擢异宜華省何人秉國鈞光輝
占翼軫慘澹別峨岷分署岐亭小雄關柏舉蹲岐亭春
秋柏舉
地卽水經赤亭俗
譌赤爲岐音近也壺觴新父老香火舊涪津墨綬勞兼
綰黃堂蹙比鄰種花過下雋通城漢
下雋減稅到蘄春入覲
留宣室除階注紫宸獻圖聞鄭俠開廩定王恂倉卒炎
方變奔逃盜路塵萑苻何反覆山砦本嶙峋深入騰單
騎旁搜借兩甄汾陽鐵面具諸葛白綸巾苦志扶顛沛

奇謀動鬼神羣兇虜血服開府受降頻慷慨孤忠淚艱
難百戰身論兵從白髮拜命且朱輪上計蕭南郡齊名
第五倫詔乘天廐馬賜出上方縉泣網仍操斧持冰更
飲醕蕩平惟鎮靜凋瘵總寬仁地熱餘蒸涇川多太淼
泯大軍時閒道苦雨動彌旬旌幟搖青雀雷霆舞黑螭
水田愁撇捩芻藁每酸辛邑少千金室秋遭萬井涇請
蠲情敢後補漏計胡陳襍被蘇瓌儉狐裘晏子貧偏分
仁祖米自有孔融賓入夢臨臯鶴登盤赤壁鱗江山仍
錦繡詞藻見幽璘愛汝波瀾濶相看肺腑眞風霜留竹
箭雨露僻松筠節鉞巖疆地丹青老大臣居平恆許與

策力肯遠巡時妖賊黃金龍受吳三桂僞劄作亂其黨
劉君子爲謀主猶豫持兩端清端往麻城招撫距賊十
里許止宿諭散其脅從者遣一人前導自入賊巢降之
分立區保籍其勇力者督令進討斬金龍江西賊犯湖
口而逃兵陳鼎業何士榮等與合勢趨黃黃之兵前俱
遣赴荆岳無可守者清端徵集鄉勇得二千人遣黃岡
知縣李經政擊鼎業擒之賊數萬從牧馬崖來犯清端
分兩翼夾擊自以銳卒衝其中堅戰急將士懼眾寡不
敵公策馬徑前親冒矢石奪賊旗賊隨大潰禽何士榮
乘勝進至呂王城餘黨望風解散赤方此詩皆實事也

康熙二十年由直隸巡撫入覲

聖祖諭曰爾爲今時清官第一爾昔在黃州土賊嘯聚爾往招之卽時投順解散何以致之公奏曰臣惟宣布威德未有他能嘗特賜內帑千金親乘馬一匹總督兩江但騎一馬赴任見者不知爲總制也二十三年南巡回鑾御製詩有云服官敦廉隅抗志貴孤潔又曰江上見甘棠遺愛與人說素性鯁直有與之不合者以蜚語間或言旣到江南變更素行或謂但因輕信爲屬下欺罔意極憂危熊文端勛以大丈夫勘得透時雖生死不可易而聖明天鑒知其正直潔清始終如一褒卹有

加焉孫準字萊公累官江蘇巡撫

當塗卞琳楚玉與其夫人吳山岩子家青山旣轉徙江
淮無常地居西湖三年女夢珏元文工詩辭顧黃公己
丑戊子閒客杭聞其賢能精筆札杵曰是求人事錯迕
遂以不果後歸揚州劉孝廉峻度康熙庚戌元文墓草
五青黃公見其舊詩西泠閨詠題二詩志感云記得銀
屏迤邐開有人青瑣歎多才簾邊送韻衣香出湖上回
船塢雨來南國燕脂愁欲贈西泠松柏更堪哀當時空
指團圓月未下温家玉鏡臺欲喚西湖作莫愁繁華自
昔帝王州續來明月笙歌院嗚下曉鶯煙火樓弱腕題

詩心緒斷修蛾入鬢眼波秋芙蓉城較蓬山遠肯信蕭
郎已白頭元文有句云夕陽交代笙歌月曙色輕移鏡
火樓又柳去六橋春色暗雨來三竺遠山無黃公所激
賞也岩子與楚玉筆墨偕隱有西湖梁溪虎丘廣陵諸
集後彙次之以青山名多玉樹銅駝之感楚玉中道卽
世未有子岩子依女夫以老次女德基爲峻度繼室如
劉敞王拱辰故事鄧孝威題青山集云江湖萍梗亂離
身破硯單衫相對貧今日一鏡花雨外青山自署女遺
民

明故監軍道遼陽佟卜年初以進士令南皮改任河間

有惠政熹宗初坐撫順族人佟養性與本朝通謀無辜
死於獄被難時以誥命遺文付故吏後三十年公子滙
白中丞以僉都御史撫閩過南皮故吏獻之並祠其主
于學宮順治甲午顧黃公過閩滙白捧遺文出示黃公
書其後云嘗從輿論仰英風實錄三朝苦未公薊北孤
軍前化鶴遼東王氣已成龍覆軍豈爲同房瑄託國何
妨有茂弘父老精漿雙涕淚廿年今得拜新宮公子南
皮昨駐轅馬頭故吏泣何言螭碑未仆前朝物龍誥猶
藏舊主恩飲恨代閒多意外孤忠地下莫聲吞數行遺
墨分明在青史他年仗討論滙白節鉞三藩年服政輒

歸卜別墅於金陵長千里取杜子美百年地僻之句命
曰僻園宋荔裳偶倡而眾和之成僻園倡和集滙伯與
兄國鼎君持皆前明己卯舉人與黃公爲同年閩中建
國顧瑞屏錫疇詣行在拜太子太師兵部尙書賜尙方
劍督師至永嘉江心寺有總兵賀君堯不法瑞屏責杖
四十釋之至夜君堯遂害瑞屏投屍江中降我師時君
持在軍中以先人故德瑞屏至深乃支解君堯以祭當
養性獲罪時佟儼若之高祖儒齋家遼陽爲捕按者所
魚肉歸命於法子養義字直菴徒步相從與弟養歲弟
子純年煢煢異地父子祖孫無完卯詳見儼若所爲三

世行略桐軒尙書讀伯祖卜年幽憤錄云吾姓明初始
著佟兩朝開拓振關東攀鱗直遂英雄志殉節難忘國
士風身後文章猶砥柱生前骨肉盡飄蓬藁街百口當
年慘痛仰精誠異代中清明禍及在誰躬曾祖緣親實
路窮撫順全家悲失散鎮江舉室奮孤忠天哀遺子能
傳業地定流人喜再逢孝友轉思先大父傷心把卷誦
難終曠代名儒竟不伸冤歌聊達性情真浮生只此留
天地已死猶堪泣鬼神家法似將遺後輩少陵終不愧
前人浣花欲卜他時老汨汨風埃未有因當明季合家
被仇所陷佟忠烈養正爲桐軒曾祖去之本朝殉難遼

陽鎮江堡長子亦死孝桐軒祖勤襄公圖賴寄養同宗
幸不及難值混一區宇經略楚地康熙閒追封一等公
賜功宗元祀扁額滙伯居江寧爲南支桐軒與悔翁皆
勤襄公後爲北支佟氏自北燕時遠祖曰萬曰壽者俱
以文字顯至明洪武佟達禮以邊功加秩指揮同知世
其爵入本朝有隸滿洲者有隸漢軍者乙酉王師至杭
顧漢石守錢塘城破被執百姓爭擁圖賴固山卽佟
署呼號求貸固山方仰臥牀上聞呼聲漸眾恐生變掉
頭內向日決了罷遂將出行刑君持兄弟嘗爲黃公言
圖賴固山之殺漢石也初以不知及審知顧氏乃拊膺

大慟黃公謂固山縱不殺錢塘錢塘肯苟活哉當時大
義私情各行其是亦後來所無吾獨怪爲託活絡忠敏
公作行述者謂資州入成都止數日程使當日併力前
進則某某諸人皆忠敏電請釋放之人宜可保護而不
至於死或不然而微服出奔順流而下鄂中多舊部未
嘗有加害之心亦且不至於死噫是何言哉惜不能用
黃公此語以瞑銜冤之目也

世祖惠民益下昭儉德以示子孫順治八年以督催織
造官役騷擾遞罷之停陝西織造裁褐妝蟒卻江西造
進龍盃曹木欣學士雜詠云盧橋新傳罷漢中尙衣聞

道滅花絨諸州節使休蠲助 聖主清心在合宮明季

宮府服御甚奢工作亦廣宮中脂粉錢四十萬兩供應
數百萬兩宮人九千人內監十萬人入關以來侈飾冗
費始悉除之各宮服用不及當時妃嬪一宮之數王雁
汀尙書石渠餘紀卷首卽紀節儉知 列聖繼承皆以
尊尙樸質爲首務也木欣黃岡人號厚菴官司業時應
詔上言宜開經筵討論經史以廣業崇德一切章奏事
宜必面見輔弼大臣面議可否獎廉而禁貪藏富以足
用十二年舉行日講木欣充日講官十四年 詔以易
經義精用博採擇先儒注釋勒成一編與聊城相國司

其事九月肇舉經筵充講官纂修歷代通鑑康熙二年卒

張簣山講學順治戊戌進士第一重九入青原詩有訪僧須諱酒登塔最宜晴之句康熙閒嘗言大臣巡方徒擾百姓無益察吏安民當責成督撫如浙撫范承謨東撫袁懋功中外俱知其賢當聽久任今承謨以疾解任懋功移補浙江臣心惜之時方以憲臣言禁出位言事部議降二級用然卒罷巡方之差而忠貞留任清獻仍故官簣山引疾歸廬陵王山刻苦向學著庸書二十卷光緒初年嘗以一歲之中疆臣強半去其位雲貴總督

劉長佑雲南巡撫杜瑞聯則以崔尊彝案去東河總督
梅啟照河南巡撫李鶴年則以王樹汶案去陝西巡撫
馮譽驥江西巡撫李文敏貴州巡撫林肇元則以不職
去兩湖總督涂宗瀛廣西巡撫裕寬則爲言者所中以
疾去兩廣總督曾國荃浙江巡撫任道鎔則以事內調
王言輕于上督撫輕于下致亂之階實基於此惜未有
以贛山之言進者也

吳漢槎燕支山辭燕支山色青崔嵬翠蓋雕輪夾道開
天畔銀河公主第邊頭金帳單于臺烏孫干馬親呈聘
鸞釵九女爭來媵舊匹由來締賀蘭和親詎是因婁敬

築館玉庭奉義成
萎蕤綠綬曜丹纓
自有威儀尊鳳女
特分湯沐在龍城
蛩蛩幘幘開行殿
紫駝白豹窮懽宴
金笳激調劣吹簫
珠帽流光罷遮扇
從官新給羽林郎
挾彈鳴鞭繡轂傍
旌飄蘭葉銀平脫
馬簇桃花錦襜褕
射生女騎何輕利
翠羽紅妝映天地
窄袖雅青綴北珠
輕鞞鳴綠裝西罽
羌管胡琴晝夜喧
貂袍三襲不知溫
自矜帝子金鄉貴
不羨名王玉塞尊
名王舊是呼韓裔
尙主中朝稱愛婿
好獵頻徵鳴鏑兒
酣歌偏惜琵琶伎
琵琶小伎珊瑚唇
歌舞朝朝粉態新
祭馬每陪青海月
射雕常從雪山雲
可敦嬌妒還猜忍
同昌那得犀纒忿

帳下纔驚一騎來，杯中已見雙蛾隕。短轅不子恨驅牛，
腸斷狂夫淚莫收。自甘髡面哀紅袖，不念同心歎白頭。
荆棘滿懷相決絕，雙垂玉筍霑襟血。龍種寧同葱薤捐，
燕飛欲作東西別。妾意君情各自流，鴛鴦文彩掩衾裯。
卻分蕃部西樓去，別是秋風北渚愁。黃砂深磧連天色，
可憐相望誰相憶。千里金河怨別離，經年銀漢無消息。
八月穹廬白雪高，玉花寒枕夢魂勞。販珠無復求朱仲，
綠幘寧聞待館陶。海西沙門術何祕，白馬迎來布金地。
畏吾字譯貝多經，龜茲樂奏蓮花偈。灼爍禪鐙著曙明，
仙梵風飄夜夜聲。黃鵠歌中思故國，青鸞塢畔懺他生。

妝殿何心理殘黛空王飯禮應憔悴已分猜嫌任姣童
誰憐調護來諸妹弱妹盈盈隔瀚源黃雲千騎擁朱軒
判翼每嗟鸞鳳侶迴腸偏繫鶴鴿原錦車銀積何迢遞
姊妹相逢自銜涕爲歎姮娥奔月來卻教須女驂星至
相勸殷勤向玉眞莫將濁水怨清塵苦辛應憶回心院
嫵婉須諧結髮人故人歡愛從今始五色羅襦織連理
重畫脩蛾待粉侯休吹別鳳悲簫史願作流蘇結不開
醅酥雙勸合歡杯五部大人齊入賀萬年公主竟歸來
從此歡娛莫相棄上如青天下如地入貢還脩子婿恩
降嬪莫負先皇意回憶先皇草昧年旌旗北屆阻柔然

欲將玉女傾城色遠靖金戈絕塞天絕塞西來平若水
三朝屢訂施衿禮異錦蒲萄出帝家名駒昔藉通燕市
今上彌敦兄弟歡迎歸旌節徧長安龍首貴宮申綺宴
螭頭中禁並雕鞍千秋天屬恩寧歇賜予年年下雙闕
沁水園中歌吹塵祁連山下氍毹月氍毹寶幄映重重
貴主籟華樂未窮莫道芳菲邊塞少春風弄玉在樓中
案嫩江水濱科爾沁汗奧巴先諸蒙古入朝天命十一
年以貝勒舒爾哈齊女孫妻焉授和碩額駙封土謝圖
汗旣而奧巴屢違約私通明天聰二年將征喀爾喀徵
其兵不至使侍衛索尼阿珠祐齎敕責之時奧巴居別

室索尼與阿珠謁公主以諭旨告奧巴聞之扶掖至
佯問曰此爲誰索尼曰吾儕天使也爾有罪義當絕今
之來問公主耳奧巴趣具食索尼阿珠祜不顧出奧巴
恐使台吉塞稜等請其事索尼出璽書與之奧巴使其
大臣環跪請罪翼曰辭以足疾欲令其台吉入謝索尼
曰汝欲解罪而使人行吾豈取拜思噶爾等來耶奧巴
乃使人請曰 上怒使應肉袒謝懼不容耳索尼曰
上覆載如天地汝果入朝雖有罪必蒙恤奧巴乃叩頭
決計入朝奧巴叔父莽古斯孫滿珠習禮尙郡主漢槎
詩所謂姊妹相逢蓋指此奧巴爲右翼中旗莽古斯爲

左翼中旗所謂瀚源之隔也科爾沁列內札薩克二十四部首世爲柝附禮崇媼戚土謝圖親王達爾漢親王卓理克圖親王札薩克圖郡王等四爵俸幣視他部獨增 純廟入科爾沁境詩云塞牧雖稱遠媼盟向最親嗣徽彤管著緜澤礪山申設埃巖暄沓清塵奉狩巡敬誠堪愛處未忍視如賓自孝端文皇后以次列朝外戚有大征伐必以兵從如親征噶爾丹及勦策妄阿喇布坦羅卜藏丹津噶爾丹策凌達瓦齊諸役效力戎行厥功懋焉達爾漢者有勤勞之謂滿珠習禮賜號也

康熙甲戌

十月朔午門頒歷科爾沁等二十四部落始注入日出度數之下

廣寧秦瑞寰中丞世楨於順治八年以御史巡按江南時經兵燹後經界多冒亂官爲丈量胥役藉是舞弊瑞寰令里長編魚鱗冊召田主自相丈量悉復其舊州縣徵賦故多溢額至是給民易知單示以科則定數又每甲彙列賦額及輸戶爲滾單里長按戶遞傳旣輸則注之違則送縣追比令下蘇民大便之遂條列以聞通行諸州縣異時徵糧擇富民爲糧長漕卒恣意凌藉當之者家立破請改官收官兌其弊遂息會巡撫土國寶贖貨私徵賦稅動大萬列其罪狀以聞 詔與督臣會訊國寶自經因奏免國寶所徵諸稅十一年擢浙江巡撫

梁玉立贈之以詩有墨吏已聞爭解綬萬家弦管徧江
東及惠文彈事冠中朝擁節東南促去輶之句吾鄉先
達以開府立功名者如福建巡撫劉漢祚招撫山寇林
文魏賜勦破海盜陳德容招降僞官李鳳何傳鄭飛熊
林文隆審虛周櫟園被劾貪酷諸款櫟園得免死起用
王宏字中丞來任以天聰八年舉人累官廣東巡撫疏
陳六害曰夫役曰民船曰采買曰私抽曰誣盜曰擅殺
疏上允行次第禁革易簣復陳三事曰裁省糜餉之兵
復還瀕海內遷之民撤橫石磯關口粵人爲立廟祀之
佟陸海總督養甲乞罷采珠之役謂產珠地惟廉雷二

郡取珠之法用長繩數百丈縋蠶戶入池往往果鯨鱷
之腹所費甚繁得不償失況今才遺之餘豈復堪此疏
聞睿忠親王召使者還吳慤僖景道撫河南除荒田之
稅輕其徭役去官之日橐無餘金蔡襄敏撫江西時朝
廷方有興作或言廣信封景山產木疏言山故盜藪久
封閉且路險木難致不宜擾民乃罷郎一柱尙書廷佐
督兩江時鄭成功陷鎮江犯江寧守禦單弱會副都統
噶楚哈等從貴州凱旋邀入城共擊賊敗之成功親率
眾逼城連營八十三艘檄梁化鳳與各路援兵水陸並
進大破之賊在鎮江瓜洲者皆遁入海江西總督張朝

璘疏奏南昌浮糧與袁瑞二州一體豁免浙江巡撫蔣國柱蠲免寇訖以來荒田銀米諸衛軍興時加銀數積欠正項錢糧王繼文在茲撫雲南請減黑鹽井月增鹽課屯田重額減則起科民間荒地亦照原則量減王磐石侍郎國安巡撫浙江躬履濱海邊界朝議欲棄舟山徙其民力言不可督閩卻琉球副貢內遷時閩人遮留不得贖金贈行不受閩人爲建卻金亭郭昌伯司寇世隆督浙閩毀淫祠督兩廣除無名之征瀕行卻鹽商羨金八萬之贖當開國之初人才輩出如沈大令光榮官河內仁慈莅民有李家窪者地斥鹵數逋稅爲引溝渠

開稻田招流民復業給以牛穀種改名藏富邨其後遂成沃土家靜山光祿秘康熙中知固安縣故事永定河秋汛興工永定道黃賦役錢不均遲延及冬朝涉者股戰光祿憐之許日出後下鑿黃巡工欲咎遲來者力爭不得乃直前牽其馬至凍處曰公能往民亦能往此時日高春公重裘尙瑟縮乃責此赤脛者戴星來耶黃大恚李文貞爲解釋之調宛平老幼爭乞留遷曲靖知府調麗江民飾廟以祀號第一太守祠彭允初詩好官若珍珠得者懼或奪誰能塵如傷太息此無褐紀實也

桐鄉周孟侯著有莊子影史離騷草木史詩文曰聖雨

齋集田家云縮髻學吳女紅花向鬢開借機攜杵出汲
井抱甕來洗葛揉梅葉漚絲治蛤灰老姑催瓦祭趁月
壓新醅不羨勞人肉一蔬聊自厭治瓜紅杏蜜燒豆紫
蘇鹽魚骨占風雨鶉羹試苦甜瓦盆吾願足時復喜丁
添爲圃仍秋晚閒來息耨鋤菜殘不似甲瓜老欲爲魚
羊角懸婚酒牛衣曬道書幽懷吾自貴碌碌笑簪裾閒
適詩亦以奇麗出之另是一種筆墨其小游仙詩花影
覆棋陰未轉誤人柯爛不成樵所感甚大其非岸上人
精藍句云磬聲依竹住月性與僧謀語極幽雋與陸仲
昭詩雍爲友仲昭酬沈恤部子先云桂棹蘭橈束兩頭

送君愁共水爭流參差吹罷芙蓉雨雲鬢羅衣不耐秋
亦有致當明之季同里沈槎墨亭張伯升超廣言方起
兄弟孔文在自洙稱桐川四子已而偕朱潔湘萬錡及
石門錢叔涵人詡爲六子潔湘有惠風堂集僧房看蠟
梅云風光浪擲惜年華已見新黃作異葩仙骨夜涼偷
玉笛小香冬暖透鮫紗座無俗客妨佳句庭有幽禽守
凍花都說上陽金谷好如何及得老僧家以教諭擢樂
陵知縣文在己丑成進士累官荆西兵備副使伯升乙
未進士一宰華亭賡言辛丑進士官江川縣獨墨亭秉
德肥遯晚年閉門學易兼悅禪理悲憤詩及和少陵詠

懷諸作慷慨歷落其清節尤不可及次皮日休訪陸龜
蒙不遇韻云晴墟煙煖竹籬斜蹋雪來尋甫里家閉戶
惟遺堆徑葉窺簾還著供瓶花已聞處士宜除令亦號
徵君未賜麻百世自當逢賞鑒太元何必重侯芭當與
邑人梅花逋客沈機青堆布衣張炎貞梅花逸叟馮允
秀合傳孟侯子案展臣孫雲杼補菴能世其學補菴以
歲貢官錢塘教諭結詩社于學舍西泠知名之士樂與
之游性尤慷慨仗義仁和沈端恪近思家力農生九歲
而孤困乏寄食靈隱寺補菴器之力贊其應試及案發
獲售寺僧卽欲閉門披荆補菴預伺之率眾突入挾以

出得補錢塘博士員復延至學舍朝夕講肄親爲督課
康熙庚辰遂成進士端恪旣尊顯猶敬執弟子禮焉彭
芝庭撰端恪墓誌謂端恪家貧游學靈隱有借巢老人
者資之讀儒書杭大宗神道碑亦諱其爲僧事全謝山
記端恪以吏部侍郎獨對語

世宗爲之改容固自言少年潦倒時逃於此也吾鄉柰
曼世臣皆端恪門人

高陽李文勤爲宰輔二十七年自翰林登政府年甫三
十有匹同時并研胡公世安曲沃衛公周祚皆以尙書
入閣獨公由祕書院學士超拜大學士未幾改東閣大

學士次年坐票擬失誤降調居三月召復原官

世祖臨御久知人善任亦時以恩威示不測如此文勤
心遠堂集擬宮詞云惆悵樓東薄命吟昭陽日影夢中
沈當熊辭輦恩難恃落葉哀蟬憶反深自昔丹青能易
貌何人詞賦可回心春風著意鳴鶗鴂紅雨千秋怨不
禁新縑故劍易生疑濁水清塵兩不期爲問絳紗初繫
日何如金屋退閒時照顏不夜珠無色樹背忘憂草有
知縱道君恩深似海波瀾洄復使人悲皓齒爭妍滿六
宮專房敞席幾人同蝶隨香袂時時改柳引羊車處處
通歡極那知蓮漏促寵移不待玉尊空當筵一奏秋風

曲始信君王是化工洛浦明珠鄭國蘭千秋長擬奉君
歡同游正墮雲間翼獨舞俄羞鏡裏鸞七寶臺高終怯
步六銖衣薄詎勝寒鉛華不是承恩具斟酌蛾眉畫愈
難

熊次侯未牧仲下第歸商邱云祇爲秋風續楚歌天將
宋玉故蹉跎承家不在科名蚤落第眞如噩夢過懷有
雙珠泣白日囊餘一劍渡黃河羞稱獻納空揮淚皤鬢
蕭蕭木葉多魄力沈邁不徒以經義擅名

漢陽吳文僖相國字當世號賡菴有句云流亡未是歸
來少丁壯其如戰後孤自是大臣之言同邑蕭文超明

經企昭嘗從顧亭林游與兄文遠齊名熊文端稱爲二
難文端有送文超還楚序所著書嘗引其說詩如晚晴
云風過層雲開恍惚明薄日樹枝靜不號遠山青漸出
漁唱登虛舟歸牛去復寂吾心亦已清焚香坐茆室浩
然思古人曠志誰爲匹極見澹逸李能哲惠伯嵇侍中
墓云江左可憐無末路竹林誰復有佳兒劉順昌九來
送陳孚尹還襄陽云神武雖懸宏景幘襄陽仍重浩然
詩亦復清切王戩孟穀執贄漁洋之門有突星閣集蔣
魯傳東衍句如風聲撼石壁花影出孤鐙石氣晴生雨
山根雪化泉學古幾時書可用閉門莫厭酒難醒項翽

西階句云人語前谿爭喚渡雁裝千里不羈程皆能自
出機杼至李以篤雲田高才淪落自號老蕩子多寫羈
旅無聊之況本事詩婦人集每紀其軼事可以等諸自
鄙矣

孟心亭尙書家永平崇禎庚午

文皇帝兵入關杖策謁軍門屢從征伐順治甲申帥師
追李白成下河北三郡踰太行出河東遂指嶠函底綏
雍涼重開井絡偏裨多至大將或爵通侯九年由陝西
總督入覲京師賜內廄御馬詔行馳道魏敏果詩督府
從龍彥三邊叩闕臣蒼生勞白髮紫塞斷青燐不有麒

麟畫馬知鎖鑰人當年兵入晉談笑大河濱帥秦十載
省兵擇吏開屯訓農性不甚讀書每令人誦文書於側
坦腹聽之鼾睡如雷偶誤一字輒驚寤曰誤矣人以爲
神甲午薨於位諡忠毅新城司寇謂其少倜儻任俠嘗
夜取父國用廢馬渡河匿杜氏遂之京師鳴弓擊劍鬥
雞走馬諸勳戚小侯爭邀致之狀貌偉碩射必洞札天
造草昧其樹立非偶然也

會稽姜二濱府丞希輒由元城知縣入爲工科給事中
屢陳百姓疾苦勸

世祖以寬大爲治時土疆新闢多逋稅催科者并新舊

征之二濱言量地所出止有此數移新補舊將并新而
逋之矣嘗請恤旱災因言有司酷罰之弊曰贖杖本用
輕鑲今倍五倍十小不應命鞭扑隨之是罰以省刑而
反以黷刑也時有司多以捐俸得紀錄二濱言如此恐
有司營俸外之金旨非分之級是教貪也又言逆賊歸
命不當遽授顯職其切直多類此蕉林相國送姜定菴
都諫還越云黃門南夫奏驪歌急雨蕭蕭下潞河禁闥
誰能憂國切朝端共識讜言多九霄綸命高卿月三徑
歸心憶薜蘿宛委山中秋色好趨庭樂事更如何鄰居
時共坐斜曛忽漫河橋雁羽分水驛月明停畫舫燕關

日暮悵江雲上林諫獵文章貴海國移軍戰鼓聞知爾
鋒車能早駕不堪離思轉紛紛順治閒言事之臣如陽
城田兼善司農六善官御史請弛馬政勸廉吏經筵進
講爲時甚暫請于閒燕之際日理經史以爲出治之本
孝陵懲明季之弊敕責臣下沽名市恩令對狀諸臣
輒惶恐引罪山陽徐山琢侍御越上言諸臣精神智慮
但保功名每奉敕回奏僥倖無事推其初心有不盡然
者畏懼之念轉爲推諉萬幾叢集專恃獨斷所關治忽
非淺請召對大小臣工並許反覆指陳寬好名之禁以
厲中材留死徙之刑以待大慝天下幸甚先後論河漕

事十六疏陳利害甚悉皆可紀也

磁州李長六大令鴻勳入泮最晚明制年二十不列于
庠服飾卽同市井例戴瓦隴巾子長六恥之鍵戶下帷
寒暑無閒時或擲巾以足蹴之年三十餘始青其衿順
治丙戌成進士有過閔子故里詩云數十閒茅屋人傳
閔子家秋風吹不斷滿地有蘆花同里張上若庶常潛
爲明大司馬鏡心子手輯鏡心雲隱堂集二十卷梓以
行世紀以詩云遺文忍痛再編摩手澤依然歲月過五
載高牙開嶺表一朝微服渡渾河韋經閉戶丹鉛久諫
草篝鐙涕淚多廿帙猶存心事在千秋憑弔復如何其

讀書堂杜詩注解閱二十四寒暑五易稿而成子子大
閣學生於司馬端州署中地多榕樹因命名榕端康熙
丙子督學江南任宗伯蘭枝方望溪黃際飛皆所甄拔
庚辰預治河之役四年工次泥塗樅櫂槌石沈河卒以
塞決癸未召還甲申歸里有天路曾驚車九折柴門無
事日三竿之句樸園者司馬功成游息地子大告歸就
遺址築室因以自號王石谷爲作樸園圖米紫來侍講
勵文恪杜訥均有題詠弟子久博士橋恆亦能詩
普定梅氏世傳文行鳳陽僉事多以萬歷鄉舉官良鄉
教諭遇異人贈詩云一枝先報江南曉次第清光徧九

州蓋示 龍興不遠及王師取南京遂歸隱丁亥孫可望陷安順二子士良士舉得免人以爲累代士家有天祐也壬辰可望挾永明居安隆自是不國桐梓傅澹方爲賦杜鵑行

仁和金夢蜚大令漸皋崇禎丙子以毛詩舉於鄉有黨魁之目國亡遁跡斷半髮作頭陀相九月晦日詩云雙丸互升沒人事有通冥不自我後先游魚墮烹鼎天寒憎嫩高壁澀蝸涎挺計成棧豆戀心媿驥足騁蕭然莫莢落感此身髮等青銅持照影秩秩如列町肯拔揚子毛庶摩墨生頂微服規聖智啜醜惡賢醒警猶治棼絲

聊用解其紊幸留碩果食敢效小夫悻旣而徵詣公車
登壬辰進士得刑臺令再任漢陽未五十謝病乞休平
湖陸話山亦名在復社甲申六月納巾衫閉門卻軌久
之以歲貢生謁選知汝川縣事當阮大鍼居白下南國
諸生顧杲等一百四十人具揭攻之不數年大鍼柄政
諸君子多挂黨議話山不與焉與夢蜚皆不能隱居終
其身以視周仲馭吳次尾沈崑銅有閒矣

梁蕉林送冀公治大司空歸廣平云洛水尙書振袂行
重開三徑向秋清漫將薄譴論榮辱祇惜仙班去老成
廿載緇塵歧路話一尊涼雨故人情每憐拙宦稱同調

愁聽陽關第二聲公治一字鎔我居廣平之永固村由
刑部主事擢至左都御史有申明內外職任之要嚴有
司初授之法請禁奴僕首主直陳鹽政害民諸疏嘗奏
獄訟繁興皆由於砌款黏單豪猾捕風捉影羅富民以
媚貪吏一狀裝十數事一事累數十人貪吏借懲姦除
暴之名縱擇肥魚肉之計迨志滿慾飽從而假以威勢
分以脂膏貪猾相濟良民何甚至有革汰逃兵砌剋餉
以告將領甲外游棍砌橫征以告州縣挾私行詐凌犯
日熾臣查砌款黏單例有嚴禁但日久廢弛請赦內外
各衙門除所告不准外仍治以違例之罪下部議行陞

工部尙書康熙丁巳解組歸其知襄陽府時居民王宣
治夫婦夜被殺廉賊無迹越三日夢中若有人語曰小
北門失火問之無有復臥夢如前頃之果得報策馬往
救適有盜人臥衾者爲邏卒所獲以愬公公心動叱之
曰盜衾小事殺其夫婦者汝也其人怖服鞫之果得實
一郡驚以爲神王文靖有送同年冀太守任襄陽詩
世祖虛已勤學手不釋卷數幸內院與諸臣討論古今
建直廬於景運門令翰林官分番入直以備顧問梁薦
林有感六首之二云圖書東壁已封塵筆札猶傳御墨
新卻憶苑南開講幄夜分中使召詞臣憶昔甘泉扈從

時天閑上駟試教騎停驂前席虛清問咫尺龍顏日影
遲幾餘游藝翰墨每以山水畫幅頒賜大臣通方西聖
游戲三昧化鹿山傳鐙寺本古平陽觀順治中爲木陳
敕建木陳本號忞公應詔入都賜號宏覺國師有御
繪宏覺禪師像畫老僧長約六尺露頂正立髮純素純
毳覆額面成短圓鬚亦無一元莖壞色衣卷袖卓錫過
頂尺又半咫履足隱跣衣紋稜稜折鐵如歐虞隸畫李
愛伯詩二百年來選佛場喞音猶自祝章皇松迎峰
勢排空待雲逐鐘聲過嶺忙盛世道林容講席名山元
英有經房迎師訪道新朝事閒聽闍黎話夕陽寺中又

有御賜一聯句爲丈室宜春到雲堂愛日臨十字王文
簡游善果寺詩注壁上有 御書唐詩一首自署臆菴
道人嘗以指上螺紋成渡水牛賜中官某嗣藏宋牧仲
家文簡詩神武十八載文教洽重譯干戈與弓矢包用
黃牛革小雅賡宣王爾牛何濕濕旒旃牧人夢考牧周
官職應知翰墨餘與世登衽席龍髯去已遠謳思徧荒
僻南苑元靈宮有 御製五言排律御撰諸書如周易
御注人臣做心錄勸善要言敕撰者如資政要覽孝經
衍義實開一代文治之先焉

正定梁慎可兵備維樞著有玉劍尊聞記有明一代軼

事其送魏環極給諫歸養云錫類逢 英辟恩俞省侍
行養親須令子名世尙清卿忠孝傳家譜文章狎主盟
追鋒何日駕輿望有餘情敏果由丙戌庶常改授給事
中條奏彈劾凡二十餘上會故相溧陽得罪坐事未發
不先糾舉六科之長皆鑄級黜爲詹事府主簿稍遷光
祿寺丞己亥乞養母太夫人以去慎可詩作於是時

鄞胡道南侍御與李杲堂束髮同研席其後出處不同
道南以進士起家出佐郡召入諫臺杲堂杜門著書道
南以內擢休沐里門重過杲堂方撰甬上耆舊傳并錄
其遺詩手稿填席道南因盡取所藏其商去取其畚杲

堂記事詩云誰向生前識子期要從隔世敘相思愛奇
肯負驚人句嗜苦偏尋走盞詞殮螿飽魚深可惜鑊金
題玉轉無奇昔賢留得靈光在蹋斷荒崖拾得詩百年
寂寂少心知賸骨蒼茫有所思碧落也須傳好句黃墟
恨不答前詩殮多石髓常逢異鬪徧芝苗定獲奇某在
千秋應一遇可如飯顆見君時杲堂序謂凡先賢士大
夫名章軼草有傳有未傳以至單門處士蟲稿鼠篇無
不走訪其婿萬允誠助之訪錄道南子德邁杲堂子暉
其事校讐集中載葛邏乃賢詩本回鶻部人來居鄞其
詩遂稱江南一絕葛邏祿譯言馬也同治閒董沛覺軒

徧讀家藏書復求之同縣煙嶼樓徐氏抱經樓盧氏天一閣范氏繼至杭州借文瀾閣書閱之輯甬上宋元詩略十六卷采諸先輩之詩各注所出凡二百八十餘人較臬堂耆舊集宋元兩代多至八倍甬上明詩略二十四卷本李氏全書而別采他書附益之甬上詩話十六卷亦采諸家之書間附已說光緒辛卯潘嶧琴學使續阮文達兩浙輶軒錄覺軒輯四明嘉道後詩凡九百餘人上之以局於卷帙因復輯國初至今別爲四明詩以益前後輶軒錄所未備可謂勤矣

奚蘇嶺同知與杜于皇爲中表于皇見訪書扇與之云

不以行藏異來探久別人艱難如隔世涕淚共相親
箇裏梅花落江頭燕子新相看逆旅豈是故園春松柏
先人地文章弱冠時只今春作夢可惜鬢成絲產破關
河在憂深笑傲危莫貪建業好忘卻武昌思詩境與茶
村相近憂深笑傲危句尤爲警動以進士官江蘇有知

津堂集

朱竹垞金縷曲送陳參議祺公之官廣西云雁塞分襟
驟七年來關河迢遞合并難偶草草殘春相逢乍通路
亭邊攜手恨不見李生良久待踐深秋雞黍約奈悤悤
畫鷁津門口萬里別一杯酒丹砂此去鄰句漏沂蠻江

人家兩岸綠榕紅豆才子從軍繇來事況是黃金懸肘
擁千騎弓刀前後聽取連營長短笛譜武溪一曲南征
又嶺外嶺柳州柳祺公名上年清苑人順治己丑進士
官廣西布政司參議逆寇破梧州迫以官殺不受幽抑
以死事聞優卹其題馮秋水方伯四知園句云右軍非
汗漫彭澤本英雄頗爲有識高陽李澹菴如滂令鄴都
吳三桂反不受僞職收羈三年乘閒脫歸其讀邑志忠
烈傳有云大厯猶然疑許遠明皇竟未識眞卿澹菴祖
父皆明末死于亂也崔蓮生令開化遭耿逆之變城守
武弁潛蓄異志與賊黨通蓮生親率義勇奮殺賊眾五

十餘人餘黨望風遁去完保疆圉有越西行紀其事詩
云越西之疆古姑蔑南走滇黔右兩浙萬山迴合抱孤
城一道金溪沸奔雪狂氛一夜吹黑雲閩關以北無堅
屯國家承平三十載卒見烽火皆崩奔彈丸小邑千巖
底踏之直用鞞尖耳城存與存亡與亡不死猶圖報

天子奔走風塵萬嶺閒齧指血濺蟠桃山浮圖一矢賀
蘭志誓不與賊生同天仰天叩心天鑒此收城豈雪生
民恥百里提封謝 主恩孤臣待罪甘心矣十年長吏
媿蒼黎亂後還驚有子遺君不見月波亭上清秋魄依
舊含情照越西長興鍾子佳太守明進廉州城樓抗逆

詩寸衷方欲固危疆豈料羣謀盡虎狼
濺血自甘同太尉矢心寧便讓唯陽
城頭慘淡黃雲繞海角陰霾白日
藏自歎書生難報國惟歌正氣勵
肝腸其後淹留轉徙僅乃得歸鬱
林除夕句云萬里鄉心何處達夢
歸猶恐過廉州子佳與祺公同年
進士也甲寅閩變溫處道陳公丹
赤與永嘉令馬公璵同時殉難馬
公子陳情行在特恩賜諡忠勤沈
麟洲詩一官迢遞到巖疆閩海烽
煙正擾攘此日陳豨終負漢同時
南八自忠唐三年亂定聞家祭兩
字名尊慰國殤廟社靈旗應儼在
清魂千古戀桐鄉同時死節者福
州知府王之儀建寧同知喻三

畏侯官知縣劉嘉猷福州城守千總廖有功漳南巡道
陳啟泰建昌知府高天爵丹赤字獻之侯官人啟泰蓋
州人同諡忠毅獻之辛卯鄉薦士啟泰丁亥貢士天爵
鐵嶺人贈太僕寺卿文恪公其位尊人也

永年鄭子勉大令茂有竹邊樓詩草其曉日當窗暖飛
塵亂隙光一首爲申臯盟所稱

吾鄉詩人國初稱盛樂府如吳伯成望遠曲五古如范
觀公偶成曹子清歲暮遠爲客七言如范允公擣衣篇
席允叔孤松歎均見風格律句如李文淵再復紀行云
囊空鐘僕笑徑僻友朋疏過清浪灘謁伏波廟云古廟

寒松影殘碑社火秋席允叔冬夜云靜極翻千慮愁多
祇一身卞月華客夜云半窗邊地月滿枕故鄉情范允
公八月送友人還山云遠山孤樹小隔水亂鴻飛卞謙
之初秋發夜郎云石危鳴瀨急峰削斷雲低姚熙止黃
村看梅云正宜明月上不礙白雲歸亦皆可誦

貴州以順治十五年入版圖思南太守歙人葉蕃招同
同守黃州彭永祐司李澧州常時泰縣尹雷其龍參戎
熊虎登中和山鄉里諸人如謝副使國榷敖主事鳴雷
陰助教旭冉舍人學滙蕭太守其澤皆亡國遺黎猶得
攬勝聯吟以曲徑通幽處禪房花木深分韻諸君曾仕

永明亦不以爲嫌 國初寬大之政自非往代所及參
戎詩豈有師臣力逢時得晏然習池堪繫馬陶徑待依
禪草長漁蓑重花垂錫帽偏鬪分餘競病何似景宗傳
亦復可誦貴陽吳滋大中蕃舉崇禎壬午鄉試桂王自
粵入黔尙紀其敘外厯令守內列省郎雲貴平奉母棄
官吳三桂反卻僞聘殘朝薄宦抗志西山晚號今是山
人以逸民樹後生標準周漁璜劉道闇皆自諸生得獎
借成名從桂王播遷時方密之贈以硯三桂聘之不應
使人脅之乃佯狂擲硯於市始免三桂平拾硯補綴以
後詩文曰斷硯草以前曰敝帚集海宇旣一應聘修貴

州通志當事欲薦之復固辭自置生壙以待死其紀夢
旬云事皆未了無如母難不相從已後君康熙之治比
隆三代滋大雖躬耕養母義不復仕而歌詠昇平屢見
篇什聞詔云聖主憂民無不至今日欲行古時事東封
既了巡南地翠華常帶甘露沛捐租減課兼除弊宛然
父母爲子計猶恐荒遐未霑旣飛書列款纖毫備詔省
狂獄清冤滯老農亦加粟帛賜黃紙出閭惟下吏知足
詩有云今雖終老在山谷身見太平何復云養雞牧豕
度年歲抱孫弄子無離分雖山人亦不能忘耕鑿作息
之所自矣

佟儼若上元竹枝詞云五侯宅第瑞煙凝樓閣嵯峨浸
玉繩忽厭玻璃光徹夜千金競買米家鐙米家鐙者明
太僕米仲詔先生所爲勺園在海淀之北有翠葆榭林
於澁諸勝嘗繪園中景爲鐙都下號曰米家鐙其曰瓊
華島上人如蟻爲看龍舟得得來喇嘛打鬼橫吹角黃
寺門前擁翠裘皆春明餘夢也華亭曹顧菴侍講冬日
長安書所見云北地寒偏劇經冬雪未消霜嚴鴻雁去
風勁駱駝驕屈耳馴狂象披肩賣紫貂蒲萄封紙密鑪
炭和泥燒燭借羊腸照歌連羯鼓挑黃芽三尺菜白韭
四時苗香味珍吳橘辛盤點蜀椒搜車疑薏苡儻舍半

鷓鴣金屋人難貯塵羹客易邀銀罌函乳酪土室護芭
蕉燈市懸紅蠟弓媒挂阜雕畫樓檀版協繡閣舞袞飄
雍伯矜長袖崔姬鬥細腰歲時眞可記宮闕待誰描寒
笛梅方咽羌笳柳正凋江南相似否呵凍寫無聊方海
槎詠都門食物作俳諧體云旅食京華久肴羞亦徧嘗
山珍先鹿兔海物首鱗鯉燒鴨尋常薦燔豚饋送將雞
如春筍嫩魚比麩條長火鼎膏凝雉炎鑪胛熟羊煮鴉
眞瑣細炙雀漫張皇壓汁蝦成滷調羹蟹去匡晨晷掌
堪摩夜鴿卵難藏驢肆嫌生脯屠門陋貫腸蒲抽聊當
筍藍劈卻無瓢出瓮憐菘白堆盤愛韭黃蔓菁醃作腊

薯蕷熟爲糧釘小蘑菇掇珠圓豌豆量菜名跟斗異瓜
類醋筒詳蘿蔔兼稱水芫荽獨號香是人皆食蒜無品
不調薑惡漢蔥三斗貧兒齋一筐炊糜要和合說餅卽
家常扁食教濡醋元宵更糝糖窩窩充糗精餈餈佐餽
餽油餽鬆盤髻牛酥瑩割肪卷蒸高釘座和落細排床
著手麻花膩沾牙豆粉涼碾纏銀線短鍋炸玉磚方緩
火論羹擔通薪賣腐坊茶膿和炒麩粥薄飲甜漿果有
頻婆美仁稱巴旦良蒲桃青綴乳柿子白留霜杏酪醜
翻味檀糕琥珀光露芽烹茉莉紅唾嚼檳榔餈栗充飢
腹酸梅解暑湯淡菰誇易水苦酒說良鄉定許供饗腹

從教慰渴羌方言多倚撫故實任評章戲作俳諧體談
資舖醞場詩成還一笑匕箸早相忘鮑辛浦瑠璃廠春
游詞云車駐雕輪馬駐鞭手拈瓜子步差肩排門盡啟
君平肆趁賺癡兒問福錢叢脞書多卷帙殘幾人著眼
笑酸寒南沙畫片香泉字幅幅裝池骨董攤料絲羊角
燦成行簇帛堆紗錦繡裝歲歲鐙棚變新式鼇山結撰
到西洋像生花草捻泥人鼓板笙簫小店陳風景不殊
吳語雜句人情緒武邱春

劉獻廷詩古直悲涼然如題閨秀雪儀畫嫦娥便面云
素箋摺疊塗雲母黛筆清新畫月娥莫道繡簾無粉本

朝朝鏡裏看雙蛾亦自細膩

徐立齋相國有懷賢詩八首一馮太傅溥一湯巡撫斌
一徐總漕旭齡一徐處士枋一陸知縣隴其一韓學士
葵一汪編修琬一張知府鵬翮二給事詩一孫君蕙一
任君辰旦馮文毅以康熙壬戌子告加太子太傅 車
駕東巡公奏乞回鑾請無南幸徐清獻由兩淮鹽政遷
漕督有請釐三害籌三便疏任干之大理以上海縣入
爲工科給事中時詔廷臣會議封禪巡狩事干之言封
禪之說僅見司馬相如書三代以來秦始漢武宋眞行
之不足慕效巡狩載舜典古諸侯各君其國議禮制度

或乖謬巡所守協同之今天下一家三年大計民生吏
治罔弗周知不待巡而所守已無不治此古今之勢異
也已而請舉掩骼之政且言盛京松山諸處明時戰骨
縣互數里宜遣官埋葬得 旨詰問卽令馳往省視人
皆爲干之危干之意氣自若至松山而還其江南三學
使詩則劉果田雯趙崙皆山東人也

順治甲午春分魏敏果以吏垣長陪祀朝日壇侍班候
駕過

章皇帝左顧呼名大笑聞者曰笑魏給事緋衣也此衣
著廿年予告家居每隨州大夫朝賀知州鄭侯數見之

謂絀非 國制又短窄弗稱而且敝焉乙巳十二月解
新制一襲贈之果敏有詩志謝敏果儉德可風而開國
之初諸從寬大亦可見其

章皇帝升遐集杜志哀云萬象皆春氣危樓望北辰鼎
湖龍去遠象闕憲章新今日看天意中原仗老臣向來
憂國淚懷舊益霑巾萬歲蓬萊日艱危袞職陪一朝自
罪已白首獨餘哀松柏瞻虛殿文章落上台不才甘朽
質莫使棟梁摧鳳歷軒轅紀王春度玉墀賦詩拾翠殿
教練羽林兒自罷千秋節到今耆舊悲君王自神武不
媿史臣辭天屬遵堯典乾坤繞漢宮忽聞哀痛詔已作

白頭翁勲業青冥上園林白露中眼前今古意忍對百
花叢壬寅癸卯甲辰正月七日遇忌皆有集杜一首王
文簡謂於禮事君有方喪三年之文三年人日皆有詩
君臣之義於是至矣工科散都存心忠直論事動以古
諫臣自期與敏果同垣交尤善輒散公詩急雨高雷聽
不勻同君問夜幾經春如何塞國登朝日不見西垣抗
疏人無地可拋兄弟淚有書難問死生因從龍多少英
雄在痛惜中朝一小臣語亦真摯

松江提督馬逢知未敗時董蒼水作將軍行刺之云城
西聞礮聲城東聞礮聲殷殷復填填礮聲如雷轟乘苑

馬揚翠旗雕弧長戟百隊馳中有將軍踞坐五彩輿珊
瑚輓玳瑁爲輿屏四角綴金鈴內施紅氍毹頭上何所
飾朱纓鞞鞞光陸離身上何所服天吳蹙錦貂襜褕刺
史伺候顏色縣令負弩前驅朝謁將軍門夕侍將軍堂
將軍中央坐銀燭正輝煌歌姬一百二翠袖搖珠璫陳
設擬皇宮服食效尙方將軍召客客步趨起座中盡屏
息再拜捧一卮以次上壽畢昵昵多諛詞將軍笑謂爾
曹今吾不樂何爲黃金如丘積白金如山高誅殺聊快
意人命如菅茅道旁蚩蚩咸謂將軍豪嗟嗟將軍何其
豪錢塘成給諫肇毅糾逢知置諸法董閩石將軍行云

強非虎貪非狼臨津有小吏與之弓不能張胡爲棄所

事潛身竄邊疆投充騎都尉先驅效戎行一解左吹悲笳

右擊鼓窮寇勢將遁我軍色如土明晨去之二百里殺

戮平人上功幕府二解一年十夫長二年歷參戎三年握

兵符尊嚴亞王公將軍拊髀坐帳中何時金印盤蟠龍

裏蹠當與南山同三解將軍起甲第內列十二樓樓下鋪

氍毹粉黛居上頭四角夜光珠管絃閒清謳捧觴進醪

酥將軍大醉喜復怒拔劍斫斷珊瑚鉤四解輦黃金募壯

士尺書走海島東西同日起麾下健兒能射生彎弓夜

夜南塘行五解新天子垂旒坐明堂收拾支黨母令猖

狂豔妻配家奴少女發教坊將軍若盧出緹騎刀如霜
解衣恐怖叩頭泣父子狼藉東市旁哀哉將軍不如爲
吏可以久長

六解

葉認菴弔鐵崖墓云先生不可見遺冢自斜暉無復攜
紅袖還聞葬白衣才銷明主忌老幸故人依鐵笛吹雲
起猶疑蹋月歸頗見清迴其贈支鍊帥云金簡標名在
絳晨玉皇香案五雲親休嫌弱水飄舟客曾作蓬山罵
座人桃實偷殘天上樹榴皮書破壁閒塵思量只合華
陽睡擣藥吹笙一夢陳蓋內廷舊供奉也認菴晚年由
翰林掌院遷兵侍卒于康熙壬戌未卒前諸嗣郢寄書

啟緘無字惟當歸一枚易簣之後弔者入室無不歎其
清苦

韓生者善平話順治中嘗供奉內廷王子底詩正平如
水先皇日行樂時時觥戲傳江上逢君道遺事斷腸如
遇李龜年謔語縱橫許入詩舍人侍燕柏梁時武皇沒
後天無笑詭著宮車祇淚垂

蔡仁菴尙書所刻通鑑紀事本末箋注一百卷爲華亭
林安國上舍子卿著子卿從包長明李舒章游讀書日
盈寸其祖有麟有素園故以名其詩稿贈山陰朱朗詣
云利器寧剛折烈士慕冰稜家世相韓國忠孝素所憑

其負魯連恥詎同子魚升黃金若丘山不易一令名巍
巍子雲閣千載爲世憎弟子威字武宣著貞娛草堂詩
稿五古亦宗漢魏律句如上策褚衣隨陸賈終年堅壁
效廉頗朔吹陵霜驅曉雁傾崖倒日換丹楓平原落日
歸嵩少野燒橫雲走孟諸虛聞玉檢誇秦瑞無復金隄
紀漢年當日春陵看王氣千年滢水憶軍聲束薪欲變
吳兒俗披褐誰憐楚國材聲光神理均以初盛爲宗青
浦諸生陸希倕讀書玉屏山中有忌之者遂北之燕康
熙戊申客死旅邸貧甚不能棺斂時蔡襄敏士英家居
夜坐忽夢一人儒衣冠進謁自通姓名曰某覓食長安

不幸客死某寺望公垂憫俾骸骨得返首丘九泉之下
感且不朽襄敏驚悟適子卿館于蔡質之信大異之因
厚有所贈旅櫬始得歸里襄敏仁菴尊人也

王孝揚都統永譽西安人隸漢軍鎮海將軍國光子襲
一等男官松江提督善詩能書恂恂一儒生每出行僅
一馬二卒遇者不知爲將軍也山陰何李左車僑居金
陵能詩尤工長短句抱負奇偉孝揚禮爲上客資之爲
縣令其寄懷何左車次金念齋韻云憑軒盡日望中賒
渺渺離懷未有涯匹馬曉衝郭郡雪小樓晴數秣陵花
徵求已下山林詔肥遯能安處士家聞道珍珠傾一斛

春風曾迓七香車在松二年嘗捐俸修學宮康熙二十
年調任廣州將軍王漁洋南海集有唱和之作吳蘭次
壽孝揚詩有云竟日自臨修竹帖三春人誦門茶詩孟
珙談兵惟注易修期草檄未離鞍儒雅可想左車需次
二十年不得選旅食都門抑鬱侘傺其燕臺雜詠云曾
聞一飯報千金情到真時感自深是好男兒皆血性莫
疑今日少淮陰蓋深慨知已如孝揚者之難遇也

董文友閨怨云流蘇空繫合歡牀夫婿長征妾斷腸留
得當時臨別淚經年不忍浣衣裳纏緜悱篤宗法唐賢
董玉蚪其叔父也有微泉閣集

秦留仙專諸塔詩千秋讓國爾爲改一死壯夫何代無
鄭寒村羊流村詩當年史已忘臣魏今日詩惟頌滅吳
皆能獨持正論

施尙白蒼梧雲蓋寺訪無可上人句云與君坐對成今
古嘗盡冰泉舊井茶語極含蓄

華亭諸生季遂鳴九明建昌知府季鷹曾孫鷹字雁山
嘉靖乙丑進士官建昌時曾購顏魯公麻姑壇記石刻
臨行封貯府庫康熙閒當湖諸生屠敦增闡兼因其友
王來又尊人守建昌具知此石無恙作詩以示鳴九其
詩云九峰生奇光雁山擅詞翰淹博嗜遺文名蹟滿几

案尤愛魯公書體勢獨稱冠石刻麻姑壇古色何燦燦
流傳江之右遼絕起長歎一朝守建昌蒐輯徧里閭帝
子忽留賓從容訪奇玩爲言前守歸攜之涉江漢蛟龍
復相鬥沈沒汀沙畔雁山投袂起遐搜窮浩泔金懸都
市旁網集長江岸拂拭見光輝石角微微斷撫碑更悵
然懸金益無算未幾石刻全璧合不復散封識府藏中
去官乘款段莽莽烽煙生舉目滄桑換遺珍委塵土況
乃白石斫文孫念先志渺渺心曲亂試問宦游人海枯
石不爛迴望斗牛寒寶雲落天半詩所言帝子謂益藩
也雁山好事此一段信是墨緣佳話鳴九和詩不具錄

溧陽宋之繩其武與旣庭子庭尙木爲昆弟行有載石
堂詩稿二卷句如瓶沐秋花乘細雨書臨古榻乞朝光
打窗葉響添山寂照幔鐙殘想月明百年幾見堂歸燕
舉世誰非水泛鳧藥草滋梅雨魚苗長麥秋疏林分寺
月古塔露城灣雲生半嶺衣裾潤風過回谿草木香皆
見清迴之致

黃陂姚岱麓中丞締虞夜柬王少參舟中云蔽省辭黃
鶴蘭橈伴白鷗岸回江月抱天迴夕雲流銀漢乘霄上
金陵逼歲流田租聞復減側識漢皇憂岱麓初以己亥
進士授推官康熙十七年以給事中典試江西還奏免

江西逋賦二百十餘萬兩明年七月地震疏言自故憲臣艾元徵請禁科道官風聞言事因循至今遂成定例世祖朝言官章奏如何審諤今者相率以輒熟爲風臣恐平時無以作敢言之氣一旦臨事必無肯爲 皇上盡忠者乞敕廷臣會議如矢志忠誠指姦斥佞卽少差謬亦賜矜全如或快已恩讐受人指使章奏鈔傳眾目難掩縱令彈劾得實亦難免徇私之罪 聖祖御門諭曰朕爲天下主固樂聞讜言但恐臣僚挾私欺罔故須禁飭朕親政以來諸臣何嘗以言獲罪對曰 皇上卽不讒言官但有處分條例言官皆生畏懼 上曰人

臣論事當擇其遠者大者且如魏象樞彈程汝璞亦是
風聞已乃鞫問得實原未有禁退以所言宣付史館

國初詩人性情深厚無論已仕未仕當易代未久多有
故國之思安止周倉符明經籙長王子除夕云日月愁
中影滄桑夢裏年莆田林蘭友自芳濟河曉發云漠漠
秋雲鎖未開披星覓徑出蒿萊關人時怪雞爲客問道
惟驚路有豺露入故宮禾黍淚風含中野雁鴻哀江淮
此際頻延伫誰抱臨流作楫才黃寅陞弼甫寄懷林自
芳侍御曾長修太史云怒挾天吳海水飛孤臣飄泊欲
何依鸞銅劍氣腥南海芳草王孫卻不歸空餘碧血報

高皇義士蘆中色已黃孤島梅開知漢臘寸天無雨亦
沾裳唐洞倦除夕云幸餘尊酒共承歡五日追呼得暫
寬歲盡不知新日月更殘惟夢舊衣冠釋機紹天月過
故宮云清晝朱門閉茸衣輦路深無人傳警蹕斜日照
高岑蕭山丁迂菴克振送開遠侯歸隱云五雲深處有
歸人野服初離紫陌塵遵海一塵唐社稷枕流不動漢
星辰丹經科斗閒中課寶玦珊瑚夢後身酩酊拚惟今
夜醉可堪朝市重沾巾無錫陸楣紫宸讀史云通眉長
爪號能文白首鄒枚也及門豈有春華憐庶子無端芳
草憶王孫驪宮夜笛吹難徹銅輦秋衾夢易溫何必軒

車親一御始云曾荷信陵恩此與迂菴詩皆爲唐王作也紫宸號鐵莊幼孤露讀書雞栖豚柵閒雖餓凍頓踣不輟爲秦對巖所知得縱觀其藏書撰著益富丁卯二月謁祖母舅華鳳超先生新祠追和臨難詩韻云早年清望肅朝端直作朝陽一鳳看欲障狂瀾波已逝爲留完節歲偏寒攫鱗自分輕投組滅頂何期後挂冠金虎銷沈銅狄改忠魂無路問長安蒼梧落日暮雲端咫尺橋山未許看繡嶺鶻嗁藏血碧金陵鳳去劫灰寒神游見說身騎尾遺恨虛疑髮指冠私淑情深餘悵望短吟和淚苦難安毘陵金廓明嘗從軍墮馬傷臂習靜惠山

荷花橋紫宸讀其獨往亭詩思一見而廓明沒矣題其
後云滄海遺民事渺茫劫灰無恙見靈光全身白髮心
何短回首青雲翅已傷故國魚龍悲鳥道空山杜宇泣
羊腸小橋流水孤吟處敗柳殘荷幾夕陽嘉興徐發圃
臣著有天元厯理十一卷詩曰清引亭稿聞谿蔣楚樵
索先大司馬未刻詩稿簡寄云江國秋風路未賒昔年
清塵隔雲霞離人錦字愁催雁避地青門學種瓜兵革
論文哀庾信山川博物羨張華一編先澤憑君重贏得
餘閒看好花

常熟郝植東堂居錦雲谿與錢湘靈稱雙璧湘靈牡丹

花下集同袁稹菴唐祖命方爾止張瑤星黃俞邵諸君
子長句一首云前歲花時渡江去去歲吳門三月暮三
度花開一度看今年恰在金陵住金陵舊是帝王都歲
歲花開如畫圖此花又殿春風後朱衣王謝相傳呼一
筵釀費中人產一花千人萬人眼金盤采籃共貽贈招
邀名士分折柬永和蘭亭金谷園月落檀板催金尊百
尺烏絲長到地清辭豔句爭飛翻得所穠華易銷歇子
規嗁血樓宮闕無復天彭百馱花王孫五勝埋香國花
殘人散可憐春十處園林九處塵欲往城南訪耆舊酒
徒零落空芳辰太史園中花百種紅敲綠捧花頭重花

神有意洗妝遲要勒詞頭固君寵諸生同日看花來鄧
生酒甕還重開廿年無此好事者無詩不醉那能回酒
醉詩成花欲語明歲花開待予汝春雨春風作主人鸞
飄鳳泊同羈旅東堂觀鐙行云新年半月雨不歇連巷
春泥馬蹶沒差池已過賞鐙時金尊玉管花空發婁東
刺史趁新晴特促然鐙照夜明珠箔舞殘初見月紅窗
歌轉欲聞鶯六街九陌鐙光曉海城今夜春生早不是
官街恣宴游爲民預祝秋成好對景翻教憶去年此時
聽雨正高眠華鐙卻掩春宵寂誰道秋來更可憐九月
十月風雨惡到處田疇盡蕭索賣男鬻舍僅供糧那有

餘錢更行樂聞說言官特疏求減租詔下可無愁不辭
徹夜笙歌沸及此風光樂未休樂事無多憂轉續書生
迂願何時足乞取蟠螭玉九枝攜來徧照流亡屋二人
詩格略同

錢介維一字立山號鹿窗詩曰澗湄草廬詩存上方山
云孤山入口說巒岈犖嶠崎嶇上幾盤三百級梯仍壁
立一筇撐破萬峰寒靜中鶯燕語偏驕曳上春風到柳
條好覓清修老宮監筍蕘閒共說先朝介維機山相國
冢孫宜其有懷舊之蓄念也嘗客高江村所其題山農
雪景有云泖莊老人吾老友吾生甲戌君癸酉燕市相

逢正壯年嶺南歸日俱稱叟比來連榻清吟堂敘舊言
歡共文滄山農者同邑陳治號柳莊工詩好游足跡半
天下嘗卻耿精忠之聘善畫尤工設色兼精歧黃憶舊
云清漏沈沈楊柳風當時送客小園空春樓燭暗闌花
氣人在重簾暮雨中言情旖旎亦何害其風節

康熙三十九年喻武功司寇偕尙書范承勳王鴻緒侍
郎王揆田雯王紳布雅勒顧藻副都御史壽彝督修高
家堰隄工遇孫無燂孝廉於江都謝埭贈以畫並題詩
其上有移向汨羅深處住之句無燂感其意爲作誌感
集唐四首云聖主宵衣夜未央遙憐澤國水爲鄉苦心

欲得安民術元首忻從治世方異地六時勞瘁寐清淮
千里共汪洋殘鮮幾戶蒼生在猶爲君王泣數行臣心
自愛玉爲人善政多方寵寇恂奉命但如頻作客在官
猶自未嫌貧一錢不受歌劉寵千里同聲說季真召對
應陳桑土計更因從此展經綸高絃一弄武陵深誰和
騶虞發素琴十載空餘孤竹淚中年潛識子房心身隨
幻境緣多事話到傷心只苦吟四海千秋誰著眼爨桐
焦尾問知音憐余白髮老儻多雲樹連天阻笑歌詩繼
青蓮懷謝史碑評黃絹讀曹娥千秋孤憤芳時在南國
浮雲水上過忽漫相逢還惜別故人重見詠菁莪無燂

名弓安高郵人順治丁酉鄉榜其他集句如詩成自號
新開府酒後常稱老畫師青雲足下三千士白玉壺中
一片冰箕宿舊勞天子夢奎文新應史官占宣室久懷
霖雨夢國人先詠袞衣詩皆能綴緝自然不減毛西河
所稱之錢景舒送春詩也

烏程沈雪樵祖孝初名果字因生錢受之之門弟子也
有湖干硯傭當泣陶年吟安下簾等集病臥雜詩云老
愛嬌兒異頻將驥子方最憐生客裏不解問家鄉學語
休論慧吟詩謾喜長時能操紙筆須勝老夫狂

宣城吳炯季野有夢華子遺集居易錄謂其作準言以

擬權書若正學觀時斂褐諸篇可自成一子詩如汎舟
青谿云平田通水曲亂樹切煙霄谿月涼乘筏山雲暗
發橋沙明懸鷺浴波冷著螢燒隱隱聞狐唳一鴻天際
遙亦極生造

邵念魯廷宋山行云入山路已深不辨出山路隔岸有
人家一徑春煙護隱隱雞犬聲橋鼓不能渡流水引飛
紅漁郎幾回誤念魯餘姚明經傳王文成良知之學於
沈國樸求如韓孔當遺韓從黃黎洲問乾鑿度算法從
會稽董瑒受陣圖從保定王正中學西歷游鎮江與梁
化鳳部將講坐作擊刺之法之淮安從防柯老卒問河

淮變遷走河南訪黃流故道旣游倦無所遇託著述以
自見以爲韓范沒而儒效疏金許沒而儒術泯陽明直
揭良知孟子之盡心也拯溺戡暴伊尹之自任也作陽
明王子傳戴山先生功主慎獨克己忠清節義之風體
備於身誠存於意顛沛弗違意信其志作戴山劉子傳
王學盛行餘姚得其醕江西得其正王艮王畿挾高明
之識駕師說而上引一再傳而羅汝芳楊起元好爲弔
詭陶望齡周汝登歸心禪乘圓規折槩敢告復性作王
門弟子傳以言明道不若以身明道金鉉郝彪佳全受
全歸白刃可蹈張兆鼇隱志潛身黃宗羲纂言提要胥

能守師說以終老作劉門弟子傳有宋遺民程敏政黃宗會遞有甄錄文山開府謝翱王炎午諸人勞事勤服六陵被發圖其成者王英孫肇其謀者唐珏改葬蘭亭流水嗚咽作宋遺民所知傳裂儒冠而僧別有師承徐枋顧炎武陳恭尹完貞抱璞信而有徵作明遺民所知傳書院基始半霖遷於南城守良知之學見諸躬行先民是程啟我後生作姚江書院傳明人家自爲史存僞失真迺稽譜牒核聞見存一家之言作倪文正施忠愍諸傳數十篇康熙五十年卒門弟子取序記雜文合爲思復堂集邵二雲其族孫也乾隆壬辰爲狀求朱竹均

表其墓

西冷十子如吳錦雯西門行云珠玉置舍中地下無酒
壚張祖望涿州城云曉霜不在地微白生牛背柴虎臣
苦婦棄兒歎云一步一回顧步步聞兒嘯張祖望秦寧
云草深蛇化徑山僻鬼留書陳際叔村中偶賦云柳風
吹夜雪沙雨暗春鐙柴虎臣覽去矜詩兼此寓懷云幽
谷寒禁蘭葉短長河雨過杏花稀毛稚黃江灘云落日
城頭橫醉眼調鷹走馬十年心皆見骨幹非專以流美
爲工

朝邑李楷叔則號岸翁書學東坡尤善飛白王阮亭謂

其每作詩文廣坐酒酣令兩人張絹素正紙懸腕直書
略不加點擲筆引滿旁若無人詩曰河濱集其海鷹篇
鴟鴞篇觀海篇地黃行負版行多噍殺之音

溧陽彭桂爰琴丁巳元日用除夕韻云遙想庭梅發家
人又望歸空勞儲臘酒定爨寄春衣鐵馬嘶方急寒鴉
凍不飛那堪頭白淚竟日灑慈幃語極眞摯彭極建初
得爰琴都門信云絕不待人惟歲月最難爲客是風霜
亦佳句也

張行人鶴洲頌繫西曹以常所乘羸抵逋於人羸悲鳴
不食一日墮其新主自逸歸王西樵與鶴洲同患難目

擊其事感之作義羸行漁洋和作云我聞名駒太乙生
渥洼又聞皇人之馬歎玉沙汝羸品流不及此乃能與
人同生復同死新主甲第高峩峩黃金作埒白蜃珂舊
主失勢困泥淖但有青蠅日相弔寧教困餓烏啄創不
忍雕鞍繡轂交輝光吁嗟羸乎羸乎汝知兔獨不見袁
粲門生不如犬

毛大可持論專主盛唐於體格聲調斷斷辨析其自作
如少年云少年抱劍出關中羽衛新招六郡雄久許報
恩逾聶政平時飲酒笑秦宮雞鳴曉日黃河動雁陣秋
陰紫塞空當日枌榆遷欲盡愁君馳馬過新豐東城云

東城初躍紫驂騮萬里親隨博望侯赤羽白傳光祿塞
紅妝新下綠珠樓春回海雁天南盡日照黃河水北流
寂寞朝鮮津吏婦長聯裙帶學箜篌朔方云天校神兵
罷朔方雙鞬不復挂漁陽三秋白草綠關斷萬里黃河
入塞長鐵柱分標嶺外戍金書異姓漢中王從軍久負
匡時略愁見開邊到夜郎天材宏肆自是一時之雄

潘次耕游山詩如碧雲寺香山卦山清涼谷元陽洞石
公諸作宏深奧衍如讀柳柳州永柳諸記其送譚舟石
之官榆林云男兒蓄大略邊勢須洞曉但披一卷圖曲
折豈能了所以經奇人驅馬涉無阜譚侯文武姿風雲

鬱懷抱天借一邊城仗節榆關道榆關落葉多千霜未
曾掃咄哉河南地甌脫痛遺老牧兒領鹽池獵馬風漢
草藩籬得無疏防虞須及早餉道阮魚河邊烽逼吳堡
土門十八寨舊額今多少屯營與互市利害宜細討我
亦侗儻人風塵苦潦倒行將關華游捫雲叫蒼昊有日
彈劍來春盤醉瑪瑙相攜青眉峰指點天山小尤足覘
其用世之略

會稽羅坤宏載嘗舉己未鴻博精小學能篆刻偶作竹
木奇石法老蓮毛大可謂其新詩能到劉河閒平視邊
徐一輩就亭絕句云朝望江口雲暮看江心月芳洲翡

翠鳴沿流孤棹發遙遙吳與楚悠悠二千里飛來渡口
雲化作清江水所爲游記雖小品顧善摹寫每讀一首
如展畫一幀

吳漢槎詩如金陵篇榆關老翁行浚儀曲

一作燕
支山辭

海郎

山靈秋神女歌票姚跌蕩鋒發韻流其贈故太常樂工
申叟云白首梨園叟曾聞值御筵千官丹陛側百戲翠
華前喪亂悲銅馬飄零泣鈿蟬那堪關塞外重對李龜
年送人之梭龍云落日嘶征馬雙旌出塞門犬牙千嶂
合虎落萬人屯力戰原秦法施刑亦漢恩雕戈風雪裏
誰念度烏孫曉望撫寧題逆旅壁云長宵鼓角渡嚴風

泱泱烽樓曙色通客夢五更驚櫪馬征途三月近歸鴻
斷雲城堞臨邊迴殘雪關山映海空莫道盧龍猶在眼
異時南望是遼東上巳許康侯招同諸君稷飲卽席分
詠得年字云近郭林巒靜夜煙佳晨千騎徧晴川秉簡
稷事仍三月拜柳軍僑已十年寒雪漸消貂去後塞外以貂
入深山爲雪消之候春風不在雁歸前流澌處處滄江裏欲泛清
觴倍黯然

麻城李中素字子鵠有遙贈閻古古七律署名李載自
序謂十載前得見古古輓梅公惠連詩雄詞悲調每與
外兄澹克酒酣縱歌輒以不悉其出處爲憾客單父聞

其投身出關狙刺李賊不中今且解鞍匣劍依然布衣
乃爲詩十章不以無因自嫌古古得詩以示龔孝升極
爲贊賞句如紉成蘭佩原忘世種得桃花不計年快意
千金投灤水當機一箭動聊城景眞少便師中散文舉
交須借伯陽格律亦與古古爲近

姜西溟題南齊旌表華孝子小像詩序謂劉裕以義熙
十三年秋八月至潼關命王鎮惡大破姚丕軍遂入長
安其年十二月裕將東還三秦父老留之不得以弱子
義眞都督雍涼秦州軍事留鎮之孝子父豪戍長安當
以此時時孝子年八歲臨別謂曰須我還當爲汝上頭

既長安陷孝子七十不婚冠有問者輒號痛彌日自古
篡竊若王莽懿操父子俱未嘗親弑其故主也至零陵
賊殺自後禪授之際習以爲常裕之子孫亦嘗身罹其
毒而君臣之道苦矣獨孝子終身思父不婚冠此其所
關於人倫甚大南齊時同郡有薛天生劉懷盾兄弟皆
以孝行旌然子獨以孝子之所遇有足感者故疏其事
於像左且繫之以詩案義熙十四年沈田子以掩殺王
鎮惡伏誅長史王脩被讒死羣情解體夏王勃勃遂進
據咸陽走義眞積人頭爲京觀號髑髏臺從此中原分
裂生靈塗炭於戰爭又百餘年然後合而爲一蓋忠孝

失而人類幾乎滅矣此西溟之所以致慨也其詠史小
樂府云曹爲舜禹禪晉天下天之報曹假手於馬操分
五部晉爲禍招天之報晉假手於曹百年禍機伏於始
嗚呼晉魏已如此

詩願言則噓鄭箋云齊人每噓則云誰道我姜西溟詩
露臺風起立多時繞亂花枝與柳枝噴噓知因誰道我
故人千里最相思

徐勝力閣學爲敬可從子有抱經齋集五十卷其丹楊
懷古云雲帆歷歷下三吳悵望孫郎起霸圖憶昔北來
曾得土居然南面已稱孤橫江樓櫓隨新月夾岸旌旗

擁故都京口兩山明滅在夕陽春去見唳鳥寂寂修陵
草色中蕭梁事業有遺宮城連鐵甕千山繞地接金壇
四塞通古木枝頭迷杜宇明霞天半落征鴻青絲白馬
同生日隔代還應禮誌公玉宸觀云深山樓閣擁仙官
檜柏蒼蒼入殿寒廢井但從沙際識殘碑多半雨中看
鑪煙夜拂黃金座雲氣晴低白玉壇福地久傳人不到
遺蹤何處覓金丹均見才力侍講幄九載

聖祖嘗命背誦咸有一德朗誦終篇不失一字至厥德
不常數語則斂容奏曰臣不敢誦 上爲嗟異嘗賜絕
句詩一首云玉臺詞藻重徐陵經笥由來博雅稱每見

趨陪鷓鷯側神仙風度在瓠棱

湯泉在遵化州西北四十里福泉山水經注漁陽郡
北有溫泉卽其地也寬平半畝泉水沸出可熟物其源
涌出投以錢搖搖如胡蝶久之始下月夜遙望氣如白
虹傍有冷泉均其氣候

聖祖以地近 孝陵頻經臨幸兼奉

文皇后歲時游賞建宮其上康熙辛酉三月駐蹕馬蘭
峪命納蘭太傅召從臣李文勤等二十有二人周歷游
眺太傅有湯泉應制二十四韻云御天乘鳳輦浴日起
龍池淑景黃圖早朝暉紫幄披落花綵綵仗初柳拂珠

旗野迴紆皇覽鑾停擁地祇翠巖深窈窕瓊構鬱參差
蘿磴時留蹕松門不翦茨方塘含皎鏡文螿淨連漪卻
望陵園近彌深弓劍思山川開麗矚草木得華滋豫悅
千秋洽陽和庶物宜每勤長樂養獨奏廣微詩溜暖春
頻駐波喧律罷吹逾涯涵帝澤曲逮被臣私竝命觀溫
渚相將陟澗湄氣凝漿五色味絕露三危凜節何由度
恩光實在斯赤鱗游自異錦雁飾奚爲瑞已徵靈液祥
應頌玉芝遠侔堯德儉只法禹宮卑孝理能馴鹿仁風
遂化鴟撫躬多竊幸好爵久相縻喜共清泉挹如從丹
洞窺濯磨欣有賜調燮媿無奇願託潺湲水年年奉聖

慈藻耀鮮明氣勢穩稱不減李巨山蘇許公應制諸作
刻通志堂集者刪成十韻作容若侍衛之詩神氣索然
矣

鄭谷口八分師莆田朱比玉專精曹全碑嘗曰作字最
不可輕易筆管到手如控干鈞弩少弛則敗矣世人作
字只是寫得皮毛作字用筆固有起落然上下四旁之
間必有脊骨必有筋力必有首尾方有神氣不然終不
成家姜西溟稱其晚年書奇變殆是游刃之餘未有能
舍規矩而能成巧者也尤工聯扁大書田綸霞有山蘊
書屋四大字一字直可價千緡之句朱錫鬯贈鄭篋詩

金陵鄭篋隱作醫八分入妙堪吾師竭來賣藥長安市
諸公衮衮多莫知伊余聞名二十載今始邂逅嗟何遲
自從鴻都石經後工者疏密無定姿任城學宮闕里廟
羅列不少漢人碑篋也幽尋徧摹搨羲娥星宿撫無遺
郃陽酸棗法尤備心之所摹手輒追黃初以來尙行草
此道不絕眞如絲開元君臣雖具體邊幅漸整趨肥癡
寥寥知解八百禩盡失古法成今斯邇來孟津數王鐸
流傳恨少無人披太原傅山最奇崛魚顏鷹峙勢不羈
臨清周之恆委曲也得宜句吳顧苓粵譚漢暨歙程邃
名相持未若篋也下筆兼經奇絲如煙雲飛欲去屹如

柱礎立不移或如鳥驚墮羽翻或如龍怒爭之而箕張
昂萃各異狀屏幃大小從所施平山堂成蜀岡涌百里
照耀連雲檣工師斲扁一丈六眾賓歎息相瞠眙須臾
望見簋來至井水一斗研隄麩由來能事在獨得筆縱
字大隨手爲觀者但妒不敢訾五加皮酒浮千鴟我聞
此事足快意目雖未覩心已怡安得留之數晨夕醉時
竊拊醒肩隨盧溝橋北風已厲子今南去生凌澌驪駒
在路留未得歲聿其暮云誰思鍾山草堂定誰在放溜
且任吳中兒華陽瘞鶴字刻露鄧尉遺樹花參差無錫
城邊見巖四示我長歌一和之

東坡送李叔師孝博使嶺表詩凡十韻石刻在揚州禪
智寺斷仆已久鐵厓道人猶及見其墨澤謂風骨過顏
柳不在二蔡下順治辛丑春漁洋維舟竹西別墅步往
上方尋此詩所在拂拭出之歸舟次韻一篇有漱墨留
春泉之句謂寺有泉名第一也刻石斷碑之側欲收拾
補綴忽忽未遑康熙甲辰冬量移主客行有日矣念往
事耿耿于心乙巳二月屬宗定九往營度靈隱頌公適
飛錫于此以一偈示漁洋輒與西樵定九各拈二絕爲
答并堅斯約漁洋詩云寒山拾得眞朋友無著天親是
弟兄浩劫西來重會台上方禪窟記經行草深一丈法

堂前片石山門委斷煙大有因緣公記取山櫻重向早
春然末句用坡詩歸來春酒凍共看山櫻然句意其七
夕諸公集禪智寺祖道留別詩云昔送日南使今歸天
北人諸公復高會片石晤前因西樵及同時諸人倡和
之作有石刻

高澹人韻竹軒侍值詩畫橋西望水中亭疑有魚龍出
北溟頌略瀛洲舊蹤迹十年墨藩在雲屏自注謂歲戊
辰層雲奉敕畫屏風四幅今尚在澹寧居 御座側高
層雲字二鮑號謾苑晚號菰村詩畫書法時稱三絕官

給事中日

文皇后上賓詔集議喪禮康親王傑書等以次環坐閣
臣王熙余國柱李之芳向前白其議跪語移時武定年
最老起卽踏地一鮑銳然曰是非國體卽日抗章謂公
同議事天威式臨異時無不列坐所以重君命尊朝廷
永康左門非大臣致敬諸王之地亦非諸王受跪之時
大臣固當自重諸王亦不可倨慢失藩臣體書奏

仁皇帝諭曰朕召大臣議事如時久每賜墊坐語後凡
大臣見諸王不得引身長跪著爲令累官太常寺少卿
卒年五十有七未究其用著有改盡齋集子查客待詔
詩筆書翰亦有名

漁洋聞貴州大捷寄蔡尙書云今日標銅柱君如馬伏
波占星臨井鬼拓地到牂牁師律嚴貔虎軍聲肅鸛鵝
昆明洗兵甲眞擬挽天河尙書建立武功有大勳勞於
國而其文章爾雅無媿專家謫戍時婁縣何是菴世澄
從至艾渾艾渾雍正以前黑龍江將軍所駐也有仁菴
先生秋山集飲寧古塔晤李台林先生艾渾歸途雜感
諸詩其云山中新宰相滇徼舊將軍朝論同晴日江干
愛白雲辭杯偏勸飲雅尙自成文不解高人意爭傳鳳
詔聞蓋仁菴尙書時已被賜環之旨而其謫居時愛客
論文不改常度亦略可見矣是菴康熙庚午副榜詩曰

片羽集句如忠孝兩無著文章安得是未聞諸葛表空
見李陵書皆有俊拔之致

馬宛斯舉順治己亥進士歷官淮安推官靈璧知縣著
左傳事緯十二卷繹史一百六十卷漁洋題宛斯小照
云里名通德舊傳經暖翠浮嵐入戶庭今日黃山山下
路空餘書帶草青青何鄭千秋樹齒牙輪攻墨守各堅
瑕大官解擅春秋癖不數公羊賣餅家山陽笛裏劇堪
憐宿草何時哭墓田更有人琴斷腸處彭城風雨對牀
眠宛斯以癸丑七月卒于官西樵同時捐館舍也康熙

四十四年

聖祖南巡至蘇州一日垂問馬驢所著書命張文貞物
色繹史元版明年四月令人贏白金二百兩至鄒平購
版入內府所集十三代瑋書篇帙倍富未刊

曾庭聞孝廉與弟青藜皆雄駿自命負文武大略庭聞
同僧登赤壁云看碑尋赤鼻問菊到黃州雁氣回秋渚
江聲向酒樓兵戈雙淚眼吳楚一孤舟蕭瑟匡山客應
隨慧遠游劉壩云烏龍江欲出劉壩卽聞歌哀壑笙竽
奏秦川鸚鵡歌天應一綫落雲入九層多谿谷人民少
開荒近若何亦復清峻

鍾廣漢嘗與朱竹垞期共注五代史記竹垞游大同轉

客太原廣漢貽書謂五代之主其三皆起晉陽最後劉
昫三世固守其地思覽其廢墟考其遺跡未幾游京師
與汪荅文辨論經史源流詩古文詞利病逾四十刻猶
不止荅文深嘉許之出居庸關暴病卒竹垞與譚舟石
集其詩二卷刻之送羅比部暫歸四川云白帝城孤落
照懸鄉愁迢遞武功天將歸故國無鴻雁行過空山有
杜鵑劍閣風雲開五丈笳關烽火隔三川明年巫峽生
春水行上東吳萬里船其歷代建元考十卷刻于金山
錢氏嗣是有陳少章之紀元要略梁曜北之元號略葉
兩垞之紀元通考而葉書爲最詳

女史趙子惠名昭寒山隱君宦光女孫生有夙慧父靈
均母文端容鍾愛之適平湖馬萬方子班夫婦不相得
嬖妾正位遺書決絕先有上父書至是又上馬氏宗族
書號痛自明卒不見省遂祝髮爲尼改名德隱結廬洞
庭西山以終有侶雲居遺稿先是合香之夕昭卽叩班
所學班謬以翁作誇耀之昭晒曰平平爾萬方聞而大
賺故終風之戚陰雨之悲皆喪如充耳未幾遭國變禾
中謀起義兵萬方以宦族亦廁名其中事敗窮竄無所
乘舴艋夜叩西山菴門昭從內察語音似翁迎入中堂
執子婦禮再拜請曰自入空門諒無骨肉相見期矣不

意大人倉卒至此萬方具道所以昭埽除密室居之晨
夕供飲膳久之禁漸弛歸故里于湯谷東昶當湖雜詠
云侶雲詩句絕纖塵住處無人得問津賸有無窮家國
恨小蒸休說管夫人有題仲姬畫竹云宋室山河多胡
少淚絕無一點到絲筵故云胡
峭飛谷題子惠上父及馬族二書後云牧圃亭臺暮靄
空寒山蘿薜泣秋風惟餘一滴傷心淚沁入苔牋血縷
紅牧圃馬氏別業也

明制沿河接田出夫始出僉派後復徵銀極爲苦累

國初兼行召募給以工食順治九年河決封止起大名
東昌兗州及河南丁夫數萬塞之此因工程浩大特行

僉派而又協撥於鄰省康熙九年總河羅多以大修用夫三萬餘請於江南山東二省僉派協濟十二年停河南僉派河夫自撫臣佟勤僖發之而江南山東仍舊其後裁減歲夫廣增兵額架船裝料鋪埽簽椿收放揪頭繩纜栽柳修柳巡查隄岸看守料物修補水溝填塞狼窩獾穴俱用河兵其人率皆駐宿河干專司填築責任專諳練熟每遇大工合龍下埽不爽分寸遂使民脫僉派之苦而工獲修防之益倡之者靳文襄繼之者于襄勤也歸安嚴修人允肇河夫行云山東六郡良家子一日長驅走千里問言河決淮泗閒點取兵夫徧城市郡

符昨下點行頻欲行不行官吏嘔耶孃妻子走相別分
別督送黃河津去年地震河岸塌白日波濤沒城郭浮
尸漂骨委道旁可惜淮南萬村落今年南國太陰雨翻
江掣海風潮惡此邦之人偏苦旱土脈如焚廢耕作縱
有鉏犁少壯丁那堪老穉填溝壑嗟哉河夫汝勿憂官
給汝直惟汝求美酒百斛羊萬頭上田下田皆有秋歸
來積粟如山丘君不見宣房築宮瓠子塞穿渠漑田利
南北修人順治辛丑進士此未改河夫爲河兵時作
吳江徐崧耀菴俞南史鹿肱嘉興沈進藍村周篔簹谷
長洲俞瑒旅農常熟顧文淵雪坡爲汪氏華及堂六客

吳日干詩吳下無雙士桐鄉老寓公爲臞菴作也

順治十八年摺紳錄大學士有九學士有二十四會署
殿閣院名列內閣之後武進士選侍衛有大教習教之
如遏必隆鼇拜皆兼此官各省督撫莅都察院當時規
制如此法梧門輯清祕述聞得順治壬辰乙未戊戌三
科會試齒錄于曲阜顏氏敘次款式亦與今通行本異
卷後有雕版于京師正陽門外西河沿浙江洪氏書坊
印記與此書同其跋國子監司成題名碑錄謂漢員敘
次較備順治元年設滿洲司業一員助教三員十五年
陞司業圖爾哈圖爲祭酒十六年吏部定以太常寺少

卿管滿洲祭酒事太常寺寺丞管滿洲司業事十七年
三月裁國子監蒙古祭酒司業增設滿洲監丞七月以
通政司知事白成格戶部主事華善俱爲國子監司業
國子監志及舊碑滿洲司業有白清額花善名白清額
無歷任之年花善則在康熙二十三年因革損益多難
稽核李越縵爲潘文勤題順治薦紳錄卽紀文達所藏
者謂錄本無歲月以庶吉士載至辛丑科張公玉書等
十人又王氏士祿時尙爲助教王漁洋時爲揚州推官
汪茗文時爲戶部郎中傅忠毅宏烈時爲韶州同知于
清端成龍時爲羅城縣故翁法兩君皆決爲辛丑大興

相國有題詩儀徵相國有跋邵氏懿辰長歌尤佳攷會
典諸書順治十八年六月改殿閣大學士復爲內三院
省翰林院官七月定制每院滿漢大學士各一員是年
六月又罷各省巡按此冊大學士尙有九人皆以殿閣
系銜翰林院尙有掌院學士胡兆龍以下各官都察院
及各省下皆尙列巡按銜而無其人又聊城傅公以漸
以是年四月予告回籍此冊大學士九人外尙有少保
兼太子太保武英殿大學士兵部尙書官銜一行而空
其姓名攷之則聊城故官也以此知必在是年五六月
閒越縵詩云

章皇御宇十八載百官名簿猶留傳河閒好事廣文獻

襲以錦韜函以檀罩谿梧門各攷索如搯經史爭鉤元

或據庶常殿辛丑或證西樵居學官互相參訂決龍紀

孝陵代嬪重光年朱公題詩阮公跋蕙西長句尤精擘

侍郎古癖甚前哲得之不啻珍珠船竭來示我發函讀

官制半與明相沿我稽 聖祖初繼極勳戚備政頗自

專復改殿閣爲三院學士稱大僅六員又停御史出巡

按盡畀督撫一事權此冊殿閣輔臣九聊城去位銜猶

聯內外臺列按臣職姓名無一留雕鐫援以定歲更知

月實在夏季秋以前祇惜涿州

馮銓

長揆席黑頭奄孽猶

餘羶次輔吳江

金文通

亦媼相貳臣傳裏徒墀顏一丞一

令落嶺嶠清端忠毅名長懸豈非爵秩本外事不因貴

賤分愚賢自茲迄今歲二百朝暮變滅如浮煙大者勳

節次文藝王詩汪筆今猶憐侍郎年位足展布論思所

暇勤丹鉛澤州京江特俛視

陳文貞張文貞時皆爲庶吉士

儀徵獻縣

堪隨肩我喜此書得所主願君局護同琅嬛蘭臺柱下

藉搜補他日千金購此編

葉井叔家樊口詩曰慕廬草窠尊石云袁山迤東郎亭

下磊砢疑如象與馬驚波帶雨刷崩沙亂擊夫容醉堪

把有如截竹斲雲根空中直上名窠尊北維坼裂頂豁

軒八分鑄字今猶存形雖如尊不可以藏酒東偏之顛
有坳復如日卽非玉女洗頭盆宛如青田核半剖漫翁
所修諒在茲其器天全可濡首澄江就釀葡萄醅挹注
何窮傾百斗春風秋月頻舉盃莫待懷襄徒衷手我思
元孟真高風杯飲欲遣尊罍空唯亭與湖名並同共守
涓樸追鴻濛苟非蟬蛻埃壚中焉能痛飲師遺蹤於戲
誰其繼之吾請從其校獵應制詩尤爲典重與王昊廬
宗伯同里雅善宗伯詩如贈周櫟園云著書忘歲月積
畫當登臨買花云賣花擔上露纔乾野老移來滿藥欄
拋卻故山花事盛翻來燕市買花看均有致

漁洋記莫進士家有漢上題襟集求之弗獲莫名與先
字大岸潛江人官知縣歸田奉母結茆月汧之濱左圖
右史冀空晏如也吾生篇云吾生一腐儒抱經兼學稽
艱虞迫積齒母也耄且耄追維牽絲年嬰疹動顛蹶臥
視凋劫民念之腸內熱竊道尸位罰懣然籍有黑曰歸
稼下地水潦謹防暵亢曠殊不料澤腹盡坼裂徂秋田
野空黃雀徒喑喑年年汎舟役潛水南支竭旣乏肇牽
資孰尋乾餼責揚袂安所如誑飢謀已拙符訾非土產
亦未饒榆屑廢枯肺半灼麴敗喉全罄此物旣充糧踊
貴等一切草木幸有根詫見恣採掘詎諳伊耆經罕究

汜勝筴爲毒則已矣無害苟日月吾廬恆晝掩木落蟬
秋咽飢鳥啄我屋鼯嘯繞坐側可笑門東兒劇嘸啐盜
高平頭數百指痛於塞垣客流迸從所務新主卿審擇
顏厚語喃喃緩死指牟麥跋跋此卒歲種種難具說歲
改蟄漸啟野梅香遠洩訪梅洄東鄰乍喜麥穎坼吾弟
散朗人來往同步屨老母頗愛梅一嗅發愉色譽麥向
妻兒聊慰忍匱闕圓闕那可忍天事有叵測是夜風雨
惡礮礮吁可駭霾隄且滄旬硬雨交積雪朝來田父泣
薪薪若抽磔縱然及首夏何以飽饜藪惜哉青帝權而
爲司寒竊三老訝未曾雪到牛脣沒巖巖穿緼齋指直

不得結樵蘇道復斷勞薪遠莫擷冰摧中林條稍稍事
檜桡苦寒亦暫爾放愁實未得僵臥了無營開帙瞥兩
睫恥逢雒令埽翻憶漢使嚙遙憐隴頭水千里墟煙歇
近聞武谿深鼓鞞方震疊臺軍上牢屯凍塚緣帶嶠蠲
條挂廨壁科斂溢符牒哀哀寡婦哭高高郤罔徹大運
自古來吞聲泣勿暇長篇險韻可與顧赤方才氣相埒
朱悔人極爲王朱所稱似尙不逮

竹垞高博士恆懋席上留贈公子緝睿詩列席先投轄
升堂喜益簪飄零忘薊北風物盡江南滄酒盜嬰滿張
梨白露甘留連如意舞更與阿戎談西陸清秋候東山

舊宅開壺觴兼日夕文詠許追陪且爲看花起還愁上
馬回春風倚歸櫂賭墅定重來恆懋靜海相國子總角
卽善屬文

世祖諭公卿子入侍文端以姪恆豫應辛卯恆懋舉鄉
薦少保卒恩蔭一子承父志復讓恆豫己亥舉進士以
祖老改教諭緝睿字堯臣詩古文詞不作常語累官福
建布政使其鏡江舟中二首云上灘宜散步倚岸數游
魚小圃花容折僧房壁許書青帘村市酒修竹野人居
牧笛來何處騎牛涉碧渠千里俱蕭索村雞喜乍鳴桑
麻粗種植廬舍小經營分水羣安磴修渠各聚滋戎州

凋敝甚孤堞枕江聲少與竹垞文詠追陪知孺染有所
自焉

湯文正以順治甲午授國史院檢討時議修明史上言
宜依宋遼金元史例錄南渡後死事諸臣執政詫其言
疏夜半上傳 旨召至南苑人皆爲公懼

世祖顧與溫語移時不以爲罪康熙甲子巡撫江南毀
五通神祠華亭許鶴沙爲賦睢陽行云睢陽學士金閨
彥夜深常侍明光殿金符大旆挾風霆冰心苦節綏南
甸長空明月照江濤於菟出走蒼狼逃木石之怪夔罔
兩猶向人閒索五牢中丞飛檄榜通衢沈其土偶廬其

居故鬼不于新鬼竄陰霾埽蕩天清虛君不見狄梁公
西門豹水沈三老焚祆廟又不見旌陽尹昌黎伯斬蛟
驅鱷服以德從來忠信孚豚魚千金惇史銘金石公今
入朝帶劍履前席殷勤報天子璽書赫濯神祇驚日麗
中天民受祉以丙寅內召丁卯十月卒時 東宮初立
擢領宮僚明珠余國柱比而相傾屢爲蜚語上聞常熟
翁叔元至劾爲僞學幸荷

聖祖保全卒被齟齬以沒秦小峴官浙江時其元孫懋
修爲縣丞問其家世零落非昔廬墓屢被河患王文簡
記其門人王公垂給事紳以艱歸睢州臨別慘然執其

手曰吾祖吾父年皆六十一今吾年適如之子歸矣不知能復相見否果以是歲不起公垂厯官戶部侍郎祭告禹陵過吳門作胥江飲餞圖圖中祖餞者二人張匠門惠仲孺作圖者文竺塢題卷者朱竹垞

張卿子有贈顧不夜歌傳青主有不夜菴

靈壽傅掌雷司空有謠三十篇總名士傳民語作於崇禎庚辰曲盡明末兵荒流離之狀子變雒鷺來感懷詩有云名山書有三千卷別業桑無八百株寢邱地在躬耕好祕閣書留手校多可想尙書清節

范文肅主丙戌會試魏敏果出其門無私謁順治十年

敏果遭萋菲午門會審文肅剖悉情事得雪十一年以疾乞休久居林下敏果於乞養時一謁園亭問所以見知之故文肅曰在會議中見文有直氣是國家有用之人不欲他人誣害因留飯而別其公忠體國扶植善類多類此睿忠親王攝政時言官多以論大學士馮銓得罪及孝陵親政以文肅言起給事許作梅御史李森仍補原官嘗謂諸臣疏劾大臣無非爲君爲國皇上當思所以愛惜之又嘗請令部院三品以上大臣各舉所知不論滿漢不拘資格不計親疏取正直才守之人堪任何官列疏奏聞一官舉數官數官可舉一官彙其

姓名置御前不時召對察其議論核其行事遇缺請旨
簡用居恆言治天下惟在得賢庶官有才者不以一眚
掩湔除拔擢時爲奏請焉積亮四朝好賢若渴功成身
退遺安子孫佟儼若呈彥公表叔詩客返家園倍愴神
碧山亭子掩殘茵閒房幔冷猶飛燕棗樹花開不見人
東閣圖書留點定南船風雨去逡巡尋春苦憶東臯路
灞上青驢墮酒民又東臯小集詩丞相東臯堂已敲空
園不見柳絲絲簾垂簾捲山風入人去人來燕子知竹
馬紙鳶尋舊處拾花鬥草憶兒時相看齊下關心淚孤
館荒涼誰最悲西州之慟亦足見盛德之感人深矣灞

上者灞河亭子文肅嘗蹋春於此園中植梨最多覲公
中丞蒙難文肅夫人尙在長齋繡佛以祈生還儼若有
句云三春細雨清明過百八危灘冷雁來歲歲年年見
范母滿龕佛對夕陽哀覲公撫浙盡劾貪吏請除衢台
處荒田之糧浙中游饑累請蠲振蘇公尙書官御史請
寬風聞處分之條在京官得不時奏對督雲貴免麗江
失地之賦吳三桂割以賂蒙番而賦籍尙留者也皆本
文肅遺教以寧一類若爲心雍乾兩朝其世胄尙時有
表見厥後遂匙聞人而國運隨之矣國家之興莫不由
於禮賢使能虛已納諫損上益下文肅早契魚水出而

折衝入而借箸上書睿邸首以申嚴紀律民安業官安
職爲言明季賦額屢增請用萬厯時額實爲逆天休縣
厯算之本末造枋國諸臣寧復有知此義者哉

王文簡望劍州懷喬文衣詩次公狂自好名字滿人閒
才士無高位吟魂寄百蠻音書湖口縣生死劍門關太
息青蠅弔交州幾歲還文衣名鉢內邱人官劍州知州
詩如宿寒亭驛云古驛重門花寂寂枯槐敗砌掩荒雲
當年夜哭人何處細雨蕭蕭不可聞探梅云散吏蕭閒
步探梅一尊獨醉古牆隈淋漓日落不歸去只等林梢
月上來申臆盟評其詩所謂橫臆而出肝膽外露者也

郭幼隗酬錢開少夜坐寄懷云劫後窮經老此生霜寒
歲暮不勝情長年積恨如翻蠟萬事衝心似轉軒篝火
夜闌仍藉酒月明人定又移更白頭負杖防敲失會傍
清谿穩處行閒情妙緒中有孤絃激越之致其儉德堂
記謂今天下尚侈極矣民習侈而貧士習侈而僞仕習
侈而污侈心生則人紀積天綱地維卒蕩然不可紀極
作易聖人深懼焉序易至否而繫之象曰君子儉德聖
人非遺棄天下教君子以煦煦子子枯守仁義爲榮也
非泥滓爵祿不一顧視也非置已于安而付餘人以危
難也大易言進退存亡吉凶悔吝者屢矣而獨于否著

儉德蓋憂患之至恐懼修省之微文守中用默其道無窮劉自熈序其詩謂三十年來天壓淵枯幼隗能獨豎脊梁入獸之羣不亂履虎之尾不啞其有得於儉德之旨矣

新建徐巨源與陳士業齊名卒於順治丁酉榆墩集附詩話一卷有云大東其離騷之葭吹與指歎星河俯仰衣屨超忽陸離非夫採擷蘭杜媒求姚宓者不能躡其奇蹤也無羊之繪事至于降阿飲池負餽何笠寢訛之異麾斥之同諸態畢具使韓榘戴嵩爲之何以加此昌黎得之以作畫記斯亦善乎能臨榻者矣谷風之同心

見怒氓之信誓不思千迴萬疊更充棟小說鑊心之文
無能及其一語者又云無滑而魂兮彼將自然壹氣孔
神兮與中夜存虛以待之兮無爲之先三閭之本領也
靜坐觀眾妙浩然媚幽獨迴薄萬古心攬之不盈掬太
白之本領也惟有摩尼珠可照濁水源願聞第一義迴
向心地初子美之本領也唐人如王昌齡空山多雨雪
獨立君始悟日月蕩精魄寥寥天府空蓋亦有所得者
韋蘇州落葉滿空山何處尋行跡則妙入不言之表矣
又云何遜機杼靡蕪妾裁縫篋笥人是盛唐人鍛句鑄
事所祖持論頗能直湊單微

雪橋詩話續集卷第二

雪橋詩話續集卷第三

遼陽楊鍾羲撰集

吳興劉承幹參校

聖祖沖齡踐祚覽監臣湯若望疏請寬窩逃連坐之法
顧四輔臣曰一逃人連坐十家本年逃旗萬人將連坐
十萬家苦吾民矣遂令寬其五家獨坐窩家充發永爲
定例紀元六十一年自殷中宗後由周迄明將三千年
所無有也柏鄉魏念庭詩紀元遠過三千載發語旋甦
十萬人累年各省免賦水旱開倉賑濟寬舊逋宥罪犯
柏鄉相國家有

世祖御賜書 景陵屢賜鞍馬表裏御纂諸書四十二年西巡回鑾駕幸柏鄉卽在兼濟堂尙食賜念庭母克什念庭詩有云先臣秉憲哭

章皇

相國有恭輓詩十章時官總憲

今撰哀詞倍感傷

念庭哀詩四章御書

千秋藏聖澤賜書弈葉仰龍光金貂優禮扶鳩母玉饌榮臨旋馬堂慚媿三朝承雨露文謨武烈紹成王皆紀實也

裕親王目耕園在右安門外麗雪厓有同蘊上人王六翰張樸園兩太史凌靜菴往游詩六首庚午噶爾旦遣烏蘭布通山王率師禦之彼軍有土克喇麻能作法喫

雨以駱駝爲陣我軍力戰遁去 聖祖常命工寫御容
與王並坐桐陰下蓋取同老之義平居友愛如此本朝
家法善于前代宗藩旣盛且賢勤郡王風雅好士嘗爲
朱贊皇畫扇頭蛺蝶爲紅蘭室畫白菊袁士旦卒捐金
三十棺衾始備雁雪厓集崇效寺看新綠應教云雅集
來初地微風盪白雲繁花紅已盡雜樹翠難分惠遠酒
長戒陳王詩不羣追隨媿應阮吟罷欲斜曛紅蘭室主
人乃安和親王之季子安郡王古香閣主人之弟其畫
杏自題云二月閒居香雪堂杏林猶未發紅芳偶將書
贖松煤汁先引香風上粉牆欲識雪厓乃以館客朱贊

皇來命之曰子行卽吾行也雪厓詩士前王未肯將命
託謙詞代造余何敢賢勞子至斯貧居憐僻遠老態媿
支離此義焉能負承顏預作期紅蘭刻寒瘦集自爲批
點卒於甲申三月

雪崖詩云 高皇原自聖龍種各超羣王子工爲賦將
軍亦好文天才同氣並藝苑大名分再見西園體長吟
過夕曛謂勤郡王與博問亭也白燕栖者問亭書齋嘗
有雙燕來巢其色白故名深於詩清嚴閒遠其東皋別
墅有東皋草堂說谿香界菴一枝閣暈香亭竹塢紅蓼
灘嘯臺杏墅川上蔬泉北瀨懷遠堂老是菴雪厓均有

詩詠之其自志東皋草堂中竹塢云風前月下清影蕭
疏予之小澗川也安郡王自號谷園荷鋤其古香閣居
西紅蘭室稍東良夜桂苑賓客交互往來雪厓安郡王
筵上作云鴻烈淮南解多材家相身從來貴介胄原異
等閒人善畫工無敵詩歌妙入神腐儒思有贈下調惜
輕陳誰更無兄弟王孫分獨隆胞封一體並文雅大名
同來往交詞客東西對雪宮楊雄笑眞怯白首託雕蟲
安郡王弟雪齋亦善畫雪厓有謝雪齋賜水墨牡丹詩
古香主人妹六郡主善畫梅出嫁部落歿後其姪拙齋
主人吞珠以示姜西溟爲題一絕句云生小嬌柔太傅

門閒庭詠絮並諸昆何堪零落依青冢自寫幽香爲返
魂西溟嘗爲紅蘭主人古香主人及問亭作詩序

李斯年自號樵嵐山人又號補黃村農弱冠遠游足跡
周九土有再眠寒寺初更雨五見炎鄉十月花及十年
九日他鄉過千里三山獨客來之句宮詞最佳如珠簾
風起暮花香水滿金壺清漏長前殿月華宮樹暗夜深
歌舞出平陽琉璃宮闕望霏微侍女窗中暗卷衣複道
槐陰春滿地歸鷗半帶夕陽飛鞍馬鞞鷹錦繡妝天家
羽獵出長楊明光美女三千騎盡著戎衣換舞裳長信
宮中鳥夜栖昭陽殿裏早鶯啼君心一似銅溝水盡日

東流不復西可謂善學唐賢分虎於三李爲最少號耕
客又號桃鄉詩曰香草居集寓滇四年自張禹山楊用
修後山水勝蹟所詠爲多其星回詞謂南詔野史載皮
羅閣建松明樓誘五詔至將殺之以并其地鄧賧詔妃
慈善沮行勿聽乃約鐵釧於夫臂旣往果焚死各詔屍
莫可辨慈善因釧識骸骨而歸葬南詔以爲賢將娶之
不從圍其城慈善堅守三月食盡死滇人每歲六月廿
四日晝作醮會食怨南詔之不仁也夜執炬相照又若
招魂者然傷五詔同焚與慈善執節也至今相傳爲星
回節卽土俗以詠其事其尋甸州雜詩有莽莽月狐北

之句尋甸唐蒙氏尋甸部明爲尋甸軍民府本朝康熙八年改爲州月狐山名在尋甸西北滇南春詞諸作亦有唐人竹枝遺意卒於福州年五十一

沈白濩受詩於梅村梅村嘗寓書龔芝麓云吾里中詩人近得毛生沈生毛生北游沈生送之以詩曰毛生自是初相識莫便輕他十九人此與唐人何以異哉其引重如此吾喜誦其憶母云貧自儒家事難安爲老親遙憐負米客長作倚閭人夜績孤燈暗朝梳白髮新生男亦何益只是累衰辛白濩家酷貧資艇脯以養母嘗挾策遠游南至閩越北至宛豫又一再至京師也毛生謂

毛亦史師柱亦史韓侯釣臺云列爵淮陰帝業開桐江
還有客星來漢家宮闕銷沈久寂寞乾坤兩釣臺錢嶼
沙嚴陵云圖畫功名安在哉高風千古一漁臺此情惟
有江潮解流到灘頭便急回二詩作意略同

漁洋司寇題卞令之少司寇紀年圖云綠橘黃橙未受
霜楊梅先熟蔗爲漿先生也似東坡老夢遠吳山卻月
廊花時河渚鏡中游茗椀鑪薰列兩頭知有何人伴幽
獨四山香雪一孤舟桐君山出白雲層雲外荒臺盡日
登烏柏丹楓秋色裏瓣香親酌古嚴陵蒼筍林中宴坐
温木樨香裏對忘言語言文字消除盡便是文殊不二

門憑將忠信涉波濤橫海樓船擁萬艘手拔鯨牙歸幕
府荔支香裏解弓刀愴然琴鶴出甌閩回首風濤百戰
身荔子殷紅榕葉碧江郎山下一歸人耿耿銀河拂地
流霜催黃菊雁橫秋橋南荀令銷魂日纔聽言愁我欲
愁萬峰飛雪暗蠶叢拄杖過眉老衲同禪會圖中舊相
識三生還踏隗囂宮名士軒頭六月時科頭長日對漣
漪行吟淥水紅蓮裏身是風流庾杲之御蓋遙臨越望
前八神警蹕衛山川畫圖省識辛壬蹟父老長傳己巳
年令之由江臬浙藩不數年遂撫閩中以康熙三十九
年入爲刑部侍郎紀其經游爲是圖也

洪昉思張睢陽墓云睢陽城北陣雲收帝遣招魂葬此
工鼠雀至今畏兵氣夜深不敢叫松楸夜過馬陵云月
沒沙飛高岸崩馬蹄昏夜踏層冰白楊樹裏青燐火直
照行人過馬陵釣臺云逃卻高名遠俗塵披裘澤畔獨
垂綸千秋一箇劉文叔記得微時有故人俱見筆妙東
園句云鳩貪桑實醉鼠戀豆苗肥

施每餘汜郎皆愚山之弟每餘詩如留別聶象鉉云風
雨篝燈一載情送君翻笑別君行漫將老淚沾雙袖已
被狂名誤半生杜甫秋吟多感慨坡公春夢太分明前
途亦有謀生策負郭閒田莫廢耕汜郎詩如將之桐川

別母云承歡成底事歲晚尙孤征似此出門狀可知居
者情晨餐休任減宵淚莫時傾慰藉翻增感垂頭念此
生皆極真至

顧梁汾贈三山云抱甕城南生事微吹簫舊伴市中稀
尊開楚醴虛前席帶拂吳鉤短後衣老覺鬢絲垂更減
閒愁髀肉坐來肥莫嫌燕趙悲歌客忘卻青山已息機
雪月山行云清光欲溼水田衣猶自支筇歷澗扉雙徑
夜隨鐙影入眾山寒逼磬聲歸頻來莫認泥鴻迹已過
偏驚野鴨飛良久風幡俱不動任飄殘葉擁平磯詩才
清雋一時當推獨步其讀遜國野史四首亦佳

烏程夏駟宛來康熙戊午以歲貢舉鴻博時浙江學使程某爲魏環極劾其簠簋不飭辭連宛來宛來致書環極自陳其誣言學使未經抵浙先已入都然事未得白竟不獲與試工古文與趙天羽黃門友善康熙七年黃門令交山有巨寇爲民患設方略討平之宛來時客幕中與有力焉因紀其事爲交山平寇本末三卷有爛谿集陽灘云疊嶂周遭碧蒼茫去住閒萬松明遠雪一碓響空山背日柴門靜穿雲樵路閒此中真可樂漂泊幾時還

蔣度臣上舍進爲虎臣修撰之弟湘帆學正尊人也有

退菴集客游長安久無所遇敝裘破帽躑躅京塵蓄杜
老之潛悲爲敬容之殘客橫空朔吹感歎無家禿鬢窮
愁情如中酒其歲暮雜詩悲涼怨抑讀之令人不樂矣
酉仲冬查夏重過其果子巷出所作詩詞夏重評其必
傳喜曰得一人知己可無憾矣數日無疾而卒嘗有句
云逢人便示才堪用寫游士干人之態有如秦鏡照膽
平湖沈南渚岸登詞居浙西六家之一閒作水墨逼真
雲林詩如江行云見說垂楊渡人家尙姓蕭渚花叢出
岸山木仆成橋馬踏明沙缺鴟啼廢殿驕誰知朱雀桁
褰屐亦飄搖曉發唐山云小郭衝晨去編篷只數家沙

明猶見月籬缺不遮花宿鳥句春語香醪趁馬賒山風
無檢束容我帽簷斜又葉星期括蒼道中云蕭然倦策
度重巒絕壁摩天傍斗看游子傷心悲九折美人遙睇
隔千盤啼鳩花信他鄉到瘦馬衫痕落照寒不斷亂雲
投北去生憎回首望長干三詩均可入畫

吳縣金蘊亭學博寄芝仙西征幕府云枚生長託乘王
粲始從軍會有平戎策能開西極雲令嚴千雪嶂犒士
萬羊羣指日應降虜饒歌奏凱聞芝仙爲常熟徐芬若
生三歲家人偶出輒能自起跣趺合掌而坐學詩於王
漁洋爲紅蘭主人所知題其集曰飛雲玉池生稿有上

已同徐蘭顧卓修稷暮春留顧卓金書徐蘭就樹堂小
飲諸詩康熙丙子親征漠北安郡王駐守歸化城芬若
以書生短後躍馬相從出塞過廢城六單于蘇武雲內
豐州殺虎土城周視險隘案之圖經陰山高闕皆在界
內祁連山中花十數種皆豔絕不知名中土所未有嘗
畫便面貽漁洋芬若故長白描人物也土產有白草雛
鷹鷹鼠瑪瑙石酪酒出喀淪至蘇啜曷北行三十里一
土山視羣阜稍峻山頂大石勒永樂八年御製碑五十
一字有瀚海爲鐔天山爲鏐一掃胡塵永清沙漠之句
其陰勒禽胡山雲濟泉六字險處壘石如墳蒙古謂之

孤堆猶中國之山神廟凡過者各擲金鐵少許于上如
祭祀然瀚海中文石番僧云是積羽所化閒得石卵擊
破中有勺水一小活魚在焉見風墮地復化爲石皆見
于詩其打鬼歌蒙古某歌彈喀赤哈歌採珠歌打貂歌
皆集唐爲之赤陵姐彈琵琶歌土木堡瑪瑙石燐火起
輦谷諸作颺馳湍發出入高岑歸化城在唐豐勝二州
境卽趙全所居左鳳閣右蟾宮之板升地後爲三娘子
所游牧萬厯中賜名歸化城芬若歸化城雜詠云五月
祁連雪似銀雪中景物最酸辛鹽花縱苦猶充食藜草
雖多不作薪谷口雷鳴能搏獸城頭風起鬼迷人浮生

那得沙場醉且聽胡琴飲數巡雪打邊城幾朵傾山頭
險阻類陰平因移右衛新屯戍來守前朝舊築城大將
新頒黃帶子名藩兼統綠旗兵交河然徧平安火何藉
書生學請纓祁連呼吸與天通不與人閒節候同後騎
解衣風柳下前軍墮耳雪花中髮離漢地根先白淚過
秦城色變紅騶從漫勞歌況瘁侯王猶是佩雕弓雨雪
漫天道路長軍中安得有餘糧愁將枵腹捐空革喜得
含飴赴戰場化外倮蟲皆感泣槽頭病馬亦騰驤飢魂
乍飽知癢痛細裂殘旗裏凍瘡音節極爲悲壯古稱明
遠嘉州工爲邊塞之辭如芬若之以歌詠代紀述亦前

代所未有春夜集紅蘭室同偉公分韻云修稷歸來興
倍增只須明月不須鐙最傷心事青門柳儘耐聞人白
髮僧濁酒重拚花下醉好山又向夢中登莫愁五嶽游
難徧酩酊何妨先曲肱長安上已同劉介子翁尹若鄧
五至吳赤霞程雨三家楚光分韻云長安自古饒春色
佳會於今勝永和修竹亭臺歌扇滿落花村巷酒旗多
省中揚出滕王蝶池上籠來道士鵝應笑塵纓逢令節
也隨稷飲濯清波則客京邸時作也後流寓北通州以
終閒居詩云柴門幾日不曾開處處牆根長綠苔花落
莫教風掃去白雲堆裏有誰來晚境牢落情見乎辭益

其時應劉未終陳王先逝矣

查他山七古俊利長篇閒有喧砌之嫌其短篇尤見道
緊題朱子蓉六丈所藏張穆畫馬用黃山谷韻云綠楊
風起驕不行低頭嚼環如有聲乾坤一線塵縱橫肉中
帶骨筆力透不比東郊詩詠瘦苦憶尋常棧閒豆青絲
漫絡高家驄龍眠妙手亦老翁誰能更貌桃花紅題宋
石門畫松云蒼髯翠鬣搖向空老榦蟠作青虬龍雙睛
未點飛不得時有雲氣來相從開時高陰散林麓捲起
生綃纔尺幅人閒何處著秋風昨夜城南拔喬木磨驢
行云山家養驢供磨麥石縫隨身落輕雪前遮兩目後

被鞭步步團團踏陳迹

用東坡詩中語

君不見雕鞍玉勒紫金

羈暮越朝燕掣電馳八百里牛千里駿等爲人役莫相

疑題馬漁村行路難小影云狂瀾打頭山壓面跼躄乾

坤縈一綫我行畏路知路難談虎還防君色變君家門

前池水清對門山與樓檐平此中徑路坦於掌作底胸

次添崢嶸畫師寫圖如有託洗耳聽琴差不惡可怪冰

雪七條絃千萬勿彈螳捕蟬棲賢寺阻雨示角子禪師

云七尖峰埋煙一塢五老神情皆下俯攜來杖頂昨日

雲灑作鐙前夜來雨石頭路滑不可行游人早起祈天

晴禪翁勸我且喫飯同向空堂作水聲再題霜林秋晚

圖卷云長風入林瘦蛟舞萬葉低昂爭仰俯擘開玉峽
飲晴虹倒射霜空撒紅雨中閒幾株尤耐霜濃者得綠
淡得黃興酣渲染出真意絹素絢爛凝秋光瀟湘洞庭
多變態放筆知君與神會披圖莫作咫尺觀別有蒼茫
在圖外他山初見陸冰修以詩爲贄有絕奇世事傳聞
裏最好交情見面初之句冰修擊節不置遂妻以女亦
佳話也其露筋祠辨俗說之譌云古驛碑殘幼婦詞飛
蚊爭聚水邊祠人閒多少訛傳事河伯年年娶拾遺
康熙中有兩張遠一蕭山人字邇可著有杜詩會粹蕉
園集朱竹垞有送之桂林詩一侯官人字超然以孤童

亡命閒關千里秦代滇粵琴劍飄然所過山川每有題
詠弱冠題滕王閣有句云豈無詞賦驚閭帥已把文章
讓子安嘗客曹秋岳幕中歲暮寄懷故園親友云一年
一萬一千里馬足車輪舴艋舟自笑此身還似葉不知
於世復何求磨牛處處尋陳迹籠鳥依依憶故丘正是
羊城梅發日瘴雲梅雨獨登樓耿逆平歸里母已卒家
蕩于兵有鵲巢爲童子所破二詩寄意其還至延平遙
望先墓有作云登樓遙望墓門秋辛苦經年尙劍州豈
有弟兄依隴畝祇憑風雨護松楸來從豺虎行邊路去
逐鯨鯢腹裏舟四十無成還浪迹雲山何處可回頭營

葬其先於侯官之登雲路復寓吳中年五十領己卯鄉薦弟一出吾鄉阿雲舉之門年六十八令滇之祿豐年七十五卒子官善畫梅竹其在祿豐思歸詩有云已訂六郎西寺住田廬賣盡賣梅花梅花者畫梅也著有无悶集三十卷沈子大謂其詩文在屈翁山魏叔子伯仲

閒

吾鄉呂大風詩雅頌集僅載四首詩觀二集錄其送潘雪帆祝髮天壽云潘子年將暮看山每在斯暗尋埋骨地虛詠學禪詩寺古門常閉松深影不移諸陵春欲盡一鉢薦醪醢秋感寄陳千頃劉鶴峰云畫角動城頭西

風起暮愁梧桐心最苦一葉一聲秋送客歸樵用楊仁
對原韻云不逐三千食客羣一肩行李別田文可憐長
鍊無人贈攜向臨淄換斧斤詩均可傳

納蘭容若密室曰鴛鴦社葬處曰阜菴屯杜雲川詩此
照還同此閣存幾人能唱憶王孫風流休數鴛鴦社只
是傷心阜菴屯登貫華閣觀容若三十小像作也生長
華閤給事禁闈出入扈從常在屬車豹尾之間其南苑
雜詠和蓀友韻云宮花半落雨初停早是新涼徹畫屏
何必醒泉堪避暑藕絲風好水西亭離宮近繞綠蘋洲
冰簟銀牀到處幽好是萬幾清暇日親持玉勒奉宸游

太液東頭散直遲一雙水鳥掠楊枝從臣獻罷平瀕頌
坐聽中涓報午時進來瓜果每承恩豹尾前頭拜至尊
正是日斜花雨散傳呼聲在望春門幔展青羅一色裁
璵窗深映拂雲槐重簾那得微風入葉葉荷聲急雨來
黃幄臨池白鳥飛金盤初進膾魚肥太平時節多歡賞
絲絡雕鞍半醉歸射生纔罷晚開筵十部笙笳動暝煙
月上南湖波似練幾星鐙火是龍船輕絲蜀錦護銀塘
誰許延秋報早涼縹緲蓬山應似此不知何處白雲鄉
纔翻急雨暗金河曲罷催陳雜技多一自花竿身手絕
那將妙舞說陽阿玉映窗扉靜不開藕花深處絕塵埃

三更露坐清無暑共待蕉園彩鷓回香引輕颺散玉除
下簾聲徹退朝初馬曹此日承恩處也逐清班許釣魚
煙柳千行宿鳥多虹梁曲曲水螢過新涼卻愛中元節
萬點荷燈散玉河夜深簾幙捲銀泥十二樓高望欲迷
蓮漏滴殘聞動鎖一鉤斜月碧河西輕雲欲傍最高樓
重露看垂白玉旒處處紅芳零落盡眾香國裏不曾秋
時攀玉柳拂華簪水檻行開玉一函幾日烏龍江上去
回看北斗是天南玲瓏朱閣擬三山上駟門依御柳閒
倦聽月中歌吹杳晨鳧秣罷夜飛還制勝由來仗德威
夜郎何物敢輕違河清欲頌慙才盡空羨儒臣賜宴歸

講帷遲日記花甄下直歸來一惘然有夢不離香案側
侍臣那得日高眠不須惆悵憶江湖身入金門待漏圖
中夜擎來仙掌露蓴羹風味得如無花映初陽覆綺寮
玉珂雙引望中遙憑君莫作煙波夢曾是煙波夢早朝
蓀友原詩作于康熙二十一年六月有云折本崇朝費
睿裁乍宜清簟映宮槐樓西一縷涼颼動又允詞臣進
講來自擁青綾夢五湖不知此景在黃圖金明屋角蘆
花雨添箇煙蓑穩稱無可想見禁近雍容之盛如展趙
淑人宮門待漏圖如讀楊奐汴宋故宮記燒殘龍尾道
竟被一尺三寸汗腳踏盡黍離麥秀之感何代蔑有若

夫鐘簾不移山河已改又不得盡歸之天命矣

王棗村登許城懷古云守府久知移漢鼎墓門枉說署
征西田子益詩遺黎弔罷破黃巾位進征西孰與倫若
染頭風身便死至今猶是漢能臣子益名震山薑之弟
人稱香城先生

柯翰周游嵩山詩勢壓三川橫地軸位尊四岳表天中
張厯友題田綸霞黔書云路遠萬山通益部天垂一髮
入姚州皆壯語也厯友別號崑崙山人其郢城春望云
楠木山頭古戰場名都形勝鬱蒼蒼羣峰黛色趨雲杜
千里江聲下漢陽天外曉煙遮郢樹城隅曲水護銀塘

遙憐純德山前路野鳥飛飛出苑牆憶光緒癸巳先君
權知鍾祥請於院長出都省覲作十日留丙午春余由
襄州移守安陸再至焉讀歷友此詩振觸昔游恍如夢
寐

高唐朱紉椽邨德州李檉茗齋並學詩於漁洋椽邨詩
如偶成云詩筒酒盞奈愁何上巳清明病裏過閒鬪香
泥下花子一庭疏雨碧苔多春堂雜詠云研北插花新
得法舍南種竹舊傳經借來城外春山影聊當空齋六
尺屏雖傷婉弱要自清新茗齋過杜亭弔南村先生云
十年游宦傷陵谷五柳歸來半醉醒

田秀才讓靈武人父爲吳川丞卒于高州佛寺讓四歲
耳母岳氏不能歸櫬旣壯母告之以恨而卒讓乃空囊
走萬里至高州寺無有識其事者一老病僧爲侍者時
諭知田丞生貌類其父因告以葬處啟棺驗左齒缺與
母言符瀝血沁骨乃大哭裂衣爲囊負之北行丐貸以
歸與母合祔焉生年三十五歲矣同里孟之珪傳其事
膠州張山農謙宜有詩

范纘笏谿十五歲謁吳梅村命賦桃花篇得千三百言
大爲激賞悔其少作不以入集句如春到酒帘爭簇市
夜無街鼓近除兵簾前山影輕于畫潭底雲容冷欲飛

田家云柴門斜映柘林疏半頃山田雨後鋤竹筍尙鮮
豌豆嫩落花飛絮夏天初皆極沖澹

羅酒出德州王漁洋謂其清如止水氣若幽蘭朱文盎
與田綸霞索羅酒云涿酒常苦烈雪酒常苦甜房酒清
香薄東酒濁者黏何況梨花春味薄脣難沾往年過漪
亭留醉十日淹酌以定州瓷有若水在匱神人下姑射
朱粉皆媠鹽孫莪山詩德酒當年羅最名近來佳絕有
香城香城卽山薑之弟以雪水爲羅酒紹酒之佳者曰
花露香雪濟南有溫泉釀酒曰渚酒滄州有滄酒無錫
有惠泉三白烏程有潯酒漢陽有梅淋酒襄陽有玉蘭

酒此皆可入酒顛補德州陳鐵巖孝廉詩清如止水味
蘭幽美酒羅家信莫儔直得詩人高仲武爲貪一醉到
陵州贈高西園作也

歸安徐行還園有德舒堂集樂府最佳善哉行云飢虎
在山藏怒不吼五采斑然望之如繡如迎斯步如拜斯
伏視爲騶虞引躬暱就歡笑幾何攬肩及脰居不擇交
莫不顛覆藹藹麟趾實爲德鄰道遠莫致涕泗悲辛雞
鷺在野甘與爲倫雌伏雖卑不與禍親日入崦嵫詰朝
東出闔門夜寢嚮晨起櫛言近旨遠漢魏之遺世乃有
引虎自衛認賊作子之事執大政者毋乃悠悠其怨歌

行云九月露爲霜裳衣與時易奉時宜棄捐非君忘夙
昔立意亦極忠厚

高紫超爲高忠憲從孫嘗舉孟子志士不忘在溝壑爲
訓謂貧士自立必從此始旣壯爲諸生父晉侯年八十
九以終紫超年五十餘矣遂不赴試張清恪延主東林
講會以瘍疾不行有司餽以楸皮不受日誦遺經深於
春秋三禮顧復初其受業門生也爲作高先生傳詩如
頌邑侯曾公云歎息閒居賦河陽又早歸人情真悔薄
生意劇憐微林下彈碁密牆頭送酒稀惟餘五株柳惆
悵已成圍自是雅音乾隆中學使者尹曾一取所著小

學纂注檄學官弟子習之

錢木菴爲湘靈族孫其大父嗣隆嘗偕湘靈問詩法於顧仲恭仲恭曰詩從經史中出者上也從讀賦中出者次也從讀詩中出者斯下矣吾不能詩尤不能時人之詩詩有作詩之旨經所謂溫柔敦厚者是已若時人之詩今在君家宮保之門每譏當時游牧齋之門者依以揚聲以天冶爲溫柔堆砌爲敦厚木菴弱冠好華豔思仲恭語益讀書以昌其詩游京師有貴人使海外請與偕往又同朝貴使塞外絕域詩多至萬餘首存百一曰撫雲集湘靈爲之序觀小伎娟娟舞劍作云蛾眉有英

雄曉妝脂粉薄短髻白衣裳窄袖錦纏縛背人緊湘裙
端捧蓮花顰請爲當筵舞佐此良宵樂取筆漬硯池授
客使分捉舞時各醮灑客漫應曰諾小立寂無言左右
試展拓微卓蠻鞞尖撒手忽然作初如雙玉龍盤空鬥
拏攪漸如曳匹練旋繞分交錯須臾不見人一片寒光
爍直上驚猿騰橫來輕燕掠膽落迂儒愁傾心壯士作
羸童縮而遁姦人戰欲瘡墨灑密雨叢筆敗硯池涸罷
舞視其身點墨不能著嫣然泥人懷腰肢瘦如削伸恭
所謂從讀賦中出者庶乎近之近體如關山道中云于
役方知行路難兼程莽莽過重關烏隨落葉下枯樹人

帶夕陽穿亂山廢耒江淮愁木酪荷受秦楚盼刀環季
鷹豈有封侯骨甘棄蓴鱸去不還寄內云六分春色四
分過夢斷家山近若何九陌鶯花情緒少十年夫婦別
離多無方賢俊皆簪筆有道乾坤漸止戈只有恨人歸
未得鏡匣閒殺舊青螺題楊枝手卷云唱徹秦豔絕妙
詞尊前細認小楊枝天公不斷銷魂種又值東風二月
時得劍村寄懷詩云亦知信美非吾土誰說狂夫不憶
家昨夜客窗風雪裏夢歸山館種梅花均饒情韻

長洲鄭弢字季雅朱竹垞嘗謂吳人狂鄭生獨狷吳人
詩靡鄭生獨剛其夜光木歌云我聞拘彌之國有變晝

之草豈知興州直北灤河東更見夜光之木生蓬葆野
人劓得盤曲形皮膜剝盡肌瓏玲黃昏腐戶置床側煜
爚幽燄騰寒廳初疑唐居士翦紙貼壁弄奇詭又疑佛
圖澄敗絮塞孔照耀同明鏡髣髴社湖中見神蚌吐
珠映水面得非放螢苑裏游冷氣射骨涼颼颼短檠牆
角真可棄攤卷還能辨細字駿童刀削玉瑣碎燐火熒
熒忽滿地吁嗟爾木上稟太陰精燭龍之所不棲羲和
之所不及乃是萬古積雪千年老冰凝結成是以白日
韜晦宵暗晶明若非周王八駿張騫槎誰復遇之震且
驚爾胡不學天祿杖劉向閣中伴書幌爾胡不學牛渚

犀驅逐鬼怪清鯨鯢徒然潛伏窮荒外叢棘柔藤生翳
蒼嗚呼世閒萬物得地方榮滋豈獨爾木歎息不逢時
此詩可與竹垞和程穆倩龍尾硯歌仙游茅筆歌紅橋
板歌諸作相頡頏宜其有牙曠之契

無錫布衣朱幼安號贖水爲人狷介廉潔刊落一切嘗
游燕趙齊魯閒歷落嶮崎所至多懷賢弔古之作有竹
埜堂商山草堂於埜幼安等集陳迦陵嘗爲之序晚歲
以友人獲罪牽連死詔獄子元方徒步隨侍入都時稱
孝子其二鳥詩序云出羊城西南里許瀕江爲華林寺
寺中方池荇藻縱橫旁通潮汐僧畜二鳧甚馴朝飛暮

還依依不忍去云已三年矣始廣人放生畜鳧六雙今
失其五蓋爲虞羅所繒繳戀稻梁而喪其羣也余旣憐
鳧作詩復用以自警有句云擇處不妄飛虞人安得騁
遠害全身意希明哲乃竟以非命死可見知之匪艱

顧紀永字灝期少有肺疾隱湖上年四十卒復初祭酒
尊人也內閭寒夜云殘雪餘空谷巖風起內閭荒宮迷
井竈往事問樵漁月冷松林寂霜清竹影疏感懷當日
事揮淚弔申胥內閭灣名吳王闔廬避暑于此有避暑
宮井故蹟

陳介夫家五湖中夫椒山南巖之下曰南巖草堂工詩

同陸桴亭過青山石屋還宿芳草堂云孟冬天氣寒空
齋澹如此緬邈懷哲人良駕或來弭其愛風日晴一葉
凌空水緩步尋幽巖精廬結崇綺絕壁倒青楓懸流迅
如駛日午天微雲飛鴻去無已夫子天下士徘徊悲廢
圯遙遙古人心疇云不可企歸路向河梁日落孤煙起
中天明月高寤寐清輝裏悠然感夙昔振策從茲始桴
亭字道威太倉諸生鼎革後鑿池十畝築亭其中不通
賓客桴亭之名以此

劉震修學博雷恆與弟沛然上舍霖恆文行交推過銅
雀臺云西陵復誰望歌詠承新恩珠簾延素月錦瑟對

芳尊天命尙有待蛾眉安足論如何拾翠女掩涕爲東
藩詞旨含蓄蓋師事王阮亭得其指授也沛然嘗南游
粵東詠五色鸚鵡云萬里飄零懷故土一生珍重在文
草願震滄亟稱之

陳睿聲字朝階有含譽堂集過兗州云巖巖泰岱魯邦
開不見黃河禹甸來白首從人騎款段青松笑我過岨
嶮爰居對享寧知樂鸚鵡移巢祇自哀漢武若教封禪
早臨卽豈負長卿才照黛閣和蓀友韻云穀雨深春柳
散絲落花庭院鬥茶天歌常達旦歡無限語忽驚人醉
偶然卜築擬鄰揚子宅催歸嬾上米家船勝游此後何

時再愛看藤陰枕石眠新燕云試舞花陰倚柳絲風簾
雙翦羽差池商量舊壘須營補話盡春愁暮雨時均似
才調集

海鹽王可菴世臣爲敬業堂入室弟子詩如半畝池開
魚在鏡三閒屋矮竹遮窗閒街斜日收魚網遠寺殘鐘
起暮鴉雖意盡句中自是初白家法初自嘗稱韓柘田
閨思云銀瓶落井無消息紅豆開花有信期秋晚云流
螢收火原歸腐絡緯停梭漸著棉則較可菴爲饒情韻
矣柘田嘗與匠門秀野查浦分賦送春斷句云花風吹
到醮醮雪不信紅歸春亦歸匠門改一落字曰如此則

七字俱活矣。柘田稱爲一字師。柘田名戴錦，又號半瓢居士。平湖人。揆文端初從初白游，年十四五出語已壓時輩。康熙癸酉初白重至京師，文端悔其少作，初白爲芟汰十之五，名之曰雞肋集。

沈不負晚號，東樂爲柘西南淳昆季行夏雨絕句云：野樹如秋葉盡飛，高田水落下田肥。谿農隨事添工課，又劈春蓑織雨衣。陸蒿菴爲清獻公族父贈朱穆齋云：栽花喜得林前雨，啜茗須留峽裏泉。陸武園句云：疏籬一面仍留月，高樹全身不滿霜。丁日觀獨坐云：白露濃於雲散後，黃花澹入月明中。均極自然。

康熙癸丑元城孫郁雪崖以進士知桐鄉縣事春日題
邑城碧霞精舍云春滿桐岡積翠濃探芝何處覓仙踪
空林溼氣千峰雨遠澗濤聲萬壑松石磴鋪紋蒼蘚合
玉鑪敲影碧雲封幽深便欲觀無始忘卻桃花盡落紅
雪崖詩性情骨力爲五鹿詩人稱首天雄懷古云畢萬
遺封古大名三州扼險土田平山川盡入秦東郡鎖鑰
曾傳宋北京白露橫空聞木葉黃花滿地見秋耕殘碑
偃臥荒煙裏禾黍西風無限情唐藩割據舊稱雄指點
川原近鄴東沙麓山崩城堞改銀槍軍散陣雲空鉦鼙
尙咽枋頭水壁馬徒沈瓠子宮贖史何人搜佚事高天

有客賦秋風霜後芙蓉病不勝荒原日落聽呼鷹秋山
荻老連雞泊澶水沙沈見馬陵捫蝨偏憐王景略狎鷗
最憶佛圖澄鹿臺龍井俱塵土何用傷今感廢興水落
宣防土一堆山形遠抱太行來離宮作寺殘鐘斷古道
成河巨壑哀魏搏牙兵元跋扈洪源竹箭半蒿萊寒煙
亂挂漳南樹夜雨秋風問雀臺大名府爲戰國魏衛二
國境秦屬東郡唐號天雄軍宋升爲北京大名府沙麓
山在府北瓠子河在開州西澶淵在開州南馬陵元城
縣東南

雲南五華山永歷故宮在其上洪文襄督師由貴筑大

路取滇李定國拒戰曲靖吳三桂由四川旁搗其虛至
黃草壩入省城永曆遁至阿瓦三桂購得之縊於貴陽
三桂以總管移鎮雲南遂據其宮增加修飾備極宏麗
康熙癸丑三桂反出攻長沙乙卯僭號丁巳病死孫世
璠僭號洪化戊午諸王貝勒駐軍曲靖賴將軍平耿精
忠由福建進征粵西亦由四川黃草壩直薄省城俘而
斬之滇南平康熙癸亥上元邵爲章赴楚雄幕有五華
山題壁四絕句一時爭相傳和其詩云百萬雄師睥睨
閒前朝一脈絕南蠻擒人卽是人擒路誰道天公不好
還軍威河朔敢稱雄轉眼興亡一瞬中他日龍門成紀

傳君臣父子總無功行營歷歷草萋萋銅柱摩崖手白
題虎豹無睛威尙在老兵猶說舊平西岵天半起觚
棱不盡亭臺取次登心力剛枯人事去秋風誰與哭西
陵

唐太宗禽隋將宋老生於霍州今其墓在州西垣砌周
繚尸祝不衰商山姚麗公年晉詩鳳讖歸唐主蒼天誤
老生驕兵欺勁敵血戰竟無成燐火燒春草陰風咽水
聲隨家一片土猶守霍州城老生死事之忠故自不容
泯沒

大興邵柯亭大令瓊填詞之學出于金風亭長情田詞

三卷四庫入存目詩如一鐙舊雨鄉園夢殘夜西風獨
客情有客空亭閒眺遠桃花春水送輕帆皆可誦

六合湯聖宏淹通儒術江寧葉方嘉鷗莊爲聖宏之甥
學有源本家多藏書有綠夢山房極幽靚詩如弟子微
奇字都人識小車課蔬除鼠婦選石護龍孫修篁重孕
筍雛燕別成窠蔬譜閒重託菱歌手自箋深文刪酒律
險韻角詩牌一石自傾桑落酒十年不換鹿皮裘月研
晨酣霜簾秋淨自得者爲多康熙戊申四月奉 旨祭
明孝陵有敬賦盛典一章謹案開國之初

世祖命諸臣修明陵園且禁天壽樵採康熙二十三年

聖祖巡幸金陵謁孝陵顧黃公有紀盛詩二首三十八
年南巡復詣孝陵御書治隆唐宋四字勒石

世宗仰體如天之心遠法商周推恩前代之盛封明代
簡王桂後正定知府朱之璉爲一等侯入正白旗於明
陵皆致祭乾隆乙酉錢坤一重謁明孝陵詩朝陽東出
遍秋苔天闕南瞻夕翠開躑躅獨龍岡下馬蒼茫二十
九年來寶城享殿猶樵禁 聖祖神孫幾酌杯自是本
朝鴻澤至軍都諸寢總無摧世宗永陵以尹嘉銓條奏
撤其祭祀乾隆五十一年仍命一體致祭焉我朝忠厚
開基盛德之事此其一也

康熙六年詔求直言熊文端疏言內臣者外臣之表也
今國家章程法度不聞略加整頓而急功喜事之人又
從而意爲更變但知趨目前尺寸之利以便其私而不
知無窮之弊已潛滋暗伏於其中部院臣工大率緘默
依阿託老臣慎重之名以濟尸位素餐之計樹議者謂
之疏狂任事者目爲躁競廉靜者斥爲矯情端方者笑
爲迂腐閒有讀書窮理之士則羣指爲道學百計詆排
欲禁銅其終身而後快乞 皇上申飭諸臣虛衷酌理
實意任事化情面爲肝膽轉推諉爲擔當漢官勿阿附
滿官堂官勿偏任司官宰執盡心論思母以唯諾爲有

容臺諫極力糾繩勿以鉗結爲將順則職業修舉官箴日肅蓋 聖祖初年輔政諸臣事多專決朝官一時風氣如此故以爲言七年上疏有朝政積習未除國計隱憂可慮及設施措置未厭人望等語內大臣鼐拜傳旨詰問下部議鑄級 上寬免之未幾康親王傑書等奉命勘鞫鼐拜結黨專權罪狀因言鼐拜銜賜履劾已意圖傾害鼐拜旋治罪而文端之結 主知自此始丙辰以內閣票擬事致仕卜築於金陵城北之蓮花橋又遷於谿西之清涼臺畔其長干曲云一樣長干水東西兩處流石城多少淚那得到荊州朝弄廣陵潮暮宿廣陵

紕郎住在長干傷心隔揚子風情旖旎可比廣平之賦
梅花已卯復相丁亥卒葬上元青龍山

錢葆勳官中書日嘗恭繕

章皇帝升祔禮成徽號神位有扈從詩十首金鏘石戛
氣體清華其詩云練日龍旗出先期鳳紙傳車攻宣后
鼓羽獵子雲篇萬騎嘶晴吹千門動曉煙游觀非耀武
古禮重三畋何處龍顏近鳴鞭出射場追風天馬赤迎
旭御袍黃襄野超軒帝昆池邁武皇宸威飛走懾不待
月弧張草滿清和候輕雲結午陰佳辰傳浴佛齋室罷
從禽徒御橐弓樂 君王解網心還聞蠲帑藏徧賜獨

園金需宴頻催賜天廚自不盈醴看中使泛酪出大官
烹樂飲賡魚藻家風憶雉羹含桃春薦後錯落滿銀鬢
南苑新晴後西山夕照中最宜隄柳碧相映寺牆紅馬
倦初回勒人閒恰自公水邊襟暫解吹面舜琴風涼鷹
臺上望七十二泉分院自仁虞舊名同陸海聞遶汀蒲
刺水夾道樹捎雲感慨沙蟲事還詢螞蟻墳浦上英雄
起商山羽翼多 三朝留鐵券百戰老金戈後乘游仍
載卷阿暇一歌從容垂斧藻七禩慶雍和數部回中曲
偏於靜夜吹鵝笙王子晉龍笛馬仙期舊譜繁音豔新
翻廣樂遲霓裳天上祕不遣世人知垂楊陰裏寺賜額

自興朝定水雕闌住鬢雲寶座飄香鐙攜鹿女幢葢翦
龍綃舊日鑾輿駐題碑簡鉅僚通籍金張裔分麾鄂杜
豪御前題姓氏帳外列弓刀短褶鵝兒色華纓孔雀毛
丁年陪五柞宿衛敢辭勞他詩如寒食坐妙光閣有感
云春風裊裊日遲遲獨凭危闌有所思丙舍松楸飛鳥
外子城花草禁煙時親朋屈指增新鬼物候驚心詠舊
詩綠葉滿扉鶯百轉得歸猶覺負東菑清明偕鍾宛兄
西郊展墓誌感云往事蒼涼不可論傷心絮酒拜松門
三千里外孤兒淚二十年來國士恩華表日斜巢鶴返
土花春繡石麟存殷勤幸接連枝會漂泊天涯有弟昆

龔孝升所謂神骨清英超然獨秀未可以魚油龍鬪列
堞明霞盡之者也

梁藥亭寄題殷麗木瀆山館云尋常居止外無事可言
機澗僻窺猿臥天晴教鶴飛閒雲投竹杖寒瀑濺秋衣
聞說新行徑尋僧失翠微漂母祠云一飯尋常事千年
廟貌存母能生大將天不死王孫渺渺長淮水悠悠行
路言翻憐漢高帝不及婦人恩以之方駕屈陳固無多
讓其夜宿廖南暉客舍兼訂歸里句云積來黃土恨贏
得白頭歸意尤深厚

玉泉山功德寺創于明宣德二年制度擬掖庭宣宗時

駐蹕于此後因世宗見金剛像努目猶惡悸而怒寺遂廢王瑁湖相國詩所謂宣宗遺蹟久荒涼古寺空留老柏僵一代已多興廢事不須劫火恨滄桑也已未秋游西山曾賦魏忠賢墓歌橫雲山人碧雲寺詩亦有安得五丁手剗此北邙岡一洗闔骨穢永昭佛日光之句然忠賢戮尸未嘗葬此聞係甲申後其黨爲之者後侍御張蘧若請仆其碑鏟其墓 詔從之時共稱快橫雲山人土城詩城北逶迤接上垣蕭蕭戰壘暮雲繁書生膽氣橫千古疋馬來看古薊門土城在德勝門外土阜至今呼蕭太后土城爲遼聖宗之母瀛洲澶淵之役偕行

此其駐師處也瑁湖昆弟辭澱都憲最爲晚達詩筆亦復森秀

楚江黃閒有王古亭者性好俠爲左寧南重客結交傾天下豪俊嘗一夜散千金立盡一日於漢口風雪中拯一人死且罄囊資給之相與往來後古亭令龍巖值海氛大作登陴血戰其人乘閒竊帑數千金以遁古亭坐是十年不遷作看劍行酒酣耳熱倚楚聲歌之音調激越坐客髮豎皆裂有願爲之擊殺負心者古亭喜輒散金與之容得金又亡去古亭益重困數年其人復至榕城爲虎所攫擲林箐閒不食第斷其首若爲古亭雪恨

者眾收其尸焚之獨心不燼如刀戟然徐電發爲古亭
作義虎傳繫以長歌斬水陳璚深亭亦有義虎行紀其
始末其詩曰吁嗟乎吾聞猛虎之啖人眼中所見非人
身人身儼然胡弗見骷髏面孔隨心變見說閩山白額
生垂頭終日空山行一聲咆哮穿重霧攫得羈人如狡
兔胫血淋淋棄道旁居人莫識行人傷久之知是龍巖
客貯金負義離鄉陌游魂只逐鷓鴣啼羞對龍池月影
西於今一飯無尋處飢則依人飽則去吁嗟乎丈夫看
劍爲知恩瑣瑣黃金安足論辛亥之亂余素所豢養者
盡舉余所有而空之世無義人且無義虎

康熙二十五年范眉山尙書總督雲貴滇新劄於兵庶
事草創至則整飭營伍修建學宮纂修通志雞足山在
賓川州東一百里一頂三支儼如雞距在蒼山洱海之
閒相傳爲迦葉尊者入定處佛寺最多故志山者多述
佛門之事眉山因舊本增修成雞足山志十卷在滇九
年嶠峨蒙新諸州縣苦魯魁山野賊剽略爲害二百年
至是就撫官斥藩莊核其價清鹽筴不得按戶抑派酌
道里遠近定支撥軍餉條例吏不得巧法少侍文肅公
謹友愛弟允公彥公德公尤篤放鍾王米書法尤工方
丈字其龍淙雜詠一序最佳龍淙洞在玉案山筇竹寺

後龍泉也詳滇海虞衡志

黎崱詩長垣李聘伊菴作也其詩云南方風氣異萬里
無霜雪祝融常司令終歲皆炎熱蠢爾崱中黎其性與
人別下者爲巢居上者爲營窟四序不知年但視月完
缺家家養黎鬼事事必取決男女無媒妁踏歌水面媒
漁獵作生計茹毛而飲血居然混沌風乃勢若吳越種
類日以繁各自爭雄傑出入行以兵刀箭總不輟大崱
連千家小崱徧五埵余初尹茲土朝夕心切切入境方
三日親自履其穴問俗識要領若輩分優劣椎牛以犒
之少長咸就列約法申三章感激聲嗚咽自是修職貢

匍匐赴官闕熙然安耕鑿遠近胥歡悅何人專闔外無
端啟釁孽質兵挾邀賞飽騰仍摘觶九重亦震動重
臣代巡閱下吏承風旨五刑畢具設二十九員官一時
陷縲縲余也僅守篆理直冤立洩微名幸瓦全區區實
不屑抱薪而救火禍亂終無歇焉用此黎爲母乃天不
絕伊菴爲熊次侯學使所賞年十五補博士弟子康熙
壬子領鄉薦丙辰成進士丁卯令江西寧都兩載輒罷
去起知廣東陵水縣縣三面環海多瘴毒黎峒三十餘
所親履其穴椎牛以犒申明法令黎民相悅會雷瓊道
以採取花黎羣黎激變相連者百十餘峒獨陵水黎勿

之從詩特紀其事也

錢唐陸曾禹汝諧編纂救荒之政爲救饑譜四卷乾隆
四年同里倪穉疇給諫奏進之得旨嘉獎賜名康濟錄
發武英殿刊刻賜穉疇表裏各二以示旌異汝諧嘗與
毛稚黃及陸進蓋思吳允嘉志上徐張珠映川逢吉學
珊王武功雒榮沈錫輅六飛趙沈堯漁玉周京穆門錢
璜他石周崧層巖王嗣槐仲昭傅光遇松巖翁必選尹
若必遠超若朱宏直沈可璋解天泳釋顯鵬輩二十人
有西湖讌會集其後穆門及鄭筠谷吳東壁厲樊榭杭
堇浦丁龍法張柳漁陳甸山施竹田汪西灝金志章江

聲戴廷燿鸕亭汪臺復園梁啟心設林江源敬齋顧之
珽月田之麟寸田湖南詩社吟賞爲盛杭州詩派稚黃
源出陳大樽其弟子爲洪昇稗村蔣淑靜山張祖望弟
子爲湯可宗古田王武功雒榮毛大可弟子爲朱樟鹿
田袁宏謨雪坡新城門人有沈名蓀礪芳而其子嘉轍
門人陳楞山符幼魯衍其傳查田一派傳之楊次也沈
菽林菽林弟子則成城衛宗爲較著樊榭門人有張東
溥汪西灑符聖幾堇浦門人有王鈞西昏袁鑑春浦程
之章柯坪雖皆邾莒小邦其淵源固有所自也

龐雪崖晚號牧翁身形尪小嘗以許用晦游山濟勝之

具自嘲五言如佛幢鐙影動石榻坐痕深怪松穿石壁
歸鳥過殘霞山風吹散帙暝色下栖禽雨色沈秋樹蟲
聲亂石根七言如講院長留馴鹿蹟題牆偶見故人名
仕路無才誰見忌人生有命自須安庭花過雨稀疏放
孤客逢秋感慨深人依勝地懷先放客喜深談晚不回
田山薑爲序戶部藁比之白陸許宗伯謂其癯容峻骨
冲夷自尙皆知言也雪崖以鴻博召對官侍從者六年
纂修明史有明都御史某裔暮夜懷金求勿入魏黨傳
力拒之旣而復試詩賦於保和殿所作不合意左調中
書改都水戊寅由農曹出守建寧政尙清簡不廢吟詠

和陶詩則多歸里後所作其詠懷次飲酒韻云夏木不
嫌密鳴蟬不厭喧長日無所爲高臥屋南偏相得素心
人淪茗說名山有來亦不迎旣去任復還老夫畏世故
外事那足言檉樹經時雨綠葉楊朱英擁腫天所選歷
落別有情用卽無可用傾亦弗自傾夕陽好鳥來交交
相和鳴婆婆處其下因君得養生其論詩謂以我言明
我志所貴於學者淺深虛實開闔賓主相生相顧之法
耳同邑諸生邊汝元善長其媼姪也與相切磋交分在
師友閒故善長漁山詩草清蒼朴摯雅有淵源邊睿智
臨亦受詩學於雪崖邊肇畛徵君隨園詩如雁聲雲外

溼燭影夜深愁天空孤鳥沒日落遠山明壁鑿鄰家火
風來雪外春亦是霽公家法

仁和邵呂璜少詹與修明史建文帝之死于火明史辨
之甚詳呂璜力主致身錄等書之說退而撰帝後紀并
著從亡諸臣程濟等列傳其高祖經邦有宏簡錄呂璜
有續宏簡錄其贈馮再來少司寇云滇南越天末志乘
苦闕略相如絕麗才不聞侈筆削近代楊升菴聞見頗
宏博滇程蒙段記亦復恣研索上古迄今茲未能悉諷
度先生好著書游覽窮幽邈編輯紀滇事亟推大著作
文詳事亦贍良史信有託此謂再來所著滇考再來天

台人於康熙初年官永昌軍民府推官取滇事之最著者分題彙輯爲三十有七篇庚申其中表戴慶華較定授梓尙有續滇考與南枝集詩文劫灰錄見聞筆記諸書其建文遯跡一篇亦謂建文不死於火出亡在外諸書言之甚明當永樂時禁令苛切而不聞有告之以取寵者謂非有賢者相從以擁護之不能然矣友人顧輿山岱守武定併爲程濟等置主配帝於龍隱菴亦善善從長之意蓋與呂璜持論略同

張霖魯菴原籍撫寧其尊人賈天津遂家焉自福建布政使落職構問津園館南北之彥觴詠其中如梅定九

朱錫鬯姜西溟查夏重趙秋谷咸主其家時人擬之玉
山草堂弟笨山中翰雲工詩善草書題所居曰帆齋欵
乃書屋綠豔亭寄兩山房錫鬯得張舍人雲皖口書卻
寄云六年不見張右史忽誦秦游一卷詩韓孟元劉無
定格尤蕭范陸有餘師歸逢鱖鯽堆盤日到及江沱夾
岸時試計合并何地好須憑來雁慰相思魯菴子逸峰
幼學詩於王阮亭學書於秋谷與弟聲百舍人堦所作
斐然聲百有秦游詩一卷秦游者覲其尊甫於西安使
署之作西溟爲之序暴書亭集乃以爲笨山所作疑雲
字乃堦字之誤

烏程姚聚中明經德奎述祖德詩聖治惇寬大欽恤廣
皇仁惟慈故能勇百折必斲伸袁安釋楚繫于公理
海濱歐陽夜折獄求生常達晨得情則弗喜大德體陽
春及觀吾祖蹟此理乃彌真兩粵安反側嶺海無冤民
陳臬江南時平反活萬人往旂訊難婦一一歸其親悍
帥恣報復飛語遭遭屯遭屯非所避予辜良苦辛自昔
逢百罹荼蓼靡所底今上未親政無由籲司匭迢迢
厯數載嚴親出從仕對策鶯遷榜侍從鳳池裏兩上書
訟冤部查奉俞旨廷論皆云過終格前議止猶聞蒙難
初里巷皆罷市桐鄉在冷城庚桑祀畏壘是非死乃定

天高聽如咫按明經祖延著字象懸號榕似與兄季迪
給諫延啟同舉順治己丑進士按察江南值海氛犯金
陵居民有登高者邏騎得之提督某命立誅榕似力爭
得釋羊尾黨之獄禍連數百人白督府郎公勿輿大獄
搖人心郎以付公公悉遣之有宿怨誣人叛者嚴反坐
之律陞河南右布政使未赴爲某文致其罪以死康熙
丁未 聖祖親庶政子陟山參議滔燾成進士授中書
詣闕頌冤未蒙存錄高沙吳世杰謂天長賊劉青海掠
民牛馬郵有姚陳七姓爲仇者誣以助賊榕似察其無
辜令釋之海氛既定大兵掠民間婦女閉大舟中令作

閩語間有囁嚅者輒露刃恐之不敢張榕似廉得其狀
親詣河干計斥弁卒無使至前獲一少婦作吳語詰之
得實遂大書伊父兄姓名於榜疾呼得之給票護其歸
鄰舟婦相率號呼並使其家雜認之一如前遣歸者凡
千七百人以身活千萬人所以不死者自在也當時廣
東西按察使余應魁畢振姬承問失出降級調用皆因
事在順治十八年正月初九日赦前免議同罪異罰宜
明經之有餘哀矣

康熙二十一年春崔定齋宮詹有奉祀長白醫無閩之
行約孫靜紫舍人偕往比歸戚友爭來問狀因作烏刺

紀游一篇以當小紀其詞曰皇帝御極壬戌歲萬方蕩
滌稱平世塵消瘴路虔陀誅雨洗蠻煙夜郎繫囊弓臥
鼓靜堯封咸秩無文始地宗北控巫閭瞻峙鳳東連長
白仰興龍名鎮告虔誰可寄從臣首選崔詹事城邊玉
杖耀螭鱗雲外金函齋鳳宇詹事欣然理去裝集來親
弔送河梁勸杯爭羨車塵壯挽轡還愁塞路長孫子方
戰棘闈裏一問遠游鬢眉喜文成不計選錢青囊攜但
解看山紫朝陽門外雨初晴塵斂橋通萬里程紆旆半
遮官柳密馳輪橫載野煙平斜陽停轡潞河岸連艘鱗
集帆影亂驛荒草長馬嘶階窗破夜涼風捲幔沙走平

原夜色鋪書籟百折到臨榆背城牆斷憑山補倚戶藤
欹倩柳扶鐸振魚陽風自古生徒講席還擊鼓竇莊何
處塾藏書李廣當年石沒羽家郵何事夜來傳蕊榜書
名事偶然壯志看花須絕塞草臣射策合窮邊是日旭
升早覓無終路情深往蹟生回顧種玉難尋雍伯田埋
麟但指昭王墓金城紆岸度轡車四面山青柳欲舒煙
雲繚繞陳宮岫嶮蚪凋殘商鼎書蕭條驛館都山下荆
代棖椽石作瓦窺林殘月擁眠牀隔隴荒雞催去馬卑
耳谿頭雨氣開褰裳人背夕陽來廢城碣字鐫黃洛倦
客谿蘋薦墨胎挽輪欲下石門阜遙見驪城大如斗案

燭催吟馬上詩砌花勸酌尊中酒臨榆關外路巘岈展
齒渾忘道路難雲鴻隔嶺聲先到海鶴凌空羽正搏雄
關扼險巋然峙對岸人煙依戰壘邊城萬轉跨山斜海
氣千尋扶日起憑欄一望盡空濛浪蹴危樓起颶風姜
女祠殘雜蚌窟仙人石倒撼蛟宮涼水河邊驚日暮板
橋新補人爭渡晚餐牆上挂蒼鷹半夜牀前跳兔免荆
榛叢裏賸城闈道左碑傳舊海濱東觀驛卽舊海濱縣鐘簾尙敲
天順字石欄不辨慶元人濤聲謾謾起松柏寧遠蒼茫
覓陳蹟夾路蕘飛世冑坊摩雲鴟瞰勳臣宅蕭疏老屋
不成村松杏何年長石根積岸雨衝殘壘蹟敬垣苔蝕

舊潮痕十三山狀互偃仰馬到峰邊呼石丈海田幾見
世升沈輪蹄閱盡人來往廣寧風澤不曾還夜露苔生
最屢斑北寺鐘聲雙塔迴西郊雲影萬峰閒路近辰韓
停晚權風沙日夜敝人貌鄉書珍重託雲鴻旅客從容
調水豹虎頭魚尾黃斑色善食魚東峰一轉盡平蕪千古雄才毓此
區抱膝晉卿通籍否乘牛元遂在田無遼河橫挽舟如
葉沙磧驚鴻爭利涉春凍懸鉏隴未耕天昏帶犬人猶
獵老邊轟起似山橫平野逶迤擁盛京鶴歸華表吟丁
令帽破林閒識管生巍峩知是興王地林樹蘢蔥聚佳
氣萬戶煙隨殿影高二陵雲繞山容翠瀋陽東北萬山

稠畫燾飄搖夜雨收當路翻漿驚沒馬

春日地氣濡輒易陷俗謂之翻

漿地耨田躍踵不鞭牛

種者先扶杖躍踵隴上後持長柄葫蘆播種竅內隨以足覆之

河三面山呈秀郵舍平岡成小構到枕谿聲渡遠橋當

窗塔影移東岫鐵嶺城隅對老松沙留山虎夜來蹤酒

帘近郭因成市寺衲依田半似農開元野站方新築路

入昏天行色速馬臨紆澗水聲驕人過荒林榆葉禿重

關鎖鑰倚岩堯地界要荒插柳條僕驚絕域頻停馬朋

慰長途屢射雕千山萬山礙人目足音終日絕空谷黃

昏破屋少煙生白日空城疑虎伏滄河石岸景氤氳幾

處灘聲隔樹聞穴裏窺人貂一箇巖邊趁草鹿千羣倦

來高臥講鷹側戟聲半夜無休息偶因笳吹惜文姬何

處鴻翻訪屬國小孤一撮與雲齊奮臂高呼驚野麀石

牀遙揖諸天近風磴回看萬樹低橋通大孤敬路細幾

家井竈因山勢日升石竇引蒼蛇椽落空林肥野彘細

雨連宵去未能記程不寐照糠燈粘熟糠於條然以代燈天邊檢

橐隨圖史馬上敲詩仗友朋土鏗一灣圍滿屋拂塵夜

枕張娘宿張娘蟲名身為長途學佩刀髀因久客偏宜肉干

渠積雨盡成流羸馬盤旋苦未休衣沈草裏濡紅鏽水色

殷赤土人呼為紅鏽水橋斷林邊踐獺頭草擁土叢生者名曰獺子頭新開鳥

道纔通步紆回穿徧千山樹裝含宿雨壓明駝蒲動迴

風驚白鷺 翠華隱映碧峰閒馬駐斜暉識聖顏書橐
不妨隨虎隊荷裳未敢溷鵷班地近烏龍增式廓石阡
幾處安耕鑿傍檐劄木聳炊煙倚樹誅茅成曠落平郊
熙攘自名邦肅慎雄風枕大江柵列嚴城森雉堞門臨
高岸動龍幢江抱村煙成樂土家家門戶臨江浦雨添
新漲失鱗鯉風起清波縱韋虎舟名劄松爲之闊尺餘長二三丈塵沙
一望絕塵囂縱目江頭慰寂寥偶遇谿童學士語閒招
野叟認侵苗鄰巷人聞征轡歇齊來坐話衷情竭作書
反覆屬雙魚貰酒殷勤佐深月遙看長白勢寵從盛世
明裡煙靄中天上詞臣勞獻帛雲邊仙侶聽呼嵩歸裝

又值江雲變滿空隱約魚龍見渡谿常覺浪沾衣落馬
齊驚泥在面山堂猶未覆茅茨雨裏擁衾情自怡野食
脫驂先易米旅懷藉草且彈棋一通河因山雨漲行人
立馬情惆悵幸濟狂瀾駝代舟怕沈深淖童爲杖重裘
兀自覺衣單信是邊庭海氣寒榭葉三春還未發杏花
四月是初看巫閭環翠如屏倚雄鎮并營何代始古洞
千年背岫開飛泉萬丈從天墜廟貌崇隆俯萬川松龕
僧老憶當年亭樓颺鼠仙蹤渺石臥荆榛墨蹟懸温泉
遙結煙雲狀沸涌年年盛石盃掬手先淘烏稽塵解襟
爲浣松花浪西指關山轉自疑玉門驚喜是歸期艱危

歷過空愁險鞭轡將停反恨遲清風臺上恣高眺大壑
空明翻夕照風振陽山憶采薇月籠漆水堪垂釣午日
還京正及時荷風榴雨帝城宜未從鴨綠攜龍鏡擬向
披香獻綵絲四十成名人未老況復聯鑣多舊好轅回
紫塞解裝遲書上青楓聽漏早靜紫名淦夏峰徵君孫
卽以是年成進士官中書定齋名蔚林戊戌通籍嘗往
蘇門從徵君游以滇寇平奉命祭告二山與靜紫同行
塞外苦寒山路危險日常數顛仆或竟日不得食怡然
不動念亦可以知得力之所自矣

德清談未菴選部九乾學詩於吳孟舉學書於陳子文

嘗以事謫戍軍臺有從軍草句如花戀殘春剛試蕊松
橫小澗不成梁犯冷晴鷓猶縮頸負暄霜樹亦開顏寫
荒寒之景如在目前道中書所見云陰厓莽莽山氣殊
野花著霧青模糊沿山四望片瓦無零星氈帳圓如盂
小者單幅矮柱扶大者高頂編細蘆透天罅出西南隅
木牀三角橫東鋪中央烈火織巨鑪一首上座兩足趺
眾酋旁立俛首趨酋婦拖鬢環穿珠毳裘貂飾緣蒼狐
駝羹馬乳珍牛酥一茶烹作竟日舖停驂偶憇晝未哺
厥酋前迓行躍躍褻幔引及妻若孥以手垂膝偃其軀
欲語不語口囁嚅聽之不覺長嗟吁人生百年過隙駒

朱門畫閣成榛蕪穹廬雖小頗足娛春田苜蓿秋田秧
六齡稚子貌且都雙目睨視能彎弧團樂一幅家慶圖
予獨何爲在道途君不見啁啁晰晰草際呼夜向南飛
小鷓鴣

顏遜甫考功君馬黃云君馬黃復驪我馬驚且疲我自
游康莊君自凌嶮巖與君金石交欲語中腸悲挽君君
不留未敢相追隨封狐走佻佻岡巒相蔽虧勿狃他人
往當思我爲誰用意深警末二語尤爲驚心動魄可當
箴銘世之隨人作計者正苦不知有我耳

王汲潔公爲或菴兄有幽居山房稿金山詩云七級凌

峰頂虛牕總不扃層嵐開紫翠急浪走雷霆斯世方多
故高天果獨醒茫茫看尺五敢欲問青冥明月生東嶺
波光一鑑開欲尋甘露寺更上妙高臺黃鶴千峰去蒼
雲萬里來無端吹簷策喚起洞龍哀汲公天性好學十
二歲補弟子員南游從梁鶴林講學爲輯全書又嘗爲
馬宛斯參訂釋史見或菴所爲行略

高槎客待詔爲謾苑太常子師事竹垞與惠紅豆何義
門張匠門交詩尙唐賢 聖祖南巡以提督張雲翼薦
特奏名出身應奉文字十一年 累朝書籍在皇史成
奉命入歲檢書有檢書行之作黃唐堂宮允跋語云毛

西河集載魏中翰稱皇史宬其室垣壁皆石甃實金龍
蟠匱于中用章京四披甲二十典守焉選高年者爲之
俾食俸名馬法馬法者虞老也自以居翰林不能一到
其地爲恨而小湖遭逢獨盛叩肩發祕又能鏗麗其辭
崇鴻雅卓所云禁軍伏地卽所謂章京披甲輩也宬制
云云則以小湖目覩而西河耳聞故詳略不同至銀印
云云則檢討所未及也其詩云宮中聖人憑三冬過自
萬卷羅心胸初唐政要明寶訓相應豈惟笙與鏞緬求
善本求言同臣承鳳皇詔益恭際曉徑去躡紫閣簡編
小大隨橫縱拓窗始意納清旭北風振櫺加琤琮縹囊

緗帙一覽閒百年前物抽無從東華廐馬逸氣鍾玉鞍
試上行雍客小南城南折旋進 皇史宬扁張崇墉夢
游先輩有不到趨庭步陞乘懽悰舍人手啟魚鑰險禁
軍伏地語喁喁燿如雲帆轉曲岸洞門雙扇開礮礮成
製穹頂竹半筒旁牖冶鐵塗以彤我我石室相對立長
磴連亘巨璞攻安置金匱二十六籤牌天矯拏虬龍造
端大清實錄字中有 三祖左 太宗自餘廿三事則
豫堯時奚啻超黃農四圍幟麓眾星共經經緯史光燄
重誰歟紛綸卷倍萬永樂大典堪當衝傳之高拱錄其
副亦類漢世尊蔡邕鴻都虎觀千載上祇今私幸逢難

逢藝苑祕寶探無外銀印一笥留塵封文命敷于武功
後纍纍忍使洪鑪鎔諸珉日夕迷舊蹤還鑣西嶺寒煙
濃道旁觀者謬儒雅奮飛何必蓬萊峰嗚呼奮飛何必
蓬萊峰元瀆山大玉海舊置萬壽山廣寒殿內後在西
華門外眞武祠前老柏下人呼爲玉鉢廟槎客賜居適
當廟東以玉鄰名軒而添築一亭曰海在嘗賦玉鉢行
乾隆間命仍置承光殿中 御製玉甕歌鐫于其上並
刻詞臣四十人應制詩於石亭楹柱焉

婁縣周洽竹岡學畫于趙伊盡得其技客靳文襄幕時
河工告成手寫黃運兩河圖進呈又別爲看河紀程三

卷傳育菴行水金鑑悉載其說當繪圖時歷充豫雍冀
四州之地四閱月相度河勢凡夾河守令多致餽遺無
所受且戒從者勿動損民間織芥文襄聞而大賢之時
畿輔營屯田文襄欲使之筦出納則以未習錢穀謝之
文襄枋用久不樂者眾而其任事之不肖者又往往乘
勢侵奪卽民間已開墾者亦多乾沒以蜚語罷幕下土
繫獄初文襄欲補演參政道竹岡勸演辭演陳演亦
不能用及疏出而攻之者羣起屯政中輟竹岡以不
受職獨超然免于禍著有難書閣詩文集

伊爾根覺羅清端公督兩江有惠政康熙三十三年疏
言淮揚所屬多荒田撫臣宋學曾疏請緩征部議未準

臣履畝詳勘鹽城高郵等州縣因水災逋逃者眾今田有涸出之名人無耕種之實小民積困之餘熟田額糧尙多懸欠何能代賠盈萬荒賦尙拘責地保里鄰逃亡益多是使熟田盡變荒田於國課毫無裨益請賜蠲除部議不允特諭免徵明季有架稅計屋徵錢爲累已久聖祖南巡奏請永蠲民感其德卒贈太子太保子世職士民爲建祠於江寧聚寶門外三學主祭四十四年駕幸江寧經雨花臺指其祠曰傅拉塔居官甚優大有氣節人雖受劾無銜怨者特賜額曰兩江遺愛甘寶菴戶部熙祭傅公祠詩萬家架稅累頻年際遇明良一旦

獨爭似燕山供役苦徧徼天下免夫錢

孔東塘濬河之役有淮海集句如船衝宿鷺當牕起燈
引秋蚊入帳飛環屋老梅當北凍連江宿霧自西晴水
關人出多于陌荷葉香來不讓花隔江送雨浮雲快落
葉驚人老樹能酒盡雨時空坐話客來午後尙驚眠清
新鮮秀雅近放翁其雜文則當時體也

沈麟洲白雲籜雜詠臨風雙鬢影飄蕭手把殘編慰寂
寥賢母自能知陸續直臣幸免祭皋陶謗深誰爲珠犀
雪路遠拌將髀肉消聞道恢恢天網闊那囚鸞鳳放鴟
梟此罷官後自京赴粵時作嘗取禮記四十七篇分類

排纂以便檢閱查聲山愛其才遂妻以女盧六以序其
詩舉謝師厚之于黃山谷李德新之于姚武功爲比子
心房仲有孤石山房詩集初受業于初白旣喪偶妻以
女孫其哭初白先生云詩擬烏臺案南歸病已侵全家
少完卯何事不傷心藥石功難奏龍蛇厄竟臨悲哉當
易簣益感 主恩深

丹楊湯賓谷上舍寅與賀黃公黃序陳其年邵子湘游
工詩古文詞潤城菴中行王銓歌海陽曲諸作具體初
唐多紀軼事近體如贈笄江上柱史云由來勝事自林
泉卻憶金門已十年狂酒牧之眞御史著書宏景是神

仙在隱華陽
乾元觀

韭花作字春依榻桃葉迎歌夜泊船祇是

避名居谷口論詩今更萬人傳聞蔣太史超靈櫬至自
蜀中云玉棺何竟下峨眉蜀道侵凌叫子規官燭燃時
猶有淚夔州去後更無詩黃金脫手留僧舍白傳清才
見柳枝愁絕墨池重過處空餘庭草記相思皆極揮灑
自如

嘉興李秦川宗渭爲秋錦從弟有瓦缶集古體多于近
體五言適于七言于唐人詩酷愛太白康熙癸巳以經
元舉北闈除永昌知府未任卒玉山雨泊云玉山人頭
雲正飛玉山城下夜何其愁雲變作半山雨風吹不度

西江西舟中行客起太息三月辭家歸未得何年芳草
憶歸人已去青陽應可惜荒城鼓角無人聲天明未明
春水生

許子遜北行留別馮二服之兼祝初度云江左有奇士
高風不可攀空隨公府辟相對鬢毛斑人憶將軍樹居
鄰虞仲山後車來渭水屈指十年閒丘園寄微尙風雅
是吾師罨畫春雲起鳴琴流水遲書傳魯公筆伎唱白
家詞倘入商山去能無采紫芝一劍從軍日秋風古戰
場灞陵逢醉尉軹道繫降王橫槩心還壯歸田徑未荒
陣圖傳令子話舊意蒼茫一結忘年友相於幾度秋詩

吟七才子兵論五諸侯無那悲歌客將成燕市游貧交
兼遠別心折大刀頭服之號白菴精槍法康熙間從征
吳逆屢立奇功爲人所擥僅授游擊將軍職銓曹復扼
之拂衣歸僑居吳門以研田爲生涯工詩及畫其春日
懷子遜詩云金閶亭畔見清揚春滿江南老葯房記得
旣閑堂上作從來才子數高陽鈍吟家風庶乎未墜旣
閑郡城繆氏堂名也

湯西厓題黃梅旅壁詩龍眠西畔太湖東步步看山了
不同雲水周遭三百里一身常在翠微中西厓與鮑西
岡之尊人大參素稱莫逆西岡輓詩有云幾番懷刺謁

平津慙媿西華葛，帔貧啓事山公能。卹舊與官顏竣未
生，嗔其別墅在飛來峰。下手書集句一聯云：他日卜鄰
先有約，故人頗問不休官。西岡詩：西湖別墅比東田，種
樹穿池已有年。未獲卜鄰尋舊約，待看伐石表新阡。蓋
深惜之。

查初白秋懷王璞菴詩：南戒江山破涕新，博臬壺馬鬥
長貧。英雄混跡疑無賴，風雨高歌覺有神。一劔乾坤鳴
怪事，六朝裘屐笑文人。采蘩橋畔留詩別，母在尤宜惜
致身。璞菴名廷銓，上元人。詩如村居雨中卽事云：池魚
上官路，野水入柴門。山居云：竹色上衣翠，谿聲繞屋喧。

詞采不豔雅近自然

三藩播亂凡出師運餉制謀決勝無一不斷自 聖心
殄定後

聖祖駕幸闕里御製甲子冬日過闕里詩鑾輅來東魯
先登夫子堂兩楹陳俎豆數仞見宮牆道統唐虞接儒
宗洙泗長入門撫松柏瞻拜肅冠裳初禮部議釋奠行
兩跪六叩頭禮奉旨尊禮先師應行三跪九叩頭禮用
本處樂遣太常寺官齋太學樂舞生袍服至闕里肄習
上諭歷代帝王致祀闕里或留金銀器皿朕今親詣
行禮務極尊崇至聖異於前代所有曲柄黃蓋留之廟

中以示尊聖之意諭畢命以御前常用黃繖留供廟庭
四時饗祀用之祀典既成御講筵命監生孔尙任講聖
經首節舉人孔尙釵講繫辭首節講經書畢徧覽遺蹟
孔子故井在詩禮堂後汲水飲之幸聖林復酌酒三叩
頭周覽訖入思堂南坐特賜增廣孔林地十一頃有奇
免其糧稅御製古檜詩檜樹賦賜恭愨公毓圻經書狐
腋蟒服黑貂鞋賜其祖母陶節並松筠扁額以周公後
人東野沛然迎駕命爲博士五天人員皆議敘講書官
格外簡用尙任授國子監博士恭愨公自十一歲入朝
太皇太后召見內廷屢叨恩禮陪祀臨雍經筵聽講

皆預焉雍正元年追封先師五代並如王爵乾隆閒頒
內府周範銅器十事交衍聖公孔昭煥陳列廟廷並頒
圖說有 御製詩紀事東美尙書毓珣以幸魯陪祀賜
恩貢生由武昌通判擢至開府雍正二年授兩廣總督
八年卒於南河加諡溫僖許子遜贈東美詩云景運中
天日雙旌出孔門道光宣聖統人是素王孫握紀羣僚
肅推心薄俗敦作霖從此始佳氣入薇垣赤幢臨嶺表
左轄鎮刀州民頌張廷尉功高蕭鄮侯棠陰承舊德霜
鉞照清秋父老重迎日歡呼拜八騶史紀龍門筆東山
有世家哲人乘閒氣當路擁高牙入境良苗秀臨雍祖

德遐南中霑化雨風土日清嘉得被詩書澤都歸弟子
行通門環薄海末契託登堂屬以諸臺約來游百粵鄉
將軍容揖客猶有次公狂温僖巡撫廣西時作也

上海周策銘翰編葉蒼巖祠堂次壁閒韻云兩朝出入
荷殊恩死節堂堂一劔存裏血空餘巡遠恨懷沙常伴

汨羅魂丹心彪炳絲綸渥先生立祠武昌城中癸未秋
復賜御書丹心炳冊扁額

勒石白首從容雨雪繁先生赴官時與親故言別有白
首青松盡此杯句遂成詩識瞻

拜荒祠揮老淚薦蘿千載託鄉園蒼巖順治辛丑庶常
以註誤補國子博士轉禮部主事祠祭司郎中其酌酒
與馬玉坡有沅湘賦就文憎命祠祝官閒性愛貧之句

康熙五年權贛關吳逆倡亂粵閩應之贛南北路絕城
孤無援公慷慨指畫相視險要與同官協力守城流民
避賊者出穀收撫之民賴以安虔州雜詩作於此時嗣
是分校北闡出典秦試十七年提學陝西有重經渭南
之作二十四年授湖北糧道戊辰五月去籍卒夏逢龍
與其黨踞山而要餉巡撫柯永昇易之遣十餘騎往繫
鋌而走遂爲亂武昌官吏避難逃奔蒼巖朝衣拜闕坐
公堂罵賊自裁其遺疏略云臣於康熙二十七年五月
署布政司印務忽督標裁兵倡亂劫奪撫臣勅印圍臣
衙署百計脅從時卽欲率同妻女闔門殉節第念臣母

年已七十有六隨臣任所長子監生葉勇遠在原籍其餘二子年未成童熒熒孤嫠死將安歸臣心不忍因遣妻奉母從水溝遁出將號印封付家屬向所過衙門呈繳疏付家人於臣盡節之後奔赴京師詣通政司齎投云云疏聞贈工部右侍郎謚忠節鄂城因立忠節祠範公像舫亭奉祀其僕人楊去疾字豫中博學嗜古著詩詞四千餘篇其圃餘雜說尤多精語七十七猶劇談善飲以貧賤老黃唐堂贈楊叟詩奇人最被天埋沒耕田何須太劇貪詩四千篇書數卷不知誰與作桓譚

李梅崖與葉蒼巖兒女媼也有紀事詩二首云讀書聞

道歎誰先節義今朝一死全老將貪生羞馬革賢人授
命厄龍年只留正氣還天地不許浮名在簡編社鼓村
祠他日事靈旗應早護晴川傳聞孤櫬出危城父老銜
恩涕泗橫自古誰能終富貴知君真不媿科名從容遺
疏憐君父慷慨交情笑友生一卷同刊詩句在十年松
誓重媿盟蒼巖善詩與梅崖相倡和有葉李合刻集一
卷新城尚書序梅崖詩謂其在鎮陽時有大猾犯法行
千金冀免刑杖峻卻之卒杖遣如律鎮陽人至今稱道
弗絕其詩得江山之助孤情遺照與世殊絕推許甚至
傷白仲調廷評云名盛官卑志不灰老多遺恨在泉臺

命如李廣奇天數詩歎陳琳實霸才能說前朝鉤黨事
曾傳太學上書來忘年交附同門重回首人琴俱可哀
仲調在前明爲諸生時伏闕奏陳阮大鍼罪惡被逮下
獄梅崖與仲調同受業合肥門下故云戊辰秋日錢飲
光重至輦下值梅崖落籍見訪留飲因話十六年前同
人文酒之會不勝感歎送飲光南歸有云往事銷沈後
纔逢又別離故人原上草新雁社前詩其柳絮詩孤負
當年詠絮人沾泥糝逕總成塵卻憐一樣風吹去偏是
飛花墜錦茵當是悼亡之作

查仲韋八里莊詩斷井冰膠汲水痕炊煙三兩不成村

客嫌南語呼難應門對西風火不溫白月荒途深夜柝
黃沙野菜雜蔬益耳邊俄覺秋濤卷臥聽駑駘齧草根
寫北方邨舍如畫

宗室恪敏貝子吞珠溫良貝子子也字拙齋以書法爲
聖祖賞識沈礪房詩所謂傳得前人磔與波臣書第
一在鸞坡者也有花嶼讀書堂小橐分詠徐芬若芝仙
書室圖得水閣云曲曲溪流草閣虛主人高隱是南徐
卻疑五月江深候滿塢松篁讀道書清曠閒肆標格固
自不凡晚號髯翁有水南莊在東便門外二閘河邊高
雲上人懷舊詩水南莊上有髯公與我同年話始終留

寫楞嚴了了義雁王其禮白雲中嘗繪杏花春雨一羣
鵝小照有女史侍側

宋牧仲桃花寺詩春風策馬桃花寺乍見雙雙燕子來
趙關祐詩如見雙雙新燕子春風來往一聲鐘李紫笈
雪夜宿桃花寺有漫吟柳絮闌中句且聽桃花寺裏鐘
之句紫笈梅崖中丞子也鮑西岡贈紫笈詩詩名端合
讓君家一代風流篋衍誇少從篋衍集讀尊二十年來

耆舊盡清吟今見李桃花西岡論詩絕句寥寥桑梓幾

人間曹棟李梅登壇迴軼羣徐蝶喻拈毫皆大雅西峰

楚楚亦清芬西峰謂陳于王健夫健夫所居名西峰草

堂

蒼山胡孟綸司寇會恩丙辰登上第直玉堂中閒扈從
南北奉使中州暨游嶺海積三十五年諸詩爲清芬堂
存藁八卷詩餘一卷卞少司寇招飲林亭卽事成四斷
句云蘭風吹幕晝陰清倚石名花媚晚晴何用晚欄開
似綺姚黃一朵足傾城前代名賢翰墨香晴軒綈几散
琳瑯天門龍跳書千幅江水魚傳字數行猶記花前奏
管絃歌場徐沈並爭妍彩雲飛去雕梁在不醉平泉漫
五年綠楊深院鎖鄰家夕眺層臺落照斜忽憶人琴王
子敬那堪重對紫薇花令之司寇弟永寧字芝亭與孟

綸同年庶常散館改主事官至山西河東道集中有夏
日集卞芝亭齋中賀新涼一闕此詩第四首謂芝亭已
逝也是日觀名人法書尺牘故有第二首

周雪客經歷在浚注南唐書十八卷爲新城司寇所稱
朱述之謂在青浦湯運泰注本之上詩如早春雨中玉
安節過話云寂寂扃雙戶衝泥喜客過凝寒春事少窮
巷雨聲多促鄰圍殘火談詩起宿疴此宵不易得慎勿
說干戈石頭城云潮打荒臺嗚咽聲參差雉堞與雲平
千航入港收帆晚萬騎環山鬻草晴林外風微旌旆亂
沙頭落日鼓笳鳴江南江北連烽燧曾照降旛出石城

櫟下家風于斯未墜南唐於宮中作紅羅亭亭外種梅
後主與周后坐其中潘佑有詞云桃李不須誇爛漫已
輸了春風一半時已失淮南故云周后琵琶名燒尾檀
槽所製曲有念家山破雪客秦淮古迹詩有云燒尾檀
槽曲已終念家山破泣吳儂春風一半吹桃李腸斷紅
羅亭子中

安平譚瑞霞莊丙午舉人所居曰砢園有葯房礪戶竹
樹臨流之勝詩如書存稍喜兒能讀家累寧堪婦自鋤
晉赦江湖蒙陸號得安煙水老巖綸皆有碩人寤歌之
意

吳江陳見桃與朱長孺同治毛詩著稽古編三十卷惠
定宇亟稱之其俠客行云大梁抱關人邯鄲賣漿子布
衣高揖王侯前臨難刎身報知已秦皇按劍崢函開斬
刈豪俊如蒿萊壯夫築爲長城土辨土埋作咸陽灰避
禍逃名耕隴畔輟耕箕坐仰天歎揭竿一呼西入秦秦
川宮室飛黃塵秦亡漢興七十載戰國遺風依然在梁
都吳市淮南城延致豪傑傾四海使酒坐上還相讐殺
入市中曾無罪探丸蹴鞠長安門自誇意氣凌諸貴一
旦吏捕急就縛如孤豚時危匹夫重世治卿相尊君不
見翁伯交游徧穹壤終然覆族抵文網將軍雖貴不敢

言嗟哉不遇信陵與平原風格頗近元和諸公長孺詩
如過周安期山中故居云霜葉重重合翠微石苔行跡
尙依稀身逃谷口名仍在賦就甘泉世已非書帶漫隨
寒燒盡薜帷俄逐水雲飛白蓮耆舊多凋謝更與何人
共釣磯兩人游處最密持論亦多同詩筆皆醇雅可誦
見桃卒於康熙己巳之冬書成於丁卯其父諱志中志
皆作意或作記其自跋謂初脫藁時質於長孺賴其指
摘得以攷正者數十條今復再易藁所改正又數倍於
前欲求就正之人不能起長孺於九原也輟斤息弦之
歎烏能己已

曹荔軒爲完翁司空國璽子完翁嘗取御書敬慎二大字爲堂額又嘗蒙御書聖製絕句云郊原浮麥氣池沼漾清萍夏日臨橋望薰風處處新棟亭者督織造於金陵署旁構一亭以爲荔軒兄弟讀書之所手植棟樹以爲表識完翁棄世荔軒夔職南來見高樹之扶疏覩庭楹之如昨繪棟亭圖題詠甚富倪閣公詩匹馬銜悲客復來空餘亭畔棟花開西風聽雨情何極落日看雲首重回兩字孝忠存父訓一原道義是師裁蒼苔白石猶如昨寫入丹青意更哀休言蘭室與蘭房吟向寒風意味長亭是傳經楊子宅樹同親植召公棠當年執卷論

心在此日流觀滿眼傷炙硯臨文報金石扶疏綠蔭忍
相忘康熙己卯南巡止蹕織造署會庭中諉花開御書
萱瑞堂三大字以賜其壽母孫氏馮山公爲之作記荔
軒自稱西堂掃花行者多收典籍嘗以詩請贄於施尙
白遺集藉以流傳愛才恤士刊全唐詩集韻等書聘上
元吳貫勉秋屏爲之讐校荔軒沒後秋屏有魂游好記
西堂路同覓仙花掃落芬之句織造府計吏劉必暉燦
臣有蘆渡詩鈔荔軒亟賞之句如垂垂蘿薜下天地一
萌屋鳥啼江樹月初落馬跡板橋人已行王昊廬許爲
隱几南郭天籟自鳴者也

郭絡羅雲舉檢討阿金辛未禮闈與喀爾喀同爲王文
簡所取士與陳香泉太守友善屬香泉臨玉枕蘭亭臨
畢卽以原本畀之香泉喜曰以魚目換明珠鉛刀易寶
劍能無快乎其閱香泉所書寄齋拙菴見懷詩冊慨然
有作云晨陰闇幽室驟雨來崇朝言念青溝老遠住盤
山椒我自下土望渺渺在雲霄更念城南友室邇人亦
遙咫尺不得見黯然魂自銷迴想培風堂縑素任揮毫
知已二三人固漆與投膠別離俱老大歎余亦二毛南
北距萬里風煙瘴癘消征鞍從此去夜郎路迢迢遼海
春風深盤龍秋月高誰憐雞栖者失侶徒哀號培風其

所居堂也卽以名其集居易錄記其爲福建正主考滿洲翰林出典鄉試自此始查心穀謂其罷官後來干斯堂劇譚縱論文采葩流枝葉橫生聽之忘倦至記其論李義山詩則一時諧噓之言不足爲典要也

當湖海浦有馬皋魚最美出重午前夜不過半月家家烘腊供一歲之用兼以寄遠高江村詩馬皋入夏壓網多秋鳥交冬因風落

鑑亭在鼇峰後黃莘田垂楊不縮可憐宵過鑑亭句也許子遜久不得莘田書寄訊詩第三首卽用其句蓋同游時作子遜在粵和張宸書夾竹桃有落花三度小長

千之句極爲莘田嗟賞故又有句云記得珠江下韓水
倚闌頻唱小長干

南宮鄭預立菴以癸酉舉人謁選得黔之餘慶南荒僻
壤川販所經其徒自川由黔達粵西興販生苗男女或
百十或數十繩連索貫各持兇器驅之而行遇人煙稀
少之區橫肆劫掠立菴患之躬親踏勘繪圖詳報請過
渡要阨撥添汛兵稽察協擒陳善後四事一形勢必能
控制一兵民貴於和衷一絕嚮導一阻鄰路悉如所請
兇販屏蹟任四年告歸黔人有去思焉乙巳元旦連朝
雨雪感賦云待罪餘陽兩拜春殘山贖水與年新茅檐

且喜能成聚官舍誰嫌僅庇身積雪盈窗筠作帚迴風
入座石爲鄰菜根齧定還須檢恐有流亡媿俸人仁人
之言藹如也

吳滋大贈周載公詩欲覓替人欣已得可知倒屣自難
禁載公卽桐塋爲人易直不立崖岸與人交有終始好
古嗜學丹黃兩毫不省去手取放翁白髮無情青鐙有
味之句貼於座閒詩不苟作歸於扌寫性情吾鄉巢寄
齋揆凱功成網齋高章之諸公多所酬唱其高章之寓
齋同楊耑木查德尹分詠畫屏風得百合云百合盛開
時赤日如炊蒸白花冒青榦扶疏滿岡林農家重曉耨

婦子誠晨興我廩亦已竭歲功何時成回頭見此花灑
灑朝露凝香色何足言但感歲序并花時倉庾空花落
黍稷登去年齊魯郊嘉禾飽蝗螟草根與木皮採擷無
餘羸此花不結實但隨秋草零誰知斲其根可以代黃
精爲巢司寇題高韋之指畫菊蝶云且園居士指爲筆
醉後秋懷指端出寫作黃花三兩枝霜影離離照寒日
蛺蝶伶俜雙翅紺晚來不止挑花擔醉白堂前弄夕陽
不信韓家秋圃淡成網齋讀書城南有煙水之觀蔣諭
德揚孫寫圖徐編修壇長題詩其上卽用其韻云不獨
身涼意亦涼城中宛轉見迴塘背將廛市煙皆綠隔斷

塵埃水亦香已約嗣宗爲嘯侶更煩摩詰寫書堂愛他
西向多林樹並入西山一帶蒼凱功爲院長嘗自行在
以鹿脯栢綠魚腊寄查悔餘悔餘分以餉桐埜桐埜賦
四絕句重爲一律東悔餘兼寄院長云海珍朱鬣陸斑
文玉饌新從紫塞分傳道釣人爲呂叟又言折角是朱
雲食苹在藻思前詠貫柳藏蕉憶舊聞未省詩情合嘗
否恐遭韓子笑羶葦其金陵懷古有云褻衣長袖說程
朱拋擲河山卽大儒擬向興朝作箕子更難江左見
夷吾高飛巢幕三春燕驚颺危檣半夜烏江令曾爲北
朝客歸來還省斷腸無不知所指何人也

寶坻王子千副使煥守惠州時建羅浮子日亭落成梁
藥亭賦長歌寄之其寄生詩序南海有蟹屬負螺殼行
泥塗中飲食動息不須與離閒遇他殼或遷入而棄其
故好事者以金銀作螺殼誘入養之可二三年不死土
人呼爲寄生噫物類不齊理莫能測大率如世人之多
累而不善遣其累也詩中大致以世人不能出世苦爲
俗狃爲言吾獨有感於楊涉范質之流又何異於此物
哉

劉大山編修崇效寺題壁有小車行處草初生之句王
樓村歎其清絕沈隱侯宅詩積暮賦郊居自憊身多病

誅茅結敝廬人外依幽靚西邸昔交歡南陵新佐命懷
中出詔書選置須臾定才智何縱橫彥龍安可並舟壑
慨推遷竹帛空輝映帶鬆孔屢移臂瘦几難凭今日老
尚書當年作家令只恐舊宮人依稀貌難認太息欲何
言東田自歌詠極有作意其白馬寺句云病槐藏細蟻
破瓦嘯愁鴟徐鵬鳴九秋杪韻上人山樓坐月云餘花
容蝶戀落葉帶鐘飛意境略同

許子遜謂漢魏以來流轉之調至于景龍諸子太白岑
李雖各開戶牖而體格未變自宋派行此調不彈久矣
近見西河毛氏詩遺響宛然諷之忘倦而談詩家無一

人稱及者其江郭卽事雜詩有云盤空硬句已成窠輕
薄王楊奈爾何逸調今來傳欲絕不知世乃有西河然
國初人如汪鈍翁春燕篇陳迦陵江南行多爲初唐盧
駱之體陳彥升白頭宮女行云白頭宮女自何至緇衣
襪襪不曳地合掌長持淨土經傷心尙憶前朝事前朝
當日選嬌娃涕隨阿監入西華黛冷脩蛾難奉輦琴操
別鴿苦思家思家荏苒韶年度自憐長在雲霄住蘭殿
千重不記名桂宮九品寧知數桂宮蘭殿倚天開玉柱
琅璈徹夜催妝鏡未收紅粉豔羽書忽報赤眉來赤眉
攘攘天初曙十萬貔貅不知處長安市上虎羣游元武

岡頭龍獨去珠沈翠死滿瑤階何幸昭儀玉蚤埋鴛鴦
合殿旌旗亂蒞若珍臺劍戟排劍戟叢中身偶脫香奩
寶釵人爭奪梓里凋殘何處歸花宮寂寞無聊活蕭蕭
白髮竟誰依魂夢時時到禁闈請看錦綺袈裟片猶是
椒房舊賜衣極似初唐諸子風調子遜七古詩兼有二
種王新城論詩絕句云接迹風人明月篇何郎妙語本
從天王楊盧駱當時體莫逐刀圭誤後賢子遜之說亦
本大復

景州李景曾竹逸工翰墨書畫皆宗米氏晚年構一堂
顏曰墨霞自記以詩云老來潑墨氣淋漓爲愛南宮七

字詩一抹斜陽孤鷺裏草堂初署墨霞時

桐鄉馮伯陽司寇善寫山水張瓜田謂其有董文敏筆
意晚年愛以小幅自娛有題畫詩云山頭雲藹藹山腳
水粼粼矮屋休嫌小開門處處春雍正五年督蘇松糧
儲革斛面耗米鎮江匠某善造斛可伸縮不露纖迹歲
取厚酬嚴訊置之法謂浮收之數以斛口大小爲多寡
部頒斛式方扁口徑大宜博其底崇其身中符舊額所
受米數口冒以鐵令薄滑不可駐粒米斗方如斛升規
之並改用小口沮於漕帥申議云斛惟所受畫一爲準
不必拘形製譬之尺止論度之長短砧馬止論數之輕

重巡撫躓其說令試爲之民大稱便顧他省皆仍舊式
乾隆辛酉運軍以南北斛口大小不同訴漕帥部議將
罪變法者其明年陳文肅公始如公製奏上報可改鑄
鐵斛頒行蘇松閒呼小口斛爲馮斛云

王崑繩卒於淮安其葬地在金壇尊人霜皋兄汲公葬
地在京師西便門西五里許羊坊店隆川進士兆符附
焉許子遜載酒出郭澆龍篆墓詩文筆摩雲橫九州傳
家文體舊弓裘那知金匱名山業博得西郊土一抔龍
篆卽隆川

桐城張文端以四十年予告嘯詠林泉者凡七年方靈

皋表其墓謂公首入直南書房 上日御門聽政後卽
適懋勤殿召入講辰進酉退以爲常因賜第瀛臺之西
每巡幸未嘗不從自翰林厯卿貳踐政府雖任他職未
嘗一日去左右也癸丑七月從幸晾鷹臺觀試馬王公
以下八旗三品官以上出良馬萬餘騎樹旌旗爲馳道
自大紅門齊發奔馳五十餘里先至臺下者四十餘騎
第其駑駿賜銀帛有差與孫在豐各賦試馬歌以獻扈
從南苑入夜值大風雨

聖祖在行宮謂侍臣曰兩翰林恐油幕未具得無有沽
溼之苦時已漏盡三鼓命中使至學士傳達禮帳中傳

諭移于五店皇莊安宿一日漏下十餘刻 上御行殿
方張鐙伸紙作大書使人問知二臣知在直廬觀書命
各賦良馬詩嘗諭傳達禮曰翰林官清苦巡行扈從所
以備顧問資講勸也無令勤于資裝嗣後帳幙飲食馬
匹器具皆令給于內府永著爲令文端紀事詩有云霽
顏不覺堂廉遠軫念恆如父子親馬首備聞天語切本
朝家法重臣鄰君臣一體之誼可想見焉

成過村文昭爲青壇相國會孫嘗受業新城又與德州
田侍郎游詩句如文迂乍可書驢券馬鈍猶知駐酒帘
十年慣買他鄉醉一種難拋此日家傾瓶桑落三升碧

鋪徑槐花一寸黃楸枰且作觀棋局紙帳翻傳獨醒方
和平雅雋不涉粗豪大名志傳稱其生長貴盛纖瘦類
山澤癯嗜好殊俗申鳧盟後畿輔詩人之表表者也
韻牌之設見於續說郛中所載王良樞購得蔡小峰舊
譜梓行于世蔡氏之先未之考也厲太鴻賦詩脾和嶮
谷一首極盡體物之妙康熙丁丑七夕趙恆夫吉士招
輦下同入雅集寄園賦詩以韻脾集字限韻取堂額相
賞有松石閒意拈爲本韻屬而和者二百七十人趙玉
峰尙書選而刊之題曰寄園集詩寄園在宣武門南里
許元月張園故地恆夫購得修葺之

楊次也太守嘗從初白德尹游深于詩康熙庚寅以高
堰河工考最擢守平涼壬辰九月望議落職河督以善
治河薦候補南河尹文端督兩江年才三十人呼爲小
尹次也年七十矣文端知爲老名士所以獎慰之者甚
厚次也指其鬢曰蒙公盛意惜守知老矣夕陽無限好
只是近黃昏文端應聲曰不然豈不聞天意憐幽草人
閒重晚晴乎次也出語人曰不意小尹少年科甲竟能
吐屬清新若此其崆峒紀游詩如占好峰頭先架屋鑿
空山腹便成梁兩犢闌煙耕虺窟隻驢肩水跨雲堆歸
雲只在窗閒宿飛鳥翻從地底來廋廚屢倩樵丁覓水

引初勞衲子分流雲低搶松梢過激水斜穿石穴來麥
黃水自笄頭出卵碧天如鏡面開皆能葶甲新意所紀
邊徼聞見謂鮮荅生牛馬及諸獸腹中似石非石大者
如卵小者如榛栗番人持呪用以禱雨無不立驗與輟
耕錄所載略同但此物有五色而李時珍本草以爲白
色蓋南人未之見也番人云龍精或涎遺草樹閒牛馬
放牧食之則孕此石興雲致雨氣類相感耳莊浪方折
鐵作花細如絲髮鋒鋌犀利久而不剉他處莫能及也
東歸留別有云擴清亭鄣到河潯一范軍中用意深小
醜豈容窺雁塞舊田自合返龜陰預防蠶食營桑土蚤

使鴟音革泮林從此邊庭烽燧息野人安穩臥青岑謂
寧夏鎮總兵范時捷也時捷文肅公孫先是鄂爾斯玉
松阿喇布以察罕託恢水草佳茂請暫行游牧許之五
十二年時捷疏言察罕託恢係版圖內地今蒙古游牧
多越界與寧夏民相混體制不便請以黃河爲界如所
議行歸安沈仲堅詩近有范將軍元戎整十隊邊事若
指掌敷陳獨明剴卓哉持正議寸土不相貸亦詠其事
長樂所產荔支名勝畫者與興化之楓亭相匹皆名種
晚熟者靜海宮友鹿庶常鴻歷閩中紀事四十韻有云
豔日堆園果垂涎首荔枝麝臍香易落石背溺先萎絳

葉盈筐瀉晶丸帶葉垂還愁穰孕早或售互人欺亦可
封泥活無勞置驛馳細枝防護密龍眼唱歌遲蔡譜興
化軍大重陳紫采時必閉戶漏牆入錢度錢與之得以
爲幸友鹿謂荔實時遇麝則落荔樹生蟲如荔核一生
十二粒遇閏又多一粒名石背荔香時卽溺溺而全枝
脫蒂矣水晶丸荔之美種荔園受賈人直謂之穰荔有
穰花穰青穰孕之別大抵以穰之遲早分價之高下穰
時倩鄉老估直名曰互人樹主樸主爭賂之云云福建
貢荔支種於盆中帶實至京師及時可採或以小榦泥
封一二年生根花時截取郵致京師結實無異夜燕所

過則荔子一空害又甚於石背故防之甚勤苦倩人採
龍眼恐其恣啖故采者相約歌勿輟謂之唱龍眼嶺南
嘉應州松口與閩之汀州接壤荔枝絕佳新興惟六祖
堂最佳每歲結子極盛開荔社之家人人競赴多食者
稱荔枝狀頭坡公自惠之瓊取道新會值西潦暴漲不
能進留止石螺岡後人築亭於其上曰坡亭亭畔爲東
坡祠并名其鄉曰坡山鄉公於岡畔摘荔食之美以指
掐其核後所生荔枝有指甲痕因名之曰東坡荔今其
地種荔甚繁公又由山徑取道新興過瓦窯灣後人亦
名其渡曰蘇渡陳白沙詩蘇公渡口雲連水指此石螺

岡今屬鶴山瓦窯灣今屬開平萬柘坡食新荔枝詩椰
帆一夜返閩南百顆勻圓白竹籃華實兼成星而兩色
香俱減日過三剝來雪椀憐肥瓠圖上冰綃肖伏蛭聞
道楓亭堪驛吏何年親下建谿探至閩粵孰勝則以竹
垞粵人誇粵閩人誇閩語最通

襄城劉太乙青藜丙戌庶常與弟青霞俱以文行知名
伯仲閒自爲師友嘗卽其家藏金石刻各爲題跋成金
石續錄四卷周漁璜道出襄城與訂交論詩派流別究
極正變其寄荅太乙詩云河洛天地中眞宰宜未絕劉
子不羈人心細膽雄拔披讀古人書落華將討實向者

攜手時議論何明豁風詩有正變天然任流溢先須覷
太幽元關闖窟窅然後颺九天風雷共吹映寄我五字
詩字字紙上活直如排霜筠曲似拗勁鐵我詩但意造
無文空眞質本乏求名心信口無爬櫛文章在吾輩於
技等豪末讀書不明道哆口徒浪說縱令言語工根源
已先失而況竊古錦紛紛爭割裂請觀古人門千秋何
喋嶮自來爭名輩頸漲面駢熱赭山求楮竹不能供紙
札盛氣凌前人何曾躋豪髮我作不鳴蟲冬寒瑾房室
談稀舌本強因君偶棖撻遂敲古瓦冰含豪濡禿鬣懷
君結隱處汝水前蕩潏籬落蚤煙開衡門數峰雪想見

拚吟鬢搖頰聳山骨甚推挹之太乙原詩見所著高陽
山人集

宛平舒子展檢討大成重過摩訶菴看杏花詩花發誰
能認舊枝曲欄深處獨凝思二年蹤蹟同游少三月風
光再到遲莫遣壺觴虛後會已輸蜂蝶識前期嫣然一
樹留人久又是黃昏欲去時頗有情致乾隆壬申程魚
門到菴惟見棗樹已無杏花作詩云玉堂舊客題詩處
野剝離離放小紅三十年來人事改棗花香細月朦朧
子展他詩如玉筍嚴催金叵羅當時歡會總如何燕辭
華館無回信葉落橫塘有去波曉日軒窗閒夢少晚涼

庭院別懷多露桃花下三年客腸斷秋來一曲歌皆似
才調集

呂天益光祿青要集稷山吳伯宗紹先尋弟詩脊鴿聚
飲啄飛鳴日在原鴻雁一失羣摧積毛羽翻稷山吳氏
子紹先惟伯昆兩弟免提攜煢煢依養飡仰荷皇天慈
庶幾承衰門一日失厥季慟定詢所在掠賣傳寺僧輾
轉已莫追仰天聲長號心痾不能解黃泉見父母生死
惟我罪誓使生還歸吾將蹈四海東則過汝泗南到九
江濱西北行萬里迢迢巴與秦塗窮眞可哭來往空風
塵歸來仲又失淚下何續紛不德厚天罰吾其猶爲人

匍匐之京國行哭忘苦辛徧顛摺神閒身是稷山民最
後至高氏厥季詢乃眞堂下拜長者感激爲沾巾予季
還累公願終惠養恩得仲方俱還相期以明春有人從
東來言自寧古塔其地雜爨夏關衛四周而說有稷山
人牧馬有馭駘行乞出關塞於時及冬臘皸瘃指欲墮
朔風吹颯颯但見牛羊羣萬幕相連沓是惟古肅慎冰
雪夏猶合飲泣思同父仰天氣嗚咽鐘鳴鼎食者坐聽
聲鏗鎔具牒叩幕府鞭笞交蹴踏血流被滿面紹先抗
詞荅大府詞其誠所請須與納仲也果見還拭淚腕雙
拉哀感路傍人觀者何雜遝皇天冒萬物感通非有言

功以愚乃濟聞之激中肝紹先樸魯子生長畎畝間有

時讀魯論負痛心煩冤

紹先每讀至父母之年章輒痛哭

乃知孝友性

不在文辭閒志迫命與會高厚實鑒觀冥冥誘厥衷卒

能生偕還次第謀婚室可以安親魂澤州在政府延之

具衣冠謂其關風教庶使凜氣完長歌紀見聞金石聲

淵淵吾師

安谿

董狐筆徵信同不刊一時徧國中爭欲識

紹先紹先豈須名其事良可傳建國設膠庠牖民亦多

端疇能厚本根闕牆嘗永歎人皆有兄弟得無泚厚顏

李文貞書伯宗事甚詳陳午亭既與爲禮復爲詩七十

六韻以誦之

明徐貞明欲仿元虞集於京東濱海地築塘捍水以成
稻田皇朝雍正閒營田天津等處文安陳子翹學士由
編修隨怡賢親王行視畿內水利教令箋奏皆出其手
以待講攝天津同知轉侍讀陞庶子五年設水利營田
官分四局公領天津局文安大城隄工皆隸焉畿輔河
道深悉源流疏故浚新公所勘定者十六七八年陞侍
講學士廷議設營田觀察使二員分京東西以督率州
縣公以僉都御史領霸州諸路營田觀察使十二年轉
侍讀學士尋罷觀察使領史職如故先後營田七萬畝
有奇溝洫旣修歲以比登田居詩云黃茅葢瓦土泥牆

籬落周遭草木香欲遣山妻曉蠶織傍檐特種幾株桑
大隄南畔小樓西十畝園開百稜畦自挽桔槔分綠水
手牽雨薤翦香泥語雖簡質自饒本色

年雙峰題楊紫宸小照云魑魅隨身亦等閒肩挑龍虎
總徒然只他一付超凡骨不鍊金丹也是仙

胡荅山詩郢雪孤高衆響停曲終惟見夕煙青琴邊山
水依然在話到鍾期便淚零草綠西州九度春松門石
馬自嶙峋如君風義今誰比漢史曾傳伏闕人相逢忽
忽把離尊南北星霜席未溫慣著征衫緣底事崎嶇猶
爲信陵恩閱盡烏衣燕子飛東園風物未全非桐花小

鳳知無恙看取銜環舊雀歸題爲虞山歌史重至都門
語及司寇公往事輒相對泣然云云蓋謂健菴司寇
馮定遠放黃絹幼婦之意題孫愷似學士集云蠶吐五
采雙雙玉童樹覆寶蓋清談梵宮謂絕好宋詩也愷似
句如送人之西湖云向來魂夢常依此送子登臨益惘
然筆墨固自鬆潤他如張日容句云牽引吳牛亭子下
刺人花腳野蚊飛吳山掄句深林客過鴉翻樹古屋人
眠犬護扉李百藥方正學祠云十族可堪同蔓草九重
亦自媿麻衣郭于宮人事不來書卷合一樓寒雨看秋
原願書宣病起云花明蜂識路竹密鳥成家願俠君新

道中云癭婦騎驢投午集秃翁驅犢趁春耕徐學人
樹寒偏得月葉下不經風大都俊逸居多而奧博爲少
學人竹垞先生留宿楓橋慧慶寺夜話追悼陸文孫云
朔風號怒紙窗前憶舊僧房感逝川鄉曲公憐楊狗監
天涯吾悼李龜年雪深院落妻無絮葉擁階除突少煙
此夜楓青鏡影黑鼓寒霜重不成眠差有蒼鬱之致陸
與竹垞同里善音律流寓常州卒於粵東

安州陳密山方伯德榮與博野尹元孚務檢身制事之
學方望谿志其墓謂才識遭遇皆與陳滄洲略同清明
郊行芳園春草綠離離好是人家祭掃時何處紙錢吹

不盡東風吹上野棠枝極有風趣

滇南詩略如石屏許鈺寶齋雨後登普陀巖句云雲背
出青山昆明文泰運西浦次韻菊影句云五更殘夢有
雷痕太和楊履寬栗亭馮亭墓云賜劍已聞誅白起買
絲翻與繡平原呈貢文化遠秋盡云歸鴉爭獨樹牧馬
戀邊營太和楊暉吉有孚九日云人閒青史皆閑夢籬
下黃花且細看寧州顧王烈相如秋柳云秋水棲鴉人
去後曉風殘月酒醒時劍川段繹祖念菴迎春云泥牛
載得春多少活盡荒村負凍人劍川何濬讀東林列傳
云千秋正學原無黨此輩清流匪自今零縑斷錦不無

可觀昆明金灑仲遠舟中見楊花云是花飛處總堪憐
沉逐東風送客船白首未歸嗟泛溷青山到處有啼鶉
吹來水驛都成雪墮入春波影化煙太息萍蹤無住著
天涯飄泊一年年情景相融在邊方當推作手仲遠號
秋野康熙丙子舉人官普安州趙州蘇竹窗女史村居
云一籬鼠跡桃花米滿鼎松風穀雨茶亦復清穩昆明
徐雲客翔鷗普安道中云暮色蕭條歲欲闌長途猶自
赴征鞍橫穿峻嶺幾千尺直下危峰數十盤古樹夕陽
鴉影瘦亂山殘雪馬蹄寒風塵滿眼愁無奈始歎當年
蜀道難皆滇詩之佳者

康熙庚辰恩例給翰林官之貧者十八人雇馬錢月三兩徐大臨書禁中春帖子口占云誇張寵荷君恩處內府猶分雇馬錢

豐潤曹鎔沖谷伏日同伯兄眉菴松茨消暑云何處攜尊酒東臯舊草堂雨殘沙路細風軟藥苗香巢燕非時出山蜂底事忙老親憐弱稚歡喜故相將松茨曹氏別墅也兄賓及舍人鈔精繪事嘗作松茨別墅圖陳確菴高澹人沈繹堂施愚山王阮亭尤悔菴朱竹垞曹棟亭成容若毛會侯顧赤方梅耦長皆有題詠賓及澹齋太守鼎望子與兄釗靖遠稱三曹

張一門之弟韋廬明府官江右識李巨來於未遇之時
罷後留居佛寺巨來題其秋山學圃云莊鳥經春祇
越吟菜根滋味憶山林夕陽千樹鳥聲寂涼月一庭花
影深窳堵坡原難作宅磨兜堅已自題箴惟餘結習殘
書在窺見羲皇以上心

交河王信芳宗伯以諸生召直內廷深被恩顧

仁皇帝丙夜觀書皆不及侍公獨在隅一夕立而假寐

上呼不應執其臂而醒之自稱老夫曰公小子曰小
不如老邪公驚謝 上拊掌笑嘗謂王蘭生爲人正所
學亦好癸巳舉人一體會試辛丑特賜同與殿試

憲皇帝御字十三年由庶常擢至卿貳王子以安徽學
政主江南試事前此所未有也詩如詠雞冠云參差丹
檻外彷彿德禽棲采羽殊疏淡層冠甚整齊微搖疑欲
鬥久聽不聞嘶時值秋風靜凝然養木雞老少年云已
爲羣芳殿紅待雁南還謂老何更少經霜乃獨妍如花
攢密葉似錦帶朝煙解得成丹術於斯可永年亦皆醇
實劉絳放請其在館職時願用方以繼母故屏居於外
數口嗷嗷不能舉爨公知其賢貲助經年後繼母感悟
召入用方吾里名臣今亦罕知其事者

盱眙李蒼岑送達履中奉太夫人往武昌詩霜清木落

下燕關酒盡高亭夕照閒路指沅湘新漲水人尋屈宋
舊游山玉綸倚重傳雙闕銅柱威名懾百蠻文度到時
登滕上應欣憂國未蒼顏履中名達禮溫都氏從張匠
門游詩文清健有拳石堂集二卷拳石者其尊人鄂海
開府秦中有人獻石卵大如斗因名堂康熙四十九年
由川陝移督湖廣紅苗時出爲民患以鎮筸邊牆宜修
築同提督巡撫會勘五十年九月自司城北出舊邊牆
馳入苗地至毛都塘苗人吳老鐵等遣其子弟導迎申
述誠款復自司城至乾州苗境宣上德意諸寨集長
皆願爲編氓輸賦供役於是本年十二月至五十一年

五月毛都塘等五十二寨相率至武昌歸順自六月至
八月盤塘窩等生苗八十三寨先後來歸撰有撫苗錄
履中覲省武昌諸公餞別陶然亭贈之以詩蒼存銅柱
句指此非泛語也其拳石堂集中華山賦杜工部祠記
弔董子墓文皆侍宦秦中時作匠門序謂其詩風骨近
漢魏人不事雕飾而落落有致余嘗見有鈔本惜當時
未及摘錄梅翁所選未足以盡其長也繪有東郊尋梅
圖初白有詩

勵南湖司寇除夕句云童心只喜年光換壯志偏驚歲
月虛次張研齋閣老韻云閑游自討安貧趣老去誰能

與命爭皆人人意中所欲言

武進管楡青邨舟行句出水魚肥論網買入雲山遠帶
晴開

周焯月東天津諸生工詩精小篆八分及摹印法築草
堂沽上多藏書畫金石英夢堂序其詩謂如礪溜忽鳴
如籬花自開清微蕭遠自寫其性情所欲言而一空擗
擗規仿之習律句如晚照明殘碣閒雲冷舊龕掃徑花
餘片抄書字益行松苓量腹進生息任時過絕句如待
子慙上人不至云望斷疏林沒夕暉寒潮空打竹閒扉
一枝槐影鐙前落疑是山僧戴笠歸大都附物切情不

爲空綺

桐軒尙書夸岱有菊圃詩十四首其序略云草木之花
可愛者三時略備獨以菊名寧有說乎菊抱終始之節
不變之操迴冠絕於羣芳者也雖凌秋之色人盡知其
可觀而傲霜之性已早具於未成故必先時培養當夫
春風初動萬卉皆萌柔枝嫩蕊自媚含生而菊之發也
不易其色不違其本蒼然挺秀實弱質而自立少小而
老成者也及乎炎熏方布重綠成陰飛紅結子雜英續
紛而菊之長也分苗異植清英各持蘊精神於淡遠整
翠幄之幽貞輕風徐披小雨微灑若彷彿而聞香若蕭

疏而自雅不必待晚節凌霜乃知其異至若高秋木落
羣芳就萎涼飈競爽金英滿前郁郁芬芬舍此安適於
是治而種之種而分之謹其萌防其害滋之使盛培之
使大爰自其生以究其成有不可躐等而進者一曰治
地種菊之處須在向陽高原宜陰宜日風雨可到之所
二曰儲種花謝後卽翦去上籛止留近根寒則覆之暖
則沃之待時而分焉三曰種子菊枯後堆放腴土時以
肥沃之春初自然出苗收種四曰分秧春分穀雨天氣
晴明地土滋潤視其嫩老審其生旺以分之五曰登盆
立夏菊苗長盛將上盆先不可澆灌令其堅老則耐日

色六曰澆灌此花大率惡水多水多則蟲傷三五日一澆以天日晴雨爲則七曰芟蒞芒種節中每枝逐葉近幹處生眼須一一掐去恐生附枝八曰插扞狂風驟雨須揀堅直籬竹用莎草縛定勿令搖動傷殘九曰壓插五月梅雨時將摘下肥壯小枝齊節邊截取插入腴土不令見日至中秋不必蓋藏細花低叢可置几玩十曰栽接四月梅雨將菊本幹肥大者截去近根數寸將他色菊頭接之一本可容三色十一曰護葉養花易養葉難葉有泥以清水淨洗十二曰捕蟲初種長至五六寸卽防地蠶嚙根四五月卽防菊牛傷葉至六七月卽防

青綿食頭十三曰附籬菊性溼熱貴得中須傍高籬以
避日暖雨濯十四曰定品或曰菊奚先曰色與香而後
熊色奚先曰黃者中色也

瑞園合選三卷一悔翁集一桐軒集一沙村集沙村者
婁縣徐振白眉康熙乙酉北榜舉人滯京邸爲邵亭上
公慶復經師及歸卒于毘陵旅次乾隆丁巳邵亭節制
兩江道毘陵哭臨其柩爲之營葬事并刻其遺稿賦詩
云十年笠屐滯幽燕投老曾無負郭田几杖舊情深午
夜死生長別悵南天墓門并絕良朋弔詩卷悲從鄰嫗
傳驛路淒涼宵柝靜不堪篝火頌遺編邵亭字天根家

世勳戚少卽工詩歌與梅翁桐軒兩兄相倡和先世賜園在海淀南有石刻瑞園字爲董文敏書雍正之季嘗賜軍機房諸臣寓此乾隆三十七年移軍機寓廬于天會樓北更以園賜簡親王青浦呂環谿秋日過佟園詩如此園林畫亦難清幽獨占碧谿灣斜橋蘸水蕭疏柳小閣當窗斷續山霜稻未登饒野色秋荷已卷見衰顏晴軒小坐天將暝嘯詠何妨待月還蓋猶未歸官時所作環谿名樾康熙己卯北榜舉人

邵亭瑞園合選序云吾家勳庸貂組照耀史笈而說禮敦詩佩服儒素羣從兄弟事吾父一如事父梅菴二兄

最疏放然旅進偃僂恪立終日不命之退不敢退長幼
屏息仰視吾父亦杖履儼然無惰容也嘗戒諸子以窮
達有命人有學問不可忽也謝事二十餘年公卿造謁
不輕容接焚香靜坐尤善大易沙村徐先生行端而尤
邃於經爲伯父忠勇公隆禮之士故得從容講席歲當
扈從熱河先兄輩拜送諄諄於仕優則學曰書以道政
事居官不本乎是皆苟道也簿書期會豈大故哉旁及
左氏國語則軍謀國典巨細該備迨秋涼還轅摘問大
義必應荅無滯意色迺和故先兄輩治事之暇篝鐙對
卷嘗如童子上學桐軒三兄好問先世佚事茲桐軒集

中所紀皆遺教也。悔翁自序亦謂先公以國之元舅雅
尙文學，常以科名期望諸子，不欲少染戚里家風。氣尤
諳諳於立品修行。桐軒嘗謂二兄即悔翁開府粵東，憶大
兄當日出鎮，先忠勇公屬云：君恩高厚，汝以戚畹而任
封疆，當思以身殉之。佟氏故勳戚門材，稟承世德，折節
嗜學問，兩公與沙村少同學長，同游道義，交契不以顯
晦殊趨。邵亭合刻其詩，尤兢兢於奕葉繼承，恐子弟漸
忘於高密之遺徽，幾以世祿世官，蒙休襲慶而不復知
讀書。此皆吾鄉先進遺風有足紀者。悔翁丙申冬授廣
東巡撫，固辭，臣愚不足任。

聖祖曰以若獨能不欺朕是以簡用寧可讓耶戊戌由
粵巡解入都遂從征西軍壬寅十一月亟請赴國喪懇
求終身守 景陵少伸哀戀君臣之際猶有古意存焉
張得天題藝經圖云走昔十二三誦經熟其詞便擬獵
聲華羊質衣虎皮大賢藥籠中致有棊與贅其時魯南
公實山東大師同年登石渠昕夕以追隨籍徵詰奧窅
十問九不知游于藝之海中流風泊之諸儒說紛紜楊
朱泣路歧乃知天下慙莫過不學兒貞玉無寒溫幻雲
多變姿公歸塞門居我留踐華資高位必疾僨昌黎曾
有詩歡華不滿眼咎責塞兩儀申公既就徵鄒陽亦釋

纍相逢話三朝淚下如縷縻粲粲者門子七葉逮九達
示我藝經圖山水照鬢眉索我書卷尾慰我長相思天
一而地兩參者惟人斯七尺一傀儡而俾千古垂請看
骸竅閒何異丹華施賴此方寸日終無盈與虧灼灼煦
萬類大生之綱維述文與興業孔志良在茲貌言視聽
思萬端紛難治不有六籍在奚爲六動規黜黜者重雲
經作長風吹蠢蠢者庶類經作甘雨滋一心敬之執簡
易非支離勿虛言靜妙式謹動之時天君旣能軍五官
無興口美玉在頑璞任君剖其籬豈其爵祿餌又豈聲
名貲如農胼手足惟實勤畚蓄白華涅不淄陔蘭香猗

猗嘉生已彌望薦藜當及時魯南卽徐壇長侍講與得
天巳丑同年也得天每以禪理入詩此作最爲醇淨王
筭林吏部宿遷詩四野無山色臨河有故城雁邊秋水
遠牛背夕陽明人意輕書劍家風半戰耕詞壇今老宿
著述是平生末韻亦謂壇長

歸安沈厚餘編修樹本晚號輪翁詩出入眉山劍南閒
與海寧楊次也平湖陸陸堂嘉善善柯南陔稱浙西四才
子汴城南昌長沙懷古諸作俱佳短簿祠云東亭才藻
滿東吳何事低顏事老奴遂使軍聲齊處仲可知祖武
是夷吾辭婚謝傳情原厚入幕郗生迹不孤今日靈祠

薦杯酒阿瓜風貌尙堪呼語極蘊藉

定侯方伯朝琦一字勿齋康熙甲午舉人熟精內典顏
其齋曰離相詩格清蒼不事雕繪其依韻荅稼山云感
君情與楚江深千里寒潮一櫂尋空谷喜聞來遠客清
言真足豁塵襟貧攻愁思三杯酒老愛交游廿載心今
日離筵重惆悵白頭長路感難禁嘗以事與查蔗塘同
繫西曹蓮坡詩話載上元夜分詠一首謂其博學強記
惜詩文不多見也

長洲徐昂發大臨過大慈寺詩茶竈家家火山鵝夜夜
風山鵝卽俗所稱石軸子花

華亭楊瑄玉符官編修時以撰擬陣亡都統公佟國綱祭文誤用王彥章事謫戍尙陽堡旋放還厯官內閣學士緣事遣歸雍正元年不召赴闕擅入乾清門獲罪戍黑龍江卒於戍所次子查岑中書錫恆兩次侍行著有冰天草其艾河元夕竹枝詞謂嘉平封篆後卽設鐙官稱鐙政司至開篆日止馬上女妝者稱鐙官夫人鐙作瓶式繪五穀而封其口取五穀豐登意亦邊徼瑣聞也艾河卽艾渾

周西陳州牧題吳東壁先生梅屋勘經圖云漢儒說經數馬鄭鏗鏗三經如靳驂誰與繼之賈與孔榛芳翦闢

窮幽探流傳派別盛南宋衛黃一出羣言弁輓近俗尙
王氏學聖籍度置供魚蟬章逢袞袞四百載釣名空腹
辭囉喃常時器數昧講習乍臨賓祭顏頰慙先生世之
經大師年始服政抽朝簪生平談禮有癖嗜至味不異
米汁耽方其精思別同異堅壘何足當戈鋌著書滿家
不療貧緇塵華髮空髭鬚五千月俸給芻賃自餘未可
醉二三長安少年習新詭古義詎肯尋周昉先生之貧
固其宜請更捫舌毋多談撰杖曷不歸去來西谿西有
梅花莽湖州名酒旨且甘遠挈花蓼同清酣醒來晴窗
負暄坐研硃點墨書眠蠶弟子汪萬久入室囊籥日鼓

春風函先生歸哉僕請從相期間字香之南東壁康熙
甲午舉人官福建興化同知以事望誤用薦入三禮館
分修所著儀禮章句於喪服奇爲精審其三禮疑義未
刊留三山著疑義適抱小疾徐嬾雲有漢儒能作厲句
一旦駁正酈善長碣石一條寒疾忽發有次汪西顥病
中韻云萬卷金樓違伏枕一裘平仲欲終身見沽上題
襟集其西施乳四首云正是河魴初上時館娃風味忍
重追馬肝久中三吳毒豕腹難歸九島池不共豚蒸王
武子終同酥識祿山兒笑他資善堂前客一死如牽抱
哺私香水谿頭張頰處錦帆涇畔進腴初怒瞠宛似胥

門目免乳羣傳越絕書曾滴珍珠止兒語敢隨銀膾說
王餘火田蘆蕪同名籍一味清芬定不如雙峰未入捧
心圖誰褪金訶出玉膚楊柳花時誇入饌牡丹會上愧
煎酥餘膏還布廣長舌濃抹空傳明聖湖一鬻難填吳
沼恨翻將潤滑媚句吳南烹爭炙死吳娃唐突多應齒
莫邪試問酪奴誰上品謾將懶婦委東家醞釀本自稱
時望乳臭終須累鬢華安得涓濱人出浴輒香七尺便
殘牙

雍正乙巳內大臣伯馬公爲正使內閣學士德公爲副
齋敕封朝鮮世子上海諸生陸琳右廷從行十月六日

自京起程經永平府出山海關北望長城隨山高下四
顧無際山岡砲臺相續關外千里抵奉天府治既歷遼
陽驟綱棧道路多險峻摩天嶺距鴨綠江百餘里遠嵐
可指十一月十日渡鴨綠江朝鮮國分八道曰京畿江
原黃海全羅慶尙忠清咸鏡平安由義州至王城一千
六百餘里州內賓館宏敞門懸金榜龍灣關三字使臣
入境有議政府節度將軍觀察使輩貂蟬金紫鵠立班
迎至館行八揖八拜禮東除一官西除一官席地而坐
薦以花席箕子墓在平壤城外二十里十五日至國王
城依山而築煙樹青蒼詎漢陽卽國王城十里設彩幔香亭

自王城廣衢至王殿兩廡前設兵仗大門榜曰仁政化
門榜曰進善 詔至王率世子以下焚香九叩開讀恭
敬盡禮賓館卽王西第司譯者左右周旋所服烏紗帽
盤領衣革帶阜鞞皆洪武建文朝所頒式右廷能詩工
書入朝鮮爭以重價購其書二十一日返旆司驛直院
長鄭哲賦詩送之有云對君如對玉惆悵是萍蹤今日
三杯飲來朝萬疊峰又云君是中華彥偶來海外身乘
輅歸帝里應念小邦人歸途鴨綠諸江俱凍合乘冰車
而渡十二月二十五日到京右廷有朝鮮行紀其事朝
鮮方言天曰翰歐爾地曰笄日日醯月曰大耳風曰拉

雲曰按耳見雷曰別勤雨曰畢冷曰促不筮熱曰督不
筮水曰幕爾火曰布爾雪曰幕雷冰曰牙隴衣曰者古
提冠曰馬哈拉屋曰積把食曰墨爾佳

康熙己卯南昌熊漢若司空一瀟予告 賜怡情泉石

額癸未南巡迎鑾 賜浦雲堂額卽以名其集丙戌卒

賜祭葬墓在寶林山李巨來爲作圖記楊鏡亭于位

題句有云昨讀司寇篋中疏白日行天斗心駐直聲在
朝澤在野歸老邱園若疏傅漢若出甲辰庶常改御史
嘗疏言投誠武職請改文職卽以參議僉事同知通判
等官用此等一經改授罔知愛惜功名覬覦營私請停

改授又請歸併闕差尋議京師左右兩翼應裁漢缺江甯西新關併入龍江關蕪湖工關併入戶關廣東遇仙橋滄光廠併入太平關俱如所請他如通變銓法成例鄉試同考照舊例用科甲知縣並下部議行

任香谷宗伯蘭枝少喜爲詩並工古文詞雍正癸卯以中允視學蜀中行劍閣觀峩眉篇詠尤多巴州云深院巖扁盡日閒一年花事已全刪情同籠鳥難舒翼行似枯僧正避關萬里煙波通峽水連朝雲霧失塗山故園遙在春江畔那得扁舟縱往還五年秋以閣學偕副都御史完顏杭奕祿宣諭安南初滇之開化與安南接壤

有內地舊境百二十里淪入夷中高文良奏請清理國
王黎維禔抗疏陳辨鄂文端給還八十里仍不服督臣
請討

世宗特許以鉛廠山下四十里畀安南詔使宣諭戒勿
遽入先至滇與文端商度未至而維禔上表悔罪 賜
敕諭旨卽命使者齎以往六年五月自滇至鎮南關陪
臣范謙益等來迎望見詔書皆拜謁如中國禮遂出關
六月抵貂瑤營後遣陪臣迎勞請跪拜儀注有鄭國公
者世掌兵柄無大小皆決於鄭至是以書來則鄭銜與
王並列叱之曰此陪隸也而僭侈若是安南且不國矣

趣使更鄭慙憤言于王以書來言從前拜詔從五拜三
叩是禮也安南所以事天以事天者事帝命度無所夫
三跪九叩禮安南不習也以天朝定制反覆移詰至七
日王意奪始聽命渡良江至彼長安門維綯盛服出迎
欲使者由左門入公曰吾詔使也何左門爲乃由中門
入旣而上殿請讀詔公大言曰使者宣讀詔書以王能
遵中國禮儀故也今若是當奉敕還京師耳安得爲王
讀乎語未畢殿門忽闔番目酋長夷隸數千人佩刀睚
眦環戶外從官皆失色虞有變公屹不爲動從容曉之
王感悟靡眾退率陪臣聽宣畢行三跪九叩首禮乃更

宣示 聖天子撫綏遠人中外一視王宜益效恭順戒

飭守邊員目毋得滋事階禍於其還也曷餽並卻之是

年十月還京 詔授奕祿吏部左侍郎賜公紅絨頂冠

異數也自登六卿在禮部且十年兼領大著作乾隆十

年以疾乞告十一年正月卒於京邸胡稚威其門下士

也春晚出郭送溧陽公歸葬江南述感四首云望到郊

門萬古愁歸來城府颯清秋閩人華屋更相代流涕哀

箏併自休陵處可應成下馬路分猶怕近西州川原便

逐東風改會有心期白日留槐碧幢新舊燕歸不逢家

令已成悲難爲東閣重來日堪憶三朝晏起時白首青

山終一隔滄波丹旆恨俱移敢辭垂老仍羈賤淚溼生

金續蔡碑

作公神道碑銘

一夢從公十載深寒雲關雪換朝陰

噓枯地覺無遺恨留落天疑直到今經共任安終託意
早成疏傳欲歸心兩嗟蕭瑟東風外盡與傷春變楚吟
冠劍行看欲就封過門爭感舊時龍人間紫氣身何恨
病後楹書墨尙濃春水帆檣星斗氣晚花賓客雨雲蹤
若爲怨句裁還得愁對青雲阮仲容蓋稚威每晏起公
早至齋中就坐牀側論事不責其簡常以比安石梳頭
對宣武又公逝後其第爲太宰劉公之居劉公仍掃舊
館待稚威義所不忍卒謝之先是數公開府于外有重

幣見迎者稚威以從公久並堅謝聘使稚威庚申歲卽
勸公乞身歸休尋至乙丑冬爲作奏因決致仕其夢溧
陽公云天漢精神遠山邱悵望休千年李膺去中夕謝
公留地下迴青眼人閒悵白頭生平如不改消息若爲
求後山之於南豐不是過矣

王述菴謂上海凌少司馬榆山傳北平黃崑圃衣鉢告
歸後掌教申江書院教人以漁洋竹垞爲主一時趙璞
菴張少華皆其弟子吳企晉亦其外甥皆遵其教而王
禮堂曹習菴同聲相應一時人才之盛要當歸功於少
司馬云榆山名如煥詩有應制皇華燕都楚湘黃海紀

游各集讀楊忠愍公文集題後云靈皋方子有成言忠
孝半成于所昧楊公慘禍罹逆璫浩氣常存骨空碎悲
哉遺疏泣鬼神那得君王一盼睽要知大罪二十四天
下臣庶同不斃籌將利害太分明遂爾隱忍百千輩讀
公被逮奉母書禍福未定言如愚熹宗闇弱桓靈質公
乃視之堯舜匹當其奮筆疾呼時賜帛何須愍懷日吁
嗟乎人心溺愛則不明惟公愛主同愚氓以火燎火石
填海中腸熱血時飛騰君不見古稱孝子虞有鰥呼天
罪己忘親頑又不見剖心極諫殷比干捐糜未稔獨夫
殘笑殺庸庸狼善顧保身全被聰明誤真氣勃出議論

均極到地雍正六年以侍講提督湖北學政以拔貢楊可鏡卷文理荒謬部議降調得旨朕聞楊可鏡係明臣楊漣元孫楊漣之子楊之易爲江南松江府同知於順治四年遭松江提督吳勝兆之叛捐軀殉難忠節凜然比蒙

世祖章皇帝之恩優加贈卹此卽楊可鏡之曾祖也朕思楊漣父子兩世忠義其後嗣子孫若稍能自立品行無虧雖文藝不工亦當格外造就楊可鏡準作選拔赴國子監肄業仍著禮部引見凌如煥免其降調亦特命也榆山別業曰水竹居張少華重過水竹居詩文窗塵

網曲池平小劫堪驚十載情裘屐不來絲竹廢東風猶
自發山櫻師友風義可想見之

鄂西林開藩吳下嘗以暮春集多士於春風亭爲言自
之官未宴一客今具含桃竹芽與諸君共賞清味殆不
忘做秀才齏菜故態也且世俗幾以書生二字作謾人
語然二字意味外人如何得知今又何須脫卻耶丹陽
姜爽齋兆錫作詩四章紀之阿文成公謂公於吳禁奢
汰過佚游甚至厥口詛祝不得已以詩自鳴論者又或
以迂遠目之公嘗有句云敢以迂疏閒略事不將廉介
巧謀身當時必有書生短公者奢示以儉儉以示禮型

方訓俗之道固非流俗所喜也江寧王後村上舍讀秦
淮詩鈔有感一序有可與此意相發者因竝錄之其詞
云曩聞杜茶村秦淮鐙船鼓吹行妙絕古今恨未一見
偶索之陳丈菊圃蒙以漢陽某君所編秦淮詩鈔見示
凡四方人士詠秦淮者其詩具在不下數百篇以茶村
鐙船作弁其首子旣愛杜詩之瓌偉而又歎諸君子者
徒以舞衣歌扇爭相流連而無復有人心風俗之感于
風人之義何當也唐人詠銅雀妓詩曰丈夫有餘志兒
女焉足私擾擾多俗情投迹互相師直節豈感激荒淫
乃淒其信斯言也則諸君子之意荒不揣鄙陋漫成是

歌以竊比茶村而大指則各有所主茶村謂天下治安則秦淮盛天下亂亡則秦淮衰不知有明天下之亂成於萬曆中年而舊京淫靡之俗秦淮士女嬉游之盛亦惟萬曆中年爲最甚物力旣耗而廉恥復喪此安樂足以死人而風俗人心所以載胥及溺者也豈得夸此爲治安之盛事乎哉惜乎茶村旣歿無從質之而姑識區區之見如此不知於諸君子何如又不知後之編秦淮詩者以爲何如也

桐鄉呂堃筒坡有題余澹心板橋志後詩四首其序劇佳今並錄之文云曼翁當鼎革時賸水殘山潛潛淚眼

祖香草美人遺意記南曲珠市諸名姬述其盛衰悲其聚散一寓睠睠故國之思至一唱三歎著淑慝寄褒譏抑微而顯矣此自序有知我罪我之說不誣也特借酒于歌兒狎客冶游豔遇之勝使人目駘神蕩歷百數十年都被瞞過其曰雪衣曰睂樓曰董宛曰馬嬌諸名色大抵行役大夫之彼黍彼稷耳所見不同興懷則一尤西堂一世才人以平康記北里志擬之陋矣筒坡嘗和朱竹垞鴛鴦湖權歌百首譚舟石作附刻暴書亭集而筒坡詩鮮知之者

江寧劉智介濂本西域默伽人取回回文字七十種譯

爲天方禮經又撮其要爲天方典禮擇要解二十卷首
爲原教眞宰識認諦言四卷次列念眞禮眞齋戒捐課
朝覲爲五功四卷次爲禋祀一卷次爲五典四卷言五
倫次爲民常四卷次爲娶禮婚禮喪禮而附以歸正儀
詳爲解釋雜采儒書經義以文其說入四庫存目其勃
泥國王墓詩萬里朝宗覲帝京祠官葬祭備哀榮至今
華表梅岡上直看江流入海清

滿洲佟鉉蔗村僑居天津尹兒灣自號空谷山人游王
氏依綠園云折簡呼谿叟攜童上野航閒情拋筆硯老
興逐杯觴短棹辭塵境名園問醉鄉到門秋正好花竹

滿軒廊許傍文星座雄談酒共傳柳搖秋水浪花醉夕
陽天絳竹寒高館殘荷對綺筵丹青圖雅集人似飲中
仙新月初浮水潮平影似鉤谿邊猶鬥酒燭下未登舟
風露吹衣冷星河入夜流小留鷗鳥狎詎是戀糟邱弟
鍊字莘湄以佐領出爲平樂太守著有沓渚集卒後妻
趙恭人依蔗村以居鞠子濬成進士其祭竈詩云再拜
東廚司命神聊將清水餞行尊年年破屋多塵土須怨
夫亡子幼人題邊塞圖云黃沙漠漠迴無垠萬古關河
不度春今見畫圖腸欲斷可知當日戍邊人三人詩雅
頌集失收莘湄與翁山交契譚仲儀謂其詩近翁山律

詩高亮至謂其官知縣則誤記也蔗村姬人豔雪亦能
詩和查蓮坡悼亡句云美人自古如名將不許人閒見
白頭李秦川贈蔗村詩所謂麗爾復天錫詩人作細君
也

翁照霽堂詩情婉約絕句如秦洛生太史招游寄暢園
卽席分韻云中雖曳一枝藤別有危亭已倦登佳水
佳山能歷徧固應輸箇打包僧水邊小憩弄清流竹冷
沙寒宛似秋一片雁聲何處落彈琴人在夕陽樓海棠
軒病起云偶緣行藥過東欄初試生衣尙覺單自笑新
來偏善病與花一樣怕春寒冷香亭夜步云夜深小步

曲廊東疏箔層層望若空一樹梅花半輪月與人俱在
寂寥中秋曉云隔隔煙鐘破曉清山房秋意畫難成時
當酒醒眼初豁蕉影一窗殘月明律句如芳城寒食次
張匠門太史韻云往來有數愁中路遠近無憑夢裏家
旅夜喜顧俠君太史至云把臂客來鐙影裏斷腸人在
漏聲中格近中晚特饒韻逸

沈季友南疑學詩於毛西河釋澹歸稱其詩如橫笛孤
吹於月下雲無片翳風無絲擾其宮詞云流鶯語燕總
難聽春入紅羅六曲屏芳草不關興廢事上陽宮外又
青青自解紅綃拭淚痕飄零十載在長門樓頭縱有能

言鳥不肯分明報至尊九子鈴搖玉殿風六銖衣冷繡
簾空夜來間說新頒詔又選良家入禁宮梧桐西下洗
妝臺十幅湘簾傍水開最是有情惟碧蘚殷殷如上玉
階來芳秀雋永雅近唐音

陳訐言揚本海昌人得鄭端簡公故宅遂移家海鹽從
黃梨洲受籌算開方後請卒業句股著句股引蒙五卷
句股述二卷嘗渡錢塘江登岵山謁禹陵過曹娥游天
台其華頂至石梁從樵徑行深澗中偃側可怖坐石梁
縱觀瀑布欲渡不敢緣山行乃出其後諸作縋險鑿幽
窮赤城之勝可抵興公一賦

秀水盛丹山學正楓盆花云木性本條達山翁乃多事
三春截附枝屈作迴蟠勢蜿蜒蛟龍形扶疏巖壑意小
萼試嫣紅清陰播蒼翠攜出白雲來朱門特珍異售之
以兼金閑庭巧位置疊石珍磊砢鋪苔蔚鱗次嘉招來
上客讌賞共嬉戲詎知根榦薄未久倏憔悴始信矯揉
力托根非其地供人耳目玩終慙棟梁器芸生各因依
長養視所寄賦質諒亦齊豈乏干霄志遭逢旣錯誤培
覆欲其類試看千尋松直榦無柔媚託興甚爲深遠
高澹人題鎮國公霓菴畫竹冊子二首云誰寫琅玕墨
未乾溥溥曉露動輕寒憶從東第趨陪日曾在梁園雪

後看綠雲淦淦影披離密葉纒抽一兩枝會得渭川千
畝意輕煙輕雨總相宜霓菴鎮國懋厚公號也

朱竹垞查初白均有詠白杜鵑花應東宮教詩此康熙
乙酉作也已丑三月 詔下青宮再建喜而賦詩云震
驚由地奮異命自天申復覩重光日毋煩四老人堂懸
銀榜舊笥出紉衣新媿遠青雲路難揚蹈舞塵沈麟洲
雜詠詩秘殿從容召對頻廟堂氣象若爲新難逢沙汰
江河手合有招延羽翼人種漆樊侯知備豫憂葵魯婦
枉悲辛今朝聽說朝陽鳳一紙封章新進臣則爲請建
儲諸人作也許子遜詩獨奏重輪曲彌含抱蔓情謂西

田相國屢疏建儲當夫九旗初建五勝夙爛瑤山作詠
藻耀前星博望多才風高漢苑 仁皇嘗以東宮歷年
所讀書本及臨摹楷法共大小八篋示閣臣與詹事府
蓋自六歲至十三歲出閣以前程課未曾閒輟四書書
經已講貫全完深通義旨熙朝雅頌登理邸詩二十四
首塔山云朔吹盈川谷蕭蕭動羽旄草枯迷兔窟水急
脫鷹絲箭落寒雲重山鳴畫角高承恩出關塞躍馬氣
逾豪過開山廟云東去指徂徠巡行亦壯哉人從千嶂
度路想五丁開雲氣連秦觀煙光接漢臺春陰嵐翠潤
谿轉徑迂迴黃河云黃河天下險萬古互乾坤不覩靈

濤壯安知禹力尊水雷無定響江海欲全吞此際乘槎
穩安瀾荷聖恩其瞻仰盛京宮闕念 祖宗創業艱難
恭賦長律一首高華典重宏我漢京卒以罪廢不能不
歸之於天意當時諸皇子如誠隱郡王允祉恆溫親王
允祺溱度親王允祐果毅親王允禮誠恪親王允祕皆
嫺篇詠怡賢親王未封時令本旗尙書巢可託薦博學
端人備咨訪以屈悔翁應命先達意許歲幣千金悔翁
固辭然亦極感其意至紫瓊道人被服儒素左右圖書
詩宗唐人畫與北苑衡山把臂入林書法亦蒼秀入古
誠河間東平所未聞而又近世懿親列屏所無有矣

張獻忠據成都三載誅求民物殆盡鼎革後獻孽運其輜重赴楚巨舟數百號連檣銜尾東至嘉州直抵江口先是有武舉楊展者豪勇冠西川憤賊蹂躪練集鄉兵備賊至是截之獻孽怒舉火悉焚其舟全物並沈於江獻孽復集賊黨還成都會王師至盡殲滅之西蜀既定頗有覬覦江中遺物者竭人力取之終莫能得半溺於水康熙乙未秋成都楊鳴岡孝廉述其事嘉興沈補隅作江口行以志慨江口者岷江口也

楊大瓢納木窩稽云跋濟過混同所歷已奇峭結束入窩稽一望更深奧陰霾不可開白日安能照古雪塞危

途哀湍喧壤道更無人跡過惟聞山鬼嘯車驅苦艱澀
換馬欲前導霜蹄偶一蹶流血沾烏帽魂魄已莫收童
僕徒慰勞死亦分所當生豈人所料但苦厯窮荒庭闈
終未到至寧古塔二首云望望吉林峰白雲繞其下登
頓及今朝亦得依親舍父母驟相見注視還相訝別時
髮覆眉胡乃成老大隣舍爭慰勞應接吾不暇姓氏未
及知空言聊慰藉日暮細挑燈恍若夢中夜喜極乃更
悲不覺淚如瀉上書不得達生男亦胡爲四十始省親
問心良可悲戲綵媿老子挽須同小兒西山日已薄鄉
園歸何時歎息謂季弟爾獨無分離承歡廿八載此樂

人誰知其尊人安城戍寧古塔大瓢赴闕訟父冤得

俞旨之柳邊迎歸時作也大瓢以書法擅名有鐵函齋

題跋

梅氏自北宋家宛陵定九徵君積畢生精力從事步算
之學李文貞取所著天學疑問進呈 御書績學參微

四字以賜居京師時裕親王以禮延致朱邸稱梅先生
有寄青州薛儀甫先生五古四首儀甫名鳳祚淄川人
也與王曉菴稱南王北薛著天學會通

明嘉靖閒清平高義女妙清少孤依兄嫂兄歿與嫂撫
孤兒鼎鼎五歲嫂又沒臨終以鼎委義女義女許之時

年及笄矣家素封族人利其有促爲義女議昏拒之曰
必待孤姪成立家有老嫗頗良謹義女厚撫之鼎就鄉
塾僕負而出嫗負而入餅餌湯水非手授不令嘗也鼎
游戲失學則泣不止鼎感憤力學隨補博士弟子時義
女年三十餘老嫗探其情義女慨然曰吾爲高氏存孤
彼何惜此一抔土乎遂不嫁以終其身年八十餘無疾
而卒鼎後爲禮部省祭官子孫繁衍爲清平望族博山
王棗村洪謀嘗賦高義女歌棗村康熙庚子舉人
胡東樵禹貢雖指取莊子秋水篇用管窺天用錐指地
之意言所見小也吳山觀潮云扶桑東極水雲昏溟漲

連天入海門白鷺千羣沙際影青螺數點水中痕石當
羅刹聲偏走風折西陵勢益奔徙倚伍胥祠下望鴟夷
信有未招魂吳荒山句云椒酒不隨王氏臘桃花自放
武陵春自注吳均入東記云漢高士吳荒避王莽之亂
寓居此後人名焉

靳熊封爲文襄從子一號書樵令歛時有東壁春臺四
大字魏廣微所題一見命碎之鄭寒村有搥得春臺東
壁碎姚江漆室自光輝之句其看梅詩卷安邱曹實菴
之子掌霖上舍霖嘗客歙州爲題絕句云尋春到此逢
寒食不見梅花撲酒缸今日誦君沐雪句鐘山碎雨打

僧牕

鄭芷畦傳其從父駿孫易禮之學兼通史傳及金石文字西河竹垞稼堂胡東樵張樸村並折輩行與之交著有禮記集注四禮參同石柱記箋釋及湖錄廿一史約編所居曰小谷口著書之室曰魚計亭嘗繪小谷口讀書圖其故居後爲陳泰虞尊所得虞尊題弟進卿翠墨齋金石目錄云寶刻編成署睦親吾家今復得傳人飛鴻屬土搜炎漢鳧嶧之采錄趙秦披蕤細摹鐘鼎款裝函大勝象犀珍回思谷口球琳富輯考何當繼後塵湖錄有金石考也史記始皇本紀名爲政姓趙氏此詩趙

秦本此

趙秋谷集中棄婦詞頗寓魏闕之思張拊琴茂才所刻
海鷗小譜一卷皆秋谷自敘閒情之作畢澗堂海瓊受
業于秋谷句如遠林懸落日暮色上孤城人喧爭午市
山靜落秋陰皆可誦常熟布衣仲是保字羹堂從秋谷
學遂依之卒于博山其懷古諸詩秋谷比之羅昭諫如
中吳云伯通掃屋留春易季札迴車挂劍難廣陵云星
期布局閒爭墅袍草生香嬾下帷皆能不落科臼
婁縣焦袁熹廣期論詩黜新城謂神韻一說其毒比竟
陵爲甚可謂蚍蜉之撼大樹其詩大都村學究語鬼謠

一篇全是鬼氣惟廣富林潘氏雙節詩松柏無冬夏冰
霜有歲年二句最佳所爲制義八集多至千首其他著
作十有餘種是老死文字閒者李安谿嘗以實學通經
薦謝荻灘上焦山懷廣期云人遠不隨流水逝焦家又
得一徵君謂此

浦二田教授居金匱之前澗肆力於古有史通通釋讀
杜心解古文眉詮諸書詩曰不是集如祝雞黃傍母刈
稻綠生孫淺碧及時村務酒小紅隨意陌頭花三泖歸
帆衣帶水十年舊雨草亭人光黃閒有方山子世界中
多廣莫鄉置之南宋羣賢小集中可分一席蘇齋議其

解杜索摘文句太頭巾酸氣亦切中其病

奉賢諸生王景堂題趙安仁先生輓冊云康熙六十年
臺臣論建儲被斥守燎者陶夔等十三人蘇州侍御趙
安仁其一也卒于塞外自辛丑迄今三十七年予客金
閫公弟綠萍出示先哲哀輓二冊爰賦七言四章以附
簡末案十三人爲陶夔任坪范長發鄒圖雲陳嘉猷王
允晉李允符范允鏞高玠高怡趙成穠孫紹曾御史題
名陶夔大興人陳嘉猷溧陽人范允鏞錢塘人俱庚辰
進士任坪高密人辛未進士范長發秀水人高怡武康
人俱甲戌進士鄒圖雲江西南城人丁丑進士王允晉

清苑人丙戌進士李元符嘉善人癸酉舉人趙成穗吳
縣人戊子舉人卽安仁先生高玠柘城人辛未進士孫
紹曾山陰人丙子舉人怡字仲友玠字荆襄號芸軒沈
塙士宗伯詩蘭臺空署赴輪臺詔遣從軍萬里來食祿
自應陳正論至尊終是重良才不教天遠投魑魅更許
兵屯關草萊想像高秋望京國一時回首白龍堆卽此
時所作劉芳草青芝爲高御史玠出塞集序謂高以雍
正丙午召還又云與高先生同謫者李揆山鄒挹青邵
璣亭皆死於塞外江村未定橐中有出塞集序謂高以
康熙辛丑入臺尋謫成雍正丙午召還案題名高入臺

在五十五年丙申江村蓋誤也吳縣金立斯上舍懷高武康侍御軍臺云身訝新環甲寇爲舊觸邪一言陳白簡萬里度黃沙食祿應持論投荒肯顧家從戎堪報國垂老莫長嗟孫字二乾號我匪陶篁村其孫壻也所撰孫公墓誌云辛丑恭遇

聖祖六旬萬壽給事中高儀倡言天子春秋高宜立東宮以固國本因草建儲一疏糾同官列名八奏公與焉上震怒盡降爲額外章京限卽日起程馳赴軍前効力公乃戎服左佩刀右屬弓矢帕首袴鞞馳驛走關外至蘇武牧羊坡昭君青塚嚴寒砭膚六月見雪酪漿羶

肉旦晚充飢其地爲西北孔道差徭如織廚傳之供帷帳之設駝馬之應悉取給於効力人員公素清介橐無餘資又倉卒起行親朋無所贈羅掘雀鼠艱苦萬狀迎候趨蹌形容枯瘁論人事之常此生馬首不復隨陽鳥而南矣

憲廟改元推廣先帝遺德詔諸臣雖不諳國體顧心本無他放還故里計同時出塞者十有三人僅存其六蓋死者過半公聞命驚喜驛中有白馬善走騰身而上日急馳二百里抵歸化城而卒年六十有五案辛丑歲仁皇帝聖壽六十有八此言六旬萬壽誤高儀當作高

怡聲近字譌爾劉芳草序出塞集之言曰荆襄先生謫
戍忒斯軍營六歷年所其居葺茅其衣久年羊鞞其飲
潼乳其啖穀糲其地冰澗蔬不可蒔火之成陽土始生
根菜其山不毛其水西流其草四月生六月槁其雪秋
前零春後結五六月亦時飛忒斯將軍者欲誇土物之
美則冬購冰魚以進欲明久屯之利則歲獻嘉穗而忒
斯固不產嘉魚其植燕麥四月布種六七月霜卽枯奉
詔老弱者歸而將軍乃歸精壯言無老弱也水不能行
舟月費數千金造之置河干言地可通運也皆可於先
生忒斯雜詠見之篁村及芳草皆以文人之筆鋪敘邊

事不無扣槃捫籥之談而高先生當此沙漠窮絕之地
朋類死喪頻仍拂亂摧折零丁困阨無聊之餘猶能發
爲歌詩以寫其孤憤抑鬱纏綿篤摯之意斯可敬也其
守燎緣起則沈子大所爲盧抱孫出塞集序爲得體要
蓋自國家有準噶爾之役命將征討北自張家口至軍
營二千餘里閒置臺站四十有九以通斥堠傳羽檄初
武臣主之後以文臣之獲譴者經理厥務號曰坐臺用
示謫罰準噶爾臣服裁爲二十九臺又憫諸臣久役三
年期滿而代或譴非其罪仍敘勞績予錄用且不次恩
至渥矣

鄧又楷贈林方之云家風存苦茗生計託長鑱白首爲
農意黃冠出世心方之確齋子也又楷名裴號東湖江
西新城人

遼陽于鰲官河工同知友人出示河津龍門圖云河山
莽蒼合迴抱夏王宮地拔雙峰表天開一罅中風雲雄
氣象筆墨闢鴻蒙千古文章在如逢太史公源從天上
落一氣撼乾坤高挾千尋險渾流萬里奔晉秦平可攬
星斗仰堪捫胸次涵中夏澄清事討論語極雄渾白山
詩介雅頌集均未收

婁縣楊采南文學陸榮撰三藩紀事本末殷頑錄等書

有潭西詩九卷康郎湖功臣廟云智勇相乘悉銳師鄱
陽慶戰記當時陳王亦有功臣在何處人閒子建祠弟
子輿尸有廟存功高肇造或焚元千秋宋穎英魂在待
向何人訴此冤此好爲翻案者也沈學子鄱陽湖詩當
日驅除同勝廣後人感慨到蕭曹百年陵谷鼃鼃徒五
夜精靈波浪高自是正宗山陽張養重虞山過方干故
居云君相憐才事最新至今詞客尙沾巾生前若竟邀
圭組不過尋常仕宦人此翻空而有意者平湖沈暘尙
廬響屨廊云響屨荒涼蔓草平空廊無復美人行山僧
幾兩芒鞋在時踏寒巖落葉聲秀水項奎東井畫菊云

秋在柴桑舊草堂不因風雨廢重陽先生自愛南山好
卻借東籬作酒場皆有意致辛亥杪冬茶仙亭小集卽
席分詠題爲范少伯攜西子游五湖限西字韻余拈一
絕句云從此西湖遂姓西鷗夷一舸得雙栖而今未是
功成日應念君王在會稽合座爲之憮然詩不足言此
意不可不記

淮南子槐榆與橘柚合而爲兄弟長洲陳雨巖詠橘云
有柚願教兄弟合成林休慮子孫忙常熟錢鏡先席上
詠物分得橘云丹實離離間碧林千頭聲價重黃金踰
淮若改平生質孤負當年作頌心鏡先名錦城牧齋孫

也

湯文正自奉澹泊撫吳有豆腐湯之號上海方槐江文
學廣豆腐詩常伴中丞退食餘名高十八種尙書至今
故老猶能說欲使溘風返里閭桂林陳汝咨相國歷官
所至無間久暫必究悉於人心風俗之得失及利害之
當興革者籌其先後以次圖之在江蘇最久遷督兩廣
未幾復還常膳止園蔬惟烹茶必惠泉水月徵百斛無
錫劉執玉嘗作水遞歌諷之然於公盛德無傷也

烏程楊昆谷塔院歲寒堂題壁云最喜僧扉僻幽尋且
破顏吳鞵穿市曲佛屋枕谿灣竹色兼秋淨禽聲入定

閒脩脩禪味逸已覺隔塵寰尙有高人跡留題牘榜楯
千秋歸夢史一笑續湘纍魚服生前困龍髯墮後悲回
谿風月夜醉酒榜船遲黃九煙嘗寓此歲寒堂榻九煙
所書也

開平王鐵衫用鐵絲環鈕塗以黃金其子孫在松江者
捨助道院助鑄神鑪道士惜其舊物也因藏弄焉華亭
謝鶴北堂詩草有鐵衫歌紀之鶴字披雲其過夏考功
墓句云荒涼中散宅顛頷左徒心又先朝無尺土內史
有孤墳存古墓在其側也陳沒後文會奉沈雪峰浩然
爲圭臬披雲書雪峰先生詩冊後云一代詩家存甲子

百年文會續庚申雪峰出家善應菴故又有原是五陵
裘馬客緇衣披卻了閒身之句

江都程蒿菴式莊字敬哉從朱竹垞楊晚研查查浦諸
公游所居紅藥山莊有葛藟齋煨芋菴水南草堂藕花
柴句如潭影照書前度雪竹聲吹夢隔灘風瘦馬背人
荒磧去孤城送客夕陽回皆佳其水後重過橋墅云蓼
節拳孤鷺沙痕隔舊潮亦見細切此與周櫟園所稱會
稽馮仲將肇杞佳句千網集斜照孤村合斷流暖歸隄
草綠晴入水天紅遠樹皆山色深雲半雨聲白沙新鳥
迹青竹老漁竿野市爭春釀新壚急暮春香影花臨砌

寒聲竹到牀孤枕寒更入殘燈細雨來皆晚唐佳境梅
杓司句螢飛過竹暗牛飯就松涼亦其類也

家補籬先生天樞久客淮干薄游西蜀其作峨眉之游
時在康熙丙申有與年某夜登木末亭觀日出詩他若
宿遷行巫山行奇氣全出有雲垂海立之觀近體如韜
光云江湖分一嶺闌檻轉雙丸清明入山道中云路自
行迴白山能宛轉青蠟屐所經幾半天下錢唐沈香巖
喜補籬先生移家浦上詩有關地未栽千樹橘掃樓先
貯五車書及有婦同燒簞谷笱無人重寄草堂資之句
長安甲第半已邱墟宋玉臨江居從憂患其晚境可想

見之弟復菴太守天寵亦嫺吟事雪霽詩有破寒一杖
作春行之句

仁和布衣楊模閏六月初七月云四日魄生方入夜七
回弦上未成秋可謂工切陳秉夏臣月詩素魄雲中起
抽豪憶謝莊寒生金掌露影動玉鉤霜半夜懸清漢三
更落故鄉還將游子意機上照流黃亦崑體之有姿制
者

吳江顧卓無錫朱襄館於紅蘭主人者五六年歡然無
所閒主人刻玉池生稿取兩人詩附於後時康熙乙亥
也襄字贊皇八歲能詩吳留村令賦詩詩成稱善又作

擘窠書來悅樓額一時目爲神童其無題集韵詩姜西
溟謂殘縑舊繡一經其杼而新之起承開闢莫不聲切
雲漢嘗著易韋朱竹垞謂其不墮陳邵科曰卓字爾立
以善畫花鳥名於時王載揚題其杏花云東風無刀不
飛花最憶紅蘭居士家寂寞梁王舊賓客斷縑零素滿
天涯

德州李秋崖明經寄飴山先生云禪宗南北幾時分一
代詞壇許軼羣入室爭勞攻墨守傳衣獨自抱遺文風
高秋雁分烏帽日暖春池寫練裙尙喜庭柯容寄傲無
心只擬作閒雲飴山書法楊可師議其守馮補之之說

而不變一以分閒布白爲主李申嘗嘗得其論書一冊
云中有缺佚持論頗近談龍錄其論臨仿之法可以益
初學是冊無撰書人姓名以篇中稱松雪爲吾家文敏
知之徐琢謂向見秋谷揚州芍藥詩筆正如此可師論
書於祁止祥則謂其學董而乏秀逸於沈文恪則謂其
學董而無氣韻謂馮補之講閒架閒架之說本於信本
而補之之閒架又與信本不同謂橫雲山人師米而失
其秀潤之氣謂陳香泉氣味好但專取姿致媚而少骨
其他亦每多微詞而梁聞山於可師則謂其得筆法學
右軍長公圓韻自然亦弱甚矣此事之難言也

屠純洲上舍文漪句云高柯已葉仍須灌小草能花卽
不除桑因分種仍先壓竹爲新栽卻禁澆是能讀種樹
書者王聯曾緜笙句云不伐有巢樹多移無主花顧維
鈔孝穀句云書句偏嫌字出關皆能卽事生新廖必恆
丁氏澹圃云晴雲嶺上游山屐夜雨鐙前種樹書亦見
閒適之趣

黃巖潘最屈右刺鼠云移家倉廩邊貧竈亦鼠穴其族
日以繁所過輒殘缺惟彼架上書何與于飢渴呼兒理
零落望古一愁絕天地之貪饕無如此輩劣中夜忿觸
聲好夢爲之折高擊牀頭杖慣聞殊無怯緣梁墮塵坳

汙我缸中潔更難寬不祥白晝立門闌泣師于烏圓爲
我宣武烈平生狡黠性毋乃徒蹠躩朱國權平物田家
歎云竟夜無眠直到曉驚聽秧長麥黃烏麥黃喜得充
飢腸秧長又怕傭錢少剗肉爲補眼前瘡糶麥且種及
時秧呼兒雖弱強努力莫教荒卻一年糧男子飽食好
出力女子省食餉南陌辛苦種得早田下晚田乾燥如
雪白上邨閭足米價高下邨空腹推桔槔阿婦典衣共
朝夕田吏徵賦入官廩天道人事何時足空將兩耳聽
布穀息林十二子中此爲佼佼

李鐵君銛吾掣電二刀歌云山海不足厭金氣往往百

尺飛精芒蒼龍白虎故有兆刀今且幻雙鴛鴦清冰截
然湛其理若滅若沒當秋陽海中安得有此物此物毋
乃更興亡風濤一旦肆騰踔九龍失守徒倉皇嗚呼刀
有碧血愼莫洗意者厓山舊從死其序云先伯父亢宗
公提督淞軍武勇絕倫累治鐵作刀以示牙門校吳英
英曰非寶也不可以試刀有二曰鈗吾掣電焉公曰其
狀若何對曰英鄉見鄭芝龍見雙鳧浮海上芝龍曰海
安得鳧擊之因忽不見使善泅者索之得二刀刀有文
一曰鈗吾一曰掣電遂異而寶之使親軍負以從出入
與俱芝龍敗負刀者今亦死母老英識其家求之當可

得也公喜與之三百金英去久之負刀來裹以花布巾
曰得矣刀長四尺本半之光景霍然眩人目公以甲覆
牛頭試擊之立斷脊裁血濡縷刀展轉藏諸子家今并
歸別氏矣案吳英泉州人初授都司僉書隸浙江提督
平耿鄭以功業自顯

朱碧山銀槎杯杯底有槎杯二字脣有岳壽無疆四字
尾有詩云欲造明河隔上蘭時人浪說貫銀灣如何不
覓天孫錦只帶支機片石還其款則至正乙酉年朱碧
山造下仍有小印二方篆隸正畫皆工一人欵坐樹腔
手持一物文支機並篆書其重不及三錢實三合許碧

山名華玉今嘉善西塘鎮人朱竹垞有銀槎詩爲孫北海少宰作後歸宋荔裳觀察施愚山高念東曹顧菴皆有長歌荔裳沒槎不知落何所康熙己巳高文恪得之於西河沿市上傳之其子谷蘭太史輿出以侑客錢介維爲賦長句有軼唐邁謝之語松江唐俊卿平江謝君餘兄弟皆同時銀工之巧者也厲樊榭詩則在玲瓏山館作汪柯亭古香樓所藏則流轉吳門或持以易米爲陸費頤齋宗伯所得亦有歌紀之

江西新城涂贊皇學琪學問淵源易堂南城潘立夫諭德廣昌黃靜山太守皆其門人琴臺玩月雲商颺起四

野薄暮難爲心高臺陟良夜清輝滌衣襟孤鴻叫天末
寒響散遙岑銀河遞隱見玉宇空沈森不知此臺畔秋
思幾家深臺基已半圯月色還相侵蒼茫積素內誰爲
理瑤琴獨孤不可見浩然傷古今詩體卽近毘陵集

雪橋詩話續集卷第一

雪橋詩話續集卷第四

遼陽楊鍾義撰集

吳興劉承幹參校

康熙戊子遂寧張文端在河工九年舉東撫趙世顯自代遂被總河之命晚節不終侵蝕帑金縱僕受賄鮑辛浦忽祿齋續稿淮北述事一詩頗爲激切詩云碌碌復碌碌河干鬼夜哭問伊哭何爲飲河未滿腹水中魚鼈盡又復來搜粟算緡橫徵商得意兼隴蜀開府建崇牙脂膏自沾渥百僚試私人那容吏部錄表授無虛歲紛如馬量谷積金家邱山列市輦珠玉變童與妙妓羅綺

炫華屋朝筵喧歌鐘夜宴濫絲竹日下何曾箸山海非
一族水齋連艇舫彩纈照屏幄唐花羅四季芬香散川
陸驕侈縱兒孫奢僭逮奴僕盈滿古所戒禍福有倚伏
請看石季倫珊瑚四尺足不見元相國胡椒八百斛以
此致殺身身死名亦辱近有閩中丞淡泊寡嗜欲苦行
同老僧 天眷死彌篤予謚并賜金邱壟扇餘馥更有
高安公正已率僚屬三載朝天階單舸載書櫝以彼相
較量冰炭異涼煥寄聲河上公 聖明罔不燭未容錫
元圭無爲蒙顯戮亟須奏安瀾蒼生免流毒閩中丞謂
海康陳清端公瓚

聖祖嘗謂其如苦行老僧以五十六年卒於官追授禮部尙書賜銀三千兩高安公謂朱可亭先生時由浙江巡撫入爲總憲也世顯以六十年十一月罷

聖祖嘗謂文端如趙世顯讀書人晚節若此豈不大喪生平讀書之謂何居官者始而好繼而不好天必不容云云繼之者陳恪勤亦文端所薦

歸元恭後別號之多無過鮑辛浦者有若喫虛翁屨提菴主一旅亭長人海長翁佞佛頭陀夢崦居士心隱山人待翁各系以詩自爲圖畫則有讀書松桂林圖秋山行腳圖望衡聚話圖雙谿詩話圖家世簪紱羣從子弟

習爲豪侈盛飾車輿服御聲色狗馬以相誇尙辛浦獨
樂與單門寒素深沈好古之士游業詩專且勤游石門
山作沈綸翁比之康樂其僦居涿鹿檢次羣書作云一
脫朝衫詠筮塗歸來無復舊田廬縱橫十笏維摩室富
有人間叢脞書曾載江頭赤馬船騾綱搥束又經年芸
香消盡衣魚飽懣悔多生文字緣自笑生如食蓼蟲書
淫傳癖坐途窮州人莫笑衣無副都在長生質庫中小
鬟雖媿康成婢老僕眞如顙士奴遣向晴窗理殘帙日
斜猶自冷齋廚癸卯長夏杜門追憶平生游歷隨筆載
記題曰雪泥鴻爪錄凡四卷復有冬日雜憶舊游詩六

十首取國朝前輩諸公詩得論詩絕句四十首可以見
趣嚮焉

蒙又上一字遠懷少年苦學厖雪厓在戶部日從之問
學雪厓荅遠懷見贈原韻云不厭吾廬遠朝來更過門
空增一日長何取老生言鑪火禁殘臘魚羹出晚殮逢
迎憐好士意氣一飛翻之子方英妙吾衰有病羸忘年
宜結友薄德詎堪師且用當前好無深向後思贈詩兼
漢魏卽此是良規曾顏能入聖游夏得登堂業自由勤
廣貧寧與道妨辭家非浪迹取友盡賢行材大成應晚
前途安可量懷抱何曾盡家童屢趣行斜風速歸騎暝

色落層城小別猶堪悵流光倍可驚迎春詰朝至轉眼
又新正以諸生中康熙甲午副榜雅頌集僅錄其春日
漫興一詩西林相國贈又上詩志士惜聲名壯士輕衣
馬賤士無不爲擾攘都城下胸中各有營逐逐未能舍
賢愚雖異儔物役竟相若又上清狂人出處任瀟灑憐
予如弟兄日久不暇假豁達吐肺肝濁醪每共把大言
寧不慙同調應已寡嘗延又上課諸子共晨夕者二十
年贈又上句云不解從人覓顏色狂奴舊日稱男兒官
江蘇時寄懷又上云西谿一茅屋風雨蔽狂夫別後吟
詩否新來得酒無逢人嘲鹿鹿對客唱烏烏舊態誰原

汝應須憶古愚其爲人之高邁可想見矣

德清戚麟祥聖來號餅谷康熙己丑通籍官侍講學士
雍正元年拜

仁皇遺物之賜有瑪瑙水中丞珠筆架鴛鴦荷色鼻烟
餅而一硯尤所寶藏硯背御製以靜爲用足以永年八
楷字銘嘗以事戍寧古塔及歸而室儲盡遺書蕩然久
之乃得賜硯孫芸生馥林生距餅谷九年思慕勿諼因
取以顏其齋曰寶硯并繪爲圖秀水蔣春雨系以長句
有云君家學士選中祕聲振鑿坡翔鳳翅嚴徐庾薛何
足論能使 至尊頻寵異龍魚河圖火珠林人間不見

窮文字承明朝夕與論思
先帝私人煩重寄李謫仙
應號鑑湖元才子亦傳宮侍一自鼎湖龍上昇哀纏弓
劍藏橋陵 天子親呼舊侍從文房攜具各拜登松花
之硯乃其一銘辭煌煌長服膺想當肘硯值幾暇五雲
華蓋玉几憑秋風瓠子日月煥龍書穗跡雲烟蒸天章
宸翰接時出金門雨露同分承歸田以之爲嘉話夢回
鈴索通觚棧後來學士遭家難火炎不分玉石爛圖書
杯椀盡飄散頭白身爲萬里竄覆巢之下無卵完何況
區區一文玩君也名孫生太晏文采風流擅詞翰念祖
長思手澤存搜尋不惜兼金換卿家惟有故笏爾撫硯

猶當作三歎馥林爲春雨編次遺稟有詩云風義師兼
友情懷弟與兄何曾相爾汝祇自罄平生馥林爲詩從
春雨得宗法或連日夕交相折其交契良非恆泛也

安邱古渠邱地馬漢荀刺史長淑輯同邑諸人詩爲渠
風輯略七卷如王菊逸上舍克篤題自適齋云詩文方
外史花鳥醉中身王國儒上舍翰臣憶源思云夜臺無
雁到孤塚有狐行馬源思進士澄西村梨花云雲邊回
燕子雪裏見人家曹幼旬上舍北山云穀苗沒犢深中
有人語細曹又魯上舍師彬郊行卽目云霜清雁背留
寒影風織谿冰作斷紋徐太拙振芳秋廬云月黑燐光

生古戍晝陰鬼語出秋墳將軍繫馬居人去燕子尋巢
地主非周保思秦生元宵卽事云酌酒人兼分肉會落
梅歌帶採茶聲曹燦垣上舍煜野望云小谿深淺白蘋
水茅屋高低黃葉村張卯君學博在辛濠上齋偶成云
谿壑易陰俚鬼喜江湖欲凍老蛟潛辛直方上舍敬儀
過小巷書所見云柳陰顧犢犂牛臥花徑分泥乳燕飛
馬三如孝廉長春哭源思弟云母老牀頭雙鬢皤侍兒
問病百回過季方不敢言長逝只道文園尙養疴去取
不苟彙集之有別裁者也

雍正間陳世修官遂昌教諭輯邑人之詩爲平昌詩鈔

中如王錫禹功句云鳥聲高枕得野色捲簾分毛以澳
瞻武句云谿聲隨過客鳥語破新晴項世溥資霑句云
臥聽蛙聲知水旱坐看鐙燄卜陰晴毛桓克生句云石
壇曬稻乘朝日竹筧通泉帶宿雲皆晚唐一派也克生
宿田家云谿西花放夾谿東夜叩柴扉對野翁雞黍席
中桑海語一鉤落月下青楓非無意人世事者殆亦東
甌之遺老乎

樂清梁祉字介繁有池上編其李斯一首云李斯未焚
書黨塾已塵埃爲治師申韓六經安在哉黃犬何足惜
儒術良可哀斯文當廢興所係非人才商山綺里輩采

芝去不來獨有濟南生
隱居誦餘灰一代無幾人氣數
實難回秦雖能賤士士亦自爲媒
議論到地趙二酉教
授君宋送崔五竺之茗谿云君訪烟波舊釣徒
冷齋尊
酒夜頻呼十年新出三都賦半笈長攜五岳圖
春雨乍
看苔劒合秋陰行送箬帆孤匡廬應得王宏祖
回首茗
谿雁有無仙居張明焜字木生重游憩雲亭云攜壺重
赴碧山堂好客從來數鄭莊看竹再摩今日眼聽歌猶
斷昔年腸沿谿紅葉矜秋色隔隴元猿怨夜霜漫道亂
餘殊慘澹黃花偏引縷衣香天台胡作肅字恭士遣悶
云經時未理出城游長雨闌風水閣頭生也有涯無奈

病悲哉爲氣不勝秋閒憑曲檻看歸鷺倦倚繩牀駭門
牛已是題糕佳節過倩誰高處共登樓太平戚鳴鳳字
啟周戚讎泉之祖方正學先生祠云逐燕翻教啄禁門焚蛇
不信有冤魂八忠先後光鄉里十族親疏報國恩到底
周公謀不利可將晁錯事輕論秋風浙瀝祠前樹葉葉
清霜變血痕皆浙東詩之佳者

景翩翩者隸建昌樂籍能詩有妾非吳中人好學吳儂
語之句邑富家兒強委禽焉未數月憤鬱死墓在谿東
江月亭側趙文昇有弔翩翩墓詩文昇官建寧學博有句
云孤燭客來閒說鬼一官廡下類司香

潛江劉阮山閣學肇國句云西風吹箬笠披雨上歸舟
朱悔人載震句云渡口桃花艇谿頭竹葉旗桃源闕潛
菴知事士登句云時訂腰領賤文厄羽林尊天門闕雙
石允命句云秋鐙出戶窺牆隙野水如人荅岸聲黃岡
萬考叔引年淇縣晚行云僕立鐙前猶帶夢馬諳行色
慣求鞍孝感程風樵正異句云貧來菰米全充釜病裏
醫書半在牀黃岡林果存之華平湖野望云烏鵲顧巢
棲樹早牛羊戀草下山遲右皆見廖元度所輯楚風補
零珪斷璧多可誦者

雍正間先後闢青海地千餘里改西寧衛爲府設青海

辦事大臣番族歸附置大通衛秀水徐楮山丙午紀事
二首云朔方禹版畫雍州天設秦關扼上游統萬城含
沙月白赫連臺壓海風秋七襄織錦輸江右萬騎黃金
出帝邱痛哭敢陳三表策儒生須識大官憂石隙乾坤
帝制雄蟠江丹嶂截飛虹貔貅豈料從天下螻蟻焉能
鬥穴中五郡牙璋新禹貢千盤巖壑舊蠶叢於今海寓
車書合青幕非邀一戰功此詠岳襄勤征土番時事

岳襄勤感懷詩云北海未通中使節南冠不插上公貂
此得罪削爵被逮時作也公以康熙季年從征西藏由
副將遷四川提督雍正二年平青海授三等公賜黃帶

是役以五千兵於十五日內降台吉三禽台吉十有五
三年總督川陝五年準噶爾叛拜西路寧遠大將軍九
年召入覲問機宜交印於提督紀成斌十年二月賊伺
公行入劫馬廠初紀命副參領查廩領卒萬人驅牧駝
馬查廩蒐縮畏邊地寒因以五十人付偏裨放牧而已
率眾避山谷間日置酒高會爲樂馬駝被虜廩聞報先
棄軍去過總兵曹勳壘曹卞急率兵往救爲所敗總兵
樊廷追之轉戰七晝夜始卻紀收廩將斬之公至知廩
宗戚多解其縛委罪於曹斬以徇而以捷聞乃廩恨次
骨會查郎阿巡邊故廩戚也廩因控公矯敗爲功諸狀

查故怒公因發其事遂置紀於法禡公爵廷議復當公
失機置詔獄公有句云長短夢還憑蜨意陰晴天欲任
鳩呼蓋雖以

世宗之明君臣之契恩威之不可測者猶如此當紀之
告公以故也公驚曰君今族矣滿人爲國舊人吾儕豈
可與之相挖以干其怒耶竟卒以此被讒爲禍嘯亭主
人紀其事甚詳亦深慨持國柄者之不可不省也乾隆
二年赦歸築室百花潭北其山居詩所謂小築山居傍
綠谿百花潭北少城西者也閒居十二年而有大金川
征勦之役十四年班師陛見復公爵賜號威信

高宗御製詩賜之曰劍佩歸來鬢鑠翁番巢單騎志何
雄功成淮蔡無慙李翼奮澠池不獨馮早建奇勳能致
勇重頒上爵特褒忠西南保障資猷略前席敷陳每日
中

徐沛皇閣學通介堂詩稿如賦得春水滿四澤隴麥蒸
和御製元韻山莊四季賦得靜裏清聲別舟中觀獵六
里橋鐵柱諸篇皆

聖祖時應制所作雍正元年爲濟寧道僉事道經嶧縣
澗頭集集西南半里許有泉河爲臺莊赴徐州必由之
道常時涓淺行者可布武而過故無橋梁然霖潦時降

黃邱庫山羊蹄羯子諸山之水並發交滙往來者阻絕
兩涯歲以爲病沛皇首出俸錢建橋跨泉河東西成於
二年八月名之曰澗頭橋土人別署一碑大書曰徐公
橋其後橋壞不修乾隆壬辰孫績出撫山左屬嶧縣令
庀材鳩工明年落成土人又別樹一碑曰公孫橋王宋
賢舊游沛皇之門爲作公孫橋記績乾隆丁卯舉人重
與鹿鳴宴

杜雲川告養歸里爲詩壇主盟雍正癸卯五月三日集
虎邱澹香樓而吳興沈綸翁適至於是長洲沈塙士彭
翰文程筠軒徐龍友朱恭季丁垣升張蓀九韓祖藝程

南溟陸學起陸雲仲陸峩鴻何子未王越南夏葭湄金
次山金象巖胡崑麓番禺方冀朔方東華常熟汪西京
吳江李酣芸王載揚歸安沈葆之慈谿沈景韓沈左泉
錢塘張繼青無錫華子山邵移山華紀常魏甸才吳商
霖杜石渠顧游園開士松泉一時並集各賦五言近體
二首而無錫馬碧滄不及赴因約友訪雲川於虎邱亦
賦二律其明年金次山校定付梓曰澹香新詠漪園名
羽泉字萃愚工書畫是集作云茲樓同燕賞何似永和
時一雨清湍激曾雲老樹欹坐深應有悟香澹最宜詩
夢筆人猶在青山短簿祠風流推二老諸子復詩豪異

日知誰健名山不在高一尊先竹醉五字和松濤記取
端陽近分牋續楚騷

華亭陳基字宗頊官蕭縣訓導其十峰集皆集赤壁賦
中字詞賦詩歌書論銘贊各體俱備陳文簡集聖教序
中字爲之序景蘇閣集則集東坡句爲之四庫八存目
朱廷樟與黃唐堂游有西湖集唐百詠如金沙港云津
流脈脈斜水溜滴金沙一徑入谿色千林發杏花巖廊
初建刹鎧火是誰家延頸遙天末潮迴動海霞十八澗
云孤棹復南行烟霞斷處生回看巖子瀨稍背越王城
谷靜惟松響山空有鳥聲梅花猶帶雪欲寄一枝榮驅

策運用渾若天成亦香屑集之亞也

金華葉更生永堪謂詩家作近體惟拈五七言至六言則鮮及者卽有之亦多昧其所自始其源蓋出于謫仙怨云唐元宗時安祿山反車駕幸蜀次馬嵬六軍不進賜楊貴妃死及行次駱谷上曰倉皇出狩未辭宗廟此山高望見秦川吾今遙辭陵廟因下馬東向再拜嗚咽曰吾用九齡言不至此命中使往韶州以太牢祭之遂索笛吹曲有司旋錄成譜駕至成都乃進此譜請曲名曰吾因思九齡亦別有意可云爲謫仙怨所云別有意指馬嵬之事也有人自西川傳得者無由知但呼爲劍

南神曲云大厯中江南人盛爲此曲隨州刺史劉長卿
左遷睦州司馬遂撰其詞意以自寓詞曰晴川落日初
低惆悵孤舟解攜鳥去平蕪遠近人隨流水東西白雲
千里萬里明月前谿後谿獨悵長沙謫去江潭春草萋
萋後竇宏餘讀之謂與本事意興不同更撰一詞曰邊
塵犯闕衝關金輅提攜玉顏雲雨此時消散君王何日
歸還傷心朝恨暮恨回首千山萬山獨望天邊初月蛾
眉猶在彎彎則又專指馬嵬竟不及韶州矣惟宋康駢
作云晴山礙日橫天綠疊君王馬前鑿輅西巡蜀國龍
顏東望秦川曲江魂斷芳草如子愁凝暮烟長蘧此時

吹罷何言獨爲嬋娟其詞與吹簫本懷庶兩全無憾爰
次各家韻成三章意仍本事其一曰中原回首雲低不
予荒郊共攜極望長安在下遙看玉壘橫西忠魂未銷
碧血芳魄早委寒谿最是淋鈴一曲傷心百草萋萋其
二曰櫓槍衝破潼關頓令六軍解顏金鑑當年何在玉
鈿何日來還疾風方知勁草遠黛遙憶春山長簫一聲
起處卻看新月彎彎其三曰風塵此日彌天惆悵三軍
不前鑿響雨淋駱谷簫吹月滿秦川英靈爲河爲嶽窈
窕疑霧疑烟今夕難忘哀怨衷情訴與嬋娟攷訂精核
三詩亦復溫雅可誦

陳朝階壽安孟公句云字裏洛神王子敬畫中天姥李
青蓮孟公名璿工書畫有句云風聲危老屋雪意冷空
山

劉文煊字紫仙號雪柯山陰諸生工詩畫年登大臺神
明不衰夏晚行村落閒云密雲雨未成夕陰涼尙淺荷
篠人獨歸緣花路幾轉鳴雞上樹宿耕牛就松飯客子
趣驅車斜陽望中遠錢仲文之流派也

無錫俞爻心學博雜題云杜律深嚴要細論北征長調
短羌村近來愛拾滄浪唾多入羚羊挂角門趙州八十
還行腳古德從無杜撰禪我與漁洋宗派別勸人多費

草鞋錢水著波紋山著皴工夫熟後自通神入門便學
町畦化到底何曾邱壑真此詩家本行經也學者不可
不知此意其詩如遂初堂云飢肉寒裘寂處朋耽書到
此癖堪稱只應文選兒都熟誰料鈔胥婢亦能祕簡千
堆灰野火宸章兩字哭崇陵遺編賸有誠齋序讀罷空
教慨歎增尤文簡藏書至多嘗燼於火誠齋遂初堂書
目序云延之於書靡不觀觀書靡不記每公退則閉戶
謝客日記手抄若干古書其子弟及諸女亦抄書一日
謂予曰吾所抄書今若干卷將彙而目之飢讀之以當
肉寒讀之以當裘孤寂而讀之以當友朋幽憂而讀之

以當金石琴瑟也遂初堂者取孫賦以自號光宗書扁
賜之貴池在蕭梁時爲昭明太子封邑廟有文選閣淳
熙中文簡在貴池倉使取善注讎校鋟木寘之學官厥
後單行之本咸從之出嘉慶中胡克家得尤槧重刻之
並爲考異十卷

柯南陔爲素培給諫聳之孫聿修上舍宏本子寓匏翰
周兩徵君從子嘗受業於竹垞之門康熙辛丑登第以
磨勘黜落雍正癸卯復成進士官衢州教授鴻詞詔下
爲方侍郎所舉未試卒詩歌駢體無不工楊崑木編修
招諸公興勝寺看杏花云銅街白日塵漲天當春不見

花便娟筠籃攜出數枝豔有買便欲傾囊錢畫盆髹几
少位置油窗誰伴高人眠朝隨諸公簇鞍馬郊坰小隊
穿雲烟問途詰曲不數里已覺耳目祛喧闐遙尋鐘聲
識古寺瘦僧如腊來導前房房青豆入幽邃中有十畝
開花田百株濃杏帶風露天與標格非朱鉛誤疑維摩
十笏地散花滿穢驚高禪不然化人出光相空濛下罩
兜羅縣心知開落一彈指聊擺俗累窮歡妍行廚彷彿
柁樓底小亭半檣耶谿船諸公戲謔無不有回眸一笑
花嫣然更臨高閣送落日西山恰在青松顛不離京輦
得此境何爲塵土來無緣朝來李花尙含蕊玉膚向晚

俄芳鮮化工翦刻有底意豈與詩客爭雕鐫僧言地僻
得花性以時灌溉勞機泉臨行珍重戒攀折上馬欲去
空遷延今宵安穩化胡蝶夢魂栩栩香林邊不減金風
亭長柳巷杏花及一峰草堂看花之作篋中詞列南陔
於竹垞之前殊爲失次

雍正初元興縣孫文定公以編修上言三事曰親骨肉
停捐納罷西兵有直言極諫之論

高宗卽位上三習一弊疏厥後嘉慶道光咸豐

列聖登極臣僚皆抄此疏進呈乾隆二年總理國子監
事奏倣安定經義治事一齋法分條教授河南鄭州有

疑獄審理得其冤狀三年出督直隸時酒禁嚴在朝時
已力言飲食細故不可以法齊利之所在不可以厲禁
至是查觸禁未結之案五百七十有奇乃上言禁酒以
利民生今民未得利而犯禁已如是之多一省如此他
省亦然以日用飲食之故而令天下騷然非盛治所宜
疏上卽弛其禁晉州小兒被殺村民紀懷讓食料豆染
衣偵者以爲血色具獄繫十餘年奏請覆審冤得以白
移鎮湖廣以謝濟世事罷官十四年召入尙書房嘗從
容言朱子詩集傳過矯呂氏之說於鄭風悉指爲淫奔
微有可議遂著詩經補注日進講義一章次及易傳癸

西十二月卒年七十有一錢穉石輓以詩云極諫先皇
納平生主上知早刪三傳例眞作六堂師燕楚旬宣歷
公忠出入爲豈徒寬酒禁冤獄賴頻治再召書房直霜
鬢政府參禁中行馬勒殿上積經函廢寢名如累刊碑
典旣覃復河應格議疾薦尙咕喃當疾革時適盧魯生
假公名作奏稿指斥乘輿播遠近直省窮治罪人斯得
於公一無所問而公自訟甚力謂其子孝愉曰聖明灼
知於老臣無與然比來食不甘寢不暝所以然者以
先帝 今上嘗戒我好名卽不好名彼何獨假我名以
是歎君之明而生平好名之累未盡有以致之也三傳

句謂其在翰林日讀春秋患四傳互異專精經文著春
秋義一書已版行蒙

世宗訓飭悔曰吾學無真得奈何妄測聖經遂并所著
詩刪南華通一切毀之也

崑山蔡確文舟從何義門游而私淑亭林以歲貢官舍
山訓導無衙舍寄孳環峰書院書院祀宋儒游定夫聚
諸生講學者五年以年老告歸留別詩云晚歲羈微祿
婆娑鬢雪深長貧甘吏隱多病忝官箴鄉夢榮臯座朋
簪謝泮林遙知故園月千里照歸心憶昨辭三徑攜家
上一船悲銜毛義檄坐久鄭虔氈講肆棲公廨香燈侍

昔賢那堪筮仕日已是乞休年歸六年卒年八十一王述菴其受業弟子爲撰墓志

邵兼山孝廉眞州別蔣湘帆云春水方生君又去此江東下我西迴湘帆從楊可師學書有游藝祕錄詩亦不俗別友云欲雪不雪寒凝烟欲行不行心茫然此時與子思盡醉他日憶我徒相憐春來江草綠如織只恐離愁又隔年漢石經相傳爲中郎一手書開成本不著書人姓氏其詳校審定各官有鄭覃韓泉輩多人爲之書者可知矣雍正五年湘帆年五十六因王虛舟吏部之言矢志寫十三經屏除世慮五年而左傳成又二年禮

記成其書左傳初在家卒業於曲阜書禮記在山左書
尙書在錫山餘皆在邗江之瓊花觀共八十餘萬言凡
十二年而就實乾隆三年戊午馬日璐裝潢高文定公
疏呈御覽盧抱孫揚州雜詩江南老拙舊風流十載著
釐一硯秋石室他年傳御榻游人爭上寫經樓江南拙
老人湘帆自號也後五十年重刊石經出之內府是正
上石樹太學以御製說經之文冠於首錄其孫和爲學
正和字仲叔亦能書善人物及寫照

磁州楊鶴巢徵君方晁錄磁人詩十卷自唐迄 本朝
作者八十餘人各繫事蹟出處自作如秋日村居病起

云小浦蘆花白荒園柿葉紅草堂新病起倚杖數歸鴻
頗近放翁

句容李東懷兆山北平使院三松歌云松關茅屋江水
東欲去不去淹春冬輜軒太史香案吏後車載我旋提
封灤灤襟帶雄三輔南臺孤竹高龍從城闔官舍三古
松翠虬揚鬣鹿養茸令支邱墟燕國故不知何代長此
青蘿蔥此行詰曲隴阪惡草木摧落山皆童桃榭李萼
不可見驚沙極目迷荒埔西齋坐久羣動息唯聞謾謾
來天風人生不如丁令鶴又不能爲葛陂龍征輪蓬轉
敝裘裂側身旅食天涯蹤大枝擁腫小拳曲頗遭詬厲

同非同儻尊青黃誇世用吐萼飛韶紛白紅平鱗剗甲
吁可惜霜淒雪虐時有窮此松敷榮欣得地交柯摩戛
相錚鏦飽經歲月天使獨斧斤不到神靈鍾古根盤薄
化爲石苔盤蘚剝辭磨礪我從燕南歷邊塞新月已見
三彎弓青山萬疊蔽歸路獨撫老物舒心胸婆娑清影
吟不寂素壁先見鏗鯨鐘此客錢香樹尙書學幕時作
文端見而歎賞因和其韻小詩如寒食後二日雨云野
棠落處水平隄一徑嫣香冷燕泥又是晚鐘花外動殷
雷時雨過橋西極饒風韻

山陰胡國楷鏡舫爲周漁璜門下士自粵東高明令入

爲郎居禮部者幾二十年乾隆戊辰奉命出守中州復有回部之命維感詩有一封啟事殊推轂兩角生輪便止車之句其尊德堂詩鈔爲穉威徵君所選定其選例謂昔梅都官詩數千篇六一居士爲選定六百首梅詩之英華傑構皆在焉當時稱佳本後世編聖俞集始取其餘雜入之今所傳且六十卷而瑕瑜乃相錯矣大抵古人集不論詩文並以簡嚴矜慎不務求多貴在可傳而已今此所選亦從六一之例云云世之泛愛廣取者當味此言

雍正甲辰嚴海珊會試不第越七日由恩榜中式有彭

衙分拜三年賜絳縣爭傳七日蘇之句其和薛天濤詠
南唐後主詩紗帽織裳盡室行回頭不見打標兵麝囊
花下愁如許金錯刀中讖已成漏語誰防徐騎省停歌
劇憶李家明一江嗚咽春流水寫盡空宮梵唄聲再和
云番歌一去更誰聽天寶遺音滿後庭烟氣暗生嬰玉
鼎葦光深覆阜羅屏只嫌搗雪無仙爪不信量絲有釣
舫昨夜柔儀殿名鐘漏永秋風簾押振金鈴温雅可誦其
昆陽城望光武軍戰處云陣壓如山一面當不勞突騎
佐漁陽兵因數少翻騰趙帝尙年輕易奮揚計定入關
除莽亂功成踰月哭兒喪艱危卒就中興業此是開基

大戰場尸填滿野水流丹雷鼓從天怒上干項羽不能
誇鉅鹿王郎多事起邯鄲尙尊讖緯誣周禮旋睹威儀
復漢官從此執金吾不羨遷都終合建長安興亡事異
氣象正自不同海珊薄宦浮沈曾無生業穎士窮來惟
餘舊僕樂天老去慘別歌姬官終嵩明知州嘗言我官
爲詩誤耳萬柘坡寄海珊望都句云州郡勞人句轉清
長城詩將得專城烏程董文白景州旅次與海珊夜話
云不妨醉我如長夜偏是吟人少達官其清明登城句
云詩酒黃墟知己淚天涯芳草倦游心則得海珊凶問
後一日作也

查儉堂原名學禮字魯存年窠墨注歌云國朝陶器美
無匹邇來年窠稱第一不讓汝定官哥均何況永樂之
坯宣德質卽此墨注如玉壺下廣上弁豐而虛置之几
席斑管俱隳糜一斗可以擘窠書清光淡淡照硯北云
是雨過天青古時色神螭躩踞繞其柄鐵足周遭黝如
墨下有小篆曲彖文觀者從此辨僞眞君不見右軍臨
池池水黑至今猶浸越山濕我欲從之挹殘汁沈錫讀
書鐙歌云循初來自由拳城袖中貽我長明鐙方如方
壺淨如雪垂領如舟亦如舌南油中注無贏餘夜夜玉
蟲燒不竭我聞敬器半則平過分以外多覆傾茲鐙何

能獨持滿汪汪千頃含澄清亦聞鴟夷以酒進宛轉灌
輸流不盡茲鐙何無灌輸勞爝火終宵有留燼由拳巧
藝天下稀茲鐙規制尤神奇況是東陽裔孫作錫經百
鍊瑩鷓鴣由拳當年藝第一朱氏銀工楊氏漆枯槎杯
筭勢連蜷鎗金盤匱繪織悉千百流傳一二無錫工惟
賸黃家壺紛紛土物各寶貴聲價不減張銅鑪後來之
秀沈爲最擬並前賢跨儕輩雁足無光鳳脰殘書臺惟
爾堪長對歌成街鼓報三更簾底疏烟一穗青卻憶辛
勤車武子宵深何處拾流螢年窳沈錫可作一佳對其
新釀棗香露初熟獨酌句云試他東老新傳法忘卻西

鄰舊撲竿亦佳魯存與其兄心穀喜賓客主其家者山
陰劉文煊紫仙胡睿烈文錫仁和吳廷華中林錢塘汪
西沆顥陳皋江皋秀水萬光泰循初合數年晨夕往還
之作各成一卷名曰沾上題襟集

錢唐任處泉太守應烈出守懷慶所屬孟縣爲昌黎故
里其子孫向無博士因創議上大吏請于朝遂著爲令
自南陽歸買宅山陰卽陸務觀快閣遺址也其移居快
閣句云疊石略存山意思蒔花聊破睡工夫烟際呼將
能語鴨莎邊畜得換書鷺

東山都統柰曼久戍邊庭句如亂山迷去徑野渡阻流

沙斷橋銜落照枯樹倚寒烟
遶屋泉聲細當窗樹影凋
多荒戍閒行孤城遠望之作
龍沙萬里時夢趨朝楫拙
一鐙獨存夜氣王子赴軍營
作云爲嫌兒女態一笑據
征鞍送別都統佟公云異域
難爲別臨風更舉杯可以
見其意氣

常裕德淵滿洲布衣有綠雲堂詩
稟鐵笛巖云鐵笛山人喚鶴歸
白雲深處掩柴扉春和巖畔苔
痕輒坐倚蒼松補衲衣

和闐春夏常多風霧至秋後始晴
朗冬日和暖過於內地無井回人
咸荷葫蘆取水於池鄂怡雲司空
和闐吟

云卻喜桑麻地經年無客過大都春雨少惟有夏雲多
秋日光偏潔冬時氣亦和葫蘆爭取水來往汲清波其
和闐四景詩序謂使署東軒下有平湖數頃惜其水淺
鑿而深之沿湖種柳三百株越一載甚茂鶯黃鴨綠秀
色襲人黃鳥頗多夏日羣集移牀坐聽泠然清耳使署
之東二里許萬木青翠一望無際春夏多霧八月後始
清朗可觀南山不高其上積雪盛暑不消四時常籠烟
霧相隔數十里非甚晴明不得見至冬積雪望之如銀
河倒挂亦佳景也

雍正丙午江西考官查嗣庭獲罪諭停浙江人鄉會試

至己酉復舉行典試者爲任香谷王次山庚戌科浙人

加倍中式是榜一甲三名皆浙人

錢唐周霽西坪秀水沈昌宇泰初錢唐梁

文莊西坪修撰舉大魁年四十有七矣時方苦旱唱名

得霽

世宗甚悅承問云朕似曾見過汝對曰臣今日初覲天

顏其及第口占句云顧名恰喜爲霖協議面還疑省象

真督學陝西吏有妄希夤緣者私諷家奴西坪於覆試

諸生日設資盃公案上注水滿之令其人捧而擲諸堂

下其人愕然西坪曰爾惜之乎爾身之弗惜而惜此區

區者乎卒使擲之復謂曰一經敗壞能復全乎吾與爾

猶是也忘身徇賄直鳩酒止渴耳其人免冠謝涕泣悔
罪遂宥之蓋懲儆而曲全之如此

錢坤一詩聖世拙無用枯腸出騷遺祇恐過樊榭終爲
來者知爲金壽門作也律句野水多于屋荒苔不見人
松子向人落山光滿屋寒鳥時來石案苔欲上山楹佛
煙聚處疑成塿林雨吹來半雜花丁硯林詩魚意不嫌
客鳥言如在村晴磬韻尤妙秋蟲語不煩俱有琴趣壽門

歿于揚州三竺菴乙酉九月歸葬于臨平黃鶴山

西京雜記漢廣川王好掘冢墓周哀王冢石牀上有帳
構銅一具無餘異物惟鐵鏡數百枚南史崔祖思傳劉

備取帳構銅鑄錢充國用此物之製由來舊矣邗上方
西疇藏魏景初帳構銅狀圓如筩徑一寸長四寸許中
空而底方旁出歧枝枝有孔上有字云景初元年五月
十日中尙方造長一丈廣六尺澤漆平坐帳上廣構銅
重二斤十兩凡三十二字分書樊榭詩云霸城夜照仙
人淚不逐魏宮翁仲二銅駝久作劫灰飛帳構猶存景
初字洛靈兒愛芳林好奪得蛾眉供灑掃弭張想像薄
羅風傳與千年尙方造流蘇翠羽光零亂土上出金妖
讖換文成石馬大討曹水吐玉蜍纔效漢碧筒平坐朱
竿密八分應認仲將筆摩挲彷彿陵雲臺小掛波痕勁

無匹更聞昭烈能自貶御用都歸銷鉛燄一枚古色出
重緘留向人間鑑奢儉敬身詩云魏宮帳暖春雲熱挈
壺謾報銅龍咽巧笑長蛾緝父風悼后至今沈恨血淒
涼往事逐颺風忽睹千秋帳構銅景初換朔希殷正土
德黃矜見處龍摩挲銘文三十二格澤朱竿知舊製蠅
頭小字密于蠶筆縱疑擅邯鄲勢漳水衝洪日夜哀曹
家陵寢久蒿萊哀王家破亦見此云伴團團鐵照子
拜都文勤公永貴趙橫山副憲門下士也文勤初撫浙
詣辭問曰此去政將奚先曰劾貪笑曰貪吏贓入已者
不必劾也文勤愕然曰贓入已而不分潤上官上官早

劾之不待君也今之巧宦全取諸民而半致之上或且全致之以貢媚而營私上下固結牢不可破譬如獲盜胥篋百萬有所恃焉則無敢蹤跡之其所禽者皆竊鈇攘雞輩耳文勤再拜曰微先生無能言及此也橫山工書在詞館日與陳紫瀾李玉洲諸襄七名望相埒以養歸杭歿時慈親健在杭大宗有輓詩

安邱孫立菴自務次郭虞受壁閒詩韻云結屋無垣圍斫取枯枝繞枝疏多罅漏透出青山小卻見山上人牽牛過樹杪傍晚步谿橋爲愛谿橋月月明忽已沈幽人賞未歇流水與誰競靜夜聲泱泱寫村居之景夷然曠

然非假王孟詩可比

高文良過衛輝舊居云童稚曾來似夢游遲遲跋馬重
回頭門前綠長新垂柳花外春深舊小樓客自有情生
白髮天應無力禁閒愁太行千里斜陽影又送行人過
衛州舒雲亭留別竹田云莫向風前折柳枝柔條原不
縮相思人生難得惟知己天下傷心是別離半載篝燈
同聽雨何年把酒更論詩西冷夜夜添新夢多在煙江
月上時偶占云芳草青青送馬蹄垂楊深處畫樓西流
鶯自惜春光去銜住飛花不忍啼託師健自述云山疊
谿迴石徑斜芳林深處偶爲家閒中靜掃庭前地打點

春歸看落花恆月山南西門外卽目云激潭初月影微
微雨過涼生透葛衣十里亂蟬風兩岸藕花香送釣船
歸均自然湊泊不假雕飾

金司農瘦馬云古戰場邊數箭瘢西風老馬憶桑乾而
今衰草斜陽裏只作牛羊一例看姚念慈看劍云齊金
楚鐵擅名高碧血模糊舊戰袍不躍不鳴兼不化問渠
何處異鉛刀寄慨之意略同

明上海陸文裕公深以翰林忤劉瑾改南京刑部主事
瑾誅復官又爲閣臣所忌左遷晉祭酒乞歸陸耳山爲
文裕裔孫有嘉靖經筵所賜宮扇藏于家姚念慈爲賦

宮扇歌云寒蟾出海大如斗訪舊城西夜攜手示我聯
吟宮扇詩知是君家先祭酒祭酒承明著作身蓬萊仙
闕正垂紳錦袍意氣凌中貴丹陛封章忤輔臣論謫江
湖年未晏彤雲重捧通明殿抗議初聞太學留受釐終
召長沙見天子談經御講筵侍臣執爵陪宸宴攜得狻
猊鼎內香賜來蟬雀宮中扇幾回青鎖動尤輝垂暮滄
江猶眷戀世廟修真禮太清齋壇習習好風生貢隨宰
相青詞進頽向昭容紫袖擎同時張永興李嘉興蒙君澤綺
囊綵索分顏色仰伊佳製本非輕賚出朝廷傳史冊奇
珍多自上方來散落旋爲市人得僂指興衰二百年永

陵弓劍闕重泉金甌久歎多殘缺紈扇安知不棄捐秋
聲易啟春華歇往跡迷離向誰說戚畹鈿居久寂寥侯
門鐵券都磨滅獨有名家故物存展開方勸記殊恩應
時潛舉宜冬夏隔代芬芳到子孫舍人述德誇能賦先
公手澤生餘慕南岡甲第聽箏堂東晉衣冠麾扇渡便
面韶光玩折枝轉頭世事驚飛絮漫譏張敞少威儀會
遣袁宏慰黎庶篋笥休教委蠹蟬鬼神那得長呵護我
觀此扇重沾襟觸忤潯陽臥病心千里黃塵遮庾亮三
條紫陌避楊情含情宣武門邊望槐閣雲屏何處尋

丙辰詞科念慈卷已擬進呈因詩塗十餘字被落其南

歸留別有句云紙上忽疑蠅點壁天邊愁殺鼠拖腸三
試人憐韓吏部數奇我似李將軍嘗病噎日惟淡粥一
孟馬子良精醫理謂其積病已深不亟治將有不可知
者因有或者生天差足樂直須埋我始忘憂憤懣極矣
嚴海珊贈詩才華見許盧思道規矩難繩禰正平其人
可想

昔人以皴瘦透品石惟詩亦然兼之者其胡雲持乎五
律如夜坐簡任編修云月牖生虛白風簾別與清鞞琴
幽竹影寄石遠泉聲幔拂煎香駐迴廊著字明夜良人
意會遙共范安成石堂雨夜云盡夜越山雨石堂孤影

看溼螢沾碧動妖鳥落鐙寒短褐卻秋苦遠鐘追夢殘
所憂秔稻熟一岸阻瀾漫贈李山人捷云人將秋共瘦
詩更瘦于人本愛山爲命惟餘鶴是鄰天教膏藥徧僧
與製衣新他日長江簿多應想後身聞爰云一夕聞爰
處寒山落葉舟清疑永無寐啼得不成秋翠壁秋終裂
孤鐙覺坐收竟知腸斷未翻爲暫淹留野燒云越山經
野燒風俗似巴人小劫兒童火他時草木春雲昏含岫
晚土黑破崖新柔櫓滄波上翻憐照影頻法隨意轉不
得以僻澀相譏七律如送侯嘉璠云四十青衫走縣門
摧積偏怪氣如雲眾中落筆追袁虎天下工詩稱竇羣

棄置丈夫安足道近時公論總稀聞吉州司戶長江簿
郡內憑誰作使君府中早起示吳郎云博山香重暗承
塵畫裏風微淨綺裯霜鶴幾開孤月口木蘭原是此花
身寒窺裘典仍欺客夢怕鐘催不戀人無事殷勤佐公
府細吟芳質與吳均重宿法相寺云碧谿藏寺寺藏烟
安隱人閒第四禪巧入晚風雲外磬不分秋雨夜深泉
種松僧老猿同瘦看竹人稀石自眠閒拂舊題尋短李
蘇荒煤暗幾經年是眞能以性情爲精神以學問爲學
尹者其小詩亦時有疏放之致相林云正著新寒換小
春早梅無處尙相尋騎牛禹廟空山路萬點依稀入相

林晉陵寒食云東風寒食未飛花已報春洲上蔣芽一
夜江潮輕帶雨河豚先到野人家不獨隨園所稱曉行
一絕也

范電文司空璨秀水人居南潯甲辰庶常未散館以人
才薦改大興令縣故有隱糧一案白京兆發之藩司不
悅以他事被誣去任在廷有白其冤者

世宗追思怡賢王嘗稱其能特擢河南鄧州知州王次
山詩三年輦下聽歌謳直節清聲到處留太息賢王勤
薦士重逢恩命畀名州陞萊州安慶江寧等府副使廬
鳳歷江南直隸布政使自湖北移撫安徽入參臺憲晉

佐司空乾隆辛巳文武廷臣及予告在籍年七十以上者各九人賜遊香山製九老詩以寵之電文自丙寅致仕至是與焉賜松岩樂志額因以松岩爲號丙戌卒年八十七

索綽絡富寧東谿永寧東村弟兄偕隱以先世負官物輸財旣盡待罪所司廢錮十年終無一言及諸弟世承勳貴至東谿始以文學舉雍正甲辰順天鄉額會試兩被薦終不得第有別墅在都城東二十里高阜長楊引連官道松編翠幕瓜種青門有郊居六詠曰修室築垣堆山掘池開圃引水與弟承謨顯菴亭外藝蔬池邊得

句其雨後至東園詩云雙輪未惜蹇層泥草隴煙茅晚
更迷遙指前村疑隔岸驚看舊路忽成谿殘霞紅漾綃
紋淺遠岫青排黛影齊慙愧定居無定著往來空自歎
栖栖方恪敏在都嘗寓東谿軒中尊前設醴雪後分甌
客院三年多所倡和恪敏南歸宴餞別墅殷殷訂後約
恪敏指席前所見曰此花復芳當共賞耳轉徙關河遂
負宿諾東谿因卽其地構小亭顏曰問芳作詩十章寄
之宜田彙稿多別後相憶之作丁未夏東谿卒恪敏至
冬始聞信其哭石東谿詩云風吹江上舊魂來夢裏分
攜曉雁哀已到相思成死別重教淚眼把書開秋墳幾

日生新草梁月何心照夜臺回首交游京洛地寸心淒
折欲成灰依依郊墅引長楊駐馬曾爲罄別觴顧我衣
風吹敗葉看君淚眼落崇岡因尋歧路憐芳草遂有孤
亭倚夕陽望遠深情頻問遠幾回書札最難忘秋雨城
南句可憐江湖別恨幾新篇題來一卷書同寄望去干
山淚暗懸遠爾音沈生死夢翻成識盡合離緣平生好
我吟情在乍忍尋聲楚些邊平生志業總蹉跎銅柱家
聲馬伏波久被明珠讒薏苡寧辭巨棟委巖阿一鳴共
信名終貴再獻誰知泣更多絳帳不褰陵草冷致身儒
術竟如何天遠難教壽爾躬幾年未契飲高風承家事

已同楊侃爭死心常義孔融鼎沸驚波成閱世冷吟狂
醉當書空何人一輩知名姓賈誼無官紀大中湛湛江
流淼逝波心傷宿草更如何天涯賸轉孤篷在薊北應
無舊雁過此日招魂誰作賦當時擊筑共聞歌素車白
馬重來路想到悲風易水多其長子潤郎十歲學恪敏
書波磔宛然十四能文章貌神似東谿以墮井死恪敏
哭以二十韻有云季父撫諸孤眞聞夜十起人琴繼宿
呼慟天但疚悔塞井亦何爲此意同覆醢謂東村也
許子遜爲天玉從子錢宮聲編修中諧壻漁洋已丑荅
子遜書有不佞與尊叔令岳翁俱同年至交猶記慈仁

寺中偕天玉同賦雙松歌之語其尊人香谷名定升嘗
令禹城康熙乙未子遜應江西學使魚鸞翔聘敬亭光
祿及歸安沈芝岡懋華亦在幕中芝岡筠陽春興云青山
一髮黛煙低日午深林謝豹啼花事已非春夢曉更無
人識杜街西筠陽者筠山之陽楊誠齋詩所謂去歲衝
炎橫大江今年度暑臥筠陽也敬亭和云紫騮嘶入柳
陰低樓上紅妝正掩啼暗卜金錢聞細語雪衣傳出畫
廊西子遜和云罨畫谿雲作雨低夢回遙聽乳鳩啼陽
城枉怕春風笑一夜桃花放水西魚頗不飭敬亭嘗謂
子遜曰吾輩在此如以金鑲象牙箸攬廁中耳子遜南

游述懷句云同儕對之歎但惜白日藏頓令高興盡幾
欲還吳閭蓋寓此意子遜再食荔支戲吟斷句云丹荔
年年玉盃新鏡中眉黛半含顰可憐嶺外紅鸚鵡猶說
華清病齒人霜柑五載洞庭孤千里炎荒聽鷓鴣爲赴
仙人海中約海雲飛出絳羅襦雲煙冉冉帶羅浮澗齒
生香碧玉流含笑花開涼月上冰杵消息到釵頭亦與
敬亭芝岡同作也庚子入都應舉與芝岡同舟芝岡渡
江詩云路盡飛鳥外微茫一葉舟月斜江岸曉潮落海
門秋山色南朝寺鐘聲北固樓寄奴城畔草隱隱入邊
愁子遜和韻云鐵甕城邊路孤篷昨夜舟煙低瓜步月

波接洞庭秋一水明飛閣三山抱郡樓鄉心正無賴玉
篋莫吹愁是科並獲雋雍正丁未春闈榜後

世宗命搜遺卷取三十人保舉知縣教職子遜與焉時
司文選者爲陳榕門相國子遜掌華掌講席時弟子也
由之就選武平及期而罷空手歸子遜氣豪矜勝少時
嘗學峨眉槍法能盤馬彎弓擊劍欲稍繪有南山射虎
圖黃莘田題詩有歸來舐筆秋鐙下還是南窗射虎人
之句武平故與粵潮州之平遠接壤本以分水坳爲界
有謝氏者平遠豪族也強佔坳北山田指爲粵界公勘
則謝悉引族眾持利兵脅官爭數十年不決戊申三月

子遜奉諭會勘謝姓一人長八尺餘挺身奮突子遜叱
擊之眾驚界遂定其望古吟云匹馬逍遙戰幾平聲拏大
帥旗至今傳姓氏能止夜啼兒蓋以自擬也應華掌之
聘在康熙辛丑高文良時撫粵西故相知蕪城感舊兩
絕爲文良所激賞故乾隆甲子廣陵雜詩有云心傷三
十年前句博得東山擁鼻吟文良督兩江子遜爲王樓
山中丞時爲十府糧道招至金陵文良時於廣座中吟其佳句
以詩商榷有當改定者子遜輒爲指彈曰我欲使公必
傳文良移撫江蘇復邀之下榻中秋大風雨後看月一
詩文良和作已見前集文良移節繼之者爲混同顧公

亦時至官舍辛酉樓山撫閩延主鰲峰其持論力主七
言古詩無通韻之說自謂得之沈方舟然稿中亦不盡
從按歐陽文忠讀張李二生文贈石先生一首仄韻已
亂用菱谿大石一首真文元先通用則七古通韻宋人
已多有之至謂魏以來流轉之調至于景龍諸子太白
岑李雖各開戶牖而體格未變自宋派行而此調不彈
久矣亦因宋以後多硬語盤空而欲復唐賢之音調解
谿尙書序其詩謂吳中詩祖宋祧唐幾於家致能而戶
務觀竹素大聲疾呼以排之沈光祿亦謂君從父竹隱
與阮亭同榜以詩名君胚胎家學而益精之具青蓮之

俊逸得右丞之古澹而工細則又入大歷諸家之室睡
棄宋人晚而益嚴可以見其宗法之所自矣

子遜竹素園詩七言絕句最饒神韻前集曾錄數首茲
復撮舉以資諷詠虔州雜詩云薄暮涼生白紵衣天南
人遠雁書稀空齋聽盡山中雨一榻鏡昏蝙蝠飛望青
山云零落牆東枳殼花風煙三月徧天涯空江日暮餘
霞散一髮青山小謝家湘中曲云洞庭南來湘水深望
湘亭邊斜日陰雲中帝子降何處瑟瑟猿啼楓樹林瀟
湘兩岸斷霜蕪千里征人望月孤忽聽湘靈鼓瑤瑟白
雲一夜漏蒼梧黃陵廟古曉煙蒼江水環流碧玉香流

到九疑山下路清湘先折九迴腸繫舟南浦弔湘娥斑
竹蕭蕭漾碧波一曲竹枝人不見月明空照淚痕多楚
澤靈均渺嗣音西風吹亂女嬃碓前山雲起感遲暮一
夕美人湘水心寒食途次云粵江水碧粵山低客路孤
舟日易西又對梨花作寒食滿天芳草鷓鴣啼翫月至
宵分云琵琶水調響潺潺聲入銀河縹緲閒一片清光
人萬里可能重聽念家山山風雲外墮天香回首瑤臺
枉斷腸明月有情應識我年年相見在它鄉嘗自言七
絕祇到中唐亦可謂得失寸心知者也

船廠爲我

朝發祥地合寧古塔白都納爲一鎮商賈

百工所輻輳無民牧歲遣滿漢官各一員巡視其地有
事會同寧古塔將軍治之方恪敏松花江行送趙奏功
給諫巡察稽林云稽林何地名何從古稱肅慎金黃龍
王畿直北三千里遼海嚴關復幾重開原以外無州縣
沙白雲黃迷遠傳大東首鎮控要荒鎮倚邊江作天塹
松花水瀉碧濤長混同北下天茫茫極邊更有諾尼水
南流亦到混同江混同橫接幢艫渡諾尼權泝松花路
三千犀甲重防羌歲歲樓船飭堅固廟廊本重籌邊計
玉斧牙旌盟帶礪一從專閩築三城坐使單于歸節制
健兒驅馬盡歸田井竈叢生闔闔煙鞭梢鹿子秋風獵

手底魚苗夜月筌長林遠嶺延江岸龍蛇氣吐青蒼亂
鴻濛窟宅毓珍奇芮鞠雲霞蒸燦爛江頭大木鬱千章
曾獻王家作棟梁萬牛力致九天上長楊五柞相輝煌
先朝更寶松花石琢成鳳尾同和璧拜賜簪毫侍從臣
歛洞端谿俱避席松花江江對面布塔年年採珠獻清
泥破霧有多名漁人偷識光如電松花江江遠脈寧古
臺山眞氣茁三極五葉紫團芝玉椀金漿好顏色川嶽
精英效 聖朝輿書包匭紀金遼敖登城倚藩籬近長
白山聯王氣遙黑水之間稱樂土漸聞韎韐修章甫韓
范寧勞百萬兵 帝簡清華憲文武雍正二年太倉王

狃天游以刑部主事巡視船廠摺陳機宜謂游民宜設有司繙清宜增缺員卡路兵丁宜撤八旗牛彘宜增減失察逃人宜分析牢獄宜嚴密糧船修造宜節省苦差宜給口糧凡十事強半如所議行兵民稱便當復命時擬面奏定例部員出差後不由堂上官引見至宮門奏事不爲通

世宗勤於政凡具摺跪門者奏事人立進御不敢刻緩天游於是繕摺具奏立召見詢何日到京以實對上大怒曰是已一月矣此必朕門上人不爲汝奏將呼重處天游曰臣知連日有大政事緩奏非傳事人故 聖

怒解乃曰汝摺朕已一一覽過嘉獎良久因問滿官某
安在卽令出召某進見知 秦陵闢門達聰其致治爲
有道矣天游號甘泉奉常時敏曾孫汲園先生摠孫耕
石比部旦復子也

沈子大光祿夷齊廟詩仁在無生死倫亡有是非十字
千古

宋章戴爲閩漕欲請劉後村爲屬旣而曰茅屋設鴟吻
乎遂止鮑辛浦送李經歷仙盤之任四川云鹽車看驥
屈茅屋借鴟榮

王箚林曾掌戶科以彈事左官吏部鮑辛浦贈箚林詩

視草猶存舊玉堂
神仙官職本良常
文章不信偏工蛻
字寶寧教獨瑞唐
岱夙標清士日
朝廷妙選吏曹郎
紫芝如豆供餐餌
七孔虛明夜有光
黃門封事著青蒲
殿上曾聞折檻呼
主聖能容臣諫直
心清白覺宦情孤
藤陰退食茶煙細
紙閣焚香墨妙俱
幾欲馬行頭弄笛
薑芽歛手媿皇芩

韓楸樹詩青幢紫蓋立
童童紫幢王孫命
軒之義取此
杜雲川爲賦紫幢軒
楸花詩其愛壻端亭
護衛得瀚海
金桃枝王孫用爲塵
柄傳玩坐客鮑西岡
絕句云天漢
流通瀚海遙金枝
塵柄刷金桃朱門
小物留佳話名並

青幢紫蓋高康熙己卯特命宗室應鄉試以後場用子
書語被放嘗受道籙自稱檜棲居士重葺枕柝軒爲賓
游談讌之地紀以一律邢卓齋下榻其閒爲作紫幢軒
詩話圖茶聲館品茶圖檜棲讀易圖趙村幽居圖北柴
大房山最勝人罕知之惟竹垞先生有題名記一篇紫
幢游賞不忘年五十舉新城愛漁洋之例自稱北柴山
人西岡上元前一日午過枕柝軒茶翁留飲觀鐙周覽
北樓棗香室深藏檜棲紫幢軒畫屏齋諸勝夜分始歸
限韻分賦云朱門屢曳裾上春趣彌永圍鑪消語默掃
地供閑冷亭午雪尙飄晚檐斜照迴漸滿一輪月林梢

浮霽景茲宵接元宵歲華紀京省叩鐙徧九陌車騎爭
馳騁主稱無遽歸金吾禁弛警款留卜夜游次第房廊
靜蘭膏綺閣明絳熾紗籠炯圖書繞香室晝寢藏幽囿
步檐轉疏寮楸檜森挺挺萬籤叢書巢州次部居整星
光錯晝光燭影交花影麗矚兼素玩四美一時併肴核
出內廚杯鎗具酒茗文談張雅讌笙歌嗤沸鼎游泳太
平時嘯傲神明境漏鼓一再沈後期還屢訂送歸門逕
開扶杖久延頸可以想見王孫好士之風其贈紫幢二
首云海內論耆舊巋然碩果存藝推風雅主派衍帝王
孫萬卷充書庫羣材集匠門曳裾賓坐末忻接笑言溫

不道朱門貴常如蓬戶游茶聲高館靜春色曲廊幽抗
迹棲雙檜逃名擅一邱何須山澤裏自是列仙儔紫幢
嘗畫西岡秋曉詩意於便面納刺慎齋紀之以詩云屣
提菴主句堪傳五字天清巷見山誰爲紫幢團扇上秋
窗著意寫孱顏西岡次韻有田郎標格知何似媿我風
塵憔悴顏之句田號小山薑其濟南絕句李峩村中丞
畫意扇頭事頗相類也

明洪武閒詩僧性海手製竹鑪王舍人孟端繪圖并首
唱爲詩和之者皆一時勝流歲久鑪亡成化中秦武昌
中齋訪得之城中楊氏有復竹鑪記嗣復淪落人間雖

前有盛冰壑侍郎後有宋漫堂中丞並仿爲之顧典籍
梁汾亦重製一鑪終以不得故物爲憾山僧靈源松泉
子斗門張氏訪得之按之武昌記中規制無爽毫髮乞
姚柏南上舍爲賦再復竹鑪詩松泉爲性泉裔孫善屬
文臨摹竹鑪詩卷孟端已下諸名蹟王虛舟亟賞之邵
文莊溫硯鑪銅質形方而橢虛中受水上二穴承硯及
孟篆文爲膠西安桂坡製其銘則公自爲之詞云暑有
藏冰寒有韞火旣濟且和變理在我彼鼎我硯制殊義
同汝革汝從惟金在鎔功成斯文而不自有左右置之
歲寒良友邗江方西疇士庶得之市集藏之三十餘年

乾隆丙戌年踰七十謂鑪宜歸二泉乞揚州太守移文
錫山遞致聽松菴與竹鑪並葺弄焉王涵齋作歌記之
和者甚夥

姚平山閉戶讀書箋刻甚夥張今涪贈詩曰鑪香堂上
白頭翁不問年朝與歲終萬卷藏書三寸管五更雞唱
一鐙紅有松桂讀書堂集出獵圖云轅門千隊簇弓刀
映日龍鱗綠燾高笳鼓不喧傳號令將軍初試橘紅袍
平岡草淺正堪馳中有花鬃汗血姿游騎遠從青嶂出
錯金槍桿小黃旗

張儋伯萬壽寺華嚴鐘歌已見前集其明宣宗御筆子

母雞圖云雄雞掉尾高參差羽毛颯威蘆花吹青蟲入
口尙夭矯丹頂倒泥珊瑚垂化雞張口拱而竦二雞仰
母求其慈二雛爭蟲競延頸一雛啄地偏委蛇一雛上
背一雛伏注目總與蟲爲期斜陽欲沒影荒澹細草亂
茁青猗猗二雞七子各異態雖有佳手誰能爲安樂已
平交吐棄萬幾多暇閒相嬉含毫吮粉若無意點染忽
出胸中奇宮娥遙看貴妃笑內臣拜賜踰珠璣上有敕賜內監
王進等字三百年來事灰燼此畫獨壽堪嗟咨晴窗漫展豁
蒙翳題識隱隱銀鈎敲得之象外洵無閒子母合繪良
堪疑君不見長門寂寂僊師閉無子君心更誰記景帝

陵云秋風十里吹荒陵繚垣敲斷莓苔青停車覓路夕
陽亂淒涼廢殿枯松鳴土木之變良可異倉黃北狩留
王庭廟謨國柄知不惜舉身委振何其輕長君弭亂社
稷重議和遷國徒營營列宗二祖養士報司馬號令行
雷霆精誠動天戰士泣咄哉委任由君明建炎踐阼宗
李在何爲不返冰天行東安門外舊君入握髮出走宜
相迎紫袍拜舞臣子事南宮朝賀家人情皇儲既定邦
本固沒寧生順千年名事不出此戀天位束刀繡袋多
疑驚綸辛鍾同受杖亦何罪一朝伐樹緣高平完德良
難吁可悼奪門之釁宜旋生當時惡諡誠太酷殺禮營

葬無人爭我來况逢劫火後野燒漠漠連巖扃歛歛弔
古不忍去回看纖月升林垆兩詩神景開闔骨力蒼堅
不愧作手劉龍洲墓云大布衣無愧小朝廷可悲渡江
揮淚日詣闕上書時千載留殘碣何人復古祠顧湄今
不作惆悵立山陲謂太倉顧伊人欲鳩同志爲復舊祠
而不果也

青浦倪鵬字振九晚慕劉蛻之爲人易名蛻自號蛻翁
幕游卒于滇麗江雜詩云地分東印度江別大金沙雪
冷千山月霜明萬樹花碉房秋放獵板屋水翻車不識
西天路還來問喇嘛怒江分界劃樂國舊連疆漢相銘

銅鼓元師濟革囊有人知大分努力事戎行世守相承
久忠勤好自將晚街分鬼市蠻婦雜雌聲屋小皆甌脫
人希半寄生通番俱有路設險竟無城辛苦防邊計年
年卒踐更當時安石鼓大長紀功成乘勝恢番落連江
列戍營泥塘門面勢天柱聳牙城可惜今淪棄空懸漢
月明袁文揆滇南詩略錄入流寓極其推挹其次韻詠
史二首未知所指今並錄之荆舒庭下一花敲捉鼻從
來事尙疑朝服未完東市案草堂又勒北山移使歸陸
賈何新語車走虞初且舊醫不是鞏牽今再駕馭人空
沒阪牛疲輪臺恩自武皇崇始信初無衛霍功踟躕尙

穿車肉臭鯨鯢未翦兌兵空烹寧可冀宏羊兩病固難
追汲黯風金鳳凰飛輿蓋傲還將被粟易三公蛻菴與
張得天同郡或刺西林相國未可知也

高南阜擅三絕之技以諸生薦舉官歙縣縣丞被劾去
寓居泰州題壁七律有不妨李固終成黨到底曾參未
殺人之句其詠燕云月明門巷影依依送盡春歸未肯
歸愛爾天然好情性一生常傍落花飛寄興特爲深婉
自跋詩集云盲子頑孫篋笥誰付不知後來所作尙復
幾許亦不知得成卷與否尙有人拾取於蛛絲蠹腹之
餘以少得流傳於人世否露電茫茫老病日篤而猶倦

倦於此故紙窠中物愚哉南阜不直一笑其語亦極入
痛以窮餓死盧雅雨哭之以詩其雜憶云寒香飛盡不
成花何處春風問水涯石罅竹根殘雪裏還留數點認
林家春光駘蕩入湖光倒影桃花浸水香何處將扶花
下女故留小步看鴛鴦畫橈送客碧雲灣小部笙歌卻
放還自拂綠茸隄草坐菜花香裏看春山風致固非俗
流所及

華亭繆雪莊明經謨字丕文與張大木張得天稱焦村
三鳳乾隆初開律呂館文敏延與共事擬疏薦之會其
老病且一目眇不果歸里未幾卒無子詩如寄初上人

云流水到門終日滿遠山隔竹有時無曉起閒步云穿
竹行無三步直避花頭更一回低春城紀游云桃花不
逐遊人去鎮日東牆相對閒

金司農論詩于漁洋初白皆有微詞翁覃谿謂冬心善
于用短小詩精悍不得以初白限之自序其詩述趙秋
谷語不屑效吾鄰家雞聲謂漁洋也後乃悔之其編詩
錄付女兒收藏雜題云天涯詩老浪相稱棖觸清愁歲
月增一權今成五湖長酒波如練雨如繩卷帙編完頂
髮疏中郎有女好收儲帽箱剝落經羸傲莫損嚴家餓
隸書涼夜鮑明府鈇攜酒劉郎泊小酌與姚世鍾同過

云秋夜秋池幽且娟涼鷗涼鷺五湖天水明于月宜同
夢樹老如人又十年散髮賀循言可聽銜杯謝瀟倍堪
憐劉郎泊記思前度好續吳興掌故傳劉郎泊者鮑辛
浦舊令長興雍正辛亥復除茲邑取劉賓客元都觀詩
語命屋曰前度軒因命池曰劉郎泊丁巳於軒西築俊
逸亭明年造一小舟曰萍牀自爲之記他若坐樾軒博
山臺兼山磴鑿坏洞皆見道腴堂集

常熟王東澂箴包船紀事云有船銳其首以箴包裹之
名爲箴包船聚泊疑茅茨浮家無定所忽湖忽江湄居
貨擅土產擅技兼卜醫中有無良者行乞同殘黎詎料

豺狼心所志竊童兒神咒與餅餌給兒兒輒迷牽引至
船中毒手恣所爲或爲矐其目或爲擺其肢或屈曲其
體如籩除戚施形骸幾變盡父母俱然疑清晨負之出
索錢號九達夕仍負以入傾倒囊中資數儻有不充攢
刺加鞭笞苟延此殘喘性命危如絲有時更肆惡視彼
軀幹肥入之人鮮甕飽噉若舖糜吸兒腦與髓嚼兒肝
與脾從此筋骨强更堪耐刀錐更聞藏祕器賣以療疔
羸一匕爲神膏索值恆不訾淫人祈長生食之甘如飴
又聞湖海濱茫洋有神祠神曰抽筋姆此輩所皈依重
午暨中秋廟門拳靈旗羣船競祭賽以兒爲牲犧祭罷

飲福酒狼藉骸與髓年來迭敗露官長胥周知勿問所
從來立斃陳其屍謂足抵其命此外無窮治不究其本
根徒然翦旁枝官長法深刻胡獨偏仁慈其毒乃滋蔓
其故難尋窺誰爲采風者聽我歌此詩於采生折割之
事言之可謂詳盡其庚申元旦詩白版方開洪氏筆紅
箋也抵翟公門時方刊柳南隨筆也

寶應喬億劍谿贈方五丈扶南云一生不負太平春四
海飄蕭任此身宿草徧生聞笛處瓣香終在曝書人詩
篇鱣子多能誦夢寐鴿原老更真兇說艱難孟門道不
曾覆轍也傷神扶南一字息翁博學工詩有春及堂集

周公瑾墓云誰令烏鵲月明中千里旌旗一夜風大帝
君臣同骨肉小喬夫婿是英雄行閒老將醅偏醉座上
清歌曲未終何事不如張子布墓前飛過白頭翁石印
山云天險長江日夜流誰知木柿下巴邱井中得壘開
三國石上成文誤九州荆楚黃旗空授甲洛陽青蓋竟
封侯前賢枉使英雄歎那便生兒盡仲謀俱見精采晚
年爲昌黎編年詩注將售以爲買山計盧雅雨爲劖劖
且歸其貲某侍郎舉以應鴻詞固辭不就與方南堂皆
桐城老詩人南堂亦舉鴻博不赴試方氏以南山集獄
多牽累扶南不求仕進實戒前車非徒襟懷高朗也

鄂文端序馬大益詩謂其生於勳舊高爵厚祿其所自
有乃好讀書浮雲富貴胸襟浩浩不知有王公大人亦
不知有山農石隱蓋皜然不滓之懷魁傑崛宕擅秀孕
奇發於流峙之間球璫激韻露生以靈沖襟以曠有自
得其爲滙川者移居滄州蔡玉躬閣學以詩送行次韻
奉酬云仕宦亦人情沈淪墮其志徒深山水懷喜無兒
女累期爲塵外游今鼓滄浪棹峩峩黃閣老瀟灑饒逸
志送我河之干贈言有餘味非不惜離別孤懷喜能遂
滄州海一隅可訪安期輩爲問天地根果否生天地長
距謝微言我將從此逝釋道研之稱蘇瓊所謂竟將我

致青雲閒何由論地上事者庶乎近之他詩已見前集
昌平郎容巖孝廉大乾序樂堂與家兄夜話云露坐空
階夜漏遲白頭兄弟話當時賓朋似雪春垂盡鄰里如
星晚更移粉壁月添新桂樹曲廊苔沒舊題詩回頭點
點頻看影狂喜霜鬢變黑髭宛平于霽亭學正振狝過
東阿山城云一灣抱郭說谿涯馬近荒城日欲斜水落
淺深來雁驚山逢轉側見人家離離古道含秋色漠漠
楓林帶晚霞猶有石碑傳伯蹟三歸臺畔足塵沙與吳
梅里話舊卽送南歸云風塵那復見英雄蓬梗相依況
味同見面唾壺常欲缺背人書字慣成空曹城秋柳離

愁外璧社煙波悵望中壯志薄雲寧歎老漫將歸興付
兒童二人皆流寓山左詩均疏雋可喜

餘姚邵東葵學博向榮送陳少章南還兼詢惠仲孺云
依然席帽去燕臺誰識凌雲獻賦才客寒曉愁霜路滑
鄉心春被柳條催遺經仍向淹中訪舊雨新從棘下迴
零落鄭公書帶草東吳紅豆又花開少章與沈果堂皆
何義門高第弟子所著文道十書但刻綱目訂誤韓集
點勘通鑑胡注舉正紀元要略四種

松喬宗伯世臣題畫云天風渾帶水泉聞老樹新篁綠
不分一樣蕭疏無著處入山僧與出山雲宗伯號木天

雍正丁未進士由檢討累官盛京禮部侍郎乾隆中以
詩獲罪邵亭上公乾隆十年以川陝總督入閣十四年
緣事賜死詩如寄愁迷遠雁懷舊數晨星引睡詩多借
催吟筆獨扛詩亦可誦本朝宰輔如瓜爾佳氏剛林烏
蘇氏祁充格他塔喇氏蘇納海伊爾根覺羅氏阿爾泰
覺羅吉慶宗室耆英皆致位三公不永終譽金川之役
訥親辦賊無功

高宗以其祖遏必隆之刀郵寄軍前賜死錢辛楣詠史
詩曾無經略似龍韜浪說烏衣甲第高健卒秋風鳴射
鏑元戎曉日擁征袍歌酣油幕揮如意寒禦貂裘酌小

槽褒鄂家聲銷歇盡空教血沍衛公刀若漢大臣則多
蒙寬貸焉

雍正戊申鎮洋王小山時翔以諸生被薦起家授晉江
縣時有司急自見務英銳擊斷而諱慈祥小山一以寬
和爲治由漳州同知晉成都知府高文良所舉也漢州
甲妻私鄰乙而殺甲甲弟具控乙不承賂獄中盜引甲
爲同盜見殺有司遽成讞然終不得甲尸小山廉得乙
有弟實共埋尸乃攝乙弟別訊之果得姦殺狀獲尸傷
皆具乙與甲妻咸伏其辜新都陳現與從姊夫某習誑
一日某從現父貸斗麥將渡河休於崖現潛往納大石

橐中某負橐以涉橐重踏於水石鎮之不能起現懼匿
後縣令究石所自現不能辨然不得致死故乃坐現與
從姊姦現不勝楚誣服小山疑之及庭訊二犯皆唯唯
然察其色若冤甚懼不敢言者小山屏左右好諭之
則張目相視哭失聲始以情告小山惻然爲力白之出
其死一郡稱神乾隆九年卒於官有詩文稿及詩餘行
世綠意風雨菴分賦新綠云采香乍定被夜來風雨芳
林洗淨嫩葉柔柯漸覺森沈裝點更饒幽景輕絲微潤
蒙茸碧卻小院蘚痕交映一年此最佳時忘卻落花淒
冷休道尋春較晚趁初霽步履閒園支徑幾樹榆槐幾

本焦桐依約翠雲千頃紅樓已怕珠簾隔况又是陰陰
欲暝怎柰他不斷鶯聲礙了倚闌人影詞筆沈雋而能
以儒術飾吏治審機要持大體斷獄復精敏如此視疆
幹之吏有加焉可以洗春華無實之陋說矣

明宣德間詔仿秦漢以來鑪鼎彝器古式命司禮監會
同工部督造凡千百十件以供大內暨各官釋道之用
其質料之美鍛鍊之精皆非民間所能辦其料乃暹羅
風磨生礦之洋銅及日本之紅銅加以倭源之白黑水
鉛賀蘭國之洋錫至天方之番礪砂三佛齊之紫碁渤
泥之紫礦臙脂石琉球之安瀾砂以及石青石綠硃砂

文蛤古墨雲南白黑碁子等皆所以助其色澤之用爰
自八鍊十鍊以至十二鍊而後成有棠梨熟梨豬肝三
色其式有商夔龍九子鳳九雛再蚰龍耳沖天耳三足
乳雙魚耳釜底天雞錦邊九鳳穿花飛鳳貼耳環耳獅
首象首豸首角天雞馬蹄鏐金戟耳橋耳三足朝冕四
足三元太極并雜款井口獸面九箍桶子如意方式夔
龍梵書虎面百摺沖耳橋囊朝官馬蹄大小臺几等鼎
鑪鑄成分進陳設乾清宮坤寧宮暨各妃王府各官府
衍聖公府其索耳一種則分賜各神廟祠壇并學宮押
經法箋鉢盂三種則分賜各經廠各寺觀爲釋道二教

用者以上各種或大字款或小字款或無款或鍾王體或歐體而其正色則有鏤金流金蠟茶藏經四種蠟茶以水銀浸搽入內薰洗爲之藏經以金爍爲泥數四塗抹火炙成赤鏤金流金銀絲片嵌減俱實用赤金白銀若干兩其在上半名覆祥雲下半名涌祥雲若流金單傳本色則有蠟茶藏經本色又有蠟茶鏤金最佳又有蟹壳青栗壳色棠梨色熟梨色棗紅色硃砂斑雞皮皺其藏經栗壳更有淡者一種硃砂斑者用番硃砂點入名金帶石榴鑪雞皮色者跡如雞皮拂之實無跡火氣久而成也或謂鑪之舊者爲覆手必有青綠色卻不

盡然余家索耳宣鑪覆手頗黑押經鑪有高腳碁脚二
種謂棠梨子白果赤以赤爲主梨色生者青熟者肉白
皮黃若煮熟者又不然此當以樹頭霜打熟者爲主熟
梨色嫩黃豬肝色深紫三代及秦漢閒器流傳世閒歲
月浸久色微黃而潤澤者曰蠟茶色可知原是古銅器
也藏經色黃極亮極稍類赤金色總由其質料之美鍛
鍊之精故質純而嫩晶瑩透脫而無一膜之隔色嬌而
雅鮮潔膩潤而有油然之光眞足爲希世寶明末國初
閒有周文富湯子祥二家湯善用補法周則鑪身耳底
三什裝就宣廟時本然二家亦稱好手餘則施家北鑪

其偽造宣鑪誠有如日下舊聞所云者而文啟美長物
志高深甫遵生八牋內歷敘鼓鑄各家如元時杭城姜
娘子平江王吉及明時雲間潘銅胡銅等種種不一互
有低昂未能殫述今時下又有對銅鑪子因今之賞鑒
家以耳爲目故特表出並系以詩右秦東田賜谷宣鑪
說見梁谿詩鈔敘述極爲詳核錄之以資談助

蔣鹿潭詞斜陽雙燕欲歸來卷簾錯放楊花入長山張
璞存永瑗山居遣興云六扇疏檣晝未開高居迴自絕
塵埃鈎簾偶爲看山色恰放雙飛燕子來蔣詞本此
國子生鄒溶字可遠號二辭家世貴盛豪于文酒善山

水學吳仲圭嘗北游主滿洲法保家法保善書畫鼓琴
以事亡命吳楚間時與溶不相聞數年矣溶飲於外聞
有急客歸視則保也舍之山中數日逮者至先逮溶因
獲保械至京繫獄保伏法溶亦論斬所親爲斂資治後
事溶顧吟詩豪飲醉卽酣臥如平時獄上命監繫在繫
五年讀書不輟喜晝初不自名至是購者無虛日旣減
等戍關中士大夫皆待以上客又十年遇赦歸家早破
寄食僧寮以死有時保堂詩集及香眉亭詞雨後鮑讓
侯招從春申澗飲泉卽事云返照逼林麓閒門應息機
卻逢新雨後獨向暮泉歸採藥留紅葉尋源入翠微經

過殊不厭相對狎鷗飛詞有乙丑除夕入獄已一週志
感及丙寅新正三日寄內諸作李鐵君所爲張翬傳云
翬年二十游京師授館太史法保家法保家不貲慕大
俠豪舉又通時俗方言服官給事人以爲敏翬一歲辭
歸旣而法保遣其黨馬雄走楚聚羣不逞將爲亂而身
應其內其庖人首其謀保亡奔雄適雄死眾鳥獸散保
無所歸遂至吳投翬以夜造門入告以情未幾事急蹤
跡且至吳翬曰誠聽翬計幸雉髮爲緇流庶幾免保許
之旣而中悔計不果保有健兒多武力嘗齎多金往來
任外事事泄獲保並逮翬保伏誅翬竟繫獄凡六年追

死戍關中其事絕相類浴無錫人翬吳人未知是一人
否鐵君謂法保悖上肆逆翬義不得逃其死掩賊爲藏
周有常刑矣然憫其窮蹙以匿之知難在前而不擠人
於危亦長者之事初馬寶之赴市刑也法保適過而笑
之曰丈夫舉事惡得至此及保死竟與馬寶同噫翬欲
不死保又惡得之誠篤論也

沈方舟詩錢東生多錄其邊關游眺之作其絕句如得
書云半載瓊函得未曾強開醉眼別秋鐙不知多少離
居淚溼徧杭州柿蒂綾津門九日云何處登高把一尊
晚來潮落見津門不知柏葉兼楓葉紅到江南第幾村

寓廣嚴寺樓懷所居云憶對涼蟾瀉碧筒水亭四面受
荷風一聲絡緯啼何處秋到城南破寺中橫波云苔階
立久落花多不遣春愁上翠蛾二十五年猶待我依然
無賴是橫波絕似馮定遠不專工王李一派

嘉善曹楷人號慈山所居中阿里東園向蓄雙鶴忽生
卵哺得二雛因構亭名以產鶴詩曰產鶴亭集卽事云
綠陰籠壁勝於紗默默攤書到日斜雨意欲來簾不捲
一聲風磬落桐花風磬以銅爲之制類鐵馬楷人按律
呂自造命以今名嘗撰琴學內外篇辨聲舉隅錄自營
壽藏曰永宇谿莊著有逸語婿禮通考孝經通釋魏塘

紀勝老老恆言所輯宋百家詩存刻於乾隆辛酉取慶湖集爲冠其少時所好也

海鹽石塘起自九黃門山楊崑近仁詩萬浪浮天白雙厓到海青騰雲噓蜃氣驟雨挾龍腥石腳危成塹金隄斷作屏篙師驚險惡不敢近揚舲

高宗御製盛京土產雜詠十二首一曰五穀盛京可耕之土甚多畿輔山左窮氓挈侶至者墾荒安居久之悉成土著地脈厚則穀實滋黍稷稻粱菽麥之類植無不宜畝獲數斗而斗直三錢故百室盈而四黼充歲以爲常二曰東珠東珠出混同江及烏拉寧古塔諸河申勻

圓瑩白大可半寸小者亦如菽穎王公等冠頂飾之以
多少分等秩採珠者乃打牲烏拉包衣下食糧人戶合
數人爲一起謂之珠軒以四月乘舟往至八月回各以
所得之珠納之於官如供賦然三曰人蓐深山邃谷中
蓐珠滋茁歲產旣饒世人往往珍爲上藥昔陶宏景稱
人參上黨者佳今惟遼陽吉林寧古塔諸山中所產者
神效上黨之參直同凡卉矣四曰松花玉混同江產松
花玉色淨綠細膩溫潤可中硯材發墨與端谿同品在
歙阮之右混同江發源長白山國語曰松阿哩江漢語
天河也俗呼爲松花江而金史乃有宋瓦江之稱皆音

轉之訛五曰貂烏拉山林中多有之索倫人以捕貂爲
恆業歲有貢額第其等以行賞冬時供御用裘冠豐厚
純黑者爲上紫次之黃又次之毛潤澤而香則以喜食
松栗之實故也貂裘可作常服三品以上大臣及京堂
翰詹官皆得用之若爲端罩惟以供御餘則皇子諸王
亦得用爲朝祭之服六曰鹿地多崇山茂林鹿蕃息而
肥腴麋鹿尤他所罕覲扶餘之鹿所以稱唐書也長白
山崇地冷鹿以夏月中避炎至秋冬乃羣就暖向盛
京圍場而來將軍等冬日行圍所獲麋鹿山積擇其肥
者以進歲率千餘年節頒賜羣臣受者如拜割鮮之惠

焉七曰熊羆盛京多窩集茂密蒼翳連林數十里熊羆
每踰伏其中熊趨捷而羆憨猛皆獸之絕有力者熊各
處皆有羆惟吉林盛京始有他處所無熊羆冬令皆入
蟄不食熊小或居木孔羆大則居穴也刺虎者不過五
人一排熊羆非十人不能勝蓋其力倍於虎也八曰堪
達漢國語馬樊纓也是獸項下懸肉相似因以得名出
黑龍江似鹿而大其角可作射鞞色如象牙而堅白勝
之鞞閒環以黑章一綫卽角中之通理以點細密而勻
正者爲最是獸生山中而喜水行水則速行山則遲亦
異聞也九曰海東青羽族之最鷲者有黑龍江之海東

青焉身小而健其飛極高能擒天鷲搏兔亦俊於鷹鵠
鷹雕皆有窠巢多緣峭壁爲之人不能上惟海東青從
未見其巢輟耕錄載演雅言海東青羽中虎也燕能制
之羣集緣撲卽墜云云以小制大物性往往如此亦猶
黃腰啖虎之類也十曰鱣鯉魚盛京之魚肥美甲天下
而鱣鯉尤奇巨口細睛鼻端有角大者丈計重可三百
斤冬日輦以充庖備賜亦有售於市肆者都人分鱣之
目爲珍品魚出黑龍等江非釣所能得捕之者以網圍
至岸邊伺魚首向岸挽強射之魚負痛一躍而上至陸
地卽易於掩取冬日或鑿冰以捕則必繫長繩於箭以

掣取之十一曰松子松子生松塔中其形下豐上銳層
瓣鱗砌望之如傘堵每瓣各藏一粒既熟則瓣開而子
落諸山皆產而窩集中所產更勝蓋林多千年之松高
率數百尺枝榦旣茂故結實大而芳美亦足徵地氣之
厚也十二曰溫普國語譯漢音書之山中果也形似榧
味甘而酢或借榧梓字書之考花木記以榧梓爲梨別
種則徒取音近固不相類耳關內山榧大如彈丸製之
可供殼核關外如熱河一帶之山榧小不及半亦不中
食盛京所產溫普大小介乎二者之間密漬之可以致
遠 御製吉林土風雜詠十二首一曰威呼威呼漢語

小船也剝木爲之平舷圓底脣銳尾修大者容五六人
小者二三人剝木兩頭爲槳一人持之左右運掉捷若
飛行登陸則可曳之而趨窩集中山谿相閒凡捕參捕
貂者攜威呼以往遇水則乘之泥馬賒枯以樺皮爲之
只容一人兩手持小槳划行二曰呼蘭呼蘭漢語竈突
也因中空之木剝使直達截成孤柱樹之檐外引炕煙
出之覆荆筐其上以護雨雪而虛其旁竅以出煙比室
皆然三曰法喇似車無輪似榻無足覆席如龕引繩如
御以牛馬挽行冰雪中可以致遠漢語爲扒犁卽挖牀
也四曰斐蘭弧矢之利童而習之小兒以榆柳爲弓曰

斐闌剌荆蒿爲矢翦雉翟雞翎爲羽其名曰鈕勘五日
賽斐古人食皆以匕羹則以勺國俗舊用木木長四寸
許曲柄豐末猶古制也六曰額林楹棟間度橫板以貯
匱篋餅甕諸器具兼几案匱匱之用七曰施函斲木爲
筒因其自然虛中以受物貯水釀酒皆用之視束鐵編
篋攢木片爲器者天質爲勝八曰拉哈築土甃坏爲牆
壁綴麻草下垂緣之以施圻墁此國初過澗芮鞫間故
俗也拉哈牆壁之上據棟中豎柱以承梁左右留二孔
出氣謂之嘛哈木圖拉圖拉者漢語所謂柱也九曰霞
綑以蓬梗爲榦博穀糠和膏傅之以代燭用資作勞然

之青光熒熒煙結如雲俗呼糠銜十曰割山夏秋閒擣
敗苳故絮入水漚之成毳瀝蘆簾勻暴爲紙堅韌如革
謂之豁山凡紙牋皆以是名之十一曰羅丹鹿蹄腕骨
也舊俗以蹄腕骨隨手攤擲爲戲腕骨一具四面各不
同持四面擲之一手攤擲承空上下各取之以不動局
上者爲工視其偃仰橫側各得一色則爲四色全卽以
此分勝負小者以麈大者以鹿瑩澤如玉兒童婦女圍
坐擲以相樂以薄圓石擊之則曰帕格又有較遠之戲
趨冰上以中爲勝名曰撒罕十二曰周斐漢語樺皮房
也樺皮厚一寸取以爲室覆可代瓦旁爲牆壁戶牖體

輕而工省逐獸而頻移山中所產不可勝用乃滿洲舊
風無殊周室之陶復陶穴也納蘭中丞受宜堂集盛京
物產賦序云客有自瀋陽來者輒誇東珠人參貂鼠赤
玉以爲希世之寶咸出陪都而未知畜牧之蕃滋鮮介
之充物生民日用之所需獨甲於天下則其爲寶者大
矣乃考覈而備陳之以爲賦盛京瓜果賦序云盛京禮
部所司園池三處石園薦櫻桃邢鎮撫屯供杏子遼陽
外園出梨內園出蒲萄繁盛堡石橋千山三園並納花
紅安平園出栗子火連塞羊臘谷並出酸梨南塢園山
旺芬園各獻瓜又內務府所司遼河以東果園五十六

處果子山場三十四處遼河以西果園七十五處並歲
納櫻額梨乾榛子花紅山查水梨紅銷梨諸物其繁盛
鮮美有兩京無以參南都不能踰者實覘興京爲發祥
之地土膏豐厚所致爰詳考品彙分志芳園而爲之賦
盛京蔬菜賦序云旣賦瓜果矣復見山野蔬菜之屬蕃
于燕京思幽風于貉獻豨之外不廢烹葵剝棗品物充
物亦足以彰留都之康阜而知肇基之所以興也惟是
虞衡莫窮其狀載籍莫罄其名因不憚就聞見所及更
賦其實三賦皆感物造耑材知深美其盛京人物頌復
推本於鳳皇矣於彼高岡梧桐生矣於彼朝陽之義

取 本朝配享者自多羅郡王以下十人膺美號錫顯
名自達海以下賜諡二十三人勤勞王家載之史冊有
雅希禪者八十人將士懷忠履危蹈險如席漢巴圖魯
等七十四人潛跡盛明自安邁軸以孝著者繆鴻業二
人以義著者烏爾喀一人以隱逸著者朱國祚一人以
神異著者賸人等二人附以不離步等三人茹蘖飲冰
沒齒無玷若阿克順妻趙氏等四百七十六人著爲茲
篇中丞文學爲吾鄉之冠此文尤足資獻徵後此則覺
羅文敏公七觀於形勢物產風俗武備柔遠恩禮祀事
設爲問答而終之以追遠薦誠繼志述事之大文極瑰

瑋鍾義所爲文經敘錄云四明文獻闡自深寧敷陳七
觀根極六經美矣周原香東有作庶幾九能山川能說
豈虛美哉賦頌皆古詩之流附之卷中以明古誼

莆田鄭慎人王臣知蘭州府杭堇浦題其歸來草所謂
七略異時標別集竟應題作鄭蘭州者也選興化府自
唐以來之詩一千餘家爲莆風清籟集六十卷國朝人
古詩如康琨于玉春日雜詩云蓬蒿生我宅薜荔覆我
牆陋室苦春雨湫溼比子桑木蘭有墜露朝歌挹其芳
翩翩雙燕子飛來入草堂豈無華屋高故巢乃不忘物
情猶如此寸心轉徬徨唐顯悅臣再過界山云山勢欲

挿空傍午見朝日况是冬月深巖壑氣增凜陰崖紫煙
生絕澗飛溜出嗟此子遺民創夷誰與恤皚雪似明蟾
曉照逃亡室近體如釋明謙見山客中寒食云一杖寒
山野水涯淡煙微雨柳絲斜頻年禁火長爲客幾樹來
禽又著花胡蝶睡中頻入夢杜鵑聲裏未還家顧子浪
迹成何事拋卻東山好歲華康于玉木蘭雜詩云菱花
蓼葉傍漁牀深夜孤舟漾白塘兩岸木棉風乍起歌聲
吹斷月如霜唐之冕岐峰盱眙舟中云江天上下碧流
離斜日輕風欲暮時兩岸鷓鴣鳴不住蘋花香裏過盱
眙多可誦之作慎人自著曰蘭陔詩集其木蘭權歌云

木蘭谿裏木蘭舟長向陂頭泛櫂遊三十六門明月夜
蘆花如雪不勝秋將軍灘下水湯湯長者祠前更渺茫
昨夜桃花春漲滿谿船銜尾下南洋春雲黯黯釀春陰
春雨新添野水深但向九龍山下過橫吹鐵笛起龍吟
樟林西去白沙磯濃綠叢中露板扉兩岸橘花香不斷
推篷時見竹雞飛木蘭陂在興化府南木蘭山下

山陰諸生劉大申天台追紀貝子功績四首有云藩籬
先徹謀如晉水陸成禽將是飛霽雲齧齒憑誰救鉅鹿
沈舟誓不留圍市三重誅叛亟網開一面受降寬南國
干戈思吉甫東山袞繡識周公記惠獻貝子討耿精忠

平定台州事也貝子諱福喇塔多羅定貝勒斐揚武子嘗從征闖孽殲海寇康熙十三年耿逆阻兵以閩與吳尙二逆應特拜寧海將軍偕康良親王督師討之八月至杭州謂扼賊之要在温台遂分兵趨台州時精忠將曾養性已由福寧渡海陷温州台郡東南已爲寇踞又別攻處州將與嶺南江西爲犄角台州失則寧紹之門戶奪浙以東悉爲賊有賊且抄衢州之後而三逆相連接貝子首復仙居十四年五月入黃巖九月樂清太平青田大荆磐石五城皆下別遣將下嵎縣于是台杭數百里道路無梗得一意討賊十五年二月解處州之圍

遂克温州三逆之聯絡也藉福建爲樞紐自大軍攻勦
温台收定處紹使不得分顧衢州遂由慶元入松谿與
康親王會建寧循延平抵福州耿逆束手乞命三逆俱
離相繼服罪其由柘谿出青田自牽所乘馬以渡失足
折其手指攻温州齒落者二軍次往往露宿積勞疾作
薨于福州台州人撰有寧海將軍固山貝子功績錄一
卷台州訓導何石雲爲之傳簡儀親王其文孫也乾隆
四年以鎮國將軍督閩浙建祠于烏石山王中丞恕爲
撰功德碑大申此詩作于百年以後其勳勞德善入人
者蓋久而不忘如此

錢唐袁肇鼎字定年號雲門老於諸生與長洲沈虢齋
進士王芝軒明經善酒酣耳熱三人往往相對嗚咽不
能成聲或杜門哭竟日晚節以窮死子龔且啞相繼亡
竟無後有洛思堂集與沈歸愚素不協故別裁集不選
其詩詩以七律爲多詠淮張遺事云魚鹽自昔竄奸民
况值皇綱解紐晨數賊倉皇持白梃一城奔命走黃巾
乘機遂作鯨鯢窟失守誰司鎖鑰人當亡須懲慶元誤
羈縻莫漫賜恩綸相臣親自啟戎行指日妖氛靖楚疆
豈謂在庖仍出柙翻然烏合復鴟張朱弓漫作眞王想
青蓋徒聞劇盜狂從此蔓延憂不細縱橫鐵騎下淮揚

吳越提封控制遙擬開黃屋作南朝霸圖每自思孫策
王命何能悟隗囂猴戲棘端空恃巧蠅居井底易生驕
當年高隴藏金日已有西風菜葉謠北降豈必畏天威
飢卽依人飽卽飛奉命空聞歸版籍領藩仍許建旌旗
軍中虎節尊方伯坐上龍衣出禁闈何待異時憂跋扈
撫綏已識廟謨非操戈一旦罷輸將聞說參軍有諫章
漫指河山邀寵命妄期帶礪賁恩光車書無路通王會
匕箸何人憶尙方此日津門盡翹首海天帆影轉茫茫
參佐風流迥絕倫翩然承制盡垂紳卽同黃歇三千客
可及田橫五百人供箸未聞籌勝算揮毫何用競清新

梁亡江總頭仍黑莫笑彈冠又入陳喪師仍得擁旌旄
諸將何心汗馬勞總恃主恩寬斧鉞便同兒戲曳弓刀
十年乘障丁男盡五夜鳴鐘甲第高已報上游烽火急
更催樂部進檀槽楚公死後棟梁摧市僧終非霸王才
荒燕坐看秦鹿走誅求肯念魯鳩哀三年傲弟持鈞軸
六郡良家付劫灰腸斷齊雲芳草外宮人血化野棠開
裘雲門乙巳紀事三首爲雙峰年氏作也聖明雨露本
無私錫命曾蒙帶礪詞坐鎮三秦司筦鑰指揮八部奉
旌旗犁庭自懾天威大獻凱虛陳將略奇但道梟鳴牙
上吉豈知猴立棘端危貲郎越序遙崇班節鉞遙臨碣

石間辛苦十年營，免窟倉皇一旦失。冰山卽邀廷讞從，
輕典便采鄉評亦厚顏。事後何勞重抗疏，當時權貴已
投閒。何心更上望京樓，紫陌煙花渺舊游。塞土徒知霍
驃騎，幕中爭羨阮陳留。白圭此日俱蒙玷，覆水由來詎
可收。終荷聖明欽恤意，謫居不遣到新州。雙峰以雍正
三年獲罪，其第二首謂直隸總督李維鈞第三首謂錢
名世諸人雲門他詩如題湯劄菴別駕出塞圖云蠻韉
小隊短刀鋌，度磧穿雲一騎先。山勢西隨關路仄，河流
北遶塞牆圓。笳吹曉馱驅兵過，扇擁宵鞍覆雪眠。慙愧
書生頭欲白，披圖重想勒燕然。酒人云酒人天性愛悲

歌自鼓琵琶喚奈何三北此生朝氣盡二南今日變風
多滑稽久已輕齊堦詞賦由來薄楚娥騎馬忽思燕市
去黃金臺下弔荆軻滑臺七夕云極目關山月一鉤晚
涼簾卷曝衣樓常教七夕看銀漢多分雙星不白頭瓜
果荒唐誰與巧菹鱸迢遞正驚秋隔牆笑語穿鍼會故
國平添萬里愁皆氣猛而格上境觸而情遙

張天扉所作詩畫自署南華山人賦才敏瞻卷阿賡和
走筆如飛書法亦蒼潤勁秀所進春林澹靄圖及日長
山靜畫扇皆稱旨

高宗依韻賜和並製詩褒美有螭頭奏對春風靄寫出

春林亦絕勝及大癡兼擅東坡筆勅敵江山兩不慙之
句由史職不數載晉宮詹以展墓乞假南歸行至天津
病歿王通侯雙清閣落成追悼南華先生云朵殿揮毫
信手成頭銜管領是雙清杏花春雨江南夢空寄相思
虞伯生構造皆由清俸餘雲飛畫棟麗天書閣成先赴
修文召香案仙班別有居

崑山朱葑亭厚章豪於才五官並用沈塙士嘗過其寓
齋見旁列二人各執筆磨墨操紙以待葑亭口授一成
四六序一改友人長律而已又謄寫某孝子傳約千餘
言中有得令二人參錯書之序成多新語長律亦完善

已所謄寫極工楷無脫誤中又與塙士道別後語寓居
嘉定雍正丙午七月連雨至次年春始晴禾稼不登民
有饑色葑亭歲暮雜詩云吳民殫力辦租庸霖潦深秋
駭老農信有槽巢師烏雀盡拋穉絜魚龍漫空水氣
難爲雪照野陽威未化淞聞道中丞能入告便令寒谷
轉春客甲寅由高文良薦舉鴻博遽以病卒門下士金
昂千刻其詩曰多師集拜方正學祠云秋氣凜毛髮祠
門弔落暉何人加白帽大節在麻衣草亂成瓜蔓庭空
絕雁飛景公遺廟盡化鶴並來歸寄蒼王千里云留滯
通侯邸眞成客裏家高門賀燕雀華髮吐煙霞逸土方

三拜才人温八叉知君懷故里邱隴有梨花題青谿集
云黃柳花飛撲醉巾六朝滾滾馬頭塵也知李嶠空才
子可恨江淹是恨人澹粉青煙疑在眼珠簾甲帳最傷
神情誰譜入參差玉訴與無情古月輪九日登東城寄
南華云蒼煙影裏獨憑高瑟瑟寒生薛荔袍我願滿頭
常插菊天生左手爲持螯雲隨暮鳥歸村樹風捲秋鐘
撼海濤佳節一杯桑落酒故人何處鬥詩豪秦淮絕句
云風花無力撲簾波佳節徧從客裏過聽說兒童挑薺
菜青青只有故宮多

陳句山通政以庚戌進士學習閩省奔走上官非其好

也巡撫趙仁圃相國薦舉詞科辛酉典試湖北所得多
知名士戴鸞亭廷熺和句山移居韻云鳳闕南頭菜市
東冷閒門巷侶羣公攜來手橐三倉外新署頭銜兩版
中宛轉對牀思穎叔蕭寥居廡著梁鴻雞棲一榻無多
地藥裹詩囊轉徙同王德甫嘗稱其直上齋尹京兆而
意致蕭散寢處有山澤閒儀鸞亭此詩蓋紀實也

秀水蔣德秋涇雍正乙卯舉於鄉游京師與徐飛山員
外浩鄭炳也翰林虎文結詩文社及門之士朱竹均石
君兄弟最知名竹均送秋涇夫子南歸云蘇君化神鶴
渴來一游嬉本不謀稻梁彈者亦何爲夫子盛文章下

第將南歸我貴物乃棄得失豈所疑翻驚臨乖淚欲灑
清潞西鄭公慕季長趙子辭昌黎離師當不及獨立恐
路歧客游廣陵以授經主易諧夔勳抱山堂張四科哲
士榮木軒辛巳飛山知山西平陽府聘主書院講席三
年而歸丙戌沒於虞山書院竹均爲作傳其詩清沖夷
澹如月下汎舟紅橋云日夕川氣白林月耀新鏡乘興
打雙槳卻與野風趁水花出岸側煙霞洗更淨忽見白
鳥下注目棲不定與厲太鴻陳授衣相角立清風雅裁
如其人邵叔宥因炳也識秋涇其懷秋涇詩云瑟瑟秋
風作薄寒故人杯酒隔江干月明一院梧桐影憶爾論

文到夜闌秋雨沈沈似去年桂花飄落滿階前今年不
共詩人賞獨對殘花倍悄然

夢堂詩老之詩錢堦石稱其溫潤縝密元夕同藥林過
椒園拙隱齋觀倪雲林墨蹟云天衢皎月鎔黃銀錦翻
障泥香飛輪書客出門塵灑面潛行忽到清谿濱清谿
主人雅好事心識敲門非惡賓不飲紅裘飲文字謹叻
那得方陳遵酒停示我青玉軸一函魚子藏嶙峋絳蠟
高移髻几淨寒具先罷辛盤陳墨淡筆疏神色凝春蛇
秋蚓微紛綸古藤絡樹自蒼勁寒荷倚石彌清瀆心本
忘指指忘筆掃除蹊徑存天真求之尺寸或不足參以

理趣殊絕倫譬如謝郎舞鸚鵡渾脫寧比公孫神氣閒
貌逸按節起傲岸乃覺傍無人倪生畫好性多癖畫爲
世愛人難親獨其筆迹尤簡至年逾四百知者泯沈君
好古人骨髓恆披殘繭收雙鱗所集多短札搜剔駢綴二十
載錯刀無慮亡千緡官貧身瘦囊篋澀寶貴不顧妻孥
顰沈君沈君具隻眼一語語君非越秦人減于畫畫減
字龍髯求珠得其真沈君一笑子飲酒慎勿出口聞此
噴書東坡先生馬券帖後云天地一馬也達觀諒非誤
若以馬視馬其細未足喻玉局仙人人中豪一馬贈人
輕鴻毛胡爲數行遺墨有餘想欲見他年齒加長廌也

窮促人共知焉能伺馬自忍飢馬贈貧士不令賣何異
凶年勸人食肉糜復有涪翁發高論索取人間二十萬
嗚呼人閒誰是愛馬人枯魚上市空愁怨取與視乎道
成毀存其天萬事過眼如雲煙紛紛區畫良徒然我聞
九華洞府仙人潛藏券而往尋子瞻問之不我荅大笑
掀其髯二詩皆似大蘇其題蔗塘所藏方正學先生雙
松圖海棠盛開同人過賞七古均勝小詩如魚臺道中
云低風阻水疏疏柳輕燕捎颿獵獵風憶在九龍山下
過鞦韆花吹雪打秋蓬再過紫竹院云落盡紅衣綠漸肥
殘荷幾柄帶斜暉蘆花不奈西風急吹作一天秋雪飛

與盧照亭登棲靈寺樓云亂松全不礙窗開一翦春蕪
碧過苔茶熟詩成誰共賞放他山影入樓來西郭草堂
雜詠云蜂癡蝶黠總由渠只有提壺最起予薄醉不深
春不淺海棠花外了殘書龜堂石帚之遺響也

長興王豫敬所一字立夫爲姚慧田姊婿骨相臞臞與
慧田同歲才相埒皆貧不克自贍其生銳意著書徵文
獻雍正王子全謝山將赴秋試前一夕敬所與談張尙
書冰槎集中考證火盡取闈中樺燭焚之雞三號童僕
盡起席間鐙火尙熒然敬所乃曰吾過矣子得無入闈
而困耶題杭堇浦松吹讀書圖云讀書攷前古所要精

與博時風求速化經史束高閣徒然逞胸臆惟恐勞齒
齟譬諸耕田夫曾不俸錢縛縱或強記覽窺尋昧萬燻
磊磊羣聖文撐腸等糟粕譬諸無制兵何能猛刺斫吾
友堇浦杭百鷺中一鷗雖處閶闔閒未嘗異邱壑雙松
爲表門亭子香茅縛架插祕閣抄巨細恣領略心識作
者意英華飽咀嚼積久鑄偉詞落筆風掃籜手持示流
輩相顧互驚愕曩爲茗雪游結交事如昨別去動經歲
令我風味惡披圖如見君亦足慰寂寞爭得縮地術共
聽秋城柝不愼擇交遭奇禍逮繫西曹者五年故孱瘦
神魂魄力不足以當大難家貧銀鏹就道一無所資配

姚世鑑字金心蕙田姊也於十七史皆能背誦亦能詩
嘗有梅花香裏待春耕之句王子六月以望夫而死事
解出獄董浦問曰患難之中所著多少敬所曰無有也
董浦曰古人遭患難正可立言何忽忽耶敬所謝之蓋
志氣不可復振矣不數年卒無子草殯山閒謝山爲之
志壙鮑辛浦爲梓其孔堂集以行世乾隆癸丑長興丁
崙峰醉山兄弟合葬之於車渚村之陽伐石表之其山
莊雜詩云隙地四十雙深草三尺許疇曩本膏腴棄置
等堦鹵方悔游惰非何辭因貧窶今歲捐筋力荷鋤學
爲圃編籬藝菜本投種逮春雨雨甲與煙苗茸茸漸覆

土茁此二十品便可助鼎俎惜哉霜降後枯倒同榛莽
復悟用力淺成功安得巨不如蚤種松共結歲寒侶彈
指十餘年一一中梁柱東林好耆舊謂丁長孺先生於世既不
合未老營菟裘愛此山千疊規爲五畝園草菜半薤葺
水木旣明瑟琴書復妥帖更聞招諸生咿唔共講習乃
知有道士出處皆足法後來作招提方袍此中集高坐
句讀師教授門常闔兒時亦從游昕夕抱書入像設雖
堪憎清芬如可挹別去逾十年已歷塵沙劫精廬無復
存廢墟風溘溘我聞爲憮然重來看一帊惟見荒榛閒
石筍如人立清雋疏爽頗近東坡律詩如病中六月十

八夜對月有懷錢唐諸游好云竹樹饒涼意微風來颯然懷人成獨立多病失佳眠稍待荻苗水相尋鴨觜船明明頭上月尙隔幾回圓雨阻風秀軒欲訪堇浦不得卻寄云漢土憶題襟停橈欲過尋江鄉三日雨孤客一年心路暗無來夢茶香耐苦吟思君情似水更比在家深亦皆風清體秀平視中唐

陳霸先故宅在長興城東五里許陽烏山麓今爲廣惠寺寺中有井相傳其始生時取水以浴水自涌出數尺歸熙甫爲令時令人去翳蔽而出之作亭於其上爲之銘其旁銀杏一株亦數百年物王敬所若谿雜詩云閑

尋寺井憶陳王寂寂空林貝葉香說與游人莫惆悵景
陽宮井更荒涼厲樊榭詩我來漱井眉銘辭義峻嶒傳
是洗兒日寒溜湯泉騰更著辱井戒不覺歛歔增可憐
馬上郎義憤尤足稱成敗有天定隙爲英雄乘煌煌江
左業從此期恢宏身後那可料暴骨據讐膺千古英雄
徒供憑弔窺竊閭干之徒可以悟矣

宛平何琇君琢雍正癸丑進士官宗人府主事學問出
入於顧閻朱毛諸家著有樵香小記二卷其詠懷云冷
署蕭條早放衙閒官風味似山家偶來舊友尋棋局絕
少餘錢落畫叉淺碧好儲消夏酒嫣紅已到殿春花鏡

中頻看頭如雪愛惜流光倍有加

上元戴雪村學士早客閩中朱一貴之亂有聞道六首
云聞道臺灣海色昏山林初起甲螺屯焦池浴日雞籠
戍赤嵌封泥鹿耳門自許遠夷爲寄遇遂令孤旅長兒
孫金錢百萬開荒裔太息姚崇偉烈存戈船飛指鐵沙
無比景南眞富版圖冬月蠶瓜傳北闕日中鮫市接東
吳人家貧亦千頭蔗地畝肥皆十斛珠一自承平洗兵
去鳳山端是萬民區周迴嶼嶼別爲天番舍初當向化
年亂壓雕題花朵重雙垂大耳竹環圓髑髏稍稍稀供
祭番俗嗜殺以髑髏祭其先麋鹿紛紛總斃絃禹貢漫言文教揆幅

員今代廓無邊不憑籌策立勳名能使金湯隔海成蜀

相七擒何數數班君片語只平平魚書有卒歌騰飽兵制

更番調戍歲餽 鵬運多官樂彙征官吏皆由薦舉資滿三歲輒遷 戢得

颶颶三十載百靈應亦赤心傾居無城郭編毛竹地產大竹

可列災有冰霜隕刺桐海外炎熱刺桐四時皆花 青犢

乍來搖地柱地震累月 黔黎宵濟仗天風居民渡海避亂小舟亦濟 帛書

未要傳鴻雁頸血羣能濺馬駿武臣死事者甚多 奇計且須陳

孺子長纓若箇漢終童太息綢繆未雨防威弧遽掩擘

旗張市人竟有言成虎疇昔將無政在羊生傀儡番疑

草木小琉球島絕津梁要知 聖代多神武待看澎湖

萬戟長雪村年十二卽引弓十石已酉督學在閩與督
撫將軍倣古射禮挽強命中將軍阿公自謂不如

青浦胡恪靖三戒云莫購大食刀殺人非人豪莫求合
浦珠水寒無衣襦莫買龜茲枕幻境未安寢語簡而意
極警動生有異稟能見鬼物尤善騎日行三四百里嘗
與陳紫瀾宮詹同被祭告之命並轡出都過涿州而公
騎已遠紫瀾至會稽公自南嶽還已數日矣請假便道
上冢松江太守蔡長澗問之曰吾官此數年不知郡中
有此搢紳訪之則已步至里門所居破屋八椽門不能
容車猶然蓬華之士也太息而去其壬申還家詩云青

眷伴我竟還鄉一日維艗到草堂已勝卓錫無隙地不
嫌移案抵斜牆曳舟居陸猶環水掃石安棊亦向陽爲
報吾廬今始有并教韓筆少鋪張自注謂余出門時黃
太史唐堂贈詩云賣屋已無身外物束裝惟有腹中書
近買屋八間可以容膝快然自足三戒之言信乎克踐
矣

華亭林豫仲太常長于詩兼善繪事未第時怡賢親王
延之于邸旣以庚戌進士改庶常仍奏請課嗣王讀在
府先後十有餘年冰玉道人穎悟好學其言語文章彬
彬有法度豫仲重至交輝園云屈指清游近十年畫橋

綠水問漁船柳垂橋角千條縷山映樓頭一抹煙望裏
林巒都熟識舊時花鳥解相憐不知棲息今何地話到
前因輒惘然謂向所寓小桃源已坍塌也

丹徒布衣余京文圻著江干詩集律句如燕子不來春
正冷梅花初放雨偏多林閒亂草難尋逕江上青山總
到門皓月出林旋墮水青山隔岸正當門均耐諷詠至
北固山懷古句云百年戎馬三分國千古江山一倚樓
當時爲沈峴山尙書所賞殊不異人

關漁雪江原隸旗籍著伴松齋詩鈔雨後過鶴林寺和
石帆作云新霽秋山爽谿聲響翠微夕陽欲西落野鳥

向南飛結伴偶乘興尋幽叩竹扉稻花香滿路爾我盡
忘機雁云憑風迢遞過空潭煙雨蒼茫客路諳影入霜
林愁欲老響驚蘆葉夢何堪鮑當聽去歌千疊蘇武傳
來字一函水冷沙寒菰米盡徘徊欲自戀江南試恩樓
云試恩樓畔草萋萋碧水澄清柳繞隄十二金釵歌舞
地至今惟有亂鶯啼均得中晚唐人佳境

京師巡城御史每鐙夕查街坊役以紅鐙數十簇擁呼
殿市人爭豔之德清徐恕齋廉使視北城時有紅鐙一
簇擁貂裘之句恕齋贊村宗伯曾孫也

歸安沈東田方伯由丙午孝廉官中書司名法入臺諫

壬戌出爲大名道癸亥東行迎駕途次雜記語三十二
首灤鯽波黎安肅菜眞定韭各入題詠戊辰分巡左江
辛未擢任湘紱癸酉量移湖北布政使丁丑調黔中以
事降蕪湖道在皖七年重秉楚臬丙戌被議就養兒子
咸熙京邸爲吳梅村祭酒舊宅顏其左舍曰餉鶴猶言
將雛之意也臨海壽人王世芳南亭年百二十有六歲
生於順治己亥少隨父禦寇壯而讀書四十九補博士
弟子八十貢成均九十六司訓遂昌乾隆辛巳百有三
歲俸滿引見晉秩六品在京祝慈壽訪錢孳石于繩匠
胡同屬書堂額壬午乙酉兩次迎鑾丁亥引乞大吏請

旌前後恩賜金帛及 御筆鬻序期頤昇平人瑞二額

庚寅慶祝

高宗六旬萬壽來都金帛外又賜詩加司業銜並予在籍食俸蓋百十有二歲矣耳微重目不借鏡而能作楷齒牙初落飲食健於中人不扶杖子四長八十有八孫十一長六十有九曾五人元七人來八人舅一人共三十六人各以耕讀自食問何術致此曰無他惟茹淡泊祛憂慮而已飼鶴軒草一百十二壽翁王廣文詩云盛際龍飛歲指寅雲蒸霞起帝城春北辰疊叶無疆慶南曜重來不老身駐景神方從紫府祝釐誠悃達蒼旻最

誇十里天街路雙鳥平趨蹋輭塵赤城勝蹟昔曾傳杖履春風得氣先甲近再周天放客星移十紀地行仙百年麤糲三餐飽五夜心清一覺眠欲識延齡惟澹泊不須采藥並逃禪冷官百歲始登程抱道惟傳讀與耕眼底來帚擁七代堂中絲竹樂羣英坐令元化推兄事後漢華佗字元化百歲有壯容只許彭鏗畏後生表晉章身旋引乞手提籐杖倚柴荆奇姿仙骨動天顏珍重殊恩屢救頽已許姓名登寶籙勝如金紫掇崇班筵開洛社行居首圖向商山色更爛知是鶴齡無量在十年一度賜恩還歸安戴農南大令永植同錢立夫晚步在酒亭云潦倒

同辭選勝場寒鴉啼處路荒涼相攜在酒亭邊路一巾
孤城半夕陽又有夕陽紅半樓及好山多赴夕陽邊之
句時人目爲戴夕陽其笈笈冷挂水清淺一疋鷺鷥漁
夕陽之句又號爲戴漁淮陰侯祠云面背動關天下計
死生不出婦人謀櫛李亭懷古云偏教臣妾知天意不
謂君王有父仇揚州雜詩云自有三朝連北魏可憐二
世學亡秦陸陸堂汀風閣集謂其以史事入詩奔赴手
腕閒者也

宣城沈眉生壽民以諸生徵賢良抗疏論楊嗣昌爲東
林黨魁讀書處曰耕巖草堂文孫樗厓名廷瑞字兆符

善山水嘗手寫耕巖草堂圖家遭火蕩滌無餘儲賣畫
江淮閒祖父徵君父處士君兩世之喪不克葬嚴崧瞻
贈樗厓詩白雲長護在山泉與世相遺老可憐黨論舊
傳元祐籍門風私記義熙年蓬萊東海三閒屋被蘇西
山一稜田生業算來無長物摩挲粉本也潛然樗厓以
畫鳴徵君家訓也姚薏田得樗厓翁書卻寄云去春君
駕琴高鯉巖扉歸掩松風裏約我揚州廿四橋淮南木
落趁寒潮故園我爲蘋花住鶴背腰纏眞夢耳江湖白
髮渺經年歡喜開書淚盈紙陶潛屋宇本不豐抱朴經
箱并遭燬錯教回祿相參元安得義財助章子賸水殘

山未是貧囊中留得敬亭雲清門文采看無恙坎壈窮途莫更論

金壽門五古如海仲授衣見過冬心齋出漢唐金石拓本共觀云空巷草根苦遭此秋雨屯離披一尺長那知中有人守窮如守盟向壁獨弔影書家得申韓二子欣造請聖唐與神漢文字古所敦吉金貞石志辨證蒐株源嗟嗟暝色催客主倚江渚炊煙飢不生寒雞各上距書宋遺民劉穆集後云我家榴皮街南宋舊都市詞伯劉季雍古宅昔在此先生當鬥爭原上自牧豕著書目半皆罵人口忽哆積勤兩紀餘其說擬鸞子不爲太廟

犧卻聘誓焚軌一從造生壙文字視糠粃酒民時時尋
風雨貌多毀葛巾與布袍淒涼話天水衮衮五百春消
歇香蘭茵昨我瓜步歸然鐙檢行李四卷搜遺聞煙煤
拂滿紙簷簷發幽光足以振縛靡持問里中兒誰能舉
姓氏質朴中自饒高秀之致此境正未易到海仲爲錢
塘楊知其送李東里之官來賓云霞明海日秋還熱雨
暗山城夏卻寒蠻方風日杼寫逼真授衣眞州句云僧
寺塔從城上出人家門在柳陰開亦寫景之佳者食鮓
魚詩有多骨不能調眾口空餘品價十分高之句

陳臯對鷗小字阿平爲授衣季弟授衣送其之天津云

仲春煙景和幽懷正宜好嗟予季行役離思忽盈抱同
棲異地久篤摯默自曉相依托形影相資澤枯槁汝失
執爨婦微業付一掃欲留將何爲送去心如擣努力莫
貽悔論年非少小利鈍難預期脩飭或可保我羈曷足
念高堂行且老躬耕倘有緒歸計亦須早別路繞花林
慘淡向晴昊絲絲不斷情應逐車邊草對鷗有書家書
後寄授衣并和來時送別韻詩庚申春於葛沽道中見
一馬服轄牽犁於畎畝閒骨高形毀無復籜雲追電之
態且撾策頻加而躑躅不進似有不勝任然頗爲太息
爰賦馬耕田長歌一首蓋義兼比興者也李繡子亦有

馬耕田行

胡雲持蜀岡瓦暖硯歌云蒼青截鐵堅不阿瓌珞敲玉
堅而瑳太一之船卻斤斧帝鴻之紐掀穴窠貝堂伏卵
抱沂鄂瓠肉削澤無癥瘡露清紺淺葉幽漉日冷赭淡
岡夔屹琅琅一片抗厯落仡仡四面平傾頗瑩陳天智
比珍穀巧斲山骨殊砉砉祝融相土刑德合方軫員蓋
經營多炎烹鑪化出搏造域分宇立開婆娑東有日山
西有月包之郭郭環之涯水輪無風自然舉氣母襲地
歸子和乾坤大腹吞樂浪荆吳懸冑藏蠡鄱陂謠鴻卻
兩黃鵠敵樹角國雙元蝸靜如辰樞執魁柄動如牡鑰

張機牙線連羅浮走複折氣通良兌無壅訛嚴冬牛目
畏積雪終旬狸骨僵偃波封翰菱毳失窈鹿凍蟀作噩
銜刀戈一丸未脫手旋磨寸裂快逐紋生鞞似同天池
敗蚩霧比困秦法遭斯苛分明落紙困倚馬絆拘行步
借孱羸爾看利器喜入用初如得寶良可歌火山有軍
罷圍燎熱坂近我勝噓呵涸湯初顧五熟釜灌壘等拔
千囊沙劍門一道塞井絡春候三月暄江沓共工雖怒
霸無所溫洛自潤揚其華東宮香膠銘絳客湘妾紫鯉
浮晴渦沈沈鴉色暈餘渲靄靄雨族披圓羅咸池勃張
浴黑帝神鼇斫掣隨皇媧山馳岳走事俄頃霆翻電薄

酣滂沱虹窗燄流玉抱肚月窟水轉金蝦蟇時時正見
黝鏡底北斗燦耀垂天河蜀岡工良近莫過搗泥攄水
相抗按爲罌爲皿爲飲榼壺如鸚鵡杯如羸千窰萬埴
列門戶堆器不盡十馬馱智搜技徹更復爾誰與作者
黠則那温姿勁骨奪端歛輕膚細理輕杪權馬肝或訝
瓜削面鳳喙兼狀鷺食荷燔燒顏色出美好端正不待
切與磋華元皤然抱坦拓周顛空洞非媿嬰早從仲將
試點漆峽檣旋溜駿注坡我初見此貪不覺眾中奇畜
擬橐駝詩篇送似因賺得若彼取鳥致以囿温泉火井
佐沐邑華陽黑水環梁嶠豹囊乾煤吐柘麝古玉笏笏

徐研摩青霜倒開漾海色烏虬尾掉重雲拖端州太守
輕萬石宮凌秦羽磯羞鼉比于中國豈無士今者祇悅
哀臺化時煩拭濯安且固捧盈時恐遭跌蹉裝書未許
押玳瑁格筆遲斫珊瑚柯畫螭蟠鳳圍一尺錦官爲汝
城初蕤啟之刀劍快出匣止爲熊虎嚴螫窩蕭行孔草
雖孌擅須記甲乙親吟哦國風好色陳姣嫵離騷荒忽
追沅澗凝鋪潭影滑幽璞秋生龍尾涼侵霞夜搖鐙語
風撼碧縈者爲虬簇者蛾行斜次雜共蜷蜿手無停度
劇弄梭宏農客卿座上客雄鳴藉掃么與麼欲銘功德
向四壁顧此堅懍誰能劇硯乎與汝好相結分等石友

亦已加闌干垂手鮮琢玉捧侍未許宮釵娥他年塗竄
堯典字伴我作籀書歸禾蜀山爲頤山之支脈陽羨陶
器皆出蜀山山原名獨東坡乞居陽羨時易名陶穴環
焉山麓有東坡祠陶煙飛染祠宇盡墨

稚歲寄鄭太守方坤云十年不見鄭瓜州竹馬猶傳郭
細侯萬卷在官書自寫他時歸抵橋千頭圍官菜地生
秋脆谿父瓜藤熟晚香松火竹寮風味美幾時分與使
君嘗鄭字則厚號荔鄉雍正癸卯進士官至兗州知府
嘗雜採前人說經之文爲經稗六卷其國朝詩鈔小傳
亦足備文獻之徵

會稽布衣丁煌鶴泉有繼吳禮部師道十臺懷古詩姑蘇章華朝陽黃金歌風戲馬望思銅雀鳳皇凌歊也吳詩如戲馬臺云寄奴千載心爭雄登高把酒臨秋風詐移晉鼎非男子君看百戰東城死氣骨錚錚可稱傑出其序言詩係濟南王所倡又栲栳山人岑安卿集中亦有此題而無凌歊止九臺而已商寶意越風云往見高澹人天祿志餘云許渾凌歊臺詩宋祖乃劉裕也南史稱宋祖清簡寡欲嬪御至少安得有二千歌舞之事耶按澹人止知高祖稱祖而不知孝文廟號太祖孝武廟號世祖蓋三世稱祖也澹人誤指孝武爲高祖未閱全

史何得妄議古人然其誤始於明焦弱侯竝其說見焦氏筆乘近時和是題者唯嚴海珊與予及鶴泉不誤海珊詩三千粉黛哭失聲羣巫又掘殷妃墓予詩陰室開時知儉德麻拂葛籠猶挂壁嗣孫好作色禽荒田舍翁聞應歎息若杜雲川誰奉赤書歸傅亮自來黃屋笑桓元亦指爲劉裕其考訂極爲明瞭至宋玉神女賦序昔者先王指懷王也古今人誤作襄王則承譌已久矣

彭剛直有絕句云江上新晴霽色開綠楊深處見樓臺老漁未肯拋蓑笠猶恐輕雷送雨來爲一時所誦蓋當金陵甫克餘孽未清安不忘危之意也然語意亦有所

本山陰吳燮齋明經修道曾舉丙辰鴻博以親老辭與
汪師李胡稚威周圍牧相友善其題畫云渡頭幾處漲
新田小艇垂楊隔岸煙來往莫拋牛背笠未應明日是
晴天詩意尤爲含蓄

嘉興金陳登病起述懷云花落正如佳客去書存時當
故人看海鹽朱之溥夏日感懷云睡思及午濃於夜花
好當階豔若春

武寧盛樂字水賓號劍山教授際斯季子與兄謨鏡並
以詩文名人稱三盛先生以貢生應鴻博不第乾隆壬
戌歲暮懷人詩三十首情詞相副旨義高夔吳鏡秋云

君平不欺志道在身可隱
搴帷向世人煙霧上衣領不
聞闐闐聲但見巖花影
葉秋林云銅柯盤十丈結根在
遙岑下有太古雲相隨獨至今
行者空喟歎寧知多苦心
張旦尾云平生有微恨不見黃
叔度頗欲慰茲懷憑君理紈素
廣漢靜無瀾高空下寒露龔松
丈云小儒百不能鞏繡以求偶
抵閒掠微榮棄之若芻狗誰憐
張仲蔚清聲落人後吳星濤云
天上多憂患公莫學神仙古
來誰得意豈獨李青蓮我亦釣
鼈者垂綸三十年李先民云雲
與匡廬別隨風落湖水湖水去
不歸相望何時已寄語山中雲
珍重宿巖裏黃一峰云結屋香
山下奇

峰九十九中有一峰高勢與華衡醜鸞鶴度遙音時時
落虛牖李屯菴云菊花向我言明日秋風去時節不苟
延晚榮亦顛顛借韻獨有青松枝閱盡空山雨毛書雲云
毛嬙如處子亦住若耶谿臨谿漚白苧水澀聲淒淒不
學鍾離意強顏東說齊鄭克柔云維揚舊板橋尙照吹
簫月月光亦不缺簫聲亦不歇此時鄭廣文秋懷正淒
絕陳越三云谷風粲然至桃李欲有言爲君發新安因
風墮高軒知君感搖落慘澹招春魂閔蓮峰云何遜與
梅花不知何因緣一上凌風臺使我百慮捐梅花與何
遜各自全其天饒古蘇云洛陽古才子三十作王傅微

辭弔秋水閭閻傷遲暮君看平津侯終當轉高步余非
睡云永叔初爲文北面于師魯淺深各有涯後先或相
取九畹淒且荒十年愧風雨魏功夏云番刀啟和璞刻
作夷門雲椎牛釁古鼎持壽信陵君上邪甲與乙要結
徒紛紛熊墨園云康齋昔講學卻聘表華碣盛名不可
居何況求聞達遐哉杜五郎課兒就春垞甘周書云落
霞橫祕閣天漢正西流美人低翠袖凝慮如有求遲迴
申苦調趨豔蒼高秋李若林云玉川洛城裏破屋翳長
蒿君今不得意心跡何勞勞幾時決春漲一蕩市門囂
洪周木云晉人泛虛匏逸少經世務臨池亦偶然所憂

在國步惜哉右將軍勳名託豪素能浣青云雄劍出鮫
胎寒芒動古壁一騁沙場中千軍盡辟易回憶棄捐時
土花無人蝕陳凌虛云龍川景前烈炙硯錄英豪壯夫
多苦志簡簡聲何高露華深夜冷倚柱摩歐刀楊念中
云海燕還家時道與賓鴻語行邁各有由寸心自相許
但願雪霜稀留君好毛羽江于九云昔夢浮大江同舟
者誰子佳人杜牧之簫吹中夜起月上小孤山至今感
人耳李梅倩云慘慘女貞花冷香不堪裊不愛春風妍
長有好枝葉深谷少行人光影自相接張行之云輕塵
諦虛元峩冠譚性命于世苟無濟何論宋與晉獨有象

山翁不負荆門令，龔鳴玉云朔風懾羣動，天意在微陽。
君子憂細故，眾人毀大防，衡門獨坐者，局曲意何傷。
趙山南云長離下九天，萬物駭相告，不知是何祥，但言文
采妙，竹花易飄零，高林激清嘯，汪輦雲云我愁一萬斛，
軻得八千斗，上帝權衡之授受，原不苟，歲暮勞羈魂，沙
風向人吼，楊子載云蓼蟲如志士，習苦不言難，敢問華
屋中幾人勝，憂患行邁何蹢蹢，白日照枯顏，蔣心餘云
蒲牢咽危響，海水羣相飛，驚波自棖觸，沃日日生暉，煩
君起聾廢，莫憚知音希，自序謂響不欲諧，貌不欲澤，務
使其人情志魂識與我相接，庶幾遠望可以當歸，悲歌

可以當泣得六義之旨矣楊屋汪軻皆其弟子

盛劍山古詩如黃澗洞云日月不到處時有春草生極似東野律詩如泊金塘云寒雲流不定勢與暮江平落葉有餘響飛鴻無壯聲故山連夜雨秋水一時生淼淼金塘澗何從問去程送朱孺翀歸吉州云主人正乞米有客復單衣雨雪連江至艱難送汝歸孤鴻遲舊侶漁火下寒磯相看不能別壯心今已違皆不落甜俗

張瓜田倪雲林谿山無盡圖云清闕高人標格奇意趣豈復同凡兒偶然適興寫山水冷冽疑欲凌人肌想是餐霞卻火食不然那得清如斯此卷高尺長減仞幽谿

重復山逶迤枯林一簇山之麓林下森森置兩屋蓋茅
零落牆欲頽屋後蕭疏映叢竹柴門不閉闔無人煙波
迤漾平浸門旁通略約亦將斷舟楫沈齧洲沙痕崇峰
側嶺絕蹊眈荒寒似寫亂後村要是生當至元末亂亡
在在驚心魂目有所傷手自應豈惟迂僻成性存此卷
筆法尤可喜細觀不與常作似山石居然王右丞樹木
全逼營邱李枯淡雖云是本色神物須知備眾美李君
珍惜同隨珠白云得之酒家胡出坎藉茅非偶爾定是
迂翁神與俱題畫入妙其自作可知女夫平湖陸念劬
明經同舉鴻博有松鱗集

周元木撰鴻爪錄錄丙辰同徵二百六十七人之詩其
長安鐙夕篇及隆福寺觀市一百韻皆可入春明夢痕
嘗病眼數月不愈客勸靜坐省思慮以養之作詩云眼
爲見色根天燭含內景晶然蒲萄朵流逸奔萬境愧非
杜父姿點漆瞳雙炯春風惡作劇吹火變微晷初如刺
錐末巖電爛俄頃紅碧炫狂花舉目礙游騁生平阮嗣
宗途窮悵莫騁多白殊少青不見靚女靚厥罰更何爲
數月類矇冥洒卮久不親書帙亦復屏刮膜無金篦盧
醫仍煩請欲速翳轉深徒然怒生癭有客張湛流古方
傳示做曰此大火聚弗熄勢將猛絕慮去其媒治躁厥

惟靜譬如水沸甌爨止則清冷低徊聽客言豁若咽去
鯁顧視小窗虛天光自罔罔沈菘林稱其詩體靜旨遠
信不誣也萬循初自笑一首云自笑昏昏野馬塵生年
卯酉早司晨纖毫漫辨江休復寸牘難離歐仲賓豈有
虛名稱好士只應危語誚盲人筋搖脈轉難咨詰欲就
琉璃悟淨因癸辛雜識凡人損目者命多是卯酉克梅
堯臣同蔡君謨江鄰幾觀宋宗道書畫詩坐中鄰幾素
近視最辨纖細時驚吁龍衮江南野史歐陽觀有目疾
不能遠視矚讀行句去牘不遠寸魏武稱丁儀爲好士
宋濂有咨目童文二詩於病目可謂體寫盡致同時齊

息園宗伯目炯炯能矚一二十里許嘗登杭州之鳳皇山視隔江西興渡人歷歷可辨洵異秉也

天長陳燭門教授以剛康熙壬辰進士舉乾隆丙辰鴻博王樓村稱其詩研晷練爽曼魄淒肌次韻酬鮑勺亭云十載遲良晤蹉跎直至今秋風雙鬢影落日一江陰湖海聲名薄關河涕淚深空餘飄泊恨無以慰知音大地飛鴻迹沙寒水氣昏煙波存釣艇風雪老江村窮豈文章過生猶覆載恩心頭千古血擬代獻君門所謂悲悽引泣者此種是也

王文簡探梅鄧尉望漁洋山因自號漁洋山人愛其名

實未嘗到也沈鮮谿尙書往游賦詩云鴻爪雪泥懷往事閒身真箇到漁洋

庶吉士肄業向無地雍正閒特賜屋爲教習館復出關稅鹽課之贏以厚其食 高宗卽位御製樂善堂文集日知薈說成於庶吉士入館之始賜是書著爲例河內范泰恆崧年燕川集有賜書記

萬循初和吳樸存詠榆葉餅云如錢遲挾鑄早葉入廚炊采自明星下餐當禁火時香應嘗麥好暝豈養生宜偶共吳均說牢丸未足奇和幼循食藤花云作羹遺事渺東坡野饌今傳雪麪拖心苦不同細惹掐葉香難學

冷淘和供因佛盃餐逾淨取到蜂糧政太苛毛莢尋垂
青累累飽儂何似豆棚多剛榴云剛榴北地貴品過肅
寧桃瓶墜看辭帶珠明笑解苞直牛寧論價少子卻宜
饗尙憶觴蒲候繁枝映日燒此三物皆河朔風味讀之
有尊鱸之思其食山藥句云種如人蹠肥尤甚屑就瓊
糜淖亦宜亦北產爲勝

石厓山在陽山縣北五里山頂石壁高二十餘尺廣倍
之刻皇宋聖傳頌并序紹熙元年正月十有五日庚午
迪功郎連州陽山令管勸農公事張本中賦并書又有
大峰之顛東麓之地數語亦本中識紹熙元年光宗卽

位之次年也柘坡之兄敬懷癸亥令陽山柘坡奉母至
縣齋甲子石厓山觀磨厓聖傳頌云空巖到頂山級窮
林疏石瘦荆榛豐野人導客尋古刻藤枝綠暗藤花紅
高餘二丈濶四丈撮襟大字書當中首言二聖體天地
卷舒進退陰陽同次言詒謀逮孫子常臨父母忘高崇
頌詩七言遡皇極意配清廟歌臣工旁加短語亦幽絕
石泉流水平陵通法堯禪舜古所有父子何必睇重瞳
拓拔字文事佚樂首棄國政傳童蒙唐之四君亦倉猝
事等刼制非純終徽欽北行宋南渡光堯太上中興隆
隆興授子年鬢暮窈然汾水觀鴻濛洎熙之末率舊典

率官格祖開明聰頌揚君德臣子職內禪作頌廬陵翁
岳倦翁程史云中興授受之懿追媿堯禹一時薦紳名
士親逢盛際濃墨大字以侈千一之遇者閒有之而史
不多見因獨載廬陵王才邊州窮邑聲教遠好事亦有
臣子俊清熙內禪頌一篇張迪功一朝將種司內政連歲不謁重華宮都人隱憂
臺諫泣引裾排闥聲鴻瓏嘉王攝位榦父蠱草草時勢
同癡聾信知禪讓非美事盛德有愧穹碑礪紹熙歷今
五百載越南軼事隨沙蟲惟存正氣不磨滅或爲震電
爲奔虹海陵覆舟碣大節匡門負帝祠孤忠茲山豈亦
神鬼護孑立僻壤光熊熊兒童敲火牛礪角讀罷四望
蒼煙空扶筇曾看家人卦吹船未著浯谿風澗泉滌筆

聊一賦明月冉冉桃江東中間論禪讓數語可謂獨有
千古至陳伯璣撰古人幾部以堯之傳舜舜之逃象皆
目爲知幾比諸明哲保身之士雖淺之乎測聖人要亦
傷心人語也敬懷名光謙嘗修陽山縣志柘坡丁卯再
至有題新志二首謂水經云匯水出桂陽盧聚東南過
浛匯縣南出匯浦關爲桂水注云水出桂陽縣西北上
驛山盧谿爲盧谿水東南流逕桂陽縣故城謂之匯水
又東南流出桂陽南至四會歷貞女峽南出又合匯水
匯水又東南入陽山縣右合漣口水匯水又東南流與
斟水合匯水又南逕縣故城又逕陽山縣南又南東流

又東南左合翁水滙水又東南左合陶水又逕含滙縣
西出滙浦關右合溱水謂之滙口酈氏序滙水源流如
此予按經言滙水而注言滙水是貞女峽以下不名滙
也注于漣口水斟水翁水陶水皆別詳所出之山獨于
滙水不詳所出是滙水卽匯水其云又合滙水必是又
名滙水之誤閱者不察耳匯水名盧谿水又名滙水又
名桂水名已繁矣而山海經又謂之湟水徐廣又謂之
漼水其外又有潢水出桂陽西北山東南注肄水入敦
浦西又有滙水亦出桂陽西北東南注肄入敦浦西皆
載在酈氏注其滙水一條在溱水下考溱水卽今之滇

水也酈氏于涇水出關之後言右合溱水則于溱水下亦宜有合涇水之文今竟闕焉乃合涇之文雖闕而于溱水又西南下反有涇水入焉之文涇水下又僅有注肆水之文而無注溱之說肆水出臨晉西南東南注海入番禺西又頗與溱水相似又潢水所出所注所入一一與涇水同記載躋駁名號繁複酈氏之失此爲最矣總而按之涇水卽潢水亦卽涇水也因地名而異則曰盧谿曰涇曰桂因同聲而訛則曰涇曰湟曰潢因字形相近而謬則曰匯曰涇曰灌曰涇其實止一水耳貞女峽今在連州至含涇縣在陽山東南縣已廢其地猶名

浚洸屬英德設稅務云又謂漢之陽山當在嶺北吳之陽山始在嶺南若縣治自唐時已移水北非吳晉之舊皆足正舊志之誤

漳浦黃石齋先生責躬詩草草一世閒遂爲稊與秕又云浮雲不可刊月華爲之虧公在戍蔡玉卿夫人石潤嘗寫心經百卷及臨難夫人寄書勉以致命遂志沒後家人得其小冊自謂終于丙戌年六十二始信其能知來夫人雜花畫冊作于崇禎丙子正公居家爲民之時未幾召復中允花卉十種工緻生動每幅有四言題句末款云石道人命石潤蔡氏寫字端勁不類婦人藏石

耕唐氏後歸小山堂趙氏乾隆己巳柘坡觀于梁文莊
清勤堂作詩云東宮學士辭青緇海濱自侶魚與蝦學
堂斷斷靜不譁洞璣一部沈疴瘥濟陽淑儷美且姘閒
居翫物耽卉葩手調素粉研赤砂十指拂拂抽靈芽蠶
風蠻雨浥注嘉厥感土物先漳茶緋桃成畦粲若霞將
離鄭俗祛淫哇當歸蔓菁思禡牙米囊不羨鳴連耒小
草細碎尤抉爬莖條婀娜根鬢髻月季末幅意更遐兩
族合并長春花白蠶風蠻雨至此多彙括所題語何來鶴書鸞鳳眉彤
管遠不攜徵車公劾陳新甲疏云臣年踰五十非有妻子之奉婢僕之累尋依戍籍
燒荒畚音音香鑪茗盃天之涯滄桑復變旋漢槎龜茲小

國讒波遮市人驅戰蓬雜麻扁擔一旅蟲爲沙徒然賭

墅野客嗟捉鼻那似東山家

賭墅渾如昨歌鐘杳未天期何雲傷黃相國詩也

留正氣永不邪零星十幅依雙鬢茂漪筆陣銛莫鄒忠

惠家法非塗鴉心經百卷世更誇惜久零落涎蟲蝸今

得對此如靈蛇寶守敢不文綈加世閒紅紫紛土苴令

人惆悵譏春華柘坡亦能畫有廷簡招飲竹葉酒醉後

寫竹以贈并題一首嘗同紫仙具區崙仲犀若季治集

恂叔落華館作畫會自謂余生學畫無家數意到便隨

神理遇其爲馬力奮作玉井圖題一絕云冷霜甘蜜人

閒味玉檢金編天外峰畫裏不妨搖白羽仙家何處覓

茅龍其手刻印存曰尊莊印樸蔣春雨詩尊莊印樸誰
知得北郭詩人萬柘坡

寶祐四年登科錄第一甲第一人文天祥第二甲第一
人謝枋得第二十七人陸秀夫覆考檢點試卷官則王
應麟也自開寶八年始有省元狀元之別至是凡九十
六科文山弟璧亦是科進士宋史陸秀夫景定元年進
士與此錄不同柘坡有與汪豐玉聯句詩

錢擇石哭萬孝廉詩銜悲宛轉尋餘味在世蒼茫累此
情萬里母妻惟涕淚一塵天地有文章語極沈痛擇石
與柘坡同補儒學生交最契卒於庚午三十九時館梁

文莊京邸籜石詩有倩作家書呼范子待傳手稟寄汪君之句汪謂康古范謂明經同治遺書盈尺未盡衷集其聞漁閣集庚申八月十一日查恂叔招同西顥文錫游盤山晡時于楊村渡河十二日過寶坻二更至崔黃口十三日自邦軍入山停車蓮花池步至天成寺少息至西甘澗老僧法天出所藏李隱士琴觀之又引觀元全真王棲真所居石龕至東澗還宿天成寺樓十四日由東甘澗樵徑至古中盤登正法寺閣望紫蓋峰下閣避雨於五松堂雨霽過中盤飯於少林寺至紅龍池觀明正德十年除夕廬師邵等題名出黑塔溝失道陷深

谷中攀繩而上至上方寺夜宿東竺菴十五日游雲罩
寺登自來挂月二峰下山厯石筍洞青溝禪院萬松寺
上劍臺翫月翠屏峰下十六乘山輿至感化寺又至天
香妙祥寺寺多柿一池養魚云冬寒則納之于井又至
佑唐寺觀洗盃池搖動石唐咸通時碑尙存還至鯨甲
石是眾水交匯處再宿東竺菴夜大風十七日重過上
方寺遂至山後游青峰法藏雙峰諸寺皆有詩紀之其
云蘄州李隱士穹谷龍蛇蟠負薪以養母用勞爲承歡
筮逢蠱上九高尚同伏鸞當途勸不膺名晦迹亦刊老
僧業淨土結屋臨哀湍示我壞琴一古聲如未彈年深

漆色碎嵐重絃絲寬旋觀不敢弄挂壁莓苔乾隱士李
光四也

程縣莊與弟南畊同以績學名縣莊治經南畊治史陶
甄夫以二女妻其兄弟縣莊詩淮行雜詠云欸乃中流
靜迢迢夜氣平低天侵水濶初月過波明沙影連昏樹
村燈露古城已拌千里客不敢惜前程晚樹鍾離國蒼
山禹會村水流背殘日人語向中原牢落惟餘劔平生
少受恩古來多感慨非獨慕乘軒野草尋荒岸危檣斷
靄閒煙波三楚地風雨八公山獨鳥凌空去浮雲帶晚
還鄉心同逝水夜夜到江關骨力蒼堅不同浮響南畊

有明宮詞百首李選侍鼎革後尙存康熙甲寅五月始卒鄭貴妃葬銀泉山西李耐其處有青史尙傳封二后玉鈞斜畔耐宮人之句

北夢瑣言河中產無核棗汪西顛謝查貢木餽虛中棗詩消夜分佳果登盤朱實稠甜多逾石蜜顆皺敵牛頭種似河中乞名難海上求木桃無以報慙愧赤心投貢木心穀從孫

劉才甫過望谿先生龍潭別墅云醉過西州涕淚并鳥飛花落總關情關西伯起殊多難江左夷吾詎噉名誓欲相從慙九死空聞會葬忝諸生祇今卮酒論經處更

得何人一字評望谿以作編修戴名世集序免罪隸旗籍

聖祖知其文學特命入直南書房尋直蒙養齋編校

御製樂律算法諸書 世宗嗣位恩詔其一以族人罪

犯牽連入旗者赦歸原籍時入旗合詔條者惟戴名世案而原讞例不得援赦刑部特請肆赦旣承恩宥請假歸葬雍正三年召見有 先帝持法朕原情汝老學當

知此義之諭九年授中允累擢禮部侍郎 高宗召對

密薦魏廷珍劾任蘭枝出卽告人及庶吉士將散館望谿奏定人數臨期復補請吳喬齡預試所居屋卽喬齡

產故爲之請 上察知之落職後賞侍講銜回籍曾文
正嘗謂其經世之學持論太高當時自朱文端楊文定
數人外多見謂迂濶而不近人情至其乾隆二年上疏
謂本朝敬禮大臣優恤庶官遠過前明而公卿大臣抗
節效忠者寥寥可數士大夫之氣習風聲則遠不逮自
是不刊之論才甫再傳爲惜抱懷海峰先生云先生高
臥楚雲旁賤子飄零每憶鄉四海但知存父執一鳴嘗
記值孫陽於今耽酒能多少他日奇文恐散亡脫足耦
耕如未晚百年吾亦髮蒼蒼其過海峰故居二詩尤爲
追愴沈摯師友之閒風義可念

華亭張少儀糧儲本姓邾宋邾亶之後明季困于戶役
蒙張氏祖德純字能一有淞南詩鈔父之頊字堅孟以
歲貢教授出宰印江負帑下刑部獄論戍極邊少儀方
爲諸生詣闕急難卒得論出長于章奏由高文良舉宏
詞不第甲子十闕秋闈再叨乙榜就職貴州縣丞嘗賦
黃鸚鵡云曾伴紅襟鎖殿廊還山新作道家裝隴頭寒
色驚秋籟天末餘暉戀夕陽觸緒欲吟金縷曲爭憐應
避雪衣孃舊時中使希相識銅鳳觚棧引夢長可從金
屋借輝光匿影雕櫳月正黃海鵠有心期太液宮鸞無
侶覓朝陽誦經台傍曇雲座銜蓋宜浮菊蕊香妄語近

來都懺悔敢將奇服耀南荒已已詔舉經學吾里張文
和公允隨鈕祜祿制府愛必達交章論薦制府時官貴
州巡撫所纂黔南識略蓋少儀相助爲理者居多其金
牀行云博南山南北睽北江沙晃漾黃金色洪鑪百鍊
得精鏐一流貨取十千直蠻兒嗜利夙輕生剗木爲牀
臨不測終朝之獲無錙銖失足往往蛟鼉食元明徵使
亟徵求騷然一方廢耕織投崖落壑不知數貢作宮釵
作容飾 國家百度鑿有殷可因則因革則革課從初
額更不增聊爲職方存舊式恢揚前列屬我 皇眷顧
西南念民力特頒明詔減什五令甲永懸石深刻昔聞

古聖淡無營，蠲金沈珠示冲德。物華地寶豈不貴，嗜欲
一開恐難塞。百金中止作露臺，漢文用以肥其國。今
皇節儉實過之，要與黔黎共休息。金牀金牀盍舍旃，莫
與風濤同轉側。少儀詩秀傑清麗，此作尤有關掌固。
桐鄉汪珊立太守筠少與祝豫堂錢籜石王穀原結詩
社晚歲自長沙歸囊橐蕭然以詩畫自娛有謙谷集泊
富陽云郭門面江啟人家背城住厭看隔江山鬱鬱青
無數遠遂逐漁來殘鴉逆風驚而我倚篷人躊躇憚前
路驛喧鐙漸上天澹月微吐何處有清醪一尊釋寒洩
晚過太湖云十幅春風緩張拓淡煙回首吳江郭隄樹

沈沈潮約約鏡中船翦朝光薄金庭玉柱青悄然包公
動定還年年安得蘸筆東峰巔三州坐擁醉不眠畫出
平遠江南天皆沈雋拔俗梧門祭酒所稱絕句三首則
以秀媚見許耳

青浦葉容齋由高文良薦舉鴻博詩如過郭有道墓云
名高八顧超羅網始信危言觸禍胎華林園云縱然魚
鳥同濠濮只是江山異雒州宿荏平云唐家房杜稱賢
相不及常何一武臣清製灑落皆能言其所言

雪橋詩話續集卷第四

雪橋詩話續集卷第五

遼陽楊鍾義撰集

吳興劉承幹參校

金檜門總憲贅於樞李汪氏讀書鐵舟園甥館汪鶴桴
范湖老宿也盡窺其藏書丙辰以中翰中式出松泉汪
文端之門廷試擢第一入直內廷屢典試事詩宗韓黃
常與錢汪相提唱蔣荅生張瘦銅奉瓣香焉其說詩謂
文詞之要古人所以不朽者只一切字切則日新而不
窮否則牽附粉飾外強中乾貌腴神悴苟知切之爲用
則變化卷舒象外箇中開闔無盡第各就學識才分成

其小大若浮夸以侈規模狹隘以詡矜貴是皆虛車也
其詩自題曰詩疑今刻曰詩存非先生志所刪亦多不
當故瘦銅有太元不副故人求之歎吾愛其劉表傳云
苦費書詞譬二袁自家豚犬向誰言鹿門未達高人旨
何處荊州遺子孫讀閒居賦云宦情巧拙細爲分養志
須知在守身乾沒到頭成大負版輿安否太夫人

劉震東郊謂粵東之屈開闢而麤新城之王娟秀而弱
薦青先生五言近體似初唐古則旋轉如意大開大闔
嘗讀看花什至山深造化全而老友宋介山適至擊節
云此唐人所未道薦青次韻荅劉東郊云名剌消磨短

袖中疏狂直與古人同獨來窮巷知何好深喜青尊且
未空一夕寒鐙疑夢寐十年長劍笑英雄驚鳥斷雁休
相亂好聽鄰雞唱曉風薦青貧而隱東郊貧而客情山
水而性風雅則同宜其論詩之有合也

大谷山堂詩有極近王韋者薄暮至萬松寺云山翠昏
陰崖雲際聞孤磬怖鴿驚深叢枯筇響蘿徑松關晚森
肅荷衣拂深淨日落山風吹琴筑灑深聽不見湯惠休
秋巖發高詠曳屐循道門檐閒數峰暝秋夜寄石堂云
嘉樹昏夕陰松際上初月澄輝動疏牖遙見數螢沒夜
靜寒露下微響出深樾窮巷數犬吠幽蟲語初歇支枕

澹相思坐聽孤鐘發

乾隆壬戌邵叔以進士廷對錢文端奉命讀卷獨賞
其書嘗爲叔書朱子小學題詞叔獻長句二首云
尚書榮遇冠儒臣食祿家居寵眷頻兩浙東西推大老
一湖煙水作閒人竝游英俊歸陶鑄得意文章泣鬼神
白髮門生偏有幸退耕仍得近清塵箋素堆牀老愛書
行閒筋骨壓嚴徐慚無左紙供揮翰幸有羊裙乞滿裾
親示箴規進庸惰謬將醇謹獎迂疏平生話契緣豪末
敢忘彤墀對策初比年內閣大庫散出殿廷試卷行款
疏落字體皆不失楷法初不類咸同以來競尙平滿光

圓致有匠書之誚余素不工院體書潘文勤師獨見賞拔謂有書味廿餘年來學書不進殊自恧也

純廟御極安平陳聖泉以孫文定薦起廢籍知登州監司河上顧用方總漕陞見奏稱陳法前知順德立鄉長行保甲繁簡得宜時盧鳳數遭水旱民轉徙戶口難稽特調盧鳳道行其法清釐之文定進呈其前官運河道所著河干問荅至是調淮揚道尋改大名道未任以河工濱海防決謫軍臺請贖得歸陳文恭稱其於得失榮辱之際正范文正所謂如四時寒暑之過乎吾前豈有二心者及詔舉經學以其深於易薦於朝復爲序所著

易箋其奉 旨回籍題壁云到來已覺人情熟歸去翻
憐惜別頻小大殷勤奉杯酒再來眞笑惠州人鮑雙五
謂先生潛心理學而不流爲擊壤一派弟浩字雨泉以
循良稱知昌平時內務府奏凡民違例典買旗地悉查
撤還旗兩泉獨抗爭曰旗漢皆 皇上赤子漢民處圈
外無恆產旗民以地誘之今旗民白手圖歸而漢民銀
地兩失 聖明豈不念閭閻疾苦乎府尹以聞得 旨
下戶部委員會同更正令旗人典賣時日淺者追全價
稍久者追半又久者不追還著爲令

詠黔中種人者以田端雲余鳧山竹枝詞爲最端雲詩

作於康熙辛丑謂九股苗善造強弩名偏架狝家苗多
伐人豕墓羅羅別有文字曰鬼書紫薑苗以十一月朔
爲節自元旦起忌門凡二七至元宵始相往來苗人歲
時召親戚俱搥銅鼓爭訟不入官府推其屬之公正善
言語者曰行頭鳧山謂羅鬼長死耐德卽爲女官耐德
其妻也朱家蔡家二種相傳皆宋人蔡人爲楚所俘放
之南徼遂流爲夷獠人居處必擇谿邊近水者以大樹
皮接水至家不用桶汲常采藥行醫歲節祀槃瓠夔人
在普安州近雲南境多松樹山茶凡狝人狝猪羅羅不
能相識者常以棘人通之車賽苗男子多技婦人工繡

前此馬三保之兵曾遺六百人於此與苗人爲壻遂成
苗故又稱六百戶生苗遵義李丹梧孝廉有苗爾雅雲
夢安曉珊有黔南雜詠四十六首寫苗疆風俗甚詳

湖北長樂地在萬山阻絕人境元以前爲蠻荒明初置
土官以羈縻之 本朝雍正十三年始改土歸流土官
多尙武略容美田氏頗事詩書以詩名者自九齡始萬
厯閒補諸生兩都名彥多與倡和有紫芝亭集武昌吳
明卿爲之序田元太初子霈霖雙雲旣霖夏雲甘霖特
雲相繼爲宣慰使均有集太初甲申除夕感懷詩序云
歲運趨於維新老人每多感舊余受先帝寵錫實爲邊

臣奇邁赤眉爲虐朱萐多慚悲感前事嗚咽成詩以示
兒子輩各宣欲言遂相率步韻命曰笠浦合集其詩云
飛光悲臘盡一夕尙今年坐歎龍髯渺誰攀義轡還舊
恩難遽釋孤憤豈徒懸縱說青陽好笙歌輟市廛兒童
未解意柏酒過相勞曾飽誰家粟難看改歲桃酸心聽
畫角伏枕厭鈴靴逆數經年過驚蓬轉泛舸終歲蹉跎
晚重新可奈何愁先青鳥至眼轉白駒過往事歸春夢
流光付逝波未堪言代謝意氣隱銷磨隔宿分新舊斯
時匪往時閒心嗟過客冷眼盼殘棋虛抱三閭憾難將
一木支許多慷慨意寂寂壓雙眉鐙燭輝如晝庸關守

歲心繁華暗欲歇歌鼓漫催深柏酒仍同昔辛盤少頌
今等閒佳節候歡喜變悲吟太初弟圭特夫尤崇尚風
雅子商霖珠濤亦能詩特雲子舜年嘗徵江漢名流輯
廿一史補遺日自課某日讀某經閱某史至某處用小
印志之有白鹿堂集歡餘吟清江紀行等詩稿云亭山
人謂其每宴客必命家姬奏桃花扇田泰斗讀九峰公
一家言曰橫絕英雄筆千霄氣象邁一朝弘典策半部
小春秋宣慰邦之彥將軍儒者流摩崖碑在石洞口水
悠悠欲徵千古信須備一家言石走星胡墜詞荒事莫
論汗功收塞外血淚灑都門如此忠勤蹟差堪示子孫

我亦周遺子豪情鄙孟嘗葵心甘向日槐穴恥稱王雨
露 熙朝渥衣冠漢代香抱經懷祖德非敢騁詞場九
峰舜年號一家言者田氏家集也以槐穴句考之蓋作
於歸流以後在乾隆初矣

王東澱青山莊記謂青山在常州之江陰距府數十里
方伯張公別墅在府治北郭取以名其莊案方伯名括
字叔度蓋文貞公之孫天門學士之子也自京口移家
於此中有樂是軒人稱樂是先生莊故主吳氏宜興相
婦翁也吳有季女死於此時時形見雖屢易姓皆祠其
木主云厲太鴻詩入門先見水宛似在濠梁林影橫煙

艇流文照畫廊清華從此始崩剝勢難忘客路偏佳境
尤宜勝侶將縱步平橋上空涼得最多俯窺開弱藻交
語出喬柯尙記橫塘夢如聞子夜歌何當逢吉語來看
颭新荷升降疑無極岡巒望更寬頽陽一枝塔飛翠幾
層闌樹杪吳天盡窗中春事殘米囊花滿眼應是勸加
餐前朝正壑擅人說兩愚公物力爲山盡經營易主同
客歸書閣閉鳥下石枰空游興兼離緒分襟向晚風錫
山鄒彥吉爲園名愚公谷此莊初主吳服于亦號愚公
也方伯弱冠能詩文善書法兼工繪事 世宗御極以
大臣後裔召賜顧問由刑部員外授陝西督糧參議薦

至直隸布政使秉性豪放無緣飾招延賓客榜門有詩
酒可共語乾隆閒忤當事以居鄉不法入奏身罹重辟
家產籍沒青山莊遂鞠爲茂草壁閒所嵌晉宋名碣皆
爲灰粉所污當事公讌必設席於此馮孟亭詩層層麥
浪涌春田小徑縈紆謝墅前夾岸通橋平似掌沿隄壘
石亞於肩林藏巖洞深逾秀花帶煙雲澹倍妍最愛流
波渺無際遙汀微露釣魚船芳園歲久如圖畫金碧當
初枉鬪奢老樹閱人更幾姓修篁避俗自成家雨淋敗
檻藤浮沼風撼虛堂燕集沙猶有野農能好事菜畦留
得牡丹芽塔鈴喚醒世閒人名勝惟餘現在身粉壁縱

橫塗短碣酒觴稠疊展新茵平泉花木徒勞記金谷繁
華早化塵南望故鄉懷倦圃雪中鴻爪有前因末韻謂
曹秋岳倦圃亦屢易主侍御嘗僦居其中

安南故交阯也其王黎氏受封 本朝時莫元清據高

平亦受都統職屢構兵既攻取高平至乾隆初遺孽未
靖丁卯九月交人夜逐莫黨薄我歸順州莫漢卡之塞
垣戍卒聞聲協捕時方昧爽兵匪雜沓交人誤殺戍卒
二人掠去三人詰旦知爲我兵也函其級及所掠以還
事聞於朝念其恭事百年不卽加誅但勒其獻凶正典
戊辰秋其王遣高平督鎮武廷蓉械囚三人送至境沈

坳堂方抵任左江奉檄鞫囚卽日赴歸順之鼓架卡其地切臨交境崇山密箐伐竹木爲堂夷官止其從人於外屏息進匄伏請命勞以牲醴頓首而去勘問三犯具狀請 旨事竣署鎮安守許守朝以六詩紀其事安南貢使四人一正使一內官二行人皆烏紗緋袍金帶皂鞢以俗以披髮爲恭跣階下行三叩首禮予之屬就地旁坐飲之茗起謝戊辰正使阮宗塞服孔雀補通事傳其言蓋某科會元官戶部侍郎其國取士以詩賦策論官秩崇卑一奉天朝品制以戊辰之春入鎮南關下潯梧沂漓江渡洞庭繞長江達析津至都庚辰二月還

國蓋兩年也太平龍州設三關正南曰鎮南惟貢使出
入迤西曰水口曰平南商人執照往來

吳江王藻載揚王樑親庭稱平望二王親庭性至孝於
先墓側築月湖丙舍孺慕不衰詩高淡尤長五古雜詩
云知者事結駟愚者事灌園所稟一以異所營遂以分
二者途固殊要各全其天違已則交病形豈逐物遷介
焉安其分鼓腹農圃間載揚詩如題雪朝蘭社圖云數
筆崇蘭留紙上可憐都似夕陽紅殊有意致圖爲崇禎
十四年冬顧眉生畫阮大鍼賦詩西疇方氏所藏

華亭戴西樵孝廉名其集曰甘所取昌黎零落甘所丁

語也出門云古人惜別離離別何足悲得志及少壯我
行已暮遲妻子非所顧衰親獨繫思臨行兩行淚嗚咽
無一詞指點手中卷訓言盡在茲再拜出門去腸斷西
風時夢涑棟云一別痛數載函關西復西豈不願觀止
無由慰淒其鱗鴻且阻滯魂魄誰護持緩步入我室握
手若曩時曩時見爾喜今朝見爾悲悲喜互起滅惘然
無盡期自序謂所存者皆含毫欲下淚與俱來之語信
非虛也其早起先愁午易倦淺斟惟取醉難成亦獨到
語

金壇史公度震林丁巳進士官淮安教授工久分書寫

樹石蘭竹亦復生秀所著西清散記皆因寄所託誘人
爲善之意詩如贈邢九相云南湖無水草連沙此地重
留玩晚霞明月滿臺君已去春愁交與杜鵑花趙鳳淇
闇叔訪余集雲菴云殘月僧牀聽曉鐘預愁相別悔相
逢澹黃雅柏湖西路得送孤帆是遠峰具饒風韻

朱卉草衣休寧人家白下詩如任昉尙存親友澹謝安
作惡別離多任俠名成家已破負恩奴散累初輕官罷
朝衣頻質庫時清諫紙盡鈔書羸酒遠澆亡友墓忍寒
先贖故人衣皆清眞樸老不襲陳言世所傳夕陽僧打
破樓鐘之句不足以盡之

江都杜甲補堂由真定府通判游牧遵化通二州精白
有幹略鐵君詩所謂父老漫愁征調急杜詩今日在南
陽者也歷守浙之寧紹杭州直隸之河閒四郡所居恆
見稱述沈學子嘗爲作治行記其尊人果齋分司天津
嘗鑿井大孫莊施利濟功鐵君有杜井篇紀其事補堂
一字禹門次查心穀茶棚寺詩韻云聽泉噴石磴看雪
灑松門心穀復用前韻荅之有云二月春風路荒村古
寺門

山陰童二樹與同邑劉鳳岡鳴玉茅少菊逸並以能詩
善畫稱與商寶意劉豹君輩結社號西園十子其爲沈

泊村題畫扇云疏疏隄柳曳殘煙郁郁汀蘭而遠天斜
日半邊雲半摺一竿山影落漁船水闊雲寒落日時兼
葭采采樹離離醉來有意無人會權向中流讀楚詞

乾隆閒大旱儲梅夫宗丞疏論時政得失有云自古人

主患不明惟 皇上患明之太過自古人主患不斷惟

皇上患斷之太速卽如擢一官點一差往往出人意

表爲擬議所不及此雖不足上累聖德然臣願 皇上

開誠布公太和翔洽要使天下服 皇上用人之至當

而不必徒使天下驚 皇上用人之甚奇唐臣韓愈曰

獨陽爲旱獨陰爲水君陽臣陰有君無臣是以久旱今

皇上宵衣旰食焦勞於法宮之中而王公大臣拱手
備位曾不聞出一謀獻一畫上贊主德輔宣聖化君勞
於上臣逸於下天道下濟而地道不能上行其於致旱
理或宜然臣區區之忱願 皇上虛中無我一切用人
行政不改鑑空衡平之體又於一二純誠憂國之大臣
時賜召對清宴之餘資其輔益必能時雨時風銷殄旱
災矣爲當時所傳誦其漢中道上聞蟬云金雁橋邊枕
曲流幽篁千畝碧煙稠巴中候比秦中早一路蟬聲到

嘉州

劉海峰詩死別漸欺初日諾長貧難作託孤人趙甌北

詩久客不歸無異死故人入夢尙如生一紙寄家言未盡萬山圍路夢難歸身去空留詩句好命窮眞到子孫微皆極眞摯

歸安姚荃亭明經文泰有論詩絕句六首其序云雙林詩人勝朝有張夢坡淵國初有沈雪樵祖孝尙矣近自沈蓉鄉侍御懋華沈泊邨太守瀾茅湘客學博應奎及孫遂初明經培沈養拙文學三秀諸老輩相繼徂謝後生小子有舉其名而不知者感慨之餘賦此紀之張居鴻墩卽以名其集入正大祐樂天鄉社勞太守府志出其手又少時夢東坡授以詩法故號夢坡詳見都南濠

詩話詩云坡老傳詩是也非鴻墩遺集識應希誰知太守徵文獻五馬親來叩竹扉沈爲何北司寇猶子入江南鉅公之門晚寓烏戍賣卜以給詩云名重詞場沈雪樵果然屈宋祖風騷石頭又見降旛豎晦迹何辭賣卜勞泊村太守遂初明經俱出蓉鄉侍御之門記丁丑春太守南旋曾命予受詩法於遂初詩云宗工哲匠典刑存前數蓉鄉後泊邨一自傳衣經指點瓣香不惜奉蘇門文學號石塘舊客商工冢宰西陂歸里與先子結華月社晚歲復同小子倡和從游甚眾詩云梁苑遄歸鬢有霜列卿子弟半門牆忘年廿載投鄉社競鑄黃金老

石塘余因文學明經兩先生復受業博士門時偕游者
爲凌子薌萃俞子散仙一時忝齊名之目詩云真訣自
從茅氏得論詩三子忝齊名海流萬派原歸一畢竟才
華敵兩京盧鹺使紅橋修禊詩和者徧大江南北散仙
五章最爲所賞薌萃金陵懷古諸什余獨愛何期燕子
飛來日正是王孫化去年一聯而故友高東井專許其
風調沈問莊先受詩法於凌子後始同余從明經游詩
云雅雨憐才到散仙薌萃風調更翩翩所嗟擤笛先偷
譜吾黨還來沈下賢其於鄉先生詩學源流可謂盡心
近世學者師心蔑古於前輩輒一意抹殺其用心之厚

薄不侔而世道隨之矣

石門方雪屏布衣蘭坻尊人也伍大夫祠句云一身恩怨分吳楚兩國存亡繫死生語極渾括吾謂子胥一生全是意氣用事江都徐浣舟抵胥門詩爭長黃池後應知霸業灰何勞抉雙目定盼越人來可謂筆挾風霜

鄭克柔乳母詩序云乳母費氏先祖母蔡太孺人之侍婢也變四歲失母育於費氏時值歲饑自食於外服勞於內每晨起負變入市中以一錢市一餅置變手然後治他事間有魚飧瓜果必先食變然後夫妻子母可得食也數年費益不支其夫謀去乳母不敢言然長帶淚

痕日取太孺人舊衣濺洗綴補汲水盈缸滿甕又買薪
數十束積竈下不數日竟去矣燮晨入其室空空然見
破牀敗几縱橫視其竈猶溫有飯一盞菜一盂藏釜內
卽常所視燮者也燮痛哭竟亦不能食矣後三年來歸
侍太夫人撫燮倍摯又三十四年而卒壽七十有六方
來歸之明年其子俊得操江提塘官屢迎養之卒不去
以太夫人及燮故燮成進士乃喜曰吾撫幼主成名兒
子作八品官復何恨遂以無疾終詩曰平生所負恩不
獨一乳母長恨富貴遲遂令慚惡久黃泉路迂闊白髮
人老醜食祿千萬鍾不如餅在手情眞語摯一序亦無

贍語

符幼魯詩好官不作如三黜何物能閒似陸郎謂江都
陸淳川郎中鍾輝刻有陸魯望笠澤叢書姜白石詩詞
合集著有放鶴亭小稿環谿詞月夜汎櫂眞州訪陳玉
几句云斷鴻前夜夢孤月此時心

富谿汪近人士慎僑寓邗江有巢林集七卷手書上版
性嗜茗茗卷端畫有啜茶小像善分書工畫梅朴不外
飾儉不苟取萬循初煎茶畫梅歌寄近人揚州云淮南
有高士結屋青山中杉陰時時畫梅樹復有水扈日飲
茗汁如王濛遠道無由作茗會想見風鑪響松檜畫梅

曾對一兩花雪後水邊還竹外近聞茶損一目成偏盲
猶能映窗弄筆曲折承窗光長縑已完茶亦熟啜茶看
畫春風香大明寺中泉第五東閣詩成興千古繁華地
有冷澹人桃李膏梁盡塵土新芽都統籃舊夢中峰菴
種梅何必庾嶺雪種茶何必蒙山嵐人生適意是鄉里
官園野驛我亦思江南梅花味苦茶味甘厲樊榭題汪
近人煎茶圖云巢林先生愛梅兼愛茶啜茗日日寫梅
花要將胸中清苦味吐作紙上冰霜極敲門走送古梅
枝索我煎茶圖子詩此圖乃是西唐山人所作之橫幅
窠石苔皴安矮屋石邊修竹不受戾合和茶煙上空綠

石兄竹弟玉川居山屐田衣野態疏素資傳處三四客
盡讓先生七椀餘先生一目盲似杜子夏不事王侯恣
蕭灑尙留一目著花梢鐵線圈成春染惹春風過後發
茶香放筆橫眠夢蜚牀南船北馬喧如沸肯出城陰舊
草堂

英夢堂卜硯山房後集序云周子月東續刻其詩成余
讀之歎曰月東真強項人哉客聞之笑曰子不嘗見月
東乎恂恂一老書生臞不任衣子謂之曰強項何其閻
也余曰否否子不嘗見前此之學詩者乎上者附於杜
韓以擣搯爲竊取次之附於蘇陸以規仿爲能事求其

自有之性情面目茫乎不知安在其不爲此者輒羣非
笑之學杜韓者恆嗤人爲弱學蘇陸者恆嗤人爲拘不
知其自侈爲雄者特杜之麤韓之拗耳自侈爲放者特
蘇之露陸之俚耳杜韓蘇陸之真雄真放曷嘗有一於
此哉余讀月東之詩如礪溜忽鳴如籬花自開清微蕭
遠自寫其性情所欲言而一空擗摭規仿之習然則月
東乃傲然掉頭不肯爲眾人之詩而自爲其詩者謂非
強項而何客爲之領首不已戊辰七夕日文肅文不多
見曩撰文經時未得也因亟錄之文肅休沐日嘗於驪
馬市街徐步閒游鬧塵中見有人漫吟曰雪嶺界空天

際白無人回首望西山
間知爲金芥舟延入酒市訂交
而去其眞率如此然長六曹時
於僚屬不假辭色也
吳縣薛雪一瓢學詩於葉星期
其過先師分湖故宅又
至橫山別墅云一日孤懷兩世情
橫山分水各心驚
文章先後仍聲價
涕淚滄江竟死生
巷冷何人還駐馬
柳花無主斷鳴鶯
居人直指岡頭地
午夢春深草色平
星期孫曰叔蕃馮仁寓橫塘訪葉叔蕃詩
到此人煙古秋
深問草亭徑穿寒樹溼
門抱亂山青
述祖留風雅交朋
豁性靈揮杯忘日夕
漁唱起前汀

符幼魯爲初白及門其論杜詩取親眞熨切之句如狀

稻畦之水則云芊芊炯翠羽剌剌生銀漢寫灤岸之暮
則云春氣晚更生江流靜猶動模江雨之靜則曰高鳥
溼不下居人門未開繪山雲之薄則云晴飛半嶺鶴風
亂平洲樹故所作亦氣和而色淡志逸而神清其都城
上元竹枝詞云鳳城不信轉東風花匠能移造化功二
十四番齊在手一時催放照春紅珠結流蘇絡寶鐙星
毬佳製出時興游人競集琉璃廠巧樣爭誇見未曾桂
花香餡裏胡桃江米如珠井水淘見說馬家滴粉好試
鐙風裏賣元宵清脆鈴聲放鴿天春風流響粉雲邊竹
筒截出伶倫手妙法新傳絕可憐玉河冰泮水潺潺金

柳橋邊綠未扳春到瓊華春正好都人齊唱兔兒山星
月高高三五明天街相約上橋行就中樂事誰知得暗
裏春情獨自生小甕琉璃玉不如碧闌寸寸貯來虛兒
童擎向階前過滿市春聲喚賣魚風俗相傳總不同詩
家爭賦竹枝工他年誰紀都城勝好譜新翻樂府中
鄂文端以乾隆十年卒符幼魯題折竹圖云一枝鸞尾
風吹折獨向空山抱恨深餘得淚痕何處染此生虛負
賞音心詩爲丁卯年作感西林相公之亡也又有經故
相宅及游故相國園詩極爲愴惋胡雲持序春鳧小稿
謂故相鄂公故廷尉汪公知先生尤深

安麓邨善古詩鑒賞古蹟不爽豪髮傾家收藏項氏梁氏卞氏所珍頗爲當代推重錢文端詩所謂高麗流寓抗浪人姿顏自足多精神平生然諾重意氣米家書畫陶家珍者也幼魯嘗館於其家法書名繪相對評品日爲撫玩不置安氏貽以端谿研自麓邨歿所寶盡矣幼魯試硯詩竹雀叢叢暍夕陽幽窗啟處室生涼徒教畫軸雲煙過淚滴空餘古研香雲林堂峻仿倪迂彝鼎摩抄今在無一片秋光上吟屋蕭寥闕角冷雙梧

濟寧仲永檀樂園丙辰通籍爲鄭筠谷所取士乾隆六年以御史疏劾提督鄂善鄂善伏法泰安趙相國緣是

案降官超擢僉都御史尋遷副都御史七年坐與鄂虛
亭商量密奏之事革審未及定擬而卒幼魯過仲家淺
弔樂園詩疏入披鱗震膽寒霜威忽卷葉摧殘高談明
哲全生易成就聲華到死難三尺纔聞圍馬鬣九原何
處慰桐棺師門風義君能踐車過空餘腹痛酸幼魯亦
筠谷門人也

陽城田少宰懋爲文端相國從典之子乾隆丙寅詔以
其秉性輕浮言語不謹且嗜酒務博少年而不老成令
解任回籍閉戶讀書幼魯送其還里云歸向中條讀舊
書王官谷口閉門居致身半部有論語守道十年忘毀

譽莫以江湖非魏闕要看天地在衡廬山中蚤莫陰晴
異一任浮雲自卷舒

乾隆初鄒小山爲貴州學政請丈貴州上田逐段繪形
編號設田單以給主者立官冊以杜訟端丈出餘田不
升科則但以原賦均攤包侍御永祚具疏力爭略謂丈
量一事徒滋煩擾無益於民臣省開墾畝數康熙九年
撫臣佟鳳彩清丈升科載入賦役全書豈得如一桂所
言田地但計穀種而無畝數之理且謂丈量爲清訟而
舉攤賦而不增賦 皇上軫念元元財賦之邦尙多蠲
免豈有土瘠民貧復行加賦之事但無知愚民易惑難

曉初聞清丈已覺倉皇既見差官尤多畏懼保無有胥
役乘機嚇詐臨丈之時高下任意行賂者將多報少缺
略者以少作多遂至富室勢紳句稽弗確貧民夷戶積
算偏精弊竇叢生田畝益混兼有姦猾頭人串通衙役
暗折夫馬朋索酒肴冊結紙張巧造名目逐需挨辦共
飽私囊再或農隙之時小民趁營生務故於旬日之前
追集合村人民行其苛索候丈無期以致廢時失業卽
有能員覺察及日久敗露而閭閻受累已深若夫編工
繪形發執田單之說揆之黔省更爲難行黔民多貧產
業無幾或兄弟析居一工分爲兩三則田單不能各執

黔田多依山麓俗曰梯田或肖夷高培低合數畝而平
爲一則又與田單不符或有數畝共一田單減半典賣
則田單又需分給更換繳領民則剝削資財官亦紛繁
案牘又其甚者沿邊地界半屬生苗冥頑易駭恐致滋
事使果田無定畝卽不因民間爭界致訟亦必澈底清
察若久已計畝升科又不得因一二競爭輒至累及通
省祈敕部轉行將從前業經清丈者現在按則起科者
概免丈量其有近年開墾實在未丈之田各令地方官
察明轉報以憑清丈部議如永祚言永祚字美成一字
存齋貴筑人其詠冰魚云想是銀河種隨槎海上來作

鱗冰縷刻懷子玉胚胎通印非凡品石花豈異才子懷
甘澹泊爲爾一銜杯

玉屏田南村大令趨嚮漁洋嘗同蔣樹存蔣瞿圃注精
華錄康熙辛卯舉人乾隆庚寅檀默齋至平谿謁見年
八十餘扶杖見客猶親拜送是秋次孫均晉獲雋適六
十年詩曰碧山堂集谿行云拍拍鳧翁嬉晚晴丹楓襯
日半江明烏篷艇子青衫客十日倪黃畫裏行花朝云
二月春風尙峭寒花朝未有一花看酒殘卻作看花想
自起支棚護牡丹襄宛道中云舟橫淺水危橋外路出
疏林落照閒三髻蠻童遙妬汝坐來牛背穩如山俱有

澹遠之致

王芥子以侍讀外補平慶道調西安糧儲道留心水利
著涇渠志三卷官雲南布政使時有功銅政其荅梁野
石書謂世之好以橫逆加人者未必遽有害於人不過
自爲無禮不仁而已然有識之士因是以動心忍性增
益不能則彼之自處非計而所以與我者固甚厚也此
言可爲躁急怫鬱不安於所處者進一解古體詩已略
見前集近體如歸自東臯得顧密齋學士書口號卻寄
云看徧秋山又獨歸楓林樵徑晚風微寒原漠漠耕人
語煙渚沈沈浴鷺飛最有遠心當暮景共誰盡醉典春

衣集賢舊侶能相問人在東皋賦采薇晚歸東屯做廬
云林外春山綠一圍月明寂寂掩荆扉舊吟杜老無家
別牘有邯鄲故步歸鄰父好懷知近局兒童含笑繞春
衣廿年事業僧行腳海鶴虛勞怨蕙幃隴右晚行寄京
師故人云遠林如薺望中齊殘照荒荒向客低塞上驚
沙還日夕隴頭流水自東西透遲道路看人面爛漫雲
山信馬蹏京洛故人都好在征車誰信似雞栖肅州館
舍云席門窮巷尙風塵行至悠悠旅病身菜把經時煩
地主酒材何處問門人嗁猿自叫空山夜香草難迴別
浦春總向芳時斷消息落花如雨一沾巾皆婉妙隱軫

無餽釘壯浪之習

桐鄉諸生朱珏瑜仲晚號鶴沙古體如別離怨朝履霜
操擬昌穀雜謠代東門行緼袍吟指事切情深得樂府
遺意律句如修巖明夕照野竹亂谿聲秋色迴三楚江
聲送六朝未夜月先得無風樹有聲亦皆清迥拔俗兩
游閩嶠客死臺陽晚年編定十卷曰秋籟閣詩集未能
付梓宋茗香桐谿詩述錄其詩爲多

興國李屯菴翰編應熙句云天無骨肉情看人自悲喜
語極酸苦

姚以銅涼州詞云夜靜邊風倚戍樓誰家歌管唱涼州

不愁客鬢秋霜滿只恐雙鬟亦白頭邵叔_子詩別夢七年舊清詩一卷新維揚喜遇以銅作也其援鶉堂筆記兼綜四部談藝尤精譚復堂謂光布政聰諳有不爲齋隨筆樸至充博在其上未爲定評

鄭炳也贊善雷陽弔寇萊公云孤注讒生蒙帕恥蒸羊媿煞拂鬚才

山陰吳修齡子延有帆帶好山移之句人呼爲吳好山遂以好山自名其集吳樸庭舍南蓄有古樸一本卓犖可喜遂名其庭以自號子延作歌贈之云君家老樹連天大半塘流影空婆娑雷門日落古巷深月明滿地春

雲墮霜皮颯颯鱗甲張秋蛇迸出寒蛟破讀罷南華星
漢高空庭一夜風濤過詩筆道緊不徒五言爲工

烏程董蓉采上舍兆元爲嚴海珊甥其孝子詩云浮雲
凝晦色雛雁正悲嘶四座且勿喧聽歌孝子詩孝子者
謂誰翁氏兩孤兒馥馥庭中蘭弈弈階前芝高堂當具
慶晨夕繞膝嬉阿翁更愛惜出入常自攜俄爲西粵游
當與家世離臨行撫二子忍愛復割慈太息屬我婦汝
當教育之成立汝之責勿復顧我爲揮淚出門去孤帆
泊天涯命蹇迫險阻奄忽隨湘纍雖遇掩骼恩益令蹤
跡疑婦弱子復少相顧徒淒悲婦又齋恨沒弱息將安

依伯也甫童子尋父湘江湄捨身波浪窟骨立神亦疲
訪求意未息僕夫病將危中道委溝壑子身益難支慟
哭叫虞舜愁雲起九疑鄉賈挾以歸憔悴無容姿伯姊
前槌胸弟何不再思父母重嗣續身體當保持殺身復
何補徒令罪咎滋二子泣且謝良訓豈敢違從此益勵
志緜帙勤探窺源流溯虞夏根柢窮孔姬季子學術茂
巍科掇春闈閨房遞舉子佳夢維熊羆自念且有後飄
飄從此辭密室戒行裝勿令旁人知相將走萬里履險
常如夷洞庭連天闢衡岳與雲齊蛟龍挾舟怒虎豹蹲
路號炎風扇虐暑瘴霧白晝迷野宿雜蟲豸攢體成創

夷窮冬十二月雪落何霏霏兩脛凍欲脫兄弟同時飢
破襪擁作裘斧冰持作糜妻子倚門泣矯首望天倪人
生重禮義終不爲此移身命且不恤何言顧恩私寒暑
忽再易日月不可追消息卒何有筋力安所施徬徨入
古廟撫心相顧嘻季也忽攘袖抽刃自刺肌出血取書
疏揮灑何淋漓旁觀紛雨泣良友前致辭事不究其原
自賊母乃癡新塘失蹤跡求之當在斯長跪謹受教命
匠乃庀材一舟初製成上下極沿洄號痛倚中流淚盡
且復隨川爲咽不波日光淡無暉路人走相告一一摧
心脾窮村有老翁短髮亂於絲指示父死處骸骨蕪沙

泥一爲述日月再爲述容儀復爲出佩鑰故物昔所遺
韶合旣無譌斯翁寧我欺求生乃得死物在人已非孤
墳覆若斧馳逐鹿與麋爰命除荆棘巍然樹豐碑冠裳
一布奠行路生光輝念昔始辭家生子初嬰孩及今還
柴扉再拜迎我歸井桃昔未花灼灼今已開所歎田園
蕪滿目生蒿萊姊弟重會面痛定有餘哀母兮如有知
庶幾慰夜臺存歿兩無憾孝道寧有虧嗟誰非人子聞
此多苦懷況我少失怙能不肝腸摧染翰竟此曲謾謾
悲風迴此爲餘姚翁運槐楫生運標蓼野兄弟作也康
熙壬申其尊人大環游粵歸及祁陽白沙洲歿於水近

村有鄭海生者要兄海寰瘞之收其佩鑰一具楫生兄弟稍長沿溯江湖求之三十又二年乃得往返證以書笥舊鎖而決之廬墓築祠張瓜田朱梅崖均紀其事而鄭氏之義亦世所稀張敘百知祁陽爲作二詩附續志查藥師爲初白先生文孫戊午秋客秦淮雜詩有流盡舊家簾幕影之句爲時傳誦後稿佚去重游補成八首云烏衣名巷里名珂夾岸亭臺貯翠蛾流盡舊家簾幕影秦淮依舊水如羅亞字低闌護板橋大航鐙影已蕭條游人不管南遷事一樣興亡話六朝玉樹金釵句極妍丁丁新調試吳弦袖中紅本多官妓宮戲新成燕子

箋市隱園中樂事稠白門柳曲記眉樓彥回少日眞名
士老去從人唱石頭鴨毛新漲白鷗潭激激波紋縹淺
藍殘月曉風楊柳岸詞人低唱憶江南斷雲零雨莫愁
湖樂府流傳此地無邀得閒人來泛艇紅衣散處引雙
鳧湖上多荷花柳翠梅妍十六樓任他蕭索亦良游顛花殢
酒生來嬾自是當年許散愁北齊書許散愁自少不登
變童之牀不入季女之室
百花洲畔跡全蕪聞說天開似畫圖桃槳一枝隨鏡轉
教人回首憶西湖馬光祖青谿園舊有百花洲天開圖
畫樓宋時號小西湖也

沈沃田客武林假館吳山之天開圖畫閣偶過火德廟

外有短碣面錢江而立鐫字曰九原丈人徧問土人無
知者或漫舉蒿里丈人對蓋以九原可作意之及考志
乘皆失載積疑二十年讀東方朔十洲記始知九原丈
人主領天下水神及龍虵巨鯨陰精水獸之類蓋當時
立石於此鎮壓錢江水怪蜀之三石犀耳爲作九原丈
人石碣歌可備武林掌故其湖上雜詩云偏安遺蹟久
消磨人過樓霞感慨多殿上焚書門外唾到頭忠佞竟
如何扶蘇古桂舊山莊巾子峰西落日黃一種誤人家
國事烏金不鑄買平章少林寺有蔡元長書面壁二大
字沃田句云巨姦遺墨在吾欲洗芙蓉題甘泉宮瓦有

莫話通天臺畔事江東已老沈初明之句則自傷其不遇也

沃田久不得戴東原音秬近知主席河汾詩以懷之云嗜古窮經最重君卻教講學向河汾雅琴獨奏難爲聽野鶴高飛自不羣羈客尙懸畿輔夢遠書猶隔太行雲年來疑義知多少揮塵何時到夕曛東原於乾隆癸未試禮部不第薄游汾晉閒汾州修郡志朱石君請先生任其事其學由聲音文字以求訓詁由訓詁以求義理性介特多與物忤嘗與友人書云僕數十年來得於行事者立身則曰不苟待人則曰無憾事事不苟猶未能

遠恥辱也念念求無憾猶未能免怨尤也薦充四庫館
校理賜庶吉士卒年五十五所著書二十種曲阜孔繼
涵爲刊行之其序學子文集謂疆梧赤奮若之歲始得
交於沃田先生同處一室者更裘葛今隔別六載先生
所爲文裒然成集乃馳書二千里屬余撰序云云沃田
病亟時手此序以示門人東原文集又有沈處士戴笠
圖題詠序作於庚辰夏今並錄之以見兩先生文章道
義之交非偶然也其略云沃田先生周甲子六十之明
年夏以戴笠圖示休寧戴震先生在維揚使幕也久震
之得識先生也於今四年蓋三四見其見也漏下不數

商而復離離則時時懸於想似先生於六經小學之書
條貫精核目接手披丹黃爛然而恂恂乎與叔重康成
沖遠諸人輩行而踵躡也余嘗謂學之患二曰私曰蔽
世之忻於祿位從乎鄙心生者不必挂語若所謂事業
顯當世及文學道藝垂千古慕而企之從乎私己之心
生者也儒者之學將以解蔽而已矣解蔽斯能盡我生
盡我生斯欲盡夫義命之不可已欲盡夫義命之不可
已而不吾慊志也吾之行已要爲引而極之當世與千
古而無所增窮居一世而無損然則沃田先生之使吾
樂於相親者別有以合也儻異時不速而游遇先生於

清澗怪石之畔臺笠軒然安步几几其又何以樂之
李客山忍飢誦經居吳中金獅巷覺羅蔚文尙書守郡
時嘗目客山及沈峴山王次山爲三士旣莅汀漳以詩
寄懷客山屬和焉嘗爲序其在亭叢稿詠歸亭詩鈔以
杜東原邢用理沈啟南朱白民金孝章文南雲相方詩
如范文正公祠云獨於天下關憂樂尙想胸中富甲兵
送人之邳州云地勢荒寒稀見雁霸圖寂寞罷談兵具
見深致

蔚文號樗亭年十七舉翻譯科官中書雍正九年入直
樞垣應陽城馬周科改御史屢上封章銳於報國乾隆

四年由通政使左官郡守去吳之日次山爲撰去思碑
且贈序旌其治行後以靖逆將軍拜屬鏤之賜吳白華
詩賀蘭山外碧油幢頌繫重重鎖畫窗擢髮似聞丹仗
數陳尸猶見玉棺扛錯成一鑄終颺敵障任三生始殺
降孤負盛朝推轂意十年遺愛論南邦爲蔚文作也姚
昔抱牧民豈謂非良榦一首亦似詠其事

孫晴崖明府昇知曲陽縣於縣北安天廟掘地得唐中
和五年碑一上云河東檢校太保同中書門下平章事
隴西郡王李克用以幽鎮侵擾中山領蕃漢步騎五十
萬眾親來救援與易定司空同申祈禱翌日過常山問

罪時中和五年二月廿一日克用記易定節度使檢校
司空王處存看題至三月十七日以幽州請就和斷遂
郤班師再謁晬容兼申賽謝便取飛狐路郤歸河東廿
一日克用重記末云天會十二年七月六日尙書都官
員外郎知曲陽縣事高君陳摹刊吳樸存詩云有唐晚
葉事百戰文人失職悲流離鴟張鯨突鳳皇死文筆亦
復歸鷗兒拓一紙寄萬循初索詩循初謂舊唐書中和
五年三月丙辰朔丁卯車駕至京師己巳御宣政殿大
赦改元是三月之十四日己改光啟曲陽去京師遠故
未知耳又克用親援處存與通鑑遣將康君立事異曝

書亭集謂可補舊史之闕然克用史無太保之稱處存以檢校司空遣大將張公慶率勁兵三千合諸軍滅賊巢於泰山以功檢校司徒事在救中山前則救中山時不宜仍稱司空又金史百官志六部尙書皆有員外郎而無尙書都官員外縣有令判縣事而無知縣事皆事之待考者爲賦七言古風一章并識其疑樸存世居州山巖海珊宰望都以子師之代爲文章朱浣桐一蜚守保定尤相敬禮浣桐藩山西方在太原主三立書院有構陷浣桐者欲君相助力拒之且白其枉朱賴以全商寶意其婦兄也在南昌日寶意中蜚語勢岌岌君守之

不去事旋雪其敦信義與人交歷患不移如此子鑑南
州牧庚辰進士從川督劉秉恬辨金川糧餉殉難登春
詩亦清麗

江賓谷與弟恂稱廣陵二江嘗著尙書私學在秣陵與
程縣莊辨論尙書古文至日晡忘食袁簡齋目爲經癡
其松泉詩特饒情韻西園感舊云逝水年光送盡春謝
家池館黯凝塵東風歷亂眞無賴滿院楊花不見人蟋
蟀云蟋蟀偏驚獨夜情一聲聲近臥牀鳴金盆棄擲秋
塵冷自起鉤簾看月明佩陳氏才情清麗四年而卒孤
居六載諸詩蓋寓悼亡瀟湘夜雨錄則侍母就養于九

官舍評隲山川攷訂金石之作也卒於乾隆乙未年七十

江良庭余仲林皆定字徵君高第弟子仲林送支仙叔
云廿載西冷話故知挑鐙重與訴新離相思江北江南
路惜別花開花落時水市亂帆春賞酒旗亭疏雨暮題
詩中年哀樂猶閒事侘日逢君恐鬢絲意極溫厚良庭
有仲林招往山家看梅次韻云晴雪不消將暖樹春煙
留在未開枝亦佳巖蔚豹人元和國子生著有詩考異
春秋內傳古注輯存盧抱經王西泚亟稱之野望云曳
杖西岡去雲行水自流山居忘歲月紅葉識深秋董增

齡字慶千號壽羣烏程廩生著有國語正義春柳詩云
鵝黃初染色偏嬌旅客無端折柳條最愛石塘春水綠
半匳波鏡映纖腰

挂蘭一名風蘭葉似菖蒲根不著土以髮纏之懸於檐
際三四月間花錢文敏詩云騷齋偶然同姓氏羅生誰
與鬪門楣寧隨斷梗悲同病偶託高門作寄生錢坤一
亟稱之蔣春雨明經元龍食楊梅頃以紫液入幅成木
芍藥花兼取庭草汁作葉錢坤一題句云畫者何人大
游戲書家聖處本顛狂卷首有錢文端題字也
坤一於癸卯予告家居每布衣草屨獨行阡陌與田父

野老相酬對不知其爲二品貴人句如今朝一杖看花
出昨夜雙扉聽雨關丙舍關門任風雨焙茶燒筍一春
過山杖已愁芳草路野花還壓老人頭寂寂湔裘人未
見野船搖過夕陽門皆類放翁戊申八月得中風疾其
獨坐句云客回諒哥舒仙稀逢幸靈太平廣記八十一
引豫章記晉幸靈者建昌人呂猗母黃氏痿痺十餘年
靈去黃氏數尺而坐瞑目寂然有頃試扶起卽能自行
捧石律句深細清微如竹光茶竈冷蟲語石闌深閉門
青竹色沈磬夕陽天短笛涼初起新潮弱又歸晚光渾
赴水幽興恰緣隄門深筠翠底僧老菊黃餘均似半山

其清隱菴兩句云黑霧遭時遠妒山見野梅句云傍礪
花開不爲人皆有意明錢郎中貢畫陶靖節歸舟泊岸
竹扇郎中自題於前後有高檢討承祚及董香光題香
光句云恨殺潯陽江上水隨潮還過石城東二語劇佳
檢討元孫舍人奮生所藏錢穉石用題者韻詠之三首
云豫章封首郡公賢得酒惟應付醉眠便不駿奔程氏
妹也難束帶督郵前義熙尙及二年末松菊聊歸三徑
中不斷潯陽江上水憑將心過石頭東小范攜將半月
斜古懷須不爲陶花舍人自是名家後藏弄猶名故物
佳義熙二年十月論匡復功封劉裕等而靖節之自免

去職在十一月也。扇爲范祖年給諫。棫士出觀給諫華亭人有淞南小范印。

薨石東鄂烈婦行云國化如風加被之自宗始殺身殉其夫乃有東鄂氏東鄂年二十婉變隆德妻隆德爲宗人雙雙未及期吁嗟未有身天則使慙雙憑屍還護髮淚下如流淙家人環持之披麻髮仍翦要令守者懈有隙絕我喘五月之二日夫葬五日周從容約髮帕畢命臨廁踰麻衣望天歸烈哉生所篤先舅倫達禮厥考烏禮卜東鄂家世勳舊祖席爾達原任四川陝西總督禮部尙書父烏禮卜字務諒原任黑龍江將軍在室以孝

謹聞適覺羅菴廉訪之子隆德爲繼妻菴蔚文中
丞之兄先卒隆德母亦前歿又喪其弟哭過哀遂病咯
血與婦訣出二指示之婦泣曰妾必不負君旗制夫死
皆翦髮披麻若從死則否烈婦哭絕而甦護其髮哭且
拜辭其尊屬矢從死競勸持之旣不得閒乃翦髮如制
徐以禮葬其夫越五日伺守者稍懈黎明起遣婢取湯
飲去潛至厠藩間解約髮帕自縊以殉家人覺救之心
尙溫灌以湯不復甦矣時五月二日也隆德年二十四
三品廕生婦年二十耳無子蔣恭棐爲之傳

擇石宗伯清漪園曉直詩苑西清境豫游便輪直羣僚

奏事前萬壽山光霽春旭昆明湖氣擁朝煙乳鴉聲裏
宮門啟綠樹陰中口敕傳仰識聖人無自暇一心常在
眾心先本朝 聖聖相承之家法末句爲能道出明代
皇城以內外人不得入紫禁城以內朝官不得入奏事
者至午門而止中外阻絕判若天人我朝家法無日不
親理庶事召對廷臣披閱本章若乾清宮若宏德殿若
養心殿皆大內禁廷大學士九卿日接其閒外至末僚
微弁外藩遠使舉得進見均在內殿每日夙興職黃門
者將各部院及疆臣具奏之摺敬達御前卽次詳閱批
示進止時燭猶未跋也每日召見軍機大臣或至再三

而於在京部旗大臣及卿貳諸臣輪日召見胥於黎明辨色時無閒寒暑至各省保薦銓補簡選文武職官均引對錄用至內閣所進本章於披閱奏摺召見廷臣宣敕幾務之後司紅本臣工卽以題奏本章呈進取旨率於晚膳後閱發其有折留之件則於御門理事日閣臣

面取進止

御門日內閣學士每奏一折本畢降旨悉以清語承平日久滿洲人多習漢文於清語轉

多生疏奏折本率係背誦凡記憶未熟者往往遺忘譌舛視爲難事卽值巡幸所莅內外

封章齎奏人皆得徑至行在直達御前閣章每閒日閒

二日馳遞其機要重務不在此例坤一賜清音閣觀劇

恭紀十首有云章奏親批膳後仍軍機晚對玉階承分

明韶濩雲山際半日中間暇未曾御書每日午牌成內
監鋪將照地明聖處工夫寸陰惜水淙山響自韶聲
裕陵六十年慎如一日之聖心臣民共見之矣非虛美
也

世宗嘗曰予之不往避暑山莊及木蘭行圍者蓋因日
不暇給後世子孫當毋忘家法乾隆壬寅錢蔣石侍郎
恭和 御製幸避暑山莊啟蹕之作元韻云頤和本自
心無暑法祖端宜歲有行可謂立言有體其木蘭詩十
五首摹寫塞外山川寥闊覺別有天地而王者一統無
外氣象一併寫出顧樊桐謂其章斷而意相承可作一

篇秋獮賦讀其一云環山度圓趾黃布爲周牆行殿繞
護軍旗門開正鑲三驅寓九伐田禮遵 仁皇我 皇

神武德今年靖天狼從官肅聲響穹帳森沙岡翠花繞

紅子高下暮有光其二云白露朝已零順時乃進哨聖

人駕玉虬虎士臂黃鶴山綠勝江南濃苔樹陰照高瞻

澀難上大嶺如壁峭穿林仄輪轅與馬爭悍慄干峰壯

九秋萬里歸一眺其三云誤入獵所行回鞭一神竦羊

腸屈注來屢試踰溝勇羊腸草豐翳坎虛墮之不旋踵

謂塔止頓近可知風旗望高隴僕夫吻燥聲亟飲以馬

子頭謂塔 拘其四云塞行所見準山夾亦樹交谷深坡且展休騎

如居巢宵清雨點響氎屋同團茅還成滴蓬聽漁汊蘆
葦梢霽色曉未遽適當停鞭鞘開溝周住處煙密連鄰
庖其五云宛宛谷乍通霏霏霧初斂碾輪豐草閒香出
蒿與藪疊翠縹如皺連林蒼似染采樵夙有禁長養歲
方漸遙瞻圍勢合正覺日光閃下走紛鹿羣上飛絕鴉
點其六云車攻旆悠悠卷阿鳳翩翩一家樂恬熙萬里
靜塵盪野草亦有心路旁榮所賴日覺深山深日忘大
漠大大坡忽以豁高立數峰最深峪忽以迴翠復數峰
外乃知開闔閒造物方未艾其七云夜烝雨徹曉曉凍
天已晴雲氣若飛絮山坳寒不輕濛濛日亭午秋暑背

汗生涼颿振空起突作奔雷聲雷轉雹隨電珠璣撒地
明電收雹旋止山迥氣清清其八云度嶺始跨馬嶺長
步履休自巔曲折下楓夾樺林稠又前見翠壁奇絕無
與儔山秀土更肥轉坡勢莫收氣象乃爾關昌昌匪幽
幽厥產富麋鹿是爲巴顏溝其九云翁牛特之地平若
水行舟迴輪過湯泉春煦生做裘疏林昨斲駐今復遙
相投掘井所得渾砂石難深求鴻濛氣惚恍夜聽談天
鄒王禮秩百神山靈紀遐陬

張贊善奉 俞往圖興安
大嶺歸爲言海喇堪之靈

其十云午晴看山行緩轡何知勞驟來雨淅淅卻不風
颼颼須臾雲吐納斷續青周遭雁排人字去天與秋心

高雨疏乃有雪雪密如翱翔旌旗萬帳灑楓樾千林韜
江鄉八月際霜未盈蘭皋快從沙磧見寒士爲之豪其
十一云峰秀林益茂月高澗逾清出門看團圞就枕聞

琮琤朝來宜秋帖奎畫傳宵情

御製疊前歲中秋帖子韻四首句曰帖子宜

秋我作師旭光並峰轉坦然蹋前程右峰虎踞伏左峰龍盤

行合沓占大勢迴環蘊元精啟予至靈境歲邀帝歌聲

御製中秋帖子句曰啟予千古塞垣山其十二云曉行入一彎仰見秋樹

冷半紅半青黃人曰達陰嶺樺樹十萬株密密直於鍼
日光照玻璃葉葉晴不陰風樹或閒之葉紅點我襟越
嶺盼左右亦皆楓樺林山黃地半青草深霜不任落葉

松如何根有絡緯吟

塞外松別一種涉
寒落葉日落葉松

其十三云放鹿

聖之仁哨鹿仁之勇

御製有放鹿詩哨鹿賦

大哉發元音大筆何

典重允惟文武德自中及外欽四十有九藩示以懷柔

心諸藩荷燕賞圍口趨駸駸願吾 聖仁主秋獮歲必

臨其十四云秋林早晚佳秋山往復好日行秋色中矯

首感晴昊大壁削造天裂紋黃瑪瑙千尋落葉松分榦

根及杪是松與是壁會見畫者少徘徊飛夕雨至曉開

巖曲薄霜被黃沙寒意在馬足其十五云矮松亞枝密

如繞梅林中巔石竅半月天光透玲瓏下帳昨得雉上

馬今聞鴻撒圍屆茲辰鞭馬馬步同西出兩峰口萬鐙

中夜紅回思千山雲有夢時難通是詩作於己巳時館
虞山相國邸虞山扈蹕木蘭擗石偕行壬申始成進士
官翰林詹事爲侍從

勝朝殉節諸臣追賜專諡者三十三人其通諡曰忠烈
曰忠節曰烈愍曰節愍共八百二十八人馮玉圃詩雍
齒侯原假韓通傳竟遺由來亡國社未得表忠碑河岳
精靈迴春秋義例垂易名洵曠典異代疾風思明政嗟
解紐難迴寶鏡淪三方無半壁萬死有完人頑儒遺風
激賢姦定論眞闡幽千載事六義在君臣自古代嬪之
際魏之王凌諸葛誕母止儉宋之袁粲劉秉沈攸之每

多抱屈含冤唐太宗之於堯君素宋太祖之於韓通追
加褒贈不過一二人本朝所以闡風教而植彝倫者固
書契以來所未有也擇石嘗許玉圃爲著作之才玉圃
輓擇石詩十年擊壤懸車後九日開尊撤瑟時家學自
追前太傅鄉賢應配小長蘆語極清切

黃文獻集淵明句題胡王簿嘉樹軒云孟夏草木長霜
露憔悴之藹藹堂前林冬夏常如茲嚴霜九月中卓然
見高枝如何舍此去白日掩荆扉深谷久應蕪此蔭獨
不衰黽勉六七年懷此貞秀姿常恐負此懷未足爲高
棲及時當勉勵慷慨思南歸親戚共一處日夕歡相持

披榛步荒墟登高賦新詩坐止高蔭下一觴聊可揮從
今至歲寒縱心復何疑貞婉精整得之集句爲難擇石
題王秀才鳴盛詩卷後集蘇文忠公和陶句云心空飽
新得佳處正在茲跡寓心已去詩成竟何爲江左風流
人喜見霜松枝獨立表眾惑黃花與我期物色恐相值
世事纏絲之功名豈人傑昭氏有成虧齋廚聖賢雜一
笑百念衰好語時見廣作詩記忘遺亦極精能如自己
出其陶靖節墓碣句云過江數人物有道見先生顧樊
桐謂十字抵一篇傳贊

善化郭煥昆甫別號羅洋山人紀文達稱其蘆溝題壁

詩姚鼐鳴送昆甫洞庭曲二首云何處湘江帝子靈孤
舟偏傍暮猿聽淒涼玉女秋霜曲神兩西風過洞庭柳
毅祠邊碧蘚封潮深舊井沒遺蹤瑤華滿袖湘煙隔一
夜波涼泣小龍昆甫詩如牆桑葉密能催雨谿柳花多
不定風亦自雅澹姚夢穀贈昆甫詩老儒閉門元向白
牢耶石耶五鹿客寄生八益爲窠數衰盛人閒如反手
君才磊落天下奇四海賢雋誰不知五年見子銅駝陌
澹沲東風吹鬢絲朝爲石鼓詩暮奏鹿鳴雅先生且臥
鴻都下絳帳譚經澹瀟灑昆甫時官國子監助教也寧
鄉黃敬之司馬道慤與昆甫同舉甲子省試宜春道中

云無盡雲岑高復橫扁舟聊作看山行寒崖木葉催人
老飛入霜空作雨聲

造紙之法取稚竹未枿者搖折其梢逾月斲之漬以石
灰皮骨盡脫而筋獨存蓬蓬若麻此紙材也乃斷之爲
二束之爲包而又漬之漬已納之釜中蒸令極熱然後
浣之浣畢暴之凡暴必平地數頃如砥礪以卵石灑以
綠礬恐其萊也故暴紙之地不可田暴已復漬漬已復
蒸如是者三則黃者轉而白矣其漬也必以桐子若黃
荆木灰非是則不白故二者之價高於菽粟伺其極白
乃赴水碓舂之計日可三石則絲者轉而粉矣猶懼其

雜也盛以細布囊墜之大谿懸版於囊中而時上下之則灰汁盡去粲然如雪此紙材之成也其製鑿石爲槽視紙幅之大小而稍寬焉織竹爲簾簾又視槽之大小尺寸皆有度製極精惟山中唐氏爲之不授二姓槽簾旣備乃取紙材投之漬水其閒和之以膠及木槿汁取其黏也然後兩人舉簾對澆一左一右而紙以成卽舉而覆之傍石上積百番并醃之以去其水然後舉而炙之牆炙牆之製壘石墜土令極光潤虛其中而內火焉舉紙者以次櫛比於牆之背後者畢則前者乾乃去之而又炙凡澆與炙高下疾徐得之於心而應之於手終

日不破不裂不偏枯謂之國工非是莫能成一紙水必
取於七都之球谿非是則黯而易敗故遷其地弗良也
至於選材之良楛辨色之純駁鳩工集事惟老於斯者
悉之不能以言盡也自折梢至炙畢凡更七十二手而
始成一紙紙槽諺云片紙非容易措手七十二米元章
十紙說饒州作入墨在連上錢唐黃興三過常山山中
人爲道其事因詳摭其始末爲之說又撮其要十二則
曰折梢曰練絲曰蒸雲曰浣水曰漬灰曰暴日曰碓雪
曰囊漚曰樣槽曰織簾曰翦水曰炙槽贊而系之以詩
朱笠亭有紙槽五十韻謂羊桃出瑞造紙者取枝葉擣

計以分張康熙閒朱錫鬯借查夏重入閩有觀造竹紙
聯句五十韻略云信州入建州篁竹冗於篠居人取作
紙用穉不用老違惜簫笛材緣坡一例倒束縛沈清淵
殺青特存縞五行遞相賊伐性力揉矯出諸鼎鑊中復
受杵臼搗不辭身糜爛素質終自保汲井加汰淘盈箱
費旋攪層層細簾揭燄燄活火煇舍麤乃得精去溼忽
就燥擘來風舒舒暴之日杲杲東坡謂昔人以海苔爲
紙今無復有今人以竹爲紙亦古所無也

如皋余半繭少尹夙負文譽爲慎靖郡王所重留客花
閒堂最久有味甘亭夜坐應教詩尤水村儀徵布衣居

白沙之半灣賣畫自給客都門爲禮恭親王上客汲修
主人贈詩引袁子才王禹卿爲比汪潤民以修撰入直
上書房年甫四十遽歸道山成哲親王爲輯遺稿其嘉
興二輓詩其一爲錢籀石有質亡今誰斲聽絕今誰弦行當訂
遺稿庶或斯人傳之句

趙味辛任工追悼李廉衣先生詩宦海歸來松菊殘重
過槐里夕陽寒一經鄭重留題篋三黜蹉跎到蓋棺儻
屋屢愁生計短 賜園猶憶主恩寬刹那廿載傷心事
門下彭宣淚未乾廉衣甲子舉人乙丑下第從戴遂堂
講詩法戊辰入詞館與朱紀齊名丁丑選直尙書房辛

卯以講學視學山左甲午王倫之變諸生有從賊者吏
議降九級乙未改編修丙申罷官丁酉復授編修又以
山東任內失察降二級宦途屢躓其龍池詩云一百五
日天氣新三十六池春水漲坐惜鶯花令節過來追觴
詠龍池上龍池風景城西南碧草芊絲彌遠望屢穿曲
岸逗煙津豁眼垂楊低畫舫新荷平鋪饒妥貼迸捧孤
抽空倚傍山川佳麗客後來臺榭玲瓏誰始創細檢題
名無故老劇憐磨盾輸飛將千金百戰想風流白髮青
山對惆悵池心構亭發興孤水面看山得神王最好沖
瀦窈窕中玉壺風蹙生微浪回身俯檻窺水源蟹眼松

風迷想像不知地脈濟南通錯假天漿帝臺餉遙見紅
裊作薄游正逢象板邀低唱隄邊桃柳認新栽牀腳龜
魚憐舊放佳地全分西子湖秀眉小亞南屏幃春蘭秋
菊不同時地角天涯肯相讓已知勝蹟須品評況復塵
蹤得寬曠鴻爪安知鄉夢遙龍槎一任蠻碑妄坐深雨
腳送殷雷向晚蟾光窺夕漲野途不用鳴騶喧清景隨
緣全所尙此戊寅以中允視學滇南時作也龍池在永
昌府九隆山麓隆俗譌爲龍云九隆氏弟兄皆龍昔浴
於是故名池廣二百餘丈修倍之下注三十六渠一名
易羅池緣隄而北入門三屋三楹水作淺碧色初日始

照瑩然見底底皆金沙泉遇竅升纍纍若干萬珠池中
有亭登而望則哀牢太保諸山若環若屏水木明瑟煙
嵐瀟照屋後有忠義祠祀漢以來死事者山坡有廟蓋
古龍泉寺詳見王述菴司寇征緬紀聞詩中飛將謂池
中有明鄧子龍一聯白髮青山卽聯中語

戈芥舟給諫亦從戴通乾學詩句如斷雲將雨重歸翻
逆風遲飯憎香稻膩飲避毒泉清遠山秋爇莽古堠夜
鳴笳閒雲將鳥意呦鹿雜人行頗能避俗其盧生祠云
一逕迴廊入古祠柳塘深處曉相宜疏簾清簟應無夢
滿院荷香過雨時亦不落科臼弟仙舟太僕督學山西

沁州葛培初隱于詩物色得之甲寅取冠童子試年七十矣見李燧晉游日記

緬甸本莽瑞體之後乾隆十八年木梳頭目甕藉牙逐其酋莽打拉以力脅諸土司遂篡緬甸夷人遂呼緬甸爲木梳或呼緬子或呼莽子本非二種甕藉牙死子孟絡立仍與各部構兵如故二十八年滋擾普洱之十三板納荷澤劉蘇村時撫雲南檄土司各率兵禦之退其眾授雲貴總督三十年孟絡死弟孟駁立揚兵九龍江上出入無忌蘇村本書生不知兵遽率師往參將何瓊詔等違節制渡滾弄江與賊遇爲所衝致迷歸路蘇村

倉卒閒以陣亡入奏後數日瓊詔由他道還蘇村張惶
失措自行檢舉照臨陣脫逃例以軍法從事旋奉硃批
豁免而瓊詔已處決多日矣滇東西皆擾自以孤恩引
罪三十一年三月抽佩刀自殺 御製緬莽詩有劉藻
畏事之句石屏羅元琦輓蘇村詩云一死詎能酬 聖
主九重早已諒書生蘇村初名玉麟由鴻博授檢討改
今名累遷侍讀直上書房五年中至僉都御史遇夙厚
本朝待大臣恩禮始終非賄非姦皆可復用即使國
憲所在亦當靜候成命乃效匹夫之見奮不自顧以致
其身元琦蓋深惜之王禹卿詩倉卒南征正碧油初聞

衽席過貔貅服牛未定輸糧策傅虎先爲入穴謀豈料
空拳眞遇敵當時一飯勝封侯星橋火樹張鐙夜羽檄
飛馳正未休屬草爭傳用左徒登壇高議日紛如謾言
蛇鳥親臨陣已覺螳螂敢抗車虎旅不遵孫武約鰕生
空誦趙奢書夷酋一隊聞堪仗娘子孤軍直擣虛蘭池
笠轂舊聲名一眚何嘗替孟明軍政纔聞誅後至將星
忽報落前營九龍移帳邊風急雙鶻橫霄塞草平可惜
希文窮塞主長天落日閉孤城亦是時所作是年楊松
門以次揆來任滇督松門故重臣且素習封疆既赴普
洱巖守禦謹斥埃甫三月賊盡遁奏授夷日叭先捧召

岡爲土司防九龍江而巡撫那蘭常鈞旋有莽匪辦竣
卽辦緬匪之請蓋不知其爲一種也於是松門移駐永
昌有新街之敗三十二年木邦失守松門被逮三十三
年將軍明瑞領隊大臣扎拉豐阿觀音保俱戰歿先是
松門邁疾命松門次子江蘇臬使重英侍疾松門獲譴
重英留營至是被虜陷緬三十四年傅文忠經略兵事
提大兵先由戛鳩西渡大金沙江撫定猛拱乃取道蠻
岡而東與阿文成會師於新街文成先駐師蠻暮造戰
艦成乃放舟南下新街擊走渡口之賊時果毅阿公駐
營江西已久病舟師旣下提兵往攻連破西岸兩柵賊

督戰竟夕適緬酋以貝葉文乞降乃取成還師趙損之

光祿以中書從軍次猛拱卽事云江煙江雨卷雙旂蠻

塞居然汜小休林下偶逢歸塞馬軍中失馬者往往行於林箐中得之

閒爭飽犒師牛諸夷頭目迎獻必以牛分給各營一牛可食五十人草花泣露猶

含瘴木葉衝颿更耐秋忽憶故園近重九菊鈴初綻酒

新筇歸抵騰越云落葉空庭撲面飛一鐙如豆換征衣

百三十日歲云暮萬五千人吾曰歸長吏繼庖空僕僕

老兵勸酒轉依依重衾無限蕭閒夢猶繞江屯鐵甲圍

重英字山齋在緬二十一年脅降不從至戊申九月緬

酋始送其入關卒于耿馬 高宗以重英獨居僧寺較

蘇武奉使外域娶妻生子者追過之無不及御製蘇楊
論褒之給道銜赦其子長麟出獄山齋女瓊華字瑞芝
戊子舉人伍佑場大使姚明新室也八月八日聞弟長
麟蒙恩釋赦云聞道金雞下赦竿廿年今始脫南冠淚
凝狴犴傷公治血灑弓衣媿木蘭絕域丹誠生馬角九
重雷雨洗忠肝遙知多病垂衰母應爲嬌兒進一餐瓊
華有綠窗吟草

寶應劉鹿沙家珍地安門觀荷詩行盡荷池又稻田碧
花紅穗散秋煙一羣鵝鴨三篙水酷似江南雨後天予
家自先侍郎公卜居地安門內油漆作同治閒羣從不

能保先業售之木厰適武英殿災求大木木商徹其梁
柱應用時先君官鄂中不能沮也每爲義言道光中葉
累世同居重闈具慶一門兄弟讀書習射之樂歲時上
冢結駟連騎予以光緒乙酉秋賦旋里過其地已成墟
矣官翰編十年賃宅以居百年第宅門巷都非地去玉
竦橋甚近荷花最盛紅雲明鏡風景不殊讀鹿沙詩輒
爲神往伯義少時往來予家先伯祖常攜以游十刹海
予贈伯義詩云椿蔭堂開侍帝晨 裕陵雨露四時春
百年門巷留詩卷中表交親得偉人伯義和詩有看荷
門巷嬉游地古柏祠堂下拜時之句伯義送予乞外詞

云燕子巢痕世家王謝模胡門巷非故喬木陰陰祇賸
我午橋莊住失喜君來相將幾載又悲君去記兒時嬉
戲君家猶省識門前樹亦致慨於舊家之中落也今則
久客無歸朝市陵谷又不獨一人一家之事矣

常熟顧備九撰虞東學詩十二卷以宋學家尊集傳而
抑小序漢學家又申小序而疑集傳因斟酌於兩家而
解其紛錢坤一題顧孝廉鎮毛詩劄記後云子夏不序
詩昌黎語初揭夾漈攻已厲雪山廢何決斷紫陽翁
序既頗采列淫奔二十四自作得無媒遂令後賢心於
此未能折沈重與范曄源流各疏別要之毛公學近古

少頡頏康成收三家尙欲補其缺逆志不以辭亦惟援
據切孝廉家補溪箋傳獨穿穴備九之先細二翁上虞
人元初程文海奉詔訪求人材以名應被徵乃避地常
熟東補溪之上自卜葬地得老檜一株曰吾宋人得托
宋樹下無恨矣有詩云吾貞所志在西山芙蓉莊紅豆
一本嘉靖初顧曲江耿光自南海移植後屬于錢名紅
豆莊樹伐且四十年後仍歸顧氏復長孫枝且盈把故
坤一詩有云其先宋遺民作歌見風烈芙蓉之荒莊紅
豆春可擷時乾隆戊辰方以學正薦十五年蔣文恪以
經學薦累官宗人府主事卒年七十三其南游在癸亥

之秋邵叔勉有送顧古湫同年之荆南序坤一又有題
顧孝廉洞庭秋汎圖詩

宗室平泰字調玉號朗軒工詩好客所居在東江米巷
周元木嘗主其家戊辰館選散館改宗人府理事官萬
柘坡已巳同坤一訪元木卽次見寄原韻兼簡調玉吉
士云王孫風格貴焚尾共吟春似子居停好宜子問訊
頻東西雙巷接內外一城鄰塵土何須惜驅馳有夙因
調玉嘗和柘坡芍藥詩

桐鄉朱方靄字吉人號春橋工長短句能繪事詩如同
閔玉井紅雲磎淨香園納涼云繞過紅橋擊槳牙入門

曲折水廊斜柳陰濃綠全遮暑荷葉清香卻勝花隨處
迎涼施夏簟有時消渴點春茶晚來忽送催詩雨歸路
依然照落霞極近劍南兄含叔蒙恩放還故里喜而賦
詩二首有九重恩大身難報歷劫身留許自新之句蓋
香南編修與張文和公有連以丙辰鴻博入選視學四
川簠簋不飭繼母死以爲父妾不解任朝官頗有聞以
文和故未之發也儲梅夫宗丞時官御史疏請逮治遂
棄官走詔捕不得逮繫家屬其弟頌繫成都者三十七
年乙巳春釋歸田里含叔於丙午正月抵家春橋卽於
是年四月卒

錢擇石宗伯僮歸十七首讀之令人絜唏僮不足責也
先貞後黷蒼黃反覆彼何人哉

葦石詩黃梁熟後難重夢杜宇啼來又一春浮生那必
關天地轉瞬眞憐卽古今於師友死生之際可謂有情
孔林之祭惟 皇上幸詣則祭卽巡撫至曲阜亦不得
祭孔林而惟學政按考許祭孔林坤一丙申以閣學視
學山東八月試兗州及曲阜謁孔子林廟有云使臣循
舊典得以祭于林

乾隆庚午汪康古豐玉昆弟同舉于鄉康古精珞珠術
善草隸書喜收藏古金石文字漢氏成園丞銅印龜紐

萬柘坡謂漢舊儀六百石至二百石以上皆銅印鼻紐
文曰印比二千石以上銀印龜紐文曰章今銅印如二
百石以上而紐取比二千石以上與漢儀異奉常屬官
有諸廟寢園食官令長丞其外又有寢郎園郎等官百
官公卿表上卷皆不載可知表之所遺不僅園丞爲賦
七古一首康古有歌和柘坡云有客長歌漢銅印歌成
索我相續廣白文方寸不在手摹印體想斯高精園丞
之秩三百石印紐作鼻銅敲鏗行園丞相間一至鈴尾
亦有文書行年深免滋伏皋誤安知鑄自東西京纍纍
多矣偶係組園郎讓與孤留名

漢書敘傳平帝時班穉
補延陵園郎延陵園成

帝陵園也當時昌陵既改議儉葬不聽劉更生近臣隨陵有

故事廟號尙假成園成衣冠也復月游廟典守祠祭煩

文并共王園起哀帝世發人穿土尊親明在理未有恩

掩義掃除舍長均使令赤眉亂後賸霸杜金盃同出人

閒驚其時懷印誰氏子不及無主荒正塋中興長安屢

聞幸封田寺舍宜經營璽螭一角且就缺歎汝零落天

全貞何人得寶忍弗予六字但見標題清史言太初數

用五豈盡畫一權量衡平生私印少一匱頭銜欲署非

無情宣和以下具譜式此事欲共吾正評學古編載古印譜式自宣

和以下凡七種瘞錢漢物倘兼致古氣研席看縱橫沃醅探鬻

具見一斑豐玉詩於宋人愛山谷半山夏夜坐小方壺
次稗石豫堂兩先生韻云梅雨乍歇梅風微桐花繞庭
柞雪飛三四冷伴擁深夕都是去年花下客花開花謝
曾幾時花應笑人忙未知酒力詩懷兩無那等閒負此
分鐙坐篔簹紋扇影涼與親秋風彈指成前因早蟬珍重
催斜日警我勞心聲第一鏡光十里涵新荷湖船並坐
敲側過通暑僧寮會應再夢魂已越孤山背密栗深巖
亦能別開蹊徑羣從如多石明經句云雨意初蒸菌年
光未浴蠶吉石州判亦有詩多石所居近東塔寺錢慈
伯重過多石故居感賦云健筆雄詞好弟彙深宵每共

翦鐙論酣歌那再春風酒踏凍仍過舊宅門玉樹光華
傷浩劫梅花消息又前村度橋見塔還如昨百尺晴檐
雀自喧

康古豐玉所居曰小方壺循初詩所謂孟家兄弟城東
住一室方壺四葉傳也藏有劉松年蘇蕙織錦圖後有
幽棲居士朱淑眞畫蕙小像及璇璣變幻圖記循初詩
織徑密緯紛如須有美獨居何麗都機聲當戶非織蒲
采絲一片明樗蒲吳刀脆澀女手瘖愁顏黹淡微歎吁
安南將軍漢南居頽鱗不到蒼雁孤仙風飄衣輕五銖
黛眉鬢髮凝脂膚莫言機中良袂揄羣娣亦是傾城姝

暗門畫手近世無粉如初吮毫新濡六朝冠笄古袿襦
辨析分寸窮型模卽如秋花階下臚向背一一分新枯
幽棲居士系小邾浙西侍官高堂俱偶圖小像氏以蘇
號以若蘭如可呼胸中璇樞轉轆轤能借星象釋舊圖
初從中央周四隅旋布粉墨丹黃盧八百四十相威紆
金輪舊解猶桷疏傷哉若蘭夫壻殊相守不及秦羅敷
七襄已甘織室輸千絲更歷愁腸紆居士平生亦憂虞
聊藉翰墨相媁媁辛勤瘦腕支檠株泔泔疾首當風扶
青衣侍兒解慰娛小家碧玉庭前梧
疾首畏風瘦腕且顫及侍兒碧梧皆
見記
中 人生失意類此如何必閨闈殊冠裾西楊相公方

正儒大書跋語衫袖烏國子先生馮具區印鈐煜熠紅
珊瑚流傳絹本千載渝重緜今日歸方壺方壺兄弟雙
韋珠索我作詩如索逋我無錦段貂襜褕空機終日營
麻纊定當貽笑蘇與朱

仰亭少司馬景福壬申入詞館壬午視學山西錢慈伯
以年家子在其幕中其介山曉行和仰亭韻云旅枕未
穩晨雞促促我登車早裝束峰頂明月逐人行殘夢悠
悠斷還續山腰路轉迷後前鐸聲郎當緩著鞭遙天星
斗燦可數野田風露浩無邊馬驚時畏深林黑崎嶇更
憚車輪仄曠然出隘就平原十里浮嵐開曉色客行看

山憺無違緬懷介子留清輝南去岩巽瞻嶽色霏霏空
翠撲人衣仰亭一字介之詩如樹到炎方花異色客來
蠻國語殊音驛路荒涼人迹少滿山秋雨畫眉聲亦皆
清挺

王穀原詩如題林良九鷺圖張穆畫馬行崛強奇橫不
拘於方近體如酬桐石云寒語蕭然簇一鐙兩峰應怪
客來仍稍緣病退秋情健不爲涼多酒力勝小技文章
那制命中年須鬢欲飯僧與君且話通宵雨如此溪山
捨未能春雨次陶篁村韻云如絲風外颺纖纖早晚丁
耽響畫檐芸餅衾稠春夢擾杏花樓閣曉寒嚴時窺吹

沫魚浮沼不放銜泥燕入簾除卻緼袍無可典尋常酒
債任頻添皆有江湖飄泊之感

國石民太僕定羌懷古二首極雄渾有歷下太倉之遺
詩云巖城雉堞枕崇岡水繞山環古定羌峰拔千尋臨
大漠河流一帶俯斜陽鐘巖舊蹟留神禹變服雄風憶
趙王割據幾人稱戰伐高齊舊壘半蒼涼登臨偶上擬
江樓秦晉風光一望收兩界中分城對峙千山不礙水
東流緣崖聚落峰爲障傍岸人家屋似舟懷古更吟豪
士句星芒夜動五諸侯

吾鄉秦石公太守廷塋從宦錢唐爲吳樵史嗣廣弟子

有秋山讀杜圖樵史題句有云排比鋪張特一途遺山
果契少陵無以壬申舉人宰全椒明察善斷乙酉錢坤
一爲江南考官適內簾監試坤一題詩有云大好石頭
城裏月桂香同席有秋雲擢守杭州著有山曉堂集句
如登燕平城橋云塞雲兼地涌疊嶂抱城來再過湖陽
云暗潮剛到枕缺月忽明船秀出流輩野谿糧儲德隆
其同歲生也潼關句云風陵怒激崑崙水仙人掌晴開太
華山格律亦極亮特

蘭州城北濱大河每歲冰泮聯二十四舟爲橋以渡行
旅郡丞司之因以河橋名廳河岸有樓郭副使朝祚書

額曰萬里黃河止一橋國笠民官郡丞時錄所得詩曰
河橋集陽曲折佩湘大令蘭州浮橋詩萬里虹橋一線
橫孤城北枕怒濤驚河從星宿源頭下人在鼉鼉背上
行絕域古今通漢節中宵風雨作邊聲由來尙德非關
險青海煙銷已罷兵佩湘名遇蘭官揭陽知縣袁簡齋
嘗與李少鶴並稱爲風塵麟鳳者

芝軒閣學瑞保乾隆丙午奉使朝鮮過洞僊關留題云
萬仞削芙蓉玲瓏黛影重當關撐峭石疊嶂擁喬松秀
色如披畫煙光欲盪胸洞僊僊在否深處白雲封中秋
林畔館對月云海國延清賞星軺賦壯游流光眞瞥眼

素魄又當頭朗照三千界平分一半秋郵亭吟眺處頓
覺豁雙眸登快哉亭云快哉亭子傍山開清迥如登百
尺臺嵐翠千重排闥入江流萬里抱城來檀君故跡空
塵壤箕子荒墳半草萊極目蒼茫成小憩星車欲發首
頻回九日蔥秀山郵館小憩觀玉溜泉留題云別館秋
高氣益清好風招我駐輶旌坐來宛對倪迂畫一岸松
聲和水聲數椽矮屋傍山垠驛舍風光最可人小住渾
忘塵世事煙霞窟裏著吟身控葛攀蘿歷上層虛巖瀑
瀉玉奔騰登高遙指扶桑外自古詩人到未曾詩均清
約可誦與全斗南乘槎一集當可並傳冶亭尙書懷舊

詩有一日詩名徧大東曾傳天語到朱蒙之句梧門祭
酒谿橋詩思圖芝軒曾爲題句

蘭巖侍郎恭泰詩如已見發機慚弩末未妨取路就牆
陰含沙射處皆成鬼入爨焦餘已是薪皆有所謂八旗
風氣爭巧鬪捷行小慧而昧和衷世家豪族知有大權
美仕而不能積文學正身行以尊主芘民平時則然其
相煎當大利害則搏沙忽散豈祖宗任與共開國之人
而及其子孫之本意哉

翁正三先生論詩家三昧十二首云辰告訐謨定遠猷
謝顏詩髓自誰求帶經第一拈花處未許尋常劍鏃舟

大雅抑篇二句是漁洋平生詩品關切處燕燕追飛衛水頭思君之勛古無

訖黯然忠孝箴銘在何必詩評許彥周雅音叶律古無

邪識卽根原正卽葩底事滄浪禪理喻杜陵法本自儒

家五字初從傅與枚關西鄴下派誰開悠然山色琴弦

外秋自柴桑菊意來芙蓉初日本天成翡翠蘭苕漫掣

鯨多少六朝金粉句只言太白似陰鏗子堅詩多不傳未可以漁洋語

之薄開府江南恨孰傳右丞騷賦續神弦少陵南注追耆

舊翻憶襄陽孟浩然韋柳商量句髓深蘇王未必不同

心爲誰曉汲湘江綠韶護雲山欵乃音韋柳詩話一卷愚在廣州藥洲

時作金鑾應詔集賢同嘉樹無忘賦角弓萬古中條懷古

意豈徒詩品付司空匡廬真面嶺峰論雪竇禪參不二

門未喻松風貞白夢漫將雙井例西崑肯讓坡詩百態

新蘇黃書畫屬何人邵菴自說先天易鳴鳥聲希想獲

麟蓋未有不研經義而僅執不著理路不落言詮之說以為三昧者掃除何李讓徐高

神韻奚煩格調操真放精微非貌襲箭鋒功力在秋豪

嶽色河聲篆泐唐王官谷後說蓮洋鵲山寒食明湖柳

一氣青蒼接太行以徐高上接陶韋以蓮洋上接司空表聖此二義竊欲附商者此十

二首即石州詩話之要旨作於嘉慶己巳蓋年已七十

三矣先是戊戌有書空同集後十六首云漢後為文唐

後詩東坡山谷兩兼之果然竟委窮源後復古商量未

是遲百寶琅玕璧與珠
天球大貝燦河圖
匠心從古搜

難盡已說微之識
砒砒言言正面作家難
杜老胸中萬

象蟠前輩論書取
敬勢右軍豈是眩人看
詩家亦有長

沙帖何至鴻堂與雪堂

戲鴻快雪

苦執懷人集書語巧偷豪

奪義元章三百篇皆孝與忠
扶陽家學本江公
縱然音

節周詩似自有承師自不同
江南河外品流兼
經緯元

黃各不嫌芳草蛾眉非
貌似後人那更擬
江淹二陳本

出江西派

后山簡齋

格調何曾肯襲唐
杜句後來拈一二
濫

觴未甚尙無妨
萬古江山著眼看
江平漸放水漫漫
峰

巒占盡苦無那
始識誠齋取徑難
勦說紛紛薄宋元
茶

山白石敢輕論草堂鐵笛狂歌夜亦復沿波可討源學
杜初推袁海叟可憐季迪本天才波瀾纔演爲楊李此
際如何遽拓開二錢題壁金門寺零落灰塵是劫餘憑

弔前朝說詞客新都翻得佩瓊琚

楊升菴明之錢劉也

史家文苑

接儒林上下分開鑒古今一代詞章佩經術不然何處
覓元音淋漓感激復峻嶒此事初非剽襲能若使胸中
無杜語故應峻極百千層自言每取改求真老矣時嗟
願未申聞此人人當汗下先生固是不欺人千四百篇
杜老詩咀吟太熟致如斯今人不熟又滋悔借問如何
權合離花樹空留舊羽痕邗江風雪舊離尊春來寄訊

揚州守不得姚郎與細論

謂姬川也

皆可與詩話相參證

覃溪瓣香所在爲虞伯生丁亥雷州道中讀道園學古錄云公撰南州仿中州何啻寶書述左工惜哉僅傳石問蒼空此妙語臨芳洲南渡而後文漸敝銷金鍋內米浙矛程學盛南蘇學北各主一二難兼收是時江表餘前修那無奇字揚付侯百年文獻天半壁孰與索隱還闡幽大都文儒富館閣亦有殷士將羊牛內府圖書誰復識宰相世系或可求在朝在野都一集風雅可當元春秋所以自負漢庭吏不肯豪末鉛粉留惜墨幾無一字著豈礙萬丈光芒留曲折淳蓄皆有故彼誇多者真

浮游楊范揭輩藻已弱對此疑古彝鼎舟温研一過又
 三載輶邊海月涼懸鉤癸亥題道園學古錄四首云陰
 鏗篇最少何遜韻尤高誰識蘇黃後深追李杜豪古弦
 夔石拊真籟錦江濤不獨仙壇近麻姑癢處搔情景沈
 冥際誰將著色論淵乎秦以上藝也聖之門西蜀揚兼
 馬南州宋接元詞章卽經濟於道孰爲尊每愛朱存理
 珊瑚閨木難世家風味在手草日尋看子今行篋攜有道園題跋手迹
 數番松雪青相盼奎章墨未乾此句謂柯敬仲補諸李本錄幾載
 媿磨丹應谷初名屋迴思十四秋微言來撫建此句謂吳蘭雪
 苔問切馮劉昔年與馮魚山論此及今爲劉松嵐也一派羣經萃三唐六

代收苔岑疑舊夢石墨媿名樓其在江西取辦香山谷
道園二先生之義題書室曰谷園以所藏先生墨蹟補
學古錄所無者凡廿餘首手鈔先生碑版文最多於所
寓青棠書屋錢捧石馮魚山往復商訂所編次虞道園
詩十卷錄於揚州庚寅合浦道中用韻示馮生云近人
學李學韓杜皆向大復空同求粵則三家復五子便爲
通國之奕秋藩籬堂奧較離合精英渣滓何去留蘇黃
而後詩未盡借問砥柱誰中流癸亥書學古錄卷尾寄
松風云嗚呼杜韓不傳祕豈在鑿險縫深幽六朝腹笥
空半豹三唐目力無全牛動操故在弦指外聲畫詎以

形聲求樂府遺徽氣逼古丹室煮朮香生秋翰林珠玉
芝亭篆處處碎佩叢芳留邵菴眉菴一轉語蜀江章江
萬古流傾倒者至矣

覃溪直諒多聞吾鄉老輩如甘嘯巖法時帆鐵冶亭玉
閬峰皆從譚藝蘇齋所藏天際烏雲帖四公均有題詠
嘯巖詩云瓣香來下蘇齋拜元祐於今眼倍明世事盡
如翻覆掌烏雲含雨重含情過眼雲煙都是夢青青萬
點蜀山尖玻璃江水峨眉月照見先生白髮添秋窗睡
起驚紅旭曉檻人來喚白翎也逐詞林三學士一時同
看換鵝經捧硯猶賡雙袖紅覃溪詩老句難同未應石

墨樓中興吹入桃花扇底風風流文采易前塵青眼能
回萬古春試問六橋花柳道杭州太守又何人袖中玉
局烏雲帖載自珠江廉石船神物定留神契在茗香相
對靜娟娟不信坡翁又此翁三山同夢一樓風能將後
夢通前夢只在濛濛墨氣中於何招得古人魂漫撫遺
編與細論樂石繳輒猶寶惜淋漓十指況親痕一函持
捧勝瑤華宋槧完然更可誇且向彝齋稱合璧又從人
代問恆沙第三詩驚字嫌其出韻故未從押又烏雲帖子擬易嵩陽乾隆丙午閏七
月之廿日同過蘇齋觀帖並宋槧蘇詩覃溪老先生出
此屬題依前同次九詩之韻幸得挂名帙末有元柯虞

尙不敢希況以上耶襄平甘運源并識廿一日鐙下時
年六十有八嘯巖尊人舊官蜀中屢往省觀嘗以長江
萬里名其集第二首蓋以自寓也此蹟蘇齋購之粵東
故有珠江廉石之句

覃溪手批高青丘集行楷精好語多入微

德清胡旭升暘乾隆壬申舉人官金沙場大使黔山道
中詩云不知眼界寬但覺腳跟重後山漸迤邐前山忽
環拱近形爭鹿逐遠勢忽蜂擁盤旋無終窮萬山皆在
踵其寫亂山連亘之狀可謂逼真相見坡在鎮遠西二
十里兩山遙望中隔澗道上下縈折行者頗艱鎮寧州

西三里爲黃谷樹白水河出焉百丈懸流晴空飛雪崖
有大觀亭貴定縣西十五里牟珠洞俗呼母豬洞洞內
有一線天玉筍圓蓋宛然束炬深入石益奇異曲折而
上僅可側身卽岱西十里打鐵關崇山蟠踞儼然巨鎮
過此山勢陡下可二十里俗名拉幫坡西林渡在阿都
田東十里卽毛口也山勢雄傑四角陡立實爲壯觀俗
傳有蟒潛此地多炎瘴老鷹巖在阿都田西四十里山
極高峻盤旋攀躋似登雲梯半坡以上雲霧瀰漫不可
窮視峰勢敬側疑若飛動巖故以老鷹名庚戌橋在土
塞驛西十餘里崇山對峙中隔一溪西林鄂公始爲建

橋庚戌紀年也橋畔有碑其上卽南軍坡升暘皆有詩紀之

江陰繆孟烈字學山號毅齋文子侍郎視學江蘇所取士其古詩依韻呈夢謝山司空云仙人坐瑤席凝笑吹玉笙靜中發天籟清響悠然生元音何淡蕩妙旨傳心聲上窮雲雷狀下驗草木情咸英古初調毋俾庸耳聽命夔載夏擊鸞鳳雝雝鳴回頭視羈羽胡爲中不平江水渺無際望之生離思商聲一何慘言是早秋時性本不諧俗硯硃早見訾敝衣拂掩骼朝餐恤苦飢匪貽賤貧戚懼辱國士知鹽車歷長坂健屈空檜持吐握日再

三念之中心悲華鑣振京闕俯首憐蓬姿意摯詞婉自
是雅調

金匱吳鼎易堂乾隆辛未薦舉經學以舉人授司業歷
官侍講撰有易例舉要十家易象集說及東莞學案無
錫黃可亭挽侍講詩清餘兩鬢雪負賸一囊書兄鼐亦
通經有三正考易象約言

留松齋少宰四歲而孤庶母郭有所生子亦前天郭撫
之成立李眉山所爲賦神鸞篇者也康熙辛丑會試

世宗在潛邸檢落卷賜進士改庶常授編修雍正四年
以講學充日講起居注官歷通政使禮部侍郎六年以

署掌院學士充經筵講官爲明史總裁乾隆十六年再
以吏部侍郎與經筵調工部乞病閒居十餘年卒年七
十七曲阜顏幼客學博鷗波亭七夕同完顏侍郎作云
小亭微月雙星夜淨業湖干望女牛雲漢橫斜天隔水
鵲橋初接燕歸樓依人幾見登三事滅刺何從訊五侯
上苑傳經劉向老秋來仍住殿東頭少宰所居在淨業
湖上有園數畝西偏小樓可眺西山望蓮池有遠香亭
亭外皆荷花也尹文端在江南嘗繪圖寄贈而爲之記
卽葺石齋爲賦宜亭新柳者

姚惜抱以江都朱篋二亭之詩與朱子穎並稱金冬心

客邗上老且病二亭延之於家供湯藥旣歿杭大宗鳩
金治喪事以餘金畀二亭二亭悉舉以畀其家其行誼
亦足紀也惜抱弔二亭詩吾年垂七十四海故人少東
望每思君如立雲霞表往昔朱子穎豪才起燕趙向我
道君才五言幾謝眺子穎貧無食君亦家集蓼相從邗
溝曲吟和觴清醪我時隔京師想見姣人僚丙申至江
都遂得訪窈窕其時子穎貴冠蓋頗叢繞君顧無所干
陋巷閉門悄扣闔就談詩但覺風嫋嫋舟乏仲舉同書
絕巨源颺獨荷時見阿累投珠玉晶惜哉近子舍攝提
僅三肇我歸子穎罷舊迹如逝鳥一別二十年中未脫

塵擾激懷實媿君高與秋旻杳子出諒不能吾游尙可
紹行當一相就帆挂橫江淼昨得郎君書已投韜練旒
豈但悲友生問道苦不了君疾正月初一榻兒女繞呼
與告逝期屈指七日剝屆時一笑亡何嘗貳壽天銜哀
遠弔君諒爲君所小那復弄豪翰繁詞報劉沼誠了然
於生死之際者矣

楚雄陳文錦綱齋乾隆癸酉舉人官騰越教諭除夕詩
云雞聲人語漫蕭然酒醒鐙殘尙未眠三十六旬都浪
過偏將一刻惜流年措語可發人深省

楊厚恥夫先世爲雅州上官天全宣慰使本朝平獻賊

後納土歸誠遂徙南昌受田宅與蔣莘畬及武寧汪軻
南豐趙由儀有汪楊蔣趙之稱舉乾隆癸酉拔貢歿年
三十二莘畬哭以詩有云壓眾才無敵成仙位獨尊別
開文字祖敢爲播遷愁九歲負才名詩成一座驚天教
將門子來作魯諸生推許甚至古詩如棧道猿聲歌銅
鼓歌題王漁洋隴蜀餘聞平瀘戰箭歌題仇石洲畫馬
諸作皆沈鬱跌宕律句如雙親知爾能貧賤四海愁余
少弟昆繞盡亂山逢上巳乍爲遠客是今年又復淘鍊
空靈固是邊徼崛起之士同時有大定諸生安吉士者
比起土目也安氏一世祖慕齊齊二世祖齊齊火卽佐

武侯平蠻者也齊齋亦作濟濟史稱濟火蓋從略也洪武以來世爲宣慰使入國朝論投誠鄉導功仍其職康熙三年安坤叛大兵戡定始郡縣其地以大方城爲大定府水西爲黔西府比刺城爲平遠府烏撒爲威寧府吳三桂反坤妻祿氏督土兵助討事平子勝祖復襲宣慰司貴陽宋氏與安氏分管水東西宋宣慰昂兄弟在明正統中以詩稱安氏不以文學顯自改土歸流後乃有列名巽序者吉士好學能文有竹林山房詩集一抹煙巒帶落暉蒼蒼樹色遠山微人家好在林陰住爛漫花枝壓短扉題榜山老人春莊小景作也

麻哈貴人山下艾鳳崑檢討之宅在焉先世有官雲南
者移寶珠茶一株植於屋後洪稚存視學貴州爲作都
春園序寶珠堂記且贈詩云朝衫脫罷臥雲煙自構園
林樂靜便生意不芟閒草木逸情何異古神仙堂中經
授三千士座下根盤五百年最是北樓山色好開筵影
已落尊前

如皋姜靜宰孝廉夏文愍白鷗園詩夜半青詞入紫薇
白鷗園在已霜飛如何不與鷗同夢空化唳鵑帶血歸
納蘭中丞曾銑論云嚴嵩攬權必不樂夏言之出其上
盛氣相凌至斥其黨而不敢救銜之刺骨適言繼妻父

者銑同里人也銑以此得交於言嵩卽以此偵言而陷銑方世宗向銑之時言欲倚以成功嵩無必於殺銑之意而非是則無以傾言則借以行其忍世宗亦無殺言之心而言存嵩之寵不固則因以行其私其力言套不可復顯然攻言世宗果遣官逮銑銑不死則言之罪不極言得在位必修怨於嵩因思仇鸞者鎮甘肅時爲銑所劾於是假手於鸞以堅世宗之心而銑之獄成銑之獄成而言之罪不可追假之以交關重之以剋滅誣之以掩敗雖滔綱不承而世宗已深入其說銑死言繼而嵩益得肆其毒矣意園嘗爲吾言此篇明著張鄂兩黨

特借言曾銑耳意主收邊蓋黔苗事其姚景行論謂人君享已成之業席富庶之餘輒生侈大之心漢武帝時承平已久寵任衛霍外內驛騷而天下卒以困敝令景行稍以依違希功生事安知不如景延廣徒以喪師而辱國也陳湯甘延壽奏功絕域論者猶謂其開邊挑釁况功不可倖而勞費已不貲者乎此指西師之敗由張主戰其馬人望論謂天下之事有一利必有一害利一而害百嗜利者疾趨弗顧以止見當前之利不知後日之害也苟且趨功流毒後世智者不然其視患在當前如渴者欲飲解以甘漿沃以香醴必不以酖酒進也馬

人望以均役之請獲罪方遼檢括戶口人望曰民產若括之無遺他日必長厚斂之門倘以綜覈者處此必下履田之令行搜括之法欺隱者重其征逃匿者倍其賦此爲田敏肅而發時河南勘荒增贖地稅民不堪也中丞當雍乾之交辭不斂鍰遂致鑠金西林甫薨東市旋殞要其言可爲千秋法戒不獨善論古人其論韓琦謂其在政府時與范文正論不合文正拂衣起忿形於色公徐把其袂曰希文不容更商量耶和氣可掬文正亦釋然歐公不信河圖公與輔政未嘗一言及易賢與賢相處時多異同其流遂至於分門別戶紛爭不已而較

短絜長思欲上人之心君子不免獨魏公之量無所不容故功業稱之此欲解釋張鄂而發前此之玉峰安溪後此之虞山東海皆未明此義狼戾旣蓄於心人才何惜焉國事何計焉

陸朗夫中丞初莅長沙夢吟七言長篇記一聯云能開衡嶽千層雲但飲湘江一杯水其詠石炭云石心持出山一旦附炎熱形狀殊硜硜氣燄已烈烈山中之人面黧黑艱難致汝骨斷絕餘人盡得藉汝温不向山中化山雪仁人之言藹如也中丞吳江人齋居嘉禾

梁山舟跋董文敏書楊參政師孔墓誌墨蹟云楊冷然

先生善擘窠書每榜書輒署吉州某不知爲楊龍友文
驄父也父子異籍閱此卷始了然此古人所以重碑版
文字也志錄凡二千餘言文敏書時年已耄耄故前後
大小行楷不倫閱者往往以此少之不知古人作書唯
無名心故能成大家看精神到底不懈其性情自在流
露處豈復他人所能仿擬今留之几案閒年餘錄其副
而後卷還之備之其善藏焉弗爲墨豬算子輩所惑也
邢孟貞華亭與龍友別因送之暫還南中葬其先大參
公詩楊子官清舊石渠臨歧黯淡美人祛滄江夜冷輝
銀燭白雪山深泣玉魚人在汗青家有誅客多冠素卷

無居棹回明月梅花發鴻雁西飛數寄書孟貞與龍友
游覽贈荅逾百篇蓋無歲不主其家致命之後杜于皇
至以五百青銅與歎孟貞題其畫云可憐蕤骨竟茫茫
四海九州無寸土生死之交於此可見

歸安朱壽巖大令少不羈嘗讀書道場山之歸雲菴一
日見巨筍出地斬筍納雞其中掃竹葉煨食之老僧見
而歎曰筍未劖斷根園竹皆敗矣壽巖因畫雙松酬之
以辛未進士厯官燕閩多惠政後此畫歸姚文僖爲作
歌紀其事

陸士衡負其才望志匡世難雲耽相攜同時湮滅屠漣

水弔二陸祠賀新郎云墨妙千秋重弔遺蹤殘碑沒字
壞祠誰奉我愛先賢還深惜是累葉孫家梁棟到國破
何心榮寵卻使道真相見了指東吳特問胡蘆種剛一
語儘嘲弄才高縱使堪時用又何妨崑陰花草谷陽田
隴多事司空相推挽枉誤君家伯仲想車轍豈眞妖夢
黃耳音書長斷絕倏倏煙飛火樹焚雙鳳千古恨不勝痛
乾隆八年五月天氣亢旱以暘命省釋徒杖以下日給
重囚冰水藥餌二十後酷熱異常死者萬計六月朔分
賞京師九門帑銀一萬兩圓明園二千兩備冰水藥餌
五日以旱申命求言是夜北風大作繼以膏雨沴戾頓

除戴通乾紀以十四韻通乾以甲戌就養於其猶子藍
輝明府秉瑛儀徵官署盧雅雨選遼東三老集檢三年
中眞州所作付剗駒戊寅廬江陳葑池侍御愛其詩索
觀全集以未有雕本致金助鐫藍輝少孤鞠於通乾通
乾篤於至性然諾不侵有忠孝大節令齊河以伉直不
苟合投劾歸辛酉入都益貧困授徒以供餽粥樵蘇不
爨單瓢屢空未嘗一日廢吟詠詩集曰慶芝堂都十八
卷藍輝刻之昭文縣署藍輝移官甘肅又移貴州板久
散失道光戊子外孫荆道復捧檄江左於乙未重付梨
棗通乾與李鐵君陳石閻齊名稱遼東三老石閻序其

詩謂如武安交鋒屋瓦皆震忽而颿靜霽止空山寂歷
其包蘊無垠而精力直入元始通乾贈陳石閭云古樂
久淪喪抱瑟猶孤鳴宮商鬱不舒中含萬古精情深世
莫測哀怨難爲聲孤鸞慕儔侶翱翔徧九宇雌雄倘頡
頰高飛戩毛羽季女婉變姿出入長苦飢容華坐消盡
翻爲嫖母嗷安能結同心生死不相離灼灼春前花嫋
嫋路旁柳所遇非堅貞欲折遲攀手日月如轉丸夙願
歲空守不恨契闊長但恐此情負往者不可援來者復
何有宇宙渺茫茫欵歔搔白首冥鴻翔壙琅矰繳安得
施神虬潛溼溟綱罟空爾爲仙人握鴻寶舉世誰能知

緣崖拾瑤蕊披雲采紫芝芬芳溢襟抱鬱爲金玉詞金
玉無凡響芬芳無已時願言躡高躅遂此平生期腰裏
鳴薊野萬馬暗不嘶驚驚飛摩霄羣鳥失羽僕南風久
不競北里聲卑迷引商雜流徵音響入雲悲翩翩鸞鶴
下冉冉神靈馳誰能爲此曲此曲知者稀君獨向我彈
我情爲君移赫赫五都璧朗朗照乘珠光芒發蒙昧驚
怪委泥塗冲霄兩龍劍神物豈終疏邂逅延平津精靈
相趨扶高天懸明月中有玉蟾蜍明月有盈虧蟾蜍心
不渝清輝照天地萬古同須臾鐵君寄贈通乾云委巷
精廬小過從正苦寒詩吟百徧過酒借一杯寬傲楚朱

弦瑟淒涼白玉盤故交京洛滿妻子怨艱難三老遼東
舊而今各暮途寒風自許索幽草不荒蕪冰雪春心長
風塵此態無市中逢阜帽曾識管寧無鐵君石閭早棄
人間通乾最老壽丙子歲暮王蘭泉欲得其詩選入湖
海詩傳通乾有得書卻寄二首蘭泉寄荅云當代稱耆
舊如公復幾人高名傾鮑謝儒行媿荀陳濩落風雲氣
飄零老病身扁舟曾把袂款款話前塵雁塞風沙遠龍
荒歲序遷生涯仍北地涕淚憶南天雪鬢他鄉改萍蹤
客路懸武林煙水窟回首一淒然作吏來山左分符近
濟陰治才尊卓茂政績數盧欽獮鼠誰能嚇青蠅已見

尋遂初偏得計浩蕩謝朝簪才擅風騷體名傳翰墨場
經年空想象遠道各蒼茫暮雨江潮急春陰驛路長白
沙官舍裏計日喜升堂金棕亭自楚入燕謂此行有三
得沂九江得見廬山道經齊魯得見泰山居都下得見
遼東戴遂堂先生其爲當時推重如此

廬抱孫釋褐後與同年賦詩棗園客寓有雅集圖令洪
雅時嘗作凌雲載酒之樂放效東坡有載酒圖爲六安
州牧霍山小峴歲春入貢由州封進有試茶圖爲亳州
牧時有看花圖汝陰西湖爲唐宋讌游勝地東坡所謂
未知杭穎誰雌雄者也久淤塞抱孫守郡時始濬治之

有瀋湖圖轉運維揚時會四方名士於平山堂賦詩有
文謙圖被逮後登北固有北固圖坐臺時有讀易圖乾
隆甲子北平久旱饑民走險起灤州牧以撫之有喜雨
圖守永平建敬慎書院有授經圖任天津轉運時有觀
海圖家德州古平原地無山有樂山圖

汪豐玉論詩謂山谷爲詩家不祧之祖元明以來無人
齒及錢虞山朱秀水皆近時巨老而動有貶詞余素酷
嗜其詩天社任淵青神史容所注行止輒以自隨惟同
里錢孳石萬柘坡兄厚石以爲然也病中雜詩云黃詩
繙閱枕函親學杜先宜此問津宗派百年誰復識解人

弦外兩三人故裘文達題桐石詩稿一絕云天下無雙
雙井黃流傳句法剡寒鉞憑君更導西江派淨洗鉛華
印妙香文達豐玉座主也舒雲亭則其房師豐玉山陰
謁莖畝先生以振饑往嵯縣不及晤寄呈二首云剡曲
卸帆餘恩門缺起居落鋪琴薦冷鼠瞰印牀虛幾夜紆
言笑如山委簿書高亭聊望海屐齒出林筵百里馳油
幘人云早得霖瓜時官注考菜色歲占禳甚欲論詩眼
因之授律心娥江空一葦訪古更碑陰康古序豐玉詩
謂其於宋人中酷愛山谷半山二家視時俗拾何李唾
餘以詭附盛唐者則心焉薄之其詩叶韻而不爲韻叶

使事而不爲事使云

文子司空校士金陵賞上元涂逢豫文欲借之吳淞閱

試卷以母老辭薦嚴冬友以自代司空作三絕句懷之

有錦樣六朝隨水去夕陽愁殺庾蘭成之句丁丑舉優

貢己卯中京兆試有懌堂詩鈔百子山云練影隨人到

碧柯飛泉倚石點晴莎青山自古無塵澆莫遣山樵辱

薜蘿懷寧阮大鍼自署百子山樵秦淮曲云鐙船歌吹酒船遲腰鼓

聲閒唱柘枝石上暗潮嗚咽語無人解拜侍中祠皆有

深婉之致律句如沈憂初似草殘夢欲迷仙亦工造語

乾隆乙亥文子司空登岱賦詩勒石殿壁嚴冬友有祇

謁岱廟謹和元韻並效其體之作末云嗟余八翼慚
躓茲何意向天門翀挈才自媿成牛螭含辭欲吐道弗
充回臚驚見貞石礮重若球貝陳三雍披吟未已淚落
胸公如天柱積中峰元神陟降應在穹帝晨左右鳴珩
璫曷歸乎來牖我衷閭闔東望雲矐矐感知懷舊之念
至深冬友登覽諸作鴻朗壯伉獨擅勝場其書宋張芸
叟撰游歸雄墓志後云唐室重辟召從事多豪英温造
佐河陽崔翰居汴京昌黎及樊川所在尤著名下訖趙
宋初沿此尙作程卓哉游夫子夙秉河嶽靈弱冠從橫
渠章句非作營農桑學校外尤熟刑與兵初膺范公薦

范忠呂大防繼乃呂趙并趙嵩中閒韓蔡劉韓絳韓琦一一

稱國楨機宜掌文字戰守司權衡周知七曜厯洞徹三

軍情岸幘古戰場精神貫長庚一上分疆錄四塞期永

貞再上安邊策三孽幾消萌西夏吐番鬼章奈彼秉鉞者大半

皆書生但知投鼠忌敢作橫鯨振請看韓范儔廿載相

代更坐鎮籌邊樓雪鬢秋泠泠聞負不聞勝議守不議

爭秉常亦黠虜心膽何曾傾史家例無識所讐徒虛聲

其事出大儒焉敢輕譏評往讀西夏傳太息真填膺斯

誌今始觀適愜心所盟願誦百千徧達此精與誠願書

千百本勵彼頑與冥聞公有荒阡僻在關西垆墓在武功西原

鳳皇 行將一再拜親擷溪毛馨兼書第二碑刊置當元

肩高並武功山終古摩天青其論趙宋武功之不振自

是定評亦生當 國家全盛之時所見如此小詩如延

禧前唐槐二絕云盤拏雙榦入晴煙幾見風花殿角前

不奈更詢唐代事斷碑已失鼠兒年 樹旁有元泰定甲子年碑今佚亂

蓋珍珍墮瓦溝黃時想見不宜秋繁華久絕南柯夢祇

有仙鄉欲臥游亦饒韻致

由哈密至巴里坤路漸上漸高八十里至南山口徧山

積雪終古不化車馬視轍迹而行否則陷入雪窖竟至

滅頂兩崖多松林天者喬者皆梁棟材也南山之北口

數十盤折而下又廿里至松樹塘則止宿處也土人出售松皮有厚至二尺許者色若臙脂文作雲霞迴薄之狀好事者用作聯額大興龍雨樵嘗作南山松樹歌雨樵在塞外時天津沈峻存圃官吳川以細過被劾亦有西域之行與雨樵唱和稱龍沈詩如徼外天荒晴亦慘春來人倦夢偏多瀚海幾層常載水龍沙四月尙披裘鶴因久睡都忘警松到嚴寒也解凋春風無主還吹雪遷客何心更問家小市幾家還築堡戍樓數里又逢臺半函繭紙懷人句一領鸛裘度夏衣皆謫戍時作賜環後鸞書自給顏所居曰隨緣自署曰陶令歸來惟乞米

鄭虔老去尙箋詩

丹陽彭莪園孝廉在日下與朱子穎王禹卿姚夢穀結
詩社其都中述懷云白草連天接大荒西風匹馬帶斜
陽千金已老燕臺駿五月猶寒易水霜道路文章供瑁
瑛樹雲心事兩蒼茫不堪更讀桑乾曲根觸江南是故
鄉

風雪寺在靈寶縣鄂剛烈行過此因風雪小憩寺中詢
無寺名卽以風雪名之明年春復命京師重過留詩于
壁旣而準噶爾內亂以參贊大臣由西路進勦二十年
六月達瓦齊就禽同班第駐守伊犁時阿睦爾撤納蓄

異志逆黨應之被陷力戰慷慨殉節上元汪文輝意園
其門客也有蘭州之役過寺見壁閒遺蹟感賦一律云
重過野寺憩雙旌一騎書生百萬兵春爲鶯花留錦句
冬因風雪賜佳名南留恩澤盈淮甸西望忠魂震虜營
今見遺蹤揮淚拜亂山秋草不勝情剛烈嘗總制兩江
故有第五句

右安門外中頂歲以四月初一開廟吳懷峰比部詩十
里城南綠滿川春風春柳自年年名園幾廢靈祠在孤
負看花穀雨天都人士女競喧奔花市闌珊廟市繁已
見田田好荷葉風流憶殺趙王孫

新陽顧竺生句云冬日能閒亦覺長歸安柴敬思句云
年老母爲過分忙皆非心閒耐寂者不能知之

錢文敏以詩畫名女浣青得其口授京師休沐之所曰
綠雲書屋昔海寧陳文簡居此王橫雲尙書所署其東
有篋焉曰古青齋文敏拜 御賜之詩而名之也莊虛

菴爲文敏甥管韞山尊人與文敏有連皆嘗館邸第文
敏弟竹初借猶子味菽數省視文敏文敏爲浣青相攸
得永濟崔曼亭虛菴之姑子也旣就婚文敏留不遣去
此五人者相得甚歡或鬪險韻策舊事爲笑樂庭有老
桑近百餘年物綠陰蔭蔚一畝視其景移屋角則文敏

退朝競就質疑及舉所得請甲乙以爲常曼亭名龍見
僑寓陽湖浣青名孟鈿唱隨風雅曼亭著述無多有詞
一首附浣青集中三子幼而能詩竹初題詞有郎種甘
棠兒視草修來福命勝梅花之句曼亭官富平時虛菴
爲序其鳴秋合籟與斯集者竹初韞山味菽復有浣青
從母之子楊與岑及曼亭子雲客時文敏已捐館舍矣
虛菴詩如送蔣健之出塞句云遼海文章師李賀帝城
書札累陳湯格調亦極超越韞山侍御以乾隆丙午大
直樞垣丁未春大宗伯某掎摭漁洋竹垞他山三家詩
及吳園次長短句內語疵奏請毀禁事下機庭韞山請

惟將曝書亭集壽李清七言古詩一首事在禁前照例
抽毀其滄洋秋柳七律及他山宮中草絕句圍次詞語
意均無違礙當路躪其議奏上報可有詩紀事姚姬川
贈錢魯思詩卻憶平生知子時侍郎舉族住京師安昌
弟子聞張樂謝傅家庭多詠詩樽前冠蓋俄逾貴室內
孤嫠今莫支盛衰之際亦足感也

蔣定翁田家小憩有作云笑捉犁鉏教子孫戲拋菽粟
飯雞豚幾人春鬢白成雪十里菜花黃到門閒數年華
同世外坐看雷雨出山根也知不識城隅路汲徧三條
井纜痕極近白陸嘗於齋前見鬪蟻數百團結六七日

不解定翁閔之具衣冠持咒爲蟻解厄蟻徐徐散去錢
麋山紀以四絕句云兵端大闕如劉項未死羣爭腐粒
餘猶感主人苦口勸肯收隊伍去徐徐董生仁孝感雞
狗蘇子庭除養鵲烏蟲蟻有知笑居士婆心一片太區
區閑上枯梨尋自樂撼將大樹漫生驕釋圍共享清平
福穴戶休令雨水漂忽忽旋磨豈知愚百歲光陰隙過
駒刪卻貪嗔種種念滿天花雨坐團蒲其佛圖澄墓有
云季龍父子嗜殺人干戈揮霍白日昏中工異僧誦經
呪能使信奉同於神譬之虎狼暴橫不可禦以術收攝
帖耳馴屢從征戰勸止殺出言頗活蒼生羣其言皆有

至理

李少鶴官嶺西李松甫館之書樓交契最深少鶴歿後
因名其樓曰憶鶴少鶴又與天津王省三希曾善爲省
三題一梧齋畫冊詩寧飲建業水不食武昌魚如何來
象郡卻憶武昌居漢陽有遺愛爭趨爲結廬晴川樹歷
歷孤木表一梧爾時方罷郡闔扉還著書人事浮雲過
俯仰十載餘此來牧蠻民豈以楚粵殊不種柳州柳自
比愚溪愚我當如元結作銘非晤浯獨許王漢陽可與
游柘湖省三以庚辰舉人歷官繁劇有治績能斷大事
發奸懲蠹無所避孝感大姓活葬饑民十一人守令畏

事莫敢發省三署漢陽立雪其冤甲寅牧象州少鶴時
宰柳城寄詩訂交並手錄舊作相示省三與其兄西園
司馬鄴下舊好也其荅少鶴行至潯江寄別云近得潯
川札知君指桂林江流去不轉離恨與同深望斷雲帆
影空傳越客吟挑鐙幾回讀風雨夜沈沈作吏甘人後
論文與俗殊天涯欣執手吾道未全孤舊榻榕陰在清
霄鶴夢無蘋花思共采逸興滿江湖文章有神交有道
於此見之

謝蘇潭中丞詠李易安居士云風鬟尙怯胥江冷雨泣
應含杞婦悲回首靜治堂舊事翻茶校帖最相思詠史

諸作比之胡曾周曇惟此首有詩人之致

嘉善浦鏗字聲之號秋稼弱冠卽從事經學校正十三
經疑譌得八十一卷阮文達校勘記屢引其說卒于乾
隆壬午其同董愚溪採梅鄧尉夜宿萬峰禪院諸詩亦
復清拔阮校單行本甚精南昌刻本不出一手脫誤甚
多

錢武肅王鐵券狀偃如瓦長尺七寸廣尺八寸厚一分
五釐文二十五行行十四字計三百三十三字宋文憲
送錢允一還天台詩序皇帝大告武成念開國諸臣勞
烈錫以鐵券下禮官議其制度近臣奏言唐和陵時嘗

有賜於錢武肅王其十五世孫尙德實寶藏之遣使者
卽其家訪焉尙德櫝券及五王遺像上之上御外朝觀
之尙德東歸命還其券與像錢氏實有此券已五百年
宋淳化中杭之守臣嘗連玉冊進之元豐五年又進之
宋季兵亂券沈官渭水中者五十六年元至順二年漁
人獲之而售於尙德之父世珪迄今尙德又進之是嘗
三登天子之庭云云順治二年台州亂錢氏子孫薶山
中旋失所在順治八年其二十世孫珍得于巖穴中顧
赤方過台州同陶季深爲歌記之乾隆壬午 聖駕南
巡武肅後裔文銓奉鐵券至省錢文端時以刑部尙書

在籍食俸率同族眾恭呈御覽

純皇帝垂念前勳御製歌詩一章勒諸券櫝天章光被
垂示無窮錢氏以居台州者爲大宗沈歸愚劬劬歌云
錢唐錢氏王家孫未見劉宋諸序也錢坤一吳越武肅
王祠詩石鏡山荒歲屢更家王遺像肅朱萐蕭森錦樹
秋風色帖妥濤江白日聲歐史世家難盡信龍門年表
有公評順天不獨能存祀猶仗臨安作宋京順天者存

王文成題額

錢曉徵贈金鍾越孝廉云澆愁十榼似淋灰絕妙詞成
大雅材風雪長安吟思在蹇驢重向灞橋來三隱高人

賸舊蹤家山作達是誰儂酒徒尙有吳郎在

謂杉亭舍人

共

話桑根點黛濃菜把多年地主恩圍鑪輒腳共寒温清
言擁鼻相酬和也勝上書光範門鍾越時寓謝東墅京
邸也全椒人若張洎樂韶鳳楊于庭並以文章名國朝
吳編修默厓有聲於時其兄山人亦能詩隱居學仙新
城尙書和左司寄全椒道人詩贈之鍾越少時卽長韻
語癸酉杪冬至都曉徵杉亭東墅及王穀原褚鶴侶李
笠雲醪錢爲輒腳會鍾越卽席賦詩云風漲斜街堀堞
塵寓廬尋訪定無因如何纔把驢綱卸便見經年夢裏
人歌罷黃塵念已灰支離誰顧道旁材只因愛畫旗亭

壁風雪長安又早來促席松益竟夜懽雞織魚鮮各堆
盤吳儂自愛江鄉味不用烹羊羨大官兌酒休辭費十
千知君壓歲有餐錢酣歌可憶秋深夜明月虛堂曲尺
眠杯中樂聖雖輸爾座上狂言定讓儂不聽公明通夕
話三升孤卻玉蛆濃獨澆濁酒酌長恩詩卷投人未易
溫泥壁紙窗堪穩臥顛當從此不開門征衣無襍袷無
顏卽次初安便擬還卻怪三年薇省夜青縑被裏夢魂
閒玉蟾蜍水和丹砂濃點新詩勝綺霞強韻壓成寒夜
半銅盤剔盡蠟鎧花曉徵同賦當亦八首但以三首入
集耳鍾越初官揚州廣文時揚州物力殷饒紅橋白塔

閒擊鉢分牋騁其速藻繼補國子博士詩名尤振於京
師旣而謝病歸僑居邗上齒髮日凋所著棕亭詩鈔爲
令子臺駿哀輯付梓其題白秋齋游戎所藏陳榕門相
國手札卷軸卽送入都云古來良相與良將氣類猶如
乳投水不有伯仲伊呂才焉識絕倫軼羣士秋齋將軍
今人雄意氣直貫垂天虹榕門相國撫吳日愛其勇敢
堪元戎手書慰勉敘契闊絕似髯公與諸葛卽今故紙
數行中片語猶教真氣活去年偵盜淮徐間跣足走徧
芒碭山談笑一探囊底智逋藪各膽皆摧豨孟冬良月
朔風急匹馬朝天入京邑 天子方思將帥臣將軍正

向彤擢立羣帥邊疆多則多三川壯士尙橫戈請看銅
柱標功業至竟終歸馬伏波沈鯨谿稱其凌空飛動得
之自天略可見也

紀文達題陸耳山副憲遺像有云蓬萊三島昔共到開
元四庫曾同編兩心別有膠漆契多年皆似金石堅謂
四庫提要與耳山偕任之也耳山詩筆較文達尤擅風
華彭城詠懷古蹟云千古雌雄閱項劉荒臺落日迴含
愁寄奴自有天人表亞父空爲豎子謀幕府關中盡豪
傑參軍江左亦風流南岡賭跳須臾事回首陰陵貉一
正黃樓樓下夕陽黃城角平臨僕射場九日壺觴共王

倅一編騷雅妙秦郎山人野鶴招難待父老花枝裊更
傷曾見兩翁清似鵠逍遙堂後木千章合肥龔端毅公
故宅云祖帳都門願竟違故山松桂儼林扉身前出處
煩青史海內身名感布衣杜老詩篇終古在醉翁賓客
至今稀蛾眉寂寞俱黃土空愛叢蘭墨瀋飛廬陵文信
公祠云宋家已失獨松關丞相遺祠傍故闔朱鳥何時
聞慟哭黃冠有客望生還榜頭小錄人爭弄獄底遺書
史不刪我向南溟雪餘涕浪花捲屋弔厓山

段懋堂庚辰舉人知富順其登雅州城樓云雉堞嵯峨
矗素雲登臨豪興百僚分灘聲不厭喧終古山色從來

媚夕曛浴沫異源同到海蔡蒙高處獨干雲聖朝聲教
原無外偶爲籌邊誓六軍飛越峰高木葉聲從軍歲晚
不勝情但知牧圉勤羈縲敢道潺湲可濯纓落落長松
穆古堞離離幽草入新晴卻愁一夜城頭月西照關山
此夜營沈匏廬其高第弟子也孫和伯題匏廬籌鐙圖
云經韻樓前絳帳開侯芭問字擅清才辦香皎長光如
炬知有傳鐙著錄來鴛鴦湖接女墳湖蟹舍漁籌隱碧
蘆一舸從君期後日吳江鐙火載書圖

德化陳時若中丞奉茲江州義門之後中丁卯鄉試第
一出錢香樹尙書之門以庚辰進士授四川知縣至老

受任不得歸取鄉地自號東浦以寄思當大兵討金川
主礮局及修飭兵興橋路常居口外山谷閒瀕危經歷
多異境舉見所爲詩其假寐詩云昨昔辭京城結交事
方始稍稍出詩篇往往道名字恩門實多才尤篤昌歎
嗜昌黎與山谷筆翰蟠天地予其受以蒙養此物之穉
歸歟少沾染風日恐憔悴再拜聞妙語低首心中事謂
蘄石宗伯也詩筆亦與蘄石爲近卒於嘉慶己未年七
十四姚昔抱有輓詩三十二韻其登大觀亭句云亦知
元學通三島安得蒼生共十洲可爲當時理學別派箴

砭

新城城東有王氏舊業曰萬樹莊爲長山袁太常承寵
讀書之所而長山城南有袁氏魯泉別墅乃王文簡公
甲申避地所居兩家百年姻好各念先澤繪圖互易均
不受直袁海曙守誠屬錢茶山記其事卷中題詠甚富
桐城馬一齋有翊翊齋筆記及詩文各一卷嘗講易於
樅陽主講虞山及吳江長洲著有讀易錄禹貢初輯門
人始與林明倫出守衢州請付梓人明倫旋罷郡而卒
不獲刊行乾隆初有欲保薦應制科者辭不就其荅張
茂才書謂春秋據左氏公羊氏之文因何休之說以爲
母弟尤重非也親莫親於同父於同母加厚則於同父

差薄而爭釁之端胥於是起由是以推程子所謂近於禽道者非過論也至於嫡有同母庶亦有同母程子言同母弟蓋謂嫡者特解禮文立嫡子同母弟之義謂其以嫡而非謂其同母文義甚明曷嘗謂母弟嫡子同母弟乎足下援衛瓘稱兄證母弟之無論嫡庶夫母弟誠無論嫡庶也若書弟之義蓋又無論同母不同母耳竊嘗論春秋常事或書公子或書弟似非義之所在惟其相殘害則書弟以見義如陳招於昭元年稱公子八年殺世子則書弟宋辰首惡書弟地非謀主則仍書公子此固比事觀之義例自見者矣程子謂稱弟者或罪其

寵信之過固未必然謂或責以失兄弟之義蓋近之矣
必謂母弟而後書弟以見尤親此必不然之論也爲說
平易溷實可以觀其學矣方植之爲序遺書謂讀之如
行平岡曼陀而時見瑤草琪花如望長空白雲而忽見
霞綺如循近澗清泉白石游鱗一一可數而可掬不專
談道而道見可謂工於取譬至其欲揚一齋而抑竟陵
胡石莊謂繹志如庫藏簿大官庖以夸窳人餓夫又如
以飴蜜糗救餒嬰兒未飽者不得飽旣飽者慮或傷腸
胃則鄉曲之見未爲篤論

吾鄉于石薌詩草有句云丁年出塞三軍壯子夜飛霜

萬馬寒爲王穀原比部所稱題云好似姑臧李常侍任
人寫作畫屏看

杭州小有天園有丹崖小雲岫石門山漱玉池歡喜巖
羅漢洞金鯽池獨木桑經藕蕩諸勝舒雲亭嘗養疴於
此陳鑑遠村贈雲亭詩小園鈔朮序深巷理茶鐺其南
亭山秋望詩只緣有客住南山亦爲雲亭作也

大名崔東壁與弟邁德皋壬午同榜舉人官羅源六年
有惠政告歸肆力著書以經爲主辨傳注闕異說精神
所注尤在考信錄一書詩曰知非集句如病多成性懶
交寡得身閒清溪隨路曲官柳到橋分皆近晚唐德皋

著有魏墟雜志又欲爲大名文存未成卒

朱南厓相國題杏瓊齋稿詩李侯灤陽秀羣舉冀北廉
哦詩必杜甫松濤發虬髯君昔宰陽高民歌邑中黔竭
來令濤皖秣馬不用箝我覲子于晉愛其知養恬廿載
會江皋舊雨隨鈴幘春鉏咨粦稌秋水憂葭蒹肝鬲洞
相照無事窺翳巖臭味久而知不必投酸鹽君旣惘無
華我矢廉不嗾三年治雄繁安靜得所愿卽今擢譙毫
施澤渦淝漸訟清好坐嘯毋擾市與閭蘇州更道州聽
爾風雅兼鞫謀如保赤報汝含飴甜杏瓊齋灤州李石
帆廷儀詩也句如高梧深見月密竹暗藏星花與僧分

種山邀鶴共游格律亦初不類杜

金壇于蘭圃上舍銳與丹徒徐宛東中丞嗣曾爲髫齡
交宛東視學陝甘路最遼闊馬上與蘭圃倡和得詩一
百五十餘首名之曰聚星編宛東謁諸葛武侯祠云漢
中王卽位五字補天功安見益州牧不爲天下雄琴臺
梁父意桑樹布衣風左袒千秋定都歸澹泊中蘭圃秦
嶺謁韓文公祠云十年風雪嶺猶見片雲橫宥罪天王
聖封章吾道明功真追孟氏論不負陽城北斗羞瞻仰
頭童學未成可謂異曲同工宛東商山詩紫芝歌罷楚
歌哀鵠羽翻教作雉媒至竟安劉憑將種諸公應悔下

山來亦復別尋蹊徑同邑李東厓堯階並在學幕秋風
鳥鼠天邊路落日牛羊隴上村隴頭流水用漁洋秋柳
韻句也

賈長江詩客舍并州已十霜歸心日夜憶咸陽無端更
渡桑乾水卻望并州是故鄉丹徒李御琴夫館京師蔣
氏春日雜詠云何處登臨好夕陽盧溝東望水雲長當
時恨不并州住渡卻桑乾卽故鄉翻用賈意可謂妙於
語言其詠佛手柑云一從散罷天花後空手歸來也自
香以此得名詠秋草云南浦送君方幾日王孫歸計已
經年亦極超脫

馮玉圃哭褚筠心學士二首有云芸編瀛館三長重蘭
草湘江四稔栽九秋尙憶樽前別一紙還傳病裏書筠
心字左莪癸未詞館曾纂西域圖志西域同文志等書
官至侍讀學士左遷部曹乞歸長洲有筠心書屋詩鈔
鳳灘詩云擊汰辰龍遡北河名灘萬斛舊驚波風煙黔
箐重源遠雷雨蠻溪九派多隘地濤聲馳白馬連天山
勢壓青螺東坡奇絕南游興準擬憑舷發浩歌視學湖
南時作也嘗與吳玉初點定玉圃詩稿

灤州李石帆刺史詠史詩累朝榮遇馮元老一代人才
莽大夫漳河弔曹孟德詩腋旁狐媚忘司馬眼底英雄

識使君太子塔在揭陽之尖山相傳爲宋幼帝駐蹕之所大埔工復齋教授詩香營虛擬孩兒降祕殿難如良嶽封三戶亡秦思往事一成興夏媿前功讀之輒爲擊節有皋羽西臺竹石俱碎之意

翰林院以典簿司簿書錢穀而掌故文書則責之待詔雍正朝始命於編檢中擇才以總之名曰辦事翰林部院體制堂上官入署乃喝道翰林開坊後則然而辦事者亦如之祝芷塘詩博帶戟冠論典墳飄蕭野鶴迴難羣肯拋冊府詩書畫忽學官箴清慎勤入署傳呼終不武隨班判牘亦空文只應鈴索深嚴地風月瀛州飽十

分芷塘以乾隆戊子辦院事也芷塘癸未館選年未冠
恩假歸娶其題簡齋玉堂歸娶圖云才名遠媿生花管
佳話同傳合盃一樣宮袍天廡馬翩翩新自日邊回
百年以來自溧陽史文靖後華亭張文敏靜海勵衣園
無錫嵇文恭秦芝軒李松雲隨園及芷塘八人故又有
翰林此例幾人同近有中丞遠相公之句文靖文恭及
舒穆魯文定公宛平黃崑圃侍郎新建熊滌齋皆重赴
瓊林芷塘和盧抱經學士重游泮宮詩有云早爲江夏
無雙士佯作瓊林第六人隨園十二歲舉秀才抱經重
游泮宮亦年七十二故又有白楊作柱青衫老除卻袁

絲孰頡頏之句芷塘入學時年十六錢曉徵入學年十五

遼東蕨菜肥美都人喜食之朱子頴白崖居士餉山蕨
分寄潤堂云肉食從來鄙清宜伴苦吟野蓴絲共滑江
苻色同深遠道家山念窮檐婦子心休嫌滋味薄儉歲
粉如金末句謂黔中米貴山民嘗以蕨粉爲食也宰簡
縣病中止酒寄都中故人云平臺歌管記游梁扶醉芳
園屐齒香一自剖符親案牘與誰破笑問壺觴人如苦
竹蕭蕭瘦愁似春雲黯黯長官閣垂簾寒不寐雨聲猶
夢下糟牀子頴早歲與王夢樓姚夢穀登黑窰厰酒酣

歌呼旁若無人至是而遠宦崎嶇同列忌其才頗爲所短成都工竣旋珙邑詩所謂壯志都隨客鬢殘也其禽賊敢言蒙上賞著書轉喜得閒官謂因捕盜由縣令擢敘永同知丁亥七月以軍興帶永寧兵八千人馬數千匹抵永昌軍前道遠而險解橐濟六營兵之不能前進者戊子二月再奉軍差入黔同德明府夜話云同倚高門建戟牙微名誰信各天涯秋鵠社燕經年別蜀道黔山萬里家白髮有情生毳帳青鐙無恙負芸紗傳書共許平蠻策忍向邊風咽暮笳己丑六月因城工受累禱神自譴有平生肝膽多相負萬里妻孥那得歸之句是

年七月奉調打箭爐旋擢渝守壬辰養疾南臺寺移秦
安又值鄰郡賊起助戰臨清城下平定餘孽思退而輒
爲上官所留於簿書叢集稍求頃刻之暇出其才力以
與古人相追逐欲息其勞而不得也東平逼近汶河居
民常苦水患督築隄防不恤勞役讀其濟南道中病骨
僵於疲驛馬宦情冷似逼晨星之句有深慨焉鄙人乞
外十年中更三郡放翁所謂以九尺之軀低首矮屋以
視子穎才則不逮憂虞悔吝抑又過之矣

乾隆二十三年山西藩司蔣洲虧帑二萬餘金升山東
巡撫去任勒派屬員彌補太原知府七賚復連名作札

向各屬催取以致各屬多有侵虧七賚及寧武令周世
紫均坐是獲罪世紫祥符人壬戌庶常也邵叔勉懷周
芝山同年云羊腸跬步有傾輒消息傳來萬里愁書札
只催旬月報夢魂難向網羅求幾聞乘驛全羊舌漫冀
更冬繫夏俟身事一朝成瓦裂十年追恨出瀛洲又哭
芝山云弱冠升朝列冊府掌羣玉清標潔冰雪勝抱陶
卷軸一朝墮塵埃黽勉親案牘側身俗吏中卑栖乖素
蓄漸萌競進圖隨眾更陸陸豈忘止足分所覲脫銜束
中道逢賞音拂拭能羽肉意氣徒傾人冒進詎爲福君
房自罹憲安仁竟遭戮殉惠迷所守希榮乃招辱乘田

與士師賢聖有遺躅如何忽斯義援上務欲速哀哉金
玉躬一誤不可贖茫茫十年別相思各天涯祇謂川路
遙詎期生死乖存不游一塗沒不撫爾骸修短本有期
難爲故人懷況子抱不測憔悴委窮埃嚴霜一以零微
藿無全荄孤魂飄異鄉零落重我哀念昔少年日結契
在金階達識祛所滯清言意多諧誓同影與形投分異
羣儕歡娛幾何時逝景不我迴痛哉山陽笛已矣令心
摧韓柳至契而子厚之不自顧藉昌黎亦不能爲之諱
此二詩猶有古道存焉光宣之閒耳目所接類此者數
見疆吏冒濫侈欺賢者不免凡所虧蝕取償司局其用

人亦以使貪使詐爲能事而廉謹者不庸所信用非盜
臣卽聚斂之臣多所侵冒覆謂廉能從而芘護之登進
之徇知養交互相被飾欺罔百出相師成風在官之能
者無不貪詐自恣比其死若去也又爲之代理官逋伙
助家屬不發其覆而恤其私偶有被譴責者則皆不善
劫持長官之短長者耳以視恆文蔣洲之事動輒敗露
誠所謂聖明之世矣彼作亂犯上之人習見官之可爲
而歆羨之因而借篝火之謀爲攫金之舉然則使貪使
詐豈徒敗壞官常其禍不誠爲亡國之媒孽哉

汪康古以壬午到閩辦事有口號六首初秋夜直四首

夜直典籍廳滿漢票籤滿漢蒙古堂凡六人漢票籤每
以後進者九人該夜直至第十日則又一周更有後進
者則最前一人不復夜直謂之脫班軍機處在乾清門
側每入領 上諭奏摺日直中例派一人候夜直交代
爲守晚遇啟鑾日迴鑾日封印日則三日本齊下夜直
書通本略節堂中爲侍讀辦事處暑晨例設冰典籍到
任例以豬羊祭庫供事阜隸紙匠蘇喇朔望日赴廳唱
名漢典籍無園直夜直連兩日內閣各堂用印有印簿
凡 上諭處 國史館三通館俄羅斯館文移行部院
衙門者俱用廳印以印單爲憑滿漢典籍各二缺餘皆

別堂來兼理者滿侍讀學士侍讀兼廳則爲廳官之長
廳供事南北各十四人五月十三日釀錢祀科神云是
蕭曹也旃檀香寶 交泰殿二十五寶之一駕出內閣

學士典籍各一員赴乾清宮請寶駕旋送寶亦如之吏
部選例中書帶辦事銜者題管典籍撰文則否康古以
甲申任事典籍廳亦有口號八首其丁亥入直歸有感

云羸騾共我兩茫然六載天街儘折旋爛漫衣冠慚小
吏飛騰車馬畏同年官書罷進無餘事

纂修通鑑已竣

閣俸頗

支未了緣

新例六年俸滿
余尙欠一年

未免隨行悲老秃重來舊侶

總成仙謂自癸未到方略館不至票籤處已四年舊時

同侶無一在也甲申圍直口號云襍被趨西苑從他石
路紆絮殘人日雪雷般四更車咫尺傍宮闕三楹占直
廬新年班首到努力敢趨起年前無檔領兀坐悶難論
俄見催籤急初聞下本喧兩人稀笑語五日計晨昏又
發京單去麤官急禁門可證舊制

乾隆乙酉南巡丹陽於震亦川以武生召試考列二等
律詩骨力格調入七子堂奧贈陳元孝後人碎琴開土
云詩派江湖三子集酒瓢風雨六朝山謁陳少陽公祠
云關河嚴譴煩元老社稷偏安憶布衣謁吳季子祠云
樂辨五音傳上國碑懸十字照南荒題淮陰垂釣圖云

一竿風雨淮陰夜兩漢功名垓下時月夜重游虎丘云
半夜塔鎧鈴鐸語當年金氣轆轤知卒以江湖潦倒客
死海陵其過吳野人墓詩岸坼蛟龍移墓道潮來風雨
弔詩魂之句殆成詩讖

桐鄉宋貴鏡樓秋夜雜感詩廿年蹤跡細評量新署頭
銜字阿狂慚媿夢魂無檢束又隨秋雁過衡陽夜半濤
聲到枕邊忽驚簾外落飛泉悄然省得浮生夢兩鬢滄
桑一指禪逐隊新妝競入時望恩甘作有情癡安閒不
及長門女無事平明起畫眉秋風秋雨正秋三書卷鑪
煙共一龕賦到蘭成難卒讀儂家況復住江南鏡樓乙

酉拔貢秉鐸寧海常有句云詩猶垂老學家爲服官貧
先官西安訓導歷權湖州德清太平臨安蕭山諸學篆
周恤寒畯家亦因是稍落迨官白嶠僻處海隅其蕭慘
孤負之概於數詩可想見矣以嘉慶丁卯卒於任

番禺故老述陳白沙佚事云先生嘗戴玉臺巾扶青竹
杖插花帽檐往來山川閒有詩云唯有白頭谿裏景至
今猶戴玉臺巾又云拄地檜天吾亦有一莖青玉過眉
長又云兩髻馨香齊插帽簪蘭花閒木犀花見羅臺山
白沙先生墨蹟跋臺山治古文以訓詁不明則文字根
柢不立支離杜撰規矩蕩然故于爾雅說文治之加詳

嘗與彭允初書云前札偶因四兄論方朱文而及小學蓋成周教法本如是也考之周官次第炳然卽兩漢時尙存耑緒故云學僮諷籀書九千字乃得爲史吏民上書字不正輒舉劾猶有同文之一重焉竊深喟方朱二君以兼人之才而不曉致力于此也昌黎生平得手舉世以爲在荅李翊一書固也然其實實用功處昌黎嘗自言之而人乃忽而不察曰沈潛乎訓詁反復乎句讀此昌黎所以拔出諸家也歐陽永叔以訓詁爲酸餽此其讀書粗處于文字根本未之得也故劉原父以不讀書規之其卒也允初錄其文爲一集有詩一卷多雜禪

悅惟送宋羽儀之南康二首云惜別章江頭秋風吹別
緒寒雲千里停對子不能語策馬賴溪陽見面何縷縷
及此攜手歡翦燭話太古惻惻小雪天迢迢南康路脈
脈意未已黯黯芳洲樹不丁遠游子白髮鬪昏晨平生
知己交卒卒懷苦辛苦辛亦何爲親慈甘賤貧極懷黎
水魯謂魯孤子受風塵念我艱難友媿此薄植身君行
胡可輟君意倍輪困我亦聞中去悠悠倚閭人清言見
骨古意益然

于文襄因 御賜臨郭昇柳梧煙雨圖名其書屋曰雨
梧董東山又爲臨摹此本復於避暑山莊直廬借錢稼

軒爲合作四友圖稼軒有詩文襄暨沈雲椒司農均有
和作時雲椒甫值內廷也雲椒以壬午春獻賦 行在
癸未入詞館自甲午至丙申五遷而至卿貳丁酉視學
閩中庚子入佐夏卿官至戶部尙書諡文恪其題晉江
林篤齋世魁軼事云林幼孤父葬邑之鳳皇山叢塚閒
旣長謀改葬求其冢不可辨夜露宿莽中若有告者曰
爾牧牛知牛脣乎晨起見牛齧草亟趨前熟視不知所
爲撫膺哭失聲一老父過而詢焉以實告曰我爲汝求
之蓋老父卽林父葬時主其役者求之果得乃改葬間
其地則名牛脣梗林奉母必得肉食值荒歲妻子雖草

具不能飽子聰自塾歸午食移晷未出母怒曰若已食
不卽赴塾何耶將撻之聰倉卒忘父戒實對未得食母
謂林曰嗟奈何汝曹日枵腹以奉我因泣下林退而撻
聰父子相泣戒母復洩言聰壬辰進士聰子紹甫年十
四卽登鄉薦司農詩云牛眠地果在牛脣誠至方知夢
是真燐碧草青泉路隔幾回腸斷入山人奉母盤匱質
貨供妻孥藜藿不能充一家忍餓傷心語盡在相看對
泣中交友生平古道敦拯人瀕死直人冤索逋旁午殘
冬候總爲尋常一諾存謂每歲爲親故認貨頗多臘殘
索償滿座也其事足以敦薄俗

乾隆己亥謝金圃偕翁覃溪主試江南夢人遺以巨筆起視案上得錢湘舫殿撰卷遂定解首辛丑禮闈德文莊偕沈文恪吳香亭及金圃主試湘舫舉首殿試後

高宗召讀卷諸臣指第四卷諭曰此書法不如前三卷而對策勝人必會元也可以冠多士折之果然御製紀傳臚詩六韻有王曾如可繼違勸我心存之句既定錢卷第一諭曰本朝尙未有三元此雖揣度得之實屬至公天下人當共喜也故事新進士釋褐於國子監祭酒司業皆坐彝倫堂行拜謁簪花禮三鼎甲所簪金花外有備用一枝爲總理監事所攜歸是時總理監事漳浦

蔡公新曰今科狀元是翁公上年鄉試所得士此花應
歸翁公翁時爲司業也覃溪所得三元花銘於櫝藏之
併撰三元考三元喜讌詩及三元花歌

雪橋詩話續集卷第五

雪橋詩話續集卷第六

遼陽楊鍾義撰集

吳興劉承幹參校

德清徐陶尊承襲清華厲樊榭稱其懷古攬勝之作橫
驚別驅清峭奇麗有綠杉野屋集明醮壇茶字琰歌云
神鼎雉羹應不數元修一代堯齋主青爵剛成內殿篇
白瓷屢進浮梁簿玉泉屈注西宮清洗滌深教甘露盛
文成五利應細啜身佩玉印壇中擎贊元班錄鈴山首
竊弄金甌如在手范銀食器已恩殊五篋卮彝還自取
人間遺事重嗟吁滇石龍涎知有無且試冰芽煨地火

謾隨犧杓與沙壺雪花當戶煤英吐淪罷身輕無俗慮

回頭笑謝紫極翁讓我蓬萊且飛去天聖寺管夫人畫

壁歌云墨竹師承難定斷清氣偏鍾閨閣輩自描牕影

月光中許有盧孃李有妹梅堯臣詩許有盧孃能畫竹盧氏許州人李公擇山房在

廬山其妹為作墨竹見周必大記蕙心蘭質更嬌春羅綺休誇越國人

宣和御府藏魏越國夫人王氏墨竹有二茗椀閒居看作賦山廬繡佛不生

塵夫人有山廬繡佛園散花偶過吳言地盤龍殿古涼無二東壁

光明粉乍新一時煙雨拖春翠腕約金環運撥輕滿檐

颯颯風檜聲寺旁有古檜堂松雪嘗作圖一幹一筆筆齊立十指十

筍筍易成丁香雀爪分還合可是隨身蘸蓮葉夫人嘗以銀珥

買得蓮葉
硯隨身

承旨應憐殘墨寒補將苔石看猶溼六種蘭

一枝蝶

俱天

畫梅花移去月宮中惜不移來供襯貼

夫人嘗入

宮畫墨梅系以詩

有移入月宮中句
悄然墮我灌頂旁

成都灌頂院有張立墨竹壁一

凹

凸何須泥手搶

郭熙合巧者以手搶泥於壁隨其凹凸作畫

穠纖開闔各有

致諦觀真欲斫青光不呼作葛呼作管

王弇州云晉人不識竹嘗謂是

有節葛西吳里語吳興人呼誰作管

瘦影梢梢痕未淡彭城之派莫說傳

湖州不及此壁五百年餘留

乙丑丙寅錢坤一嘗留止德清徐氏之茗雲草堂在舍

亭山南為齊王裕之隱處也雪夜徐陶尊在城內懷摯

石先生三首云塞帷影忽疑初曙瀉竹聲猶憶舊年贖

我獨吟何所似月中寒鴛鴦肩風來吼虎仍相虐歲
云奔蛇不可援孤負論詩劉夜坐滿堂鋸肩落清言統
如漏鼓城闌隔童子屏風倚欲僵未必羈愁明似雪那
無春酒暖如湯反用蘇公樂著作送酒句也坤一答之
二首云佳晴雲水轉清虛似此谿山可讀書甚欲草堂
鄰白石還期詩格到黃初羈愁不計明于雪春酒無煩
煖若湯料理鷺鷥肩聳聳今宵真有月如霜丙寅閏上
巳吳越諸公修稷事於西湖陶尊與羣從以震以坤皆
與焉有仿蘭亭體詩

高陽李露桐中丞殿圖乙未分校禮闈得吳穀人卷力

薦獲冠本房撤闈後有詩紀事由給事中補鞏秦階道
嘗奉命查涇渭清濁源流自秦州溯流而上至鳥鼠崆
峒著辨繪圖上之得邀 睿賞明史沐英討西番禽酋
長癭嚙子等平朶甘納麟七站宣德年千戶錢宏激變
番人正德年松潘熟番作亂宏治十四年巡撫張瓚攻
黃頭諸寨赭其碉房九百我朝漳臘置鎮番人寧謐無
異編氓會卓泥土司與四川松潘漳臘各番互爭噶固
山界露桐減騎往勘由卓泥城歷小洮河丈八嶺鶯哥
口皆人蹟所不到處羣番導行得至所爭地界片言解
紛兩造咸服立石于達魚山頂而還其番行雜詠云鸚

哥溜下響如雷白馬東流去不迴

白水源出若魯等番達鸚哥谷東南入岷

州欲向嘉陵尋古道貢璆端自漾川來卻行祇覺馬蹏

偏竟日微窺一縷天七十六盤彈指計到頭不信有人

煙異卉參差間綠紅靈根稍復辨芎藭會須得遇看山

眼併入桐君藥籠中黛色參天不記春灌叢都作老龍

鱗何當巨掌開河曲大芑安棲億萬人昭靖

英諡

當年自

請纓納麟七站出奇兵依稀癭瘿成禽處偉績千秋說

沐英羊嶺鵝谿古戰場黃頭九百赭礪房正嘉勦撫均

無策漳臘何曾是大荒

自狄道至岷州洮州皆沿洮河岸行洮州南接四川有

九條丹巴之戍近城山土皆赤番人市馬千百爲羣上
海喬雲門鍾英次洮州詩葑屋參差半枕山枯林煙散
石隄灣邊城犖确千崖赤番市駮驪萬馬班戍險丹巴
巖蜀道軍雄鐵步障雄關楊土司番兵稱鐵步西來繞徧臨洮路
越巘穿谿去復還其過野狐橋云洮流如帶峽風零積
岸輪囷石作屏簾木縱橫漩溜下板橋逼窄緯輿經孤
村旁水連笮架荒堠沿岡出戍瓶衰草前隄穿詰曲夕
陽無限數峰青皆官岷州時作

上元戴芑泉侍御翼子與從弟未堂學正祖啟俱受學
於世父雪村人稱爲二戴詩如牛樓云豆方滋莢紛綠

壁柳不藏根曲護隄早稻完租遲稻實手按新草補牛
棲老農云下下高高石路斜老農得樹便爲家繁英壓
隴平無迹晴雪秋開蕎麥花皆有風韻未堂爲關中書
院山長撰有陝甘資政錄縱橫數千里之間山河阨塞
瞭如指掌其諸水總序謂觀省志及府州縣各志其敘
水皆斷續不接一川而割之數十州縣數十州縣而疊
見此一川前旣不見其所發後亦不見其所歸蓋其分
疆絕界勢不得不然此志乘之所以難稽也其於山也
亦然然山之連亘數郡如祁連終南者絕少水則略有
源流必更數縣寸寸截之觀者孰從而尋之今則綜水

經之法綜兩省之水自源徹流各聚一篇河則自積石以至於底柱涇則自安化以至於高陵渭則自渭源以至於同華漢則自寧羌以至於郿西江則自秦州以至於廣元其他諸水莫不皆然此桑扈之遺法也然水經及注方說經流忽轉支派正支未了又入旁支比歸其原目眩已久今則經流先敘各條貫成篇正篇既終然後按地勢之先後以次敘旁入之支而先標之曰入河之水若干入渭之水若干庶乎若網在綱有條不紊可謂通識

瑛夢禪詩不多見興化李審言得其手書詩稿一幅爲

辛亥七月所作詩云十年不相見我懷難具陳及至相見時欲語反逡巡豈真無所語身世多悲辛茫茫鴻爪雪役役車腳薪俯仰一回首滄桑變故頻高年半物化弱息皆成人嗟我雁行稀分飛各風塵求田計已左垂老情愈親蹉跎看白髮倏忽六十春自慙叔夜嬾誰知原憲貧蓬蓬揚春華勛爾休因循敬以懋乃績勤以策乃身扶搖九萬里矯翼凌青旻吾衰勿惆悵天涯猶比鄰詞意蓋以示卑幼者自注謂前輩尊長俱已物故諸弟或差或官各在一方又云先老家訓以敬勤爲主知拜都家法其重圭綯組非偶然也

乾隆己丑瑛夢禪攝豐鎮涇陽張五典敘百權應州同
發太原敘百詩所謂代北之官簿俶裝柴車書束各盈
箱也所藏石谷畫冊夢禪爲審定同時有以十萬圖相
貽者夢禪一覽輒歸之其畫十巨幅作萬壑萬柳之類
蓋借輦名耳敘百與夢禪話舊詩云烏目山人畫格殊
曾邀題字印連珠清冷心眼都如水笑卻吳裝十萬圖
其答夢禪詩遂爛亦何易人門時共推籃輿佐病足雪
色上吟髭積日勞尋問深談慰別離藝多能近道舊許
託心知則夢禪里居後作其寄懷瑛筆公夢禪云數椽
矮屋一園蔬此景端應靜者居最是尙書清節後諸孫

繪布誦詩書皆可想其高致

元和林蠡槎蕃鍾乾隆戊子舉人官婁縣教諭湖上絕
句云不知春雨漲但覺綠波長湖水不厭人扁舟自來
往頗近自然尤工詞其梅子黃時雨一闕云殘葉離亭
正臨別黯然聊共尊酒甚解纜滄波催人分手一片愁
痕空極浦半江暝色迷寒岫孤村口落葉晚蟬尙抱疏
柳偏負歌雲舞繡漸傷心望到幾處亭埃笑我亦飄零
淚痕盈袖涼意尙餘花影外月明空照人歸後重回首
玉闌夜寒依舊

仁和張虞琴比部時風詩如湖雲低覆塔林雨半吹花

午陰松拜檻僧定鳥窺龕皆有致初以中正榜授中書
雍正五年下第舉人文理明通特用教職時謂之明通
榜乾隆己丑有選用中書之諭因又謂之中正榜也

高宗御製瑪瑙寺詩商力彼民力求欣吾不欣又瑞石
洞詩徒因創覽一憑闌率費中人十家產洞在吳山之

西

東坡詩只有青山對病翁謂富鄭公也慈聖撤簾韓魏
公與歐陽文忠定策鄭公在樞密不得與聞由是絕交
歸田後魏公歲時遣使以書幣問訊鄭公一無所答魏
公深有慙德李厚齋韓魏公故園詩定策當年第一功

眞王錫爵誓初終卽看持重慙文正可有勳勞媿令公

公歿後子孫仿郭汾陽編魏公家傳

青史大名隨逝水黃花晚節尙西風

劇憐元老三朝貴不及邨山有病翁厚齋名且華秋錦

先生元孫也淹貫史事學使雷貫一取冠一郡丁丑壬

午召試皆在一等己卯竄東舉以優生咨入成均與當

湖沈文恪並有國士之目有周易象義十六國世家表

後唐書青蓮館集卒年二十九子遇孫其題馬令南唐

書後謂朱温篡唐而諸國仍稱天祐唐未亡也所爲後

唐書起天祐元年至宋開寶八年唐爲正統自太祖至

潞王爲本紀劉仁恭朱温居列傳之首如世充建德例

更爲載記五篇曰汴記晉漢曰吳記吳南唐曰蜀記前蜀後蜀

曰南漢記曰北漢記錢鏐馬殷王審知俱入列傳以正歐史及十國春秋之失見其舅氏楊謙所撰行略

烏程孫梅春浦以己丑進士官中書由典籍作丞姑熟校試金陵擢守寧國甫上而卒所著四六叢話其門下士阮芸臺爲板而傳之子曾美爲輯舊言堂集刻于嶺表壽外舅張少儀云九重曾歎無雙李女子猶知不二韓贈松青巖太守齡云若爲喚起騎鯨客更放江天載鶴舟亦極雅令

王宋齊名宋本謂荔裳及商止撫吳門下漸盛阮亭手

書一絕與之有王揚州與宋黃州之語邵長蘅因譏漁洋縣津詩吳江王翠曾論詩絕句云十子詩篇輦下稱何緣王宋得齊名荔裳已沒漁洋老暫許中丞領俊英翠山曾游沈文慤之門與同邑袁樸村竹軒陳易門芝房顧蔚雲東巖結竹谿吟社又與樸村同輯松陵詩徵有北谿詩文集所爲沈虹舟行狀謂壬申春舉於鄉名第一秋試禮部榜出名第二主試嵩閣學壽得先生卷擊節甚欲以作元而陳文勤公浙人以元屬浙爲嫌至拆號見先生名始惋惜旣而告人曰會狀易得耳解會聯者甚難有則許特奏聞國家昇平百有三十載三元

未有其人若有之又值太后萬壽恩科豈非盛事哉是
吾過也嵩閣學臨歿猶惓惓以爲恨此事可入四書文
話

董浦先生以詞科起家文章經術海內傾嚮身後其少
子杭八義寅貧無以給來京師仁和陳寶所給諫董浦
門下士也用道古堂集中無米詩韻作詩贈之云趨庭
曾是抱經人蹤迹飄零敢怨貧自向天涯投倦羽誰從
滄海恤窮鱗前賢事業青箱敝舊日門牆白髮新太息
爲卿名父子紛紛俗眼宵相親處約寧知世味耽寂寥
情思再眠蠶孝標獨念任君舊優孟能爲楚相談居不

鄉園心已苦乞從貧友意偏甘一毛半菽真何益持較
豪門我尙堪時梁肯堂守保定義寅往就之寶所再用
前韻送行云悲秋更愴別離人餞送知吾宦況貧清露
零朝蔬翦甲涼風散夕酒生鱗詩壇大雅空懷舊碁局
長安莫訝新此去郡樓橫翠待不勞竿牘是交親經羸
素業未遑耽生計勞於八繭蠶才力豈應餘子讓榮枯
漫信老生談揮金任俠誰當倚飲水儒風亦自甘畢竟
將飛先翼伏一鳴還卜異時堪吳聖徵序其學福齋詩
有云流連昆季之歡繾綣友朋之好岑苔秋諾池草春
期一篇之中三致意焉卽此數詩可得其概矣

嵩山將軍永憲詩才超妙所居水雲鄉山房積壤一日
雨夜浸漏至不能寢因得句云自信平生多坦白誰知
一夜數移牀用李林甫事也

王西莊題唐八繡遺像云枯木未逢春貧女終不嫁冰
霜故相欺膏沐向誰借偶于窮餓中歌吟出嗶嗶禿筆
雖成冢敝衣纔掩胯萬言一杯水賣賦乏高價時遭路
鬼笑苦受醉尉罵唐衢本善哭之子殆其亞長安一選
近頗肯過我舍爲言作客久騎驢覓杯炙絕嶂飽所經
險灘吁可怕異域浪奔馳低顏自悲吒無家遂無歸十
試還十罷何時具饘粥努力親犁耙微志竟莫償奄然

隨物化可憐遺挂在位置雜亭榭抱膝獨聽泉蕭灑風
葉下生前那有此尺紙聊染研空餘鮑家詩唱出秋墳
罇八繡名黼廷與王大椿八千同爲常熟諸生兩人工
爲詩八繡語皆獨造務爲卓詭而八千綺豔婉緝書畫
亦並入妙品仗氣振奇多從緇衲黃冠往還屢試于有
司卒不遇八繡好遠游依人入蜀行峻峽中百丈忽斷
舟從怒濤巉石閒倒流而下幾不測居三載流浪暮歸
一發于詩歸而貧益甚則躑身游京師渡河舟覆伏船
背行十數里遇救得生旣抵京從人兩入木蘭一至吉
林八繡不習騎而吉林地多塔兒頭者蓋泥淖中水草

交結當鞭馬疾過遲則陷八繡幾陷復出其危困如此而久不歸八千深恨之貽書詰責謂其違性而徇俗非全身養壽命之道八繡未能用乙亥九月客死京師後二年八千以母病奉湯藥積勞鬱得疾而死八繡長于八千二年兩人年皆止四十一八千烏目山人王翬曾孫也

出嘉峪關四千里而遙烏魯木齊卽古輪臺地也乾隆乙酉國丹中以蘭州郡丞外補迪化兼攝寧邊有輪臺八景詩一曰聖山雷雨迪化城東北百五十里博克達山爲西極鎮山蒙古言博克達者聖也五峰高出萬山

四時積雪山半兩海一碧無塵有樹墮葉鳥墮翎自然
漉去下分谿澗引以灌田行人過必祭堆石其側有不
潔不能至也必有雷雨阻之二曰虎峰水樹城北三里
許紅山嘴蒙古名巴拉哈達巴拉虎也哈達山石也以
其石似虎踞狀故名乃博克達之支山石色紅碧相映
其下樹木陰翳河流洩湫三日七嶺鑱雲迪化城東二
百里蒙古名多倫大把多倫七也大把嶺也七嶺相連
自東來每轉益高爲烏魯木齊之屏障出雲母石可爲
屏風嶺下多良田流水環繞四曰兩池釀玉城東南四
十里鹽池墩池廣十八里又二十里爲小鹽池廣十里

許水色青近岸處色白者爲鹽挹取之細糝如粉如玉
凝爲水晶味鹹而甘五曰暖泉漾碧城北十里許有暖
泉一泓澄澈不著纖埃冬夏常熱而絕無硫磺氣六曰
大冶霏青城北十五里屢豐堡南爲鐵廠其地產鐵撥
兵匠列居山下掘礦煉沙融冶成器以供各屯農具七
曰西亭花鳴城西里許地名快活林在水西岸有亭翼
然爲習射游息之所名曰秀野八曰北灣稻畦城北二
十五里卡子灣九道灣居民自高臺縣遷來能藝稻購
種闢塍引渠蒔秧居然水鄉風味丹中以乾隆乙酉丞
輪臺者三年不廢吟詠呼圖壁洛克倫昌吉烏魯木齊

皆有水迪化輯懷阜康寧邊景化五城各有屯田其北
灣稻畦詩有云游牧昔善地水雲今江鄉決渠足春雨
招侶蒔稻秧猶營平遺法也勒木沁卽事云疑是松濤
送遠音沿洄方見水龍吟跳波赴壑太鹵遽不及悠悠
萬里心浮鴨沈魚自天性雞埒豚柵有華風誰將前後
車師國移入朱陳邨巷中亦可想見南城殷富之象其
舊爲回民業屯戍亦不之奪丹中在烏魯木齊嘗搆虎
峰書院課生徒

乾隆三十五年古州黨堆塞逆苗香要脅眾肆劫適錢
文敏赴貴州查審威寧州劉標虧帑案未復命偕總督

吳達善巡撫宮兆麟往勦香要就擒甲午趙味辛爲錢
三竹初題文敏畫卷云尙書天人流鳴盛和笙鏞餘事
及六法苦詣追南宗目無元四家肯學王司農雲煙不
在眼工壑蟠其胸西清多暇日北苑空前蹤至尊歎奇
絕佳手驚未逢當其下筆時寸縑逾尺踪尙書意不滿
小藝其何庸殊方偶小蠢蠻觸爭戈鋒詔謂尙書行單
騎清傳烽浹旬傳露布逾月爭輸寶裴公下淮蔡馬卿
定笮叩臨機獨游刃尊俎有折衝歸來侍承明珥筆仍
雍雍蠻煙與瘴雨一一揮奇峰萬里縮咫尺雙管隨衡
縱指此役也庚子味辛以召試出彭文勤門下文勤謂

相知先在此詩畫卷後爲休寧汪承燮所得

富察勤肅公新柱以乾隆戊子卒於盛京將軍任沈學

子爲作挽詞云鎖鑰神京倚何期隕大星姓名鏘琬琰

勳伐爛丹青關粵謳思永荆湘涕淚零悲風吹大樹蕭

颯不堪聽回憶三山日頻邀共論文禮加徐孺子義重

信陵君鬥酒須杯滿投壺盡夜分西州餘馬策何處哭

公墳奉諱還京日曾經唁水濱殷勤勞慰問感激忘沈

淪豈意臨江別長爲隔世人征南恩分少尋憶欲沾巾

舊客汪倫在

謂汪槐塘徵君

前游不可尋大江霜氣重絕塞海

雲深自此空彈缺無能再鼓琴峴山埋片石千古幾知

音勤肅以癸亥鎮福建兼攝巡撫己巳總督湖廣旋調
吉林將軍次年仍調福州將軍辛未署兩廣總督次年
回閩己卯奔太夫人喪道出揚州學子迎唁舟次情渥
如舊自此遂成永訣也

乾隆官窯書乾隆年製他窯則用花印官窯三十座分
二十三作每座前以空匣障火後惟重器一色驗青當
敲青時分別高下多少非專家不能風火窯溜火者視
火色惟謹亦最難石珠出瑞州繪采用之堆器用白泥
加坯上以筆堆成花草錐器坯上用鐵錐錐成其仿金
玉銅漆紫檀各器宛然本色五采小品多仿佛郎嵌十

景酒器象佛手葫蘆桃榴等品文房玩器多盛盤九種
印色池爲最作硯室最難搏作塗澤開窯日反復比量
同質而異同色而異相去甚遠海鹽朱笠亭以丁亥戊
子閒客章門作有陶說六卷其官窯詞云製年記乾隆
今亦重官窯彷彿宋吉州第一書公燒窯座各分作安
置必帖妥鑑空許驗青心細能溜火染采非渲染采色
繇石珠爲間堆與錐製作又各殊金玉銅漆木色色肖
象取不獨哥定汝搏土能仿古魚子雜番錦口足金爲
餞不須銅作身鬼工勝佛郎方圓與觚棱隨樣自能好
酒醖各象生十錦更弄巧雕盤盛九種最愛印色池安

得紫方館養硯爲相宜。樞範既中款，油色亦動目。入古
驗陶旄，非徒賤辭暴。開窯辨善等，細若析秋毫。譬之人
相去紛如九牛毛。紫方館歐陽通硯室名陶旄之器髻
墾辭暴不入市見考工記

朱笠亭有明詩鈔十四卷其後桐花集讀明人詩絕句
三十首云元詩靡弱苦雕鏤明代分風又擘流格是犁

眉開國手埽除端合讓青芷清江才調並高楊
史談

詩許擅場更向西谿尋畫本碧雲紅棗賸蒼涼
山橫紅葉晚寺

鏢碧雲涼西谿題畫句羅扇花冠絕可憐
浣谿沙調出鮮妍文章

煙月卑吳體玉袖當時有少年吳興山水好遷居結屋

雲林老著書儻向殘年記初約雙谿苔雪負張徐來儀移居

戴山以詩招幼文云吳興好山水子我益遷居又云結

屋雲林下殘年共讀書幼文乃移居蜀山兩山蓋相望

也其後皆春華門外跨烏犍不使楊花負世冤只共青

以法死

正較歸計一時明哲應推袁海叟以楊白花詩被讒乃

而免于死可謂識微見苦學開元林膳部八閩宗派出

幾者矣論詩終孫青

三唐即經滄海橫流日皎月清輝見石蒼子羽以唐音

明一代海南成化以還雜體興披荆斬棘起茶陵中州

墨守不變

何李登壇日閭室傳宗仗一鐙文章本易變新聲幾為

鈴山亂濁清不向直廬看應制詞人何怪世相輕一代

裁詩有折衷積波至竟挽空同丸泥自可封函谷未許

吳儂仰面攻信陽北地角雙雄抑李伸何亦未工卻愛

長篇賦明月何郎源雅又源風何源雅李源風王元美語迪功蟬蛻

能軒舉吏部空山獨鼓琴莫為高徐愁絕響朱絃疏越

有遺音失足權門劇可哀康王樂府擅奇才偶因誌地

抒詞藻三輔猶存舊體裁康有武功志王有鄆縣志士林稱之謂得黃圖決錄之遺

四部才華妙一時主張風雅是吾師何緣未識芭蕉樹

嗤點西園五字詩華泉西園詩自聞秋雨聲不種芭蕉樹本維摩詰經身如芭蕉樹語王元

美疑樹字不典擬改作自海內談詩一派分浚川恩怨

漫紛紜何如太白山人好特起蒼頭見異軍浚川因少谷海內談

詩王子衡春風坐徧魯諸生語至為之經紀其喪蓋激于空同送呂穀詩歷數當代詞人不及之也太初不與

雪橋詩話續集卷六

去求恕齋

李何通郵卓然自立要自可貴載酒亭中一曲歌琴書箏笛重摩抄幅

巾湖上真吾侶不似華堂冷眼多顧華玉闌息園築載酒亭蓄聲伎延接文

士甚蒸一日至西湖訪孫太初見有幅巾坐舟中者旁立一鶴曰此孫太初也遂訂交分宜招飲既嫌酒熱又

嫌酒冷目無主人六詔風煙絕斷腸三春花柳怨朝陽臥雲高

閣寒山裏借隱談詩興最長升菴繼配黃安人寄外曰歸曰歸一聯升菴謫永昌

時作也趙凡夫陸卿子偕隱寒山陸有臥雲閣集喬木森森出相城紅闌家世

負時名丹青渲染詩人筆唼到無聲別有情沈啟南居相城丹青

志云相城喬木代禪吟詠繪事為當代第一文待詔世居紅闌里風花雲瀑指雲邨一

笑芳洲小徑存不為吟詩愛標格令人難忘兩黃門吾

張許兩黃門俱以清節著詩亦入格翩翩南國雁聲和連理花開簇錦柯

一曲關山閒雲雨可憐宦跡左遷多皇甫子循詩一聞關山曲猶似別長

安晉帖唐臨太逼真後來拊擊欲推陳縱然匍匐羞餘

子才力終當勝萬人謂王李五子論詩起四溟卻循資格

數英靈笑他糞土甌甄洞眉壽居然作典型王李諸人初起選詩

定格倡自四溟明卿入社四溟以糞土譏之遂搆讒絕

交亦由明時資格太重布衣華絨不相類也明卿有甌甄洞遺珠滄海笑虞山海目遺編一例刪不是竹垞搜

采徧夜光明月幾時還區海目為海南名宿在泰泉蘭汀諸人之上柳愛松

圓日倡酬尙書消遣絳雲樓不應援邵中州例曲沼清

泉壓眾流松圓依虞山倡和詩刻初學集者與柳如是並列別朝詩選推為一代之冠稱松圓詩老

以擬中州集之辛敬之此論未公改絃何必罪更張獨恨輕丸轉蝓蜨

雪橋詩話續集卷六

七求恕齋

欲向公安問詩派小修差比白眉良孤峭深幽派別新

山中木客鬼為鄰當年銀海波濤瀉也怕江東一片塵

謝在杭詩若問者夫成底事雪山銀海瀉秋濤又云怕見江東一片塵摩登伽女出傳衣

謂竟西域波羅教亦非謂太青季木欲向宗門尋法眼相真

閣下好飯依謂臥子論詩斟酌有中和問次齋頭不入魔

提唱三齋歸大雅由來名士濟南多公文介潁南邨地滿

桃花瞳上吟情入望賒王清臣愛殺荷鉏好風味西邨賸

有古田家吾鄉西邨老人穀城山好青于黛滕縣花開白似銀

不識檀園真畫本臥游冊子隔微塵零落詞壇數俊游

江南耆舊幾人留讀書種子亭林在情景當中一色秋

選輯意旨略具是詩

陳觀樓兵備和李西巖軍門韻云百尺樓船五兩旗陽
侯箕伯效奔馳軍威到處夫誰敵籌筆揮來不用疑定
有高文傳鱷戮轉疑孺子受鶡欺和衷報國兼文武肝
膽還應與其披任溫處道時作也與忠毅深相結納故
唱酬爲多凡接見武員必加禮曰海氛未靖正武夫效
命之日也巴圖魯一等侯德楞泰奉命按閱閩浙營伍
議於各海岸添設兵弁晝夜巡邏不許一人下海令水
米器具無所接濟不數月可盡斃侯風采巖厲屬吏莫
敢置對觀樓進曰侯未身履其地也閩浙兩省皆環海

居民耕田而食者十之五捕魚爲業者亦十之五若禁
其下海則數萬漁戶無以爲生激變之咎誰當任之侯
默然久之曰公言是也侯鄂密特氏嘉慶四年以勦川
東西教匪功賞世職累晉一等繼勇侯後爲西安將軍
加一等公

藍淀廠金之鹿園也孔誦孟農部詩蟬聲嘶暑曉雲流
下陞驅車潦未收稻埂綠稠全種豆荇花黃小不藏鷗
水鄉遠仿江南地山勢西連代朔州飽挹朝來嵐爽氣
只差拄笏坐危樓誦孟鈔藏極富蘇齋送荏谷歸曲阜
詩牙籤精點勘勿笑北方人別號南洲嘗顏故廬偏之

楹有曰福持精舍郭象注莊子至樂篇條達而福持言性常得故福持

孔眾仲詩如示遠威儀覘魏應幹機祇慎陋黃香許郭論人無附和慶廉交友最綢繆一賦長卿逢狗監十年張季老貲郎爲愛孟公留尺牘卻慙義甫擅詞林典重精純與儷體文相稱

乾隆壬辰豐潤鄭濟燾以渝州倅從戎討兩金川丙申二月寇平辦善後於噶拉依爲塞上吟以誌其事舒鐵雲書鄭玉峰平苗紀事詩後云綠海參軍日紅旗殺賊時同行萬里路遲讀十年詩鹽鼓擧純菜弓衣繡竹枝

相逢笑紕纒我亦杜分司玉峰官至松江知府改秋曹
同縣常方伯發亦以庫官從征金川有從戎記略趙菁
衫詩攬轡來歌蜀道難崑崙關外馬蹏乾天涯莫蠹從
戎記留與巴潼說故官

乾隆丙戌 御製賜陝西涇陽縣貢生張璘七世同居
詩有曰表宅寧關一家勸所希比戶洽和漳璘敬取二
字榜書屋曰和漳書舍張敘百大令其從子也乙巳朱
石君贈敘百詩七世同居孝友家景陽翰墨擅騷葩掣
鯨海外波瀾壯沐日峰頭咳唾華三晉清風餘愛蔭五
湖新雨勸耕畬知君不少為于曲好慰吳儂望歲賒敘

百詩曰荷塘詩集都十二卷其與十九弟重絲論畫云
爲數吾鄉賞鑑家平陽老守眼無花琅函高似臣輝閣
題字一般如畫沙諸劉都有父風存三入詞垣好弟昆
舟夜連牀江上雨清臞鐙下對琴尊詔許將軍解甲迴
年高白盡簷子鬢閒中斗覺身強健匹馬山南射虎來
一枝渴筆草齋翁皴法麤疏遠勢工省識歸舟天際下
樹根人立向長風壺山聲價重揚州尺幅千金不易求
蘇禍鴻文白渠記二王書格舊雙鉤藉甚涇陽李念慈
才名早歲動京師人留谷口山房集畫入漁洋五字詩
筆致似郎本性真谿山雖淺淨無塵十年壁面藍田叔

從不空庭間主人過眼江干雪霽圖長嗟好景失難摹
並教移得名山去短棹寒谿影太孤模胡愛仿米家山
瘞筆題銘鬢已斑淡赭輕青還惜墨曉村小景水雲閒
長夏風窗四面開仿山亭子碧林隈石牀曬晾閒箱篋
招客嘗茶看畫來自注謂劉刺史儀恕琅函閣任運使
璣臣輝閣並多收藏劉氏鑑別尤審二公皆工書多有
手跋平陽五子三與館選風雨聯牀圖西谷荆侯兩太
史寫自京口胡大都督弘茂有刺虎圖梁時元號草齋
長于山水外家有秋江曉望橫幅蓋其晚年得意之筆
張中翰恂嘗寓維揚畫重一時人稱壺山而不名白渠

記出其手筆在東關路公祠側王文簡題岷瞻進士畫
有云君家涇水陽終南在當面紫閣與皇陂宛向圖中
見趙氏有藍瑛山水幃子劉同菴源獨往觀之日以爲
常印周先生得右丞墨蹟於管西維氏爲有力者奪去
屢形歎息身後所藏宣和名山圖亦易主壁閒山陰雪
棹小幅張孝廉郊舊爲臨寫者也曉村張孝廉天德別
號仿山主人常維祺別號其於涇邑畫人可謂詳盡敘
百故亦工畫也

望山相國晚年患脾虛性不喜藥不茹葷其病中作云
風透疏櫺骨亦寒病魔未去夢難安花殘漸覺春光減

樹老猶霑露氣團藥餌無功勞勸慰菜根有味佐盤餐
只餘見獵心還喜獨坐微吟到夜闌乾隆三十五年

聖壽六旬文端所製萬壽序有云願我 皇上慎修思
永頤養天和精神以愛護而愈充政治當恬熙而愈飭
將見聖德日懋景運日隆頌不忘規極得大臣立言之
體自癸亥甲戌戊戌三修謁 陵之禮四十八年阿文
成公領起居注撰東巡記一篇不作頌而作記附於記
言記動之義以寓諷亦此意也

皇六子質莊親王因金海住陳句山詠蚶酬倡戲作蚶
田圖圖蚶四俯仰傑僂生趣迴出嘗彙錄上書房倡和

詩題曰仙壺蘭韻與汪雲壑有門神聯句雲壑視學滇
中王用雲南字賦詩二章寄懷雲壑澄懷園雜詩飛蓋
隨游夢宛然青山神理賸絲絲愁雲淨業湖光外生日
憐渠又一年感逝之作也甲辰乙巳閒常以荷花誕日
觴詠于積水潭有再疊東坡北臺韻詩其六月廿四日
感積水潭舊游句云殘詩理徧空澆酒流水枯來合罷
琴

蒙自土職裔李鶴齡字松屋絕工詩如西崑體丁亥秋
王禹卿解臨安郡鶴齡賦詩四章贈行有玉堂老鳳留
衣鉢滄海長虹卷釣絲之句禹卿效漁洋贈費密詩體

爲長句以答之

敬亭王孫挽孫虛川銀臺灝云鹿洞親依徽國席登龍
曾御李君車自爲桃李公門後不向春風更著花自謂
用后山妾薄命意其論詩頗取后山謂別三子詩有女
初束髮已知生離悲枕我不肯起畏我從此辭大兒學
語言拜揖未勝衣喚爺我欲去此語那可思置之少陵
北征詩中亦何能辨

敬亭家有西園起四松草堂築夢陶軒拙鵲亭五笏菴
作閭慵子傳以自況性嗜酒別構小屋效村墟式懸一
帘名葛巾居客至則就飲其中春日獨酌云石上苔茵

竹下樽煙雲盡日變西園松花滿地竹鳩語一客不來
春掩門尤好游盧龍昌黎榆關松亭及近郊西山題詠
殆徧嘗宿慧雲寺夜半聽松風不寐有詩云窗滿四更
月蕭蕭夜氣涼山風吹短燭石瀨響虛堂似此疏慵客
堪居雲水鄉朝來陟絕頂後鶴共相將甫得太廟授爵
官卽投閒色養日引文士分韻擘箋不閒晨夕嘗爲琵琶
行傳奇一折曹雪芹語題句有云白傅詩靈應喜甚
定教蠻素鬼排場雪芹爲棟亭通政孫平生爲詩大概
如此竟坎珂以終敬亭挽雪芹詩有牛鬼遺文悲李賀
鹿車荷鍤葬劉伶之句

敏亭侍御索祿嗜書好古善撫琴舞劍錢香樹有雪夜
關外聽索侍御彈琴詩手法受之唐侃爲入室弟子罷
官後杜門卻掃性孤潔廉於取與其壻年稼軒舊藏唐
閣立本畫一軸敏亭愛之稼軒卽以此爲婦翁壽卻弗
獲卒質衣鬻物得三十金償其值敬亭感懷詩琴在消
沈廣陵散劍埋土碧蝕青萍當年問字經過地賸有乾
坤一草亭爲敏亭作也吾鄉工琴者又有唐明字青照
馬大鉢稱其食貧而不累其天平琴李鐵君有贈青

照序

秀水沈帶湖司勳集四松草堂贈懋齋敬亭昆仲詩云

石苔不染外人蹤，依舊屏圍小朵峰。二月掃除花徑雪，
經年問訊草堂松。漉巾舊店留家釀，度曲當筵有阿儂。
伯仲風流成二老，未留斑鬢早攜筇。敬亭與兄子明懋，
齋怡怡親厚長，雖異居而無異體。問衣問食有司馬，涑
水之風戊寅春。予明自榆關馳五百里，視敬亭於松亭。
值敬亭入都，未回至沙河，遇於途，遂登景忠山挑鐙話
舊。因詠東坡逍遙堂詩，誤喜對牀懷舊約，卻忘飄泊在
彭城之句。復和其鄭州西門相別原韻。馬子明詩如詠
宋武帝云：虎步龍行奮戰功，寄奴一世爲誰雄。葛籛麻
拂留陰室，貽笑孫謀田舍翁。齊高帝云：新亭白服憶初

心彈指應憐泣汝陰一自東昏鑿金後蕭郎又早進生
金陳武帝云一例相傳又號陳霸先倜儻不猶人如何
親見臺城餓也向莊嚴去舍身敬亭稱其意調雙美載
之鷓鴣軒筆麈子明別墅曰槐園在太平湖側

何士錫漢軍正白旗人愜爽尙氣誼乾隆乙未故邢臺
令徐鵬起喪回觸溜覆舟柩旣傾鵬起一小女及婢嫗
三人皆溺水死時方昏夜鵬起子均又以受代事羈邢
臺家人蒼黃號抹士錫時爲臨清關官聞聲至則謂曰
若等此時募人人必不應卽應費且不訾趣召閭夫集
挽曳之具以俟及明漕艘至闌閉不啟漕卒咸詬士錫

疑得徐氏賂士錫毅然曰人孰無惻隱心若避不韙名
是爲德不卒也苟誤漕甘坐罪卒懸棺起獲四屍斂葬
之乃馳人至邢臺而於衙前賃屋居其眷屬時州城方
被王倫之亂宵小出沒士錫又貧日煮粥糜以餉且令
二卒守護焉未幾邢臺人返始送之歸徐氏酌以物卻
不受趙收菴感其事賦臨清閘官歌以美之

東昌太守胡書巢少學於張瓜田渭南道中句云豐原
草長連天遠渭水冰流到底清臘月廿四夏縣道中絕
句云竈君儻欲分功過應說儂非善媚人其入蜀日記
謂過孝義縣宿虹霽橋曉行所見如米家潑墨圖登西

平原望三疊泉積日成冰柱約丈餘色成碧玉過秦嶺
半月餘出寧羌州見南山蒼翠褰帷坐對如遇故交過
大散關以後行千餘里惟褒城一日道路平坦餘皆險
峻但有極險處必有極平處一日之中勞逸相閒因語
同行者此可悟天地平陂之理皆雋語也朱笠亭題日
記後有云揚鞭鳳嶺如天半兩翼開張傍錦鞵遠勢居
然入清覩五言高格得瓜山用瓜田過鳳嶺詩兩翼時
開張遠勢入清覩句也

馮康齋幼從瑞金楊默堂鴻臚游旣而侍其父祁官京
師從山陰周蘭坡讀書考證經史尤精地理之學周藥

岡學士玉章以女妻焉族子吾園宗伯芝題敬學堂詩
鈔謂尙有霞抱軒詩子成字百史爲沈文恪婿以庚子
舉人官浙江建德知縣有勛齋詩鈔百史孫焯有道華
堂詩鈔康齋曾叔祖訥生爲梅村祭酒詩弟子梅村集
中有贈馮訥生進士教授雲中詩祖光裕官湖南巡撫
家有知園一時如顧亭林李天生朱竹垞俱來雁門詩
刻壁閒訥生有硯徑四寸廣半之銘云質云薄矣而賦
性則良從我於山巔水洑而出入詩囊嘉慶己未爲孟
亭給諫所得以贈百史百史爲賦還硯歌焯字穉華官
澆山縣天堂巡檢子福基咸豐七年陷於賊中寘藥斃

金斃賊十七人譚仲修爲製雁門馮童子誄所謂食采于馮公高餘裔著籍代置弁冕亦世者也

中州相國寺僧野蠶潁州人俗姓宋氏嘗爲諸生不得意棄去爲僧其詩原本少陵沈雄激壯嶮峭魁梧每以自負喜藏書工竹石又能奕碁識古硯尤工篆刻眇一目嘗自鐫一石曰隻眼貌寢陋面黝黝衲衣垢敝蟣蝨從項閒出不喜從貴人游乾隆己丑秦小峴游相國寺見壁閒詠鶴詩與定交其送邵太守大業出塞有手彈寒淚溼袈裟之句後擬訪太守於塞上以事不果小峴與野蠶夜話詩云歲寒寂無豫梵音坐松門積雪在庭

戶寒禽無驚喧夜靜對眞侶心清聞道言卻懷九峰下
空山鳴夜猿庚寅小峴自大梁至濟源野蠶以詩贈行
無何病死小峴哭之以詩云不信蠶公沒書來隔歲遲
未歸淮水曲長別信陵祠塞北黃塵斷江南舊雨悲何
人誰齊已蕭瑟爲題碑隻眼乾坤內公如謝茂秦風騷
七子社巾拂六朝人切切扶牀日囟囟判袂辰他年酒
壚畔歌哭更誰陳同時有碎琴者元孝之孫不習僧事
賣卜秦淮市短視善談論詩不如野蠶然能淹貫諸史
於南北朝事尤熟又習知明季軼事時隨園主盟壇坫
碎琴獨與牴牾議論不相中坐益困所著遺民錄載徐

昭法金孝章諸人事頗可傳小峴贈碎琴詩云南國詩
僧少蕭條白下門那知野蠶死猶有碎琴存野蠶向客
秦淮最久也予嘗見黃儀逋詩有碎琴印曰碎琴陳陶
成哲親王嘗爲劉文正作山水冊郭祥伯題云賢王名
相朝廷盛珍館閒房山水滋密國圖書塗水筆憐渠不
遇太平時

乾隆鴻博先後舉者二百六十七人滿洲五漢軍二直
隸三奉天一江蘇七十八安徽十九浙江六十八江西
三十六湖北六湖南十三福建十二河南五山東四山
西三廣東六陝西四四川一雲南一曹地山宗伯被薦

後元年丙辰成進士改庶常是秋臨試天下所薦士有
旨免試秋冬之間厲樊榭沈東甫沈幼牧迮松石汪槐
塘諸君同寓於接葉亭試畢先後出都同人咸于此餞
別甲申初夏劉繩菴相國邀同裘漫士司空王晉川廷
尉陳句山通政楊二思中允集王孫同太守宅卽華亭
相國舊邸之錫壽堂申笏山光祿錢擇石閣學及地山
與焉宗伯時官參議以期服不至擇石錫壽堂燕席作
四首云 仁廟平海寓制科雅化覃 憲廟光盛軌舉
士詔至三我 皇初元啟復詔幽遐探羣材 闕下劉
公來江南褒然試第一政府于今參武成錫宴後萬國

彌樂耽從容叶佩玉小大端朝參槐陰靜首夏雲色濃
西嵐庶幾式懇款庖潔醴且甘徵車徧諸路膺選十九
人只今數偕進朝則銀臺陳豈無歸田儔遠在江湖濱
況乃還山侶寂寞半已淪其閒甲乙科先後相拖紳崇
霄信翔羽廣波樂萃鱗文章竝特達事業難等倫奈何
星再周落落還向晨賤子晚通籍鬢華強當春迴憶公
車錄眷然陪茲辰光祿舉布衣旣而孝廉仕中允第二
人相國同州里科名與官職我寧肩肩齒入座惟數公
纏絲能不爾廷尉適養疴掩關詢初起參議叔耗聞樂
歌方輟耳盍簪非屢占顧且睽咫尺何以永今宵華鐙

照階阼已未五十人曰惟文恭相城南此舊堂老樹鬱
檐向賢孫爲大郡繼迹歲在壯矧看子又才兄弟早蓬
閭紫藤架乍緣紅藥闌齊旁撫景邁良時聆譚挹嘉貺
緬自祖宗朝迨今逾醞釀羣公邁曩哲賤子勉微尙從
來臭味親亦可周旋曠穹壤百齡俱因之起高望乙未
七月朔日礪石招曹少宰申副憲小集山齋爲同徵之
會各賦七律六章書入礪石所畫歲寒三友圖後以誌
一時之盛甲申會者惟三人在耳笏山詩有兩公視我
如兄弟三世論交到子孫之句越三日少宰復招集行
館爲同徵二集時皆扈從山莊也

吳中自解谿尙書後家大厯而戶元和張瘦銅吳曇繡
獨宗法眉山不涉吳下七子詩派曇繡壬辰入中翰直
樞廷秉憲嶺南官至山東布政使其論詩謂作詩非枯
坐不可東坡云歲云莫矣風雪淒然紙窗竹屋鐙火青
熒時於此閒得少佳趣吾鄉徐昌穀詩王弇州謂如白
雲自流山泉冷然殘雪在地掩映新月最易濬人性靈
集中如渺渺洞庭秋水闊又洞庭葉未下又昔上黃鶴
樓又美人南往雲陽墟等作俱推倒牆壁妙悟入神與
其俎豆青工不若瓣香迪功也曲阜孔氏紅欄書屋有
修竹數十竿絕可愛用坡翁壽星院寒碧軒韻云涼風

卷雨搖軒扉擗龍一夜翠作圍篔紋如水不可唾欲翦
薛荔爲秋衣螳螂捕蟬墮葉響蝙蝠撲火穿廊飛先生
放腳自酣睡故應不俗何緣肥有虎賁之似

定制親王至貝勒不戴花翎戴自貝子始翎用三眼吳
曇繡聞福公相晉封貝子句云諸王位亞冠翎翠八陣
兵收石薊黔

嘉慶初洪稚存上書言事附劾竇東臬交結和珅書扇
稱師相自稱門生秦小峴力辨其誣謂公自浙江學政
以左都御史召還一日富陽董公手執公所書金字扇
和見而語董曰寫金字善用金無如東臬者遂取一扇

屬董代乞公書余適趨過董曰秦君固善東皋先生者
盜屬之因以屬余請於公公書就授余送之書款稱致
齋相國自稱晚生某蓋遵舊例東武以乙卯沒于京邸
小峴爲譏墓誌銘其感舊二首云先生嶽嶽冠朝班大
節還留天地閒豈有石亭按與彌更無蔡氏薦龜山世
人欲殺緣招忌聖主終憐已賜閒一著殘碁應悔錯白
頭仍未返鄉關落日秋風大鳥前斯文已喪付虞淵歸
心未免淹三宿衰骨終當旁九仙幾見門生曾會葬那
聞才子更無年吟殘東武揮寒淚絕少孤雛守墓田東
皋罷官以乙卯會試卷被磨勘事吳仲雲尙書謂東皋

性伉直嘗發和珅私事和深銜之是科以總憲充正總裁所定第一第二皆浙人他總裁欲易置其一竇曰吾論文豈論省耶他總裁意皆不平榜發則王以銛及勿菴宗伯以銜胞兄弟也於是羣議譴起和欲與大獄以傾竇覆試日使衛士環列譏察之無所得卒摘元墨小疵罰停科遂有謂此榜不足據當再試者迨殿試卷進呈拆第一名封

高宗驚問曰此非會元耶和奏此會元兄 上問誰所取紀文達奏臣取誰所定和相奏臣定 上笑曰爾二人豈有私者外閒傳聞固不足信於是事遂解東臯僅

降四品銜子休卽以是年病卒

仁和宋茗香助教舉甲午京兆自放於山水間凡徑山
鄧尉天台華嶺黃山無不到詩曰學古集坳詩論一卷
引世之憂憤悲怨淫泆詭譎者而一軌於正其謂齊之
王儉韓蘭英先仕宋劉繪後仕梁梁之范雲卽遲任昉
張率柳惲周捨徐勉先仕齊庾信後仕北周江淹沈約
先仕宋齊陳之陰鏗徐陵沈炯周弘正張正見顧野王
先仕梁周弘讓先仕侯景徐孝克阮卓蔡凝潘徽後仕
隋江總先梁後隋隋之姚察虞世基虞綽王脊王胄先
仕陳柳詵先仕梁李德林諸葛穎孫萬壽先仕齊于仲

文先仕周何妥先仕梁及周盧思道李孝貞薛道衡魏
澹先仕齊及周元行恭先仕北齊辛德源先仕北齊及
周楊素崔仲方先仕周及梁孔紹安後仕唐袁朗先陳
後唐偶指數之皆詩人之名級故高者也晉宋詩人之
失節者繁豈獨無顧晉有陶靖節之高趣入宋終身不
仕又有束皙之沈退張翰之慮禍張協之屏居草澤嵇
紹之以身衛帝劉琨之戴帝室郭璞之阻逆謀宋亦有
顏延之不受資供王徽素無宦情沈慶之盡言諫諍赫
矣退跡世教賴焉齊謝朓不從江祐之謀王僧祐不交
當世風韻清疏如孔稚珪徵而不就如顧歡猶有晉之

遺風梁以後如蕭子雲不樂仕進者寥寥矣齊之狎客
通脫以俳優自居者有之至隋則晉王廣之弑立其謀
遂出自楊素此其由來非獨在慕榮利也蓋廉恥道喪
且有使之然者矣齊武帝布衣時嘗游樊鄧登乍後憶
往歌估客樂曰意滿辭不敘猶尙有羞惡之心者乃導
之者有釋寶月矣若簡文宮體直寫妖淫後主男女倡
和極於輕蕩煬帝所撰飲馬長城窟行頗好雅正然有
諸內必形諸外則有江都宮掖諸作焉夫一變而爲清
談再變而爲極欲其病同歸於必斃顧清談者聽其
斃而已極欲者又趣之發乎情者不止乎禮義不止乎

禮義則無廉恥無廉恥安得有氣節以流極之運加以
登高之呼城中好高髻四方長一尺矣蓋聲音發于男
女者易感風化流于朝廷者莫大也誦其詩不知其人
斤斤焉僅斥其詩格卑靡定爲下品之第何異向名倡
而責之曰曷不綴道論以自娛苟展其狂直以匡益無
行豈不方圓其柄鑿哉可謂推原本始有功於詩而惠
於學詩者矣鍾記室之論人司空處士之論品蓋猶未
知詩之何爲而作與上之所以爲教之所在也

汪容甫旅食云旅食秋江上浮生已二毛畏讒多禮數
居賤習憂勞野性存麋鹿機心對桔槔百年將母計未

敢託名高吾生云吾生應有命身世兩相違客路中江
遠鄉心比雁飛聽歌翻灑淚入夢暫如歸爲憶臨行日
心傷篋裏衣心計長如夜思親枕未安寄居時見迫衰
序早知寒女子謀生拙貧交仰食難尙憐游子意書到
屢相寬孤露惟依母漂零正苦貧勞生筋力盡暮景笑
嘯真親戚皆他縣扶持止一身白頭空有子終歲走風
塵自序所謂幼罹窮罰多能鄙事極日傷心非悲則恨
比于孝標抑又不逮者也琴德司寇嘗比之秋墳鬼唱
余伯扶句云才應爲貧盡勞尙有親憐苦語亦略相似
高密三李受學於單書田先生宗元膠州王克紹薪亭

年長於石桐詩格之清曠略近灑然亭次十桐韻云炊
煙低復起閒態受江雲曉色孤亭望秋聲隔水聞客愁
驚節序歸計誤朝曛一讀懷鄉什深情合似君李松圃
與少鶴論詩有鍼芥之合其江上宴別子喬云酒盡暮
江頭依依爲少留殘鐘林杪寺斜月石邊舟此別絕堪
惜苦吟猶未休朝來回首處雲水但悠悠子喬卽少鶴
字其寄少鶴句云夢裏家山青未了鏡中鬢髮黑無多
春城處處催簫鼓蓬戶深深掩薜蘿亦復逼近張王石
桐贈單先生詩邀叔白同作云食盡門前樹先生空忍
饑祇應到死日始是不貧時古性原無怨高情獨有詩

卽今三日雪堅臥又誰知過無懷先生故居云舊是黔
婁宅今來崇構新乍驚行處改常憶住時貧樓榭何曾
識鶯花別作春獨憐庭際月不照識經人皆爲書田作
也叔白卽蓮塘終於諸生詩如曉發云太白上東嶺西
望牽牛角煌煌叢薄下猶爛金盆月林際春風生衣上
曉寒薄羸馬戀豆味背櫬不改發行行村舍遙稍稍農
樵作天色變茫昧清氣但寥廓長空何處聲早雁在雲
末淡遠不減乃兄少鶴爲令歿廣西松圃以千金送其
喪當乙酉選貢高第年十九

高宗見其幼罷歸陳文恭慰之曰君名臣子終當以科

第起家丙申召試賜舉人卒終於令長其民頑一首呈
鎮安李太守云民頑不知恩不仁哉此語爲恩知有幾
爲害已莫數此州屬極邊夷民紛雜處舊以獷悍聞未
往神先沮試爲布心腹告其兄與父因利固有待先除
昔所蠹庶各安爾業訟獄莫予苦此來未云久民已三
泣予某實心媿之而證前聞誤勤勤賢太守怨吏不怨
民某既證所信還舉以相聞語語真樸於陶韋非貌似
也嘗選同時人詩爲孤賞集

朱小岑九枝堂集贈李石桐並送其北歸云喜識膠東
叟居然稷下賢詩如人瘦健心與古周旋一字嚴南董

終身奉聞仙劇憐相見晚何況是離筵去去幾千里凌
寒舟上遲楚雲不斷處湘水欲生時聽雪篷收暝敲冰
硯有澌同行摩詰手商榷畫中詩石桐撰主客圖復褒
已與少鶴詩爲二客吟少鶴官嶠西有與秦小峴詩以
國家設民牧將以養民而顧殘虐之是非以養民適以
賊民小峴答書謂邊嶠少詩人足下以易直子諒之心
發而爲詩而學於足下者得所指授皆能爲詩夷猶悅
懌平其心和其志以庶幾乎風人之旨比諸柳子厚之
在柳州所評韓詩甚精粵西人士傳習者甚眾小岑寄
石桐少鶴兄弟云石叟擢脩榦卓然如石介說詩用秦

法棄灰者抵罪紛紛柳下季常苦伯夷隘鶴也萬夫雄
自負本領大鷗鵬不受縛溟渤供育怪椎成示敦樸割
犀見鋒快於法不苟同于古兩不背其音卽非至要亦
梅蘇輩世耳不易悅姦聲復相害譬張咸池奏勿與巴
里對譬齋章甫冠母向荆蠻賣斯文有代興相期百禩
外少鶴與小岑多所倡和少鶴招飲普陀巖用七人姓
字在棲霞分韻小岑有詩桂林伏波巖卽龍隱巖巖上
末題云米黻潘景純同游熙寧七年五月晦方好菴信
孺因勒南宮自寫小像於左上有高宗贊旁有小米題
識其下則好菴跋云予來桂林得僧紹言詩序及伏波

巖與潘景純同游

尉

秩滿寓居西山資

慶寺頗與紹言游故有此作其他游蹟則闕如也序中云書於桂林易堂今亦失所在豈尉舊治耶公作畫史自此始然蔡天啟志公墓書滄光不及臨桂豈所謂

者臨桂在其中耶抑先臨桂後滄光天啟所書偶略之耶小岑謂海嶽遺事米公自寫真世有四本一本古衣冠曾入紹興內府有其子友仁審定贊跋蓋卽此本是也外一本爲蘇養直題一本唐裝據案執論十七帖者元章自書裴几延毛子明窗館墨卿之句至蕭明堂畫像則楊之儀筆也

百文敏嘗謂乾隆四十二年沈雪友佐湖南臬幕檄取苗峒各州縣情形繕爲一秩存其友周介圻家其時苗民綏靖人咸視爲不急之務越十餘年變作倉皇莫知所措當事急索雪友書案視凡山川遠近夷險峒戶多寡強弱一一瞭如指掌於是堵禦進勦有所藉手以成功案雪友名梅會稽布衣其城陵磯句云直恐閒關老扁舟七往還蓋老於爲客者也

李五星處士名經家貧好學嘗大雪堅臥不出其友爲製羊裘強起吟眺李石桐爲詠高士裘詩見還山集劉松嵐題五星詩卷云性與時人異平生惟苦吟耳中無

世事身在少名心夜雪空齋寂寒煙古巷深誰當惜袁
子強起共登臨阮亭後人子文秀才衣衫藍縷面無媿
色而論詩有吞牛之氣嘗偕新城台過松嵐濟南寓齋
松嵐賦詩爲贈所謂古貌不修飾漁洋賢子孫者也

宋三峰廣文爲漫堂太宰之孫滁州道中作云人家疏
樹裏城郭亂山中

元王梧谿自號席帽山人于淮張時嘗爲畫策使降元
及洪武改元不書年號將錄用卒不起其吳門感懷詩
有南州孺子爲民住之句秦小峴題梧谿小像云瘦骨
峻嶒筆有神風流席帽大江濱隗囂割據曾參幕徐穉

歸來不作臣詩似義熙書甲子人從洪武哭庚申鐵厓
老子梧谿叟省識東吳兩逸民

秦小峴遂園修禊圖書後云外高王父崑山司寇負經
世才激昂任事爲忌者所中累疏乞歸後總督傅拉塔
撫他事文致其子姪劾公與立齋相國罷相國而禡公
職山東巡撫佛倫又劾公相國歿撫蘇者商工宋公公
稍得從容游讌而不幸遽逝當日同朝要人明珠明珠
子出公門何以必欲傾陷公蓋時成性已天明珠黨科
爾坤佛倫皆與公忤而余國柱方與湯文正相齟齬明
珠亦惡文正文正撫蘇公爲文送之其歿也作神道碑

據事直書不諱兩人蓋銜公深矣他人構公或與王鴻
緒高士奇並列兩人皆與公有連王又出公門然公友
文正王攻之兩人亦嘗構公王尤甚先宮諭主甲子順
天鄉試公子姪皆取中以磨勘興大獄實高爲之其於
當時事實頗能詳其本末其過崑山有感云玉峰如畫
草堂前外氏風流付逝川安石風流重江左衛公花木
記平泉蛇杯南國張弧日蠹簡西山設局年破帽青衫
餘宅相夕陽影裏繫吳船要之司寇憂懇跪 仁皇
聖明所以保全之者甚至猶得有田園之樂文譙之盛
也小峴題成容若先生側帽詞後云人生易斷鈞天夢

世事方爭博道基蓋容若事司寇甚謹納蘭太傅之與
之相左爲容若所不及見矣

錢慈伯檢討麋山老屋詩集論宋人絕句十二首和陳

檢齋司馬云雪夜燈前酒細傾詩人憂國念邊兵何須

好語同韓愈鐘鼓園林飾太平歐公於晏元獻席上賦詩云須憐鐵甲冷徹骨

四十餘萬屯邊兵晏曰昔韓愈亦能作言語赴裴晉膏公會但云園林窮勝事鐘鼓樂清時不曾如此合開膏

潤無窮書似詩輕裘緩帶有餘姿太平氣象雍容甚想

見仁宗御宇時神采秀發膏潤無窮東坡跋歐陽文忠書法云然余謂二語不獨評公書惟詩

亦然長卿怨刺本非宜况復紛紛新法時孤負故人文與

可殷勤相勸莫吟詩西湖雖好莫吟詩與可送東坡詩也彭澤田園是古

賢惠州細和謫居年晦翁豈妄雌黃下筆力雖高欠自

然朱子謂淵明天真爛然東坡篇篇權書氣味先秦得

詩亦如文格老蒼絕勝韓門翱與湜吉光片羽有吟章

誰能學杜得元珠鉤棘槎枒派自殊魯直太生我無取

論詩終服小長蘆魯直太生竹垞論詩語也不盡唐賢

作典型歐梅蘇陸各門庭盛時詩律從經出深識無如

戴石屏或語戴復古宋詩不及唐復古曰不然本朝詩

函關渭水夢馳驅耿耿中原壯欲圖果是輪囷肝膽在

始知詩外有工夫劍南示子適詩曰汝果嫵媚清新鮑

謝俱誠齋斂衽不為諛令人絕憶江南好雜興田園范

石湖誠齋序石湖詩曰我於詩豈敢以青冢千年恨未

平春風可好在氈城荆舒禍宋商君甚出語分明不近

情介甫明妃曲二首已絕不憶漢恩然則介甫而當靖

康豈能作李若水哉故曰不近人情者鮮不為大姦

願欽璜英氣銳偏師合古無妨與古離不獨春風妙詞

筆縱橫試讀昔游詩余酷愛姜白石昔游詩如風掠水

詩序論與古離合之際極精鈞萬卷陶鎔絕點塵仙人

璜英氣橫白蜺誠齋贈白石句

遊戲果通神兒童目眩休輕學且讓坡詩百態新慈伯

論詩嘗引荆川與鹿門書舉陶元亮沈隱侯兩人詩見

文章之高下由其人本色有高低為言又嘗記戊寅春

陪王又曾於天寧禪房看梅談論詩律先生語世錫云

好詩固須煅鍊然當隨手拈得爛然具有天趣淋漓酣
嬉轉於積唐中見態度必執一成之法苦苦相繩是亦
刻舟矣慈伯承穉石家學又與心餘西澗東井諸公上
下其議論所好不同而各自有所得金檜門視學京畿
與張瘦銅舍人校文幕中檜門與論詩趙州試院中取
少陵沙苑行天育驃騎丹青引凡詩之及於馬者類聚
得八九篇云可以見少陵布置篇篇之妙南歸每過朱
梓廬書屋輒留宿談至四更或達旦師友淵源亦可紀
也其謂心餘詩於循吏節婦凡孝義之事淋漓頓挫爲
工自是篤論其先侍御公書屋故阨在鹿山之麓故以

名其詩有老書屋曰葯房竹垞題額

擇石宗伯與馮文肅公交誼厚戊戌慈伯入詞館文肅
與宗伯同奉命教習諸吉士一日慈伯謁文肅於邸第
文肅顧語曰子入翰林而上卽命父爲之師可謂至
恩試考之古籍徵故事于唐宋能多得否子不可以不
自勉也庚子二月宗伯奉命往秦蜀祭告華岳江源張
夫人忽病中風文肅聞之急遣長須齎百金至寓以爲
葠藥資所以撫恤其家者甚至慈伯述德詩云月黑春
風厲天平母病危倉皇燈火夕拮据朮葠資紫磨金何
有長須馬亟馳惟公存問切古誼更誰知瓌頰雄文苑

談遷繼史家斯人能自樹古道豈終賒樗櫟材應棄驚駘策亦加槐庭頻請業猶憶夕陽斜

瑞安孫紹周編修希旦號敬軒所居鄉曰桐田爲學一宗程朱尤致力於三禮著有禮記集解六十一卷首取鄭注孔義下及宋元諸儒之說裁以己意戊戌廷對以第三人及第澹于榮利直諒多聞同年馮魚山談佛理願斷葷血長齋以終身敬軒頗規諷之易簣時年未逾五十病極沈繇史館送公費錢至饗然起謝不敢受沒後幾無以斂婦林孺人遵遺言纂修國史因病曠職兩月不敢濫領錢也錢慈伯輓詩云矩步循循守如君不

媿儒治生非所屑，謀道獨從迂。身後幾無斂，門前久索逋。
友朋誰可仗，素旆送歸艫。后氏曲臺記，斷斷論說精。
疏嫌陳匯澤，誤辨鄭康成。有結俱臚解，如梳理髮清。
侯芭風義在，好爲護書楹。謂上舍何君家學西齋錄，曾同史法論。
書從窺石室，事欲核龍門。敬謝餐錢給，深銜豢養恩。
更難康子婦，凜凜守遺言。猶記探花宴，笙簧握手初。
歡言投臭味，比德重璠璣。薤露俄悲曲，桐田只破廬。
萬山寒嶽僻，遠望此歔歔。同治戊辰族子藁田校刊集解畢，
復於其家得顧命解一卷，附於後以廣其傳。

瑤華道人詠百合花詩瓦注何妨種玉姿，如蘭芳韻兩

三枝天然太素無人識寄語滄州老畫師爲滄州張桂
巖州判賜寧作也桂巖山水清妙尤工寫生著墨無多
自饒姿致晚居揚州傳畫法於子百祿天津沈銓青來
山水師石田翁花卉宗南田草衣常游京師亦爲瑤華
主人所重

林翁子祿秦人能文工醫尤擅武事罷官後攜其姬人
陶貞華寓吳酒闌談塞外事慷慨激昂聲淚俱下海寧
沈子逸賦詩贈之云鋒鏑餘生劍俠腸歌殘勅勒氣悲
涼拓朔夜獵飛狐雪壓笛春愁墮馬裝百口雲中傳錦
字千金肘後有奇方而今頭白誰相問醉臥要離墓石

旁生氣遠出儼爲此翁寫眞子逸名維樹詩饒有其鄉
先生初白翁之風兔牀先生爲朗上人作西林菴第二
圖上人精醫善奕來乞詩爲書卷尾云東來只一葦寂
處但方丈要令淨域中解脫諸幻相精藍宅陂澹波光
日演漾風過無留痕瑟瑟搖寒蔣椹頭槎沙尾疏柳挂
漁網有時煙暝初雪墮鷗兩兩青山瘦于僧雲開忽露
顙粉本妙天然寓目愛疏爽阿師駐錫久眞諦闡益晃
禪味入靈素藥竈春融益利濟證無礙誰復嬰疴癢谿
居隔野橋意到輒孤往花霧染衣濃棊聲雜泉響香飯
餐伊蒲白麩檢榆欒歸路一磬微不知夜潮長佛鐙紅

墮水漸看谿月上我友申屠蟠健筆寫蒼莽是卷尤清
遠珠林恣奇賞樓閣現俄頃華嚴納諸掌似聞般若品
普絕意色想乞詩偶展讀沁心漉與沆祇樹識前因招
提記弗方挂單緣未了那能懺塵鞅擲筆萬慮澄妙旨
襲書幌七言如復園看芍藥大小壺廬山和葑湖西洋
畫詩均極酣恣其曉泊吳江寄瘦生武原客舍有云流
光熟羊脚駛往不可招恥伍曹李輩沒齒等蓬蒿相期
矢勿諛爾漁我則樵述懷感舊其語甚悲

宋刻六十家小集原名國寶新編亦名江湖集原刻共
一百十八家存者止此耳每卷後有臨安府棚北大街

陸親坊南陳解元書籍鋪印行字一行初藏曹子清鹽
使家再歸郎溫勤廷極溫勤康熙五十四年卒家人徇
俗將與平生珍玩俱付之火時錢唐吳志上客幕中亟
以重賄出之吳身後厲徵君攜以歸維揚馬氏乾隆壬
寅復爲書賈所得鮑淥飲嘗題其後云國寶爭傳落棗
花江湖處處擅才華只須小換紅羊劫僥倖寒灰六十
家卅年渴夢慰瓊琚四十年前此書在樊榭山房不得一見好事曾傳出
燼餘更五百年還照眼定知何處走蟬魚春風楊柳相
公橋詩案行都似北朝輸與松陵舟一葉小紅低唱自
吹簫大街棚北陸親坊卷尾刊行字一行喜與太北同

里開芸編重擬續芸香淥飲家去睦親數武陳道人名
起有芸居乙橐在集中子名思號續芸淥飲嘗刊行數
家茲擬續刊全集也淥飲藏書多善本所進祕笈至七
百種以上得拜圖書集成之賜有印章曰茅屋三閒賜
書萬卷刊知不足齋叢書至三十集

仁宗朝進御褻題詩章恩賜舉人亦藝林之盛事也其
花韻軒詠物詩哀然成集有夕陽詩二十首爲時傳誦
因呼爲鮑夕陽以比鮑孤雁

乾隆辛丑三月逆回蘇四十三作亂眾六千人陷河州
直樸蘭州環攻六晝夜蘭州兵少布政王廷贊手劍巡

城賊燬西郭門兩重城幾陷固原鎮總兵圖欽保以步
騎四百七十人赴援迎擊手殲賊四賊退據華林山掘
坎濠以死拒大軍與戰不利四月公率兵越水磨溝由
山梁進逼賊巢逆回等從山坡撲上公料兵少不可敵
乃發健卒二百激以上賞冒黑前往自奮勇持刀突入
賊中力戰馬蹶墜山下死之四百七十人皆戰歿城圍
由此解無錫王鶴亭太學相英時在陝西尙方伯幕中
聞警馳赴助餉且觀戰感其事爲作圖總兵歌歌云撒
拉逆回圍金城凡六晝夜城將傾誰爲解圍圖總兵總
兵軍至豬嘴營白日僵臥不肯起謂言大兵踵至如雷

霆實有親兵四百餘夜發百人爲先聲百人繼之鼓三
下百人繼之天將明一夜三起金鼓齊鳴逆回膽破總
兵徐行總兵僅領百餘騎直抵城下如流星逆回退據
華林山總兵列營在城下賊眾劫寨營無人總兵射人
先射馬殲賊凡幾彼眾我寡平明賊益眾總兵獨閒雅
先領三十騎山頭俯平野步卒四百餘勢若長蛇杳賊
眾向撲陣右旋繞出賊後揮戈鋌殺賊三百戰且走賊
人大呼躡我後我兵埋伏夾山口發礮斃賊據險守振
旅而還酌大斗酌大斗歌鳴鳴皋蘭夜風嘯白鳥泣數
行下壯士呼賊眾不敢出土卒且休息請纓殿上來終

童趣出蹊底欲仰攻賊勢涌出如攢蠶圖總兵竦身絕
壁如秋鷹徑撲賊營賊反顧歸鷓護巢抵死爭兵少援
絕烏能生雖然兵少援絕繼以死大兵全師實由此朝
廷聞之蔭其子圖總兵本是羽林軍四百騎擊六千賊
殺一身全五千人古來名將孰比倫家世將種勇略世
所傳長兄死緬甸次兄死金川總兵來鎮蕭關道道路
人知圖欽保麾下四百七十人亦如齊之壯士死海島
徐闡齋圖將軍行紀事略同公姓瓜勒佳氏隨征緬甸
金川有功圖形紫光閣 御製贊有云竭力敵愾世承
家訓至是賜祭葬子明昌擢三等侍衛我 朝盛時固

多廉恥之將如公者豈非忠義智勇俱備者哉

是役海蘭察輕

騎規賊卡梟賊韓九哥率眾馳下蘭察
佯走回射殪數賊訊之所射皆黨梟也

京師每於三月中開溝出積穢街巷閒頗礙行車輒紆

其途以避之馮玉圃清明句云泊船久憶青山豕紆轡

新淘紫陌溝

玉圃詩名鶴半巢取務
觀託宿新分鶴半巢語

光緒甲午分校京兆試乙未復分校會闈初入闈時尙

無校閱之役同人互以便面紙素乞書偶閱鶴半巢詩

存玉圃於乙卯丙辰連預分校有握槩故應吾輩事尋

巢還屬去年人之句其秋闈詩云秋日杲杲穿疏櫺十

有八人共一庭新知舊友並歡洽合并何啻風聚萍書

生結習自冷淡爭趨翰墨如羶腥入闈之始尙多暇諧
笑閒作能忘形競出箋縑互相索箋頭小字羅繁星或
摹乞米帖或仿籠鵝經或錄吟句傳芳馨集裘綴腋錦
合屏斜行矮格光熒熒我輩濡毫禁用墨同考官例
用藍筆青
泥黯入孤鐙青暫假淪麋一揮灑恍逢故物手腕靈人
生良會豈易得結緣如此天所令一時藝林亦佳話不
愁市月長巖扃八月十七夜對月仍用前韻云明月先
照堂西櫺催人卷幙行空庭聞聲相尋步相躡人影散
作波閒萍吾曹肺腑盡冰雪槎枒不受紅塵腥校文餘
暇一吟嘯垂芒屋角搖秋星我欲夢游廣寒窟素娥髻

髯雲駟經叱去吳剛斧舉手摩桂馨瓊樓玉宇銀爲屏
遙見文昌座上文光熒翻思前夜過陰雨微雲不放三
霄青及茲澄眼喜清快一泓水鏡揚圓靈昨歲山莊今
試院流行坎止誰爲令不須煎茶學坡老凌虛徑叩仙
真扇鎖院前塵如露如電其會闡卽事詩注謂王桂峰
李石農曠六柱俱連差陳伯恭學士籤分第一房洪桐
生薦卷最多余與宋小坡侍御俱祇三十卷領試闈者
爲紀曉嵐宗伯

玉圃文成相公輓詞進止未嘗踰尺寸笑談可以懾回
邪生同韓范聲名大死並劉王謚號尊

質莊親王永瑤受經於介野園能書工篆隸兼善畫臨
淳化閣帖拈唐太宗螢火不溫風及右軍帖來禽字分
體詠詩時考證漢瓦當及古泉布自號西園主人句山
太僕請假歸葬作圖送別並係以詩法源寺看花有午
影移深徑風香散翠幢之句獨步句云菰蒲蟹舍江邨
似粉本須求趙大年詠葦絮云江上青衫頻送冷漫傳
裂帛入冰絃其九思堂詩可與花閒紫瓊後先輝映嘗
輯時流畫十二幅而自畫山水一幅於其閒題曰畫禪
集腋圖明嚴氏書畫收藏記有胡廷暉題宋太祖蹴鞠
圖一軸主入所臨宋太祖蹴鞠圖爲宋院本有董香光

跋錢裴山題詩所謂銀管鉤題文敏後東都巾屨建隆
前也裴山爲伊墨卿題質王所畫竹石云琅玕一枝玉
一尺消沈不共梁園雪壺天染翰想精神白雨蒼煙正
清絕青蘂花開幻夢漚九天鸞去毛羽留多君鄭重弄
遺墨竹君石丈黯古秋秋毫積素麝煤碧左右當年鐙
火夕西風挂壁拄了叉腸斷西園舊賓客送張桐谷舍
人歸里云浮瓜沈李夢猶新入座年時授簡頻梁苑雪
消賓客盡回頭忍說舊游塵桐谷名時風亦西園客其
題陳桂堂所藏質親王書鐙花詩卷有云一盞秋堂風
味在河閒鄴下比何如謂王所用印章爲一盞秋鐙夜

讀書也

章止劉松嵐兵備初在嶺外學詩於李子喬子喬謂其
爲才調集所誤三十後從新作起又曰格律不合色相
不配又火之得其指授一以清瘦峻削爲宗得李子喬
書云想見寄時難離愁有萬端經年始能到隔日又重
看積雪在枯樹薄帷生峭寒那能遼水上一夕振輕翰
他如馬因行部瘦民自下車肥血枯平虜後家散拜官
秋皆類長江一派萊陽趙曾慶孫亦從二李受詩法有
北嵐詩鈔

韋約齋謙恆以黔撫入爲編修錢坤一題其秋林講易

圖云操觚歲月非難得開府功名不易爲頗存古道冶
亭尙書督兩江法梧門寄以詩云天上黃河水人間白
髮臣安危三省繫憂樂一情真老去功名薄年來府庫
貧如何轉移法不獨活斯民交道之真從可想見李虹
舟送友詩誰復攻吾短還須慎爾謀亦佳

坤一律句如翠借巒爲郭暄忘市在林百五兩收翁子
冢兩三松覆雪菴書清泉滿路不歸澗破寺無僧惟出
雲顧樊桐最所激賞樊桐名列星居秀水之新塍管轄
舊雨遺音皆平生亡友之詩自著曰深竹閒園詩明月
詞云十載從戎冷鐵衣秋來知潰幾重圍可憐一片關

山月長照征人夢裏歸亦自沈著

歸安吳蘭庭著有五代史纂誤補胥石筆談南雪草堂
集韓侯嶺云一徑走峻坂崖壁若環衛行行漸幽默如
入永巷內日御歷綫天見午不見未亂山尠木石蠢蠢
惟積塊堆阜忽俯瞰突兀壓我背脈疏質已離暑然恐
其墜勢險比巖牆疾驅思縱轡卻怪繞馬首抗行斷復
綴保無或偶然適與禍機會頗聞漢韓侯奮蹟致高位
一蹶中危法乃爲兒女賣詎伊非英豪良由昧進退卽
今弔荒冢行客發深喟凜凜抱微軀羈孤彌自貴讀之
悟全生遠害之道

雲麓將軍奎林與吳澹川敦布衣之好割俸爲刊詩集
澹川南野堂筆記亦盛稱雲麓之詩澹川詩如古來恃
機智勝則危其身忍於棄所親學仙亦枯槁皆有至理
徐青藤寫生卷子幀端自題澹老墨諺四大字蔣春雨
句休輕澹老無心諺不數南唐沒骨花

平和何子祥字象宣辛未進士初選浦江令浦故多豪
猾屢訐其令黜去象宣始至按尤黠者數人上其罪流
之俗以少靖久之調平陽多善政仿古法設陡門興水
利先是海疆三年秩滿卽得擢用至是始格于新例僅
加通判銜留任尋以年衰乞休不得而疾亦遂亟邑民

哀思爲立廟以祭顧梅坡司馬輓象宣詩云路接甌閩
一水寬近鄉無奈欲歸難頌碑到死留孤廟資格應遷
尙下官獨抱苦心多考據不輕握手論交歡鬢絲可歎
垂垂老腸斷郵封忍重看蔣春雨壬午薦卷出其門次
韻云吾師爲政猛而寬欲傳循良紀更難共道文翁能
化蜀還憐揚子不遷官桐鄉祠祀千秋永鄭國渠歌百
姓歡珍重高文鏡實行侯芭掩泣幾回看

嘉禾詩人推小長蘆爲一大宗錢汪王萬相傳不墜擇
石宗伯詩律精嚴深厚字句結體時規西江蔣春雨生
稍後最爲擇石所深許擇石錄鴛湖十子之詩九人皆

已故生存者惟春雨一人自注云此人不在此例以宿
學屢躋場屋錢雲巖學士謀梓遺藁未及而卒子衍石
給諫成之辛丑上元日梓廬招同種梅秋塍約齋集牆
下小軒余舊藏有姜西溟先生手書上元讌集詩攜往
同觀卽用其韻云我少匙嗜好濡染唯古酣老至淡名
鞅譬作無波潭瞥眼又新歲過去紛蒼籛世味等紗薄
誰謂荼其甘良友要夙好佳日督叢談爲言事游歷經
歲勞駢驂近始謝徵逐效佛不離龕回憶總角交性習
都宿諳蔬筍咄嗟辦兼弗用湯燖感君意甚厚未飲而
心耽君宅政新闢金明寺街南奉母躋八十速客來兩

三搗我闖牆下奚啻琅嬛探列障半前賢後生能無慙
索我出名蹟賞以牀頭壘著作當上第髣髴已鬢鬢肉
食非馬肝肯作遲暮惓葦閒老書屋上下窮搜擿家山
磯釣魚鄉味田種蚶藏身殫人海欲脫終何堪不如卽
時酒笑口同開函快翦春初韭各擘霜後柑公等凌飛
隼下走困眠蠶一切想無住弟生三宿貪偶爲戲文字
持擬參伽藍何妨顏氏瓢并陋陶家甌其含咀六籍蟬
蛻汚俗之致可見一斑居瓶山下有句云破故紙中尋
獨活一鐙如豆笑空青病中夜讀本草經疏作也所藏
集古帖半宋元舊搨繪事出於天然著有西齋過眼錄

嘉慶丙辰里人舉孝廉方正堅辭不就嘗以羚羊角尖
手刻名號亦續印人傳者所必錄也

紀文達拙於書皆門下士代寫盧召弓亦拙於書簡翰
多起草屬人錄之伊墨卿輯文達硯銘草稿裝之成冊
硯銘之外有筆斗鏡函二銘趙億孫次韻題後云銘辭
廿紙剪裁新筆斗香匳硯其珍塗改漫嫌隨意寫裝池
難得有心人閱微堂左拓窗紗想見揮豪落彩霞持與
柳家新樣比可能斂手笑薑牙秩宗文字久撐腸壽石
緣還藉省郎我亦乞書盧子幹數行殘墨至今藏墨卿
時官比部也

昆明湖隄有銅牛乾隆乙亥年鑄趙億孫詩小步西隄
上昆明一望收水光清鑑髮山翠澹宜秋遙作都城衛
頻經御輦游安瀾恢禹績卅載鎮金牛咸豐庚申英人
入園淀犀尾毀折事定以棘圍之

甘道淵七十始就官象岡分司嘗自寫空巖宴坐圖小
影甲寅年七十七矣黎簡民閏月初旬寄懷道淵老人
云今年公入七十七閏月春遲三月三誰與此翁修稷
事我將中宿借風帆弄石癖知山滿袖不冠狂任髮遺
簪寫取虬髯象岡長作官猶似坐空巖又爲題空巖宴
坐圖云青藤紅樹合兩崖忽有猿狖吟崔嵬吟猿隱耳

去未已麋鹿嗚嗚來于思六年以前于思來此山此人
伊可懷乃如長白不易見三韓雲海心無涯六年一昨
交臂才咤欲墮舌收不同薜蘿垂膺鬚而髮正壑滿面
顴窠顙藐姑淖約但飲霧老子中央如立柴黝石渾渾
壁削鐵青雨漠漠衣及苔招之不轉呵不背其影入石
心如灰寒巖枯木暖氣迴忽生爾稊度爾材或言壅腫
稱櫟社或言郁烈勝柏臺濠上畸人得莊惠梁園老客
空鄒枚五仙客舍門不開門前落葉迴風堆我真有病
此虛室心亦無火守大槐自惟憂患得生者君今灑濯
真熟哉問君昔者林巒隈可挈竹杖雙芒屨何年了事

又撒手撇捩猛火辟歷雷入于南海風穴盡賸恐北山
雲壑哀不然羅浮與子偕上可東西呼蓬萊鐵橋萬仞
與垂尼海水一滾看寫杯其詩甚爲怪偉

南昌李恭毅公湖以乾隆四十五年由湖南巡撫調任
廣東廣東素多盜番禺之沙灣菱塘近大洋縣亘百數
十里尤稱盜藪假風便捕魚出洋肆劫或散布內地行
劫恭毅莅任籌訪各盜姓名居阨出入途徑偵各盜首
以七月望前歸家設祀密飭文武官分布兵役旬日間
擒誅盜首二百餘人萑苻無警以菱塘鄉之鼠山地氣
所出掘其脊爲鐵貓鎮之香山麥愔爲作鐵貓歌次年

條奏安輯章程甚悉十一月卒于官黎二樵永寧詩云
沙菱舊萑苻新血污海陬幾處大樹下風雨飄颻化
爲鬼車烏灑血呼其儔血冷哲人萎歸骨雲海愁英魂
爲董狐筆下錄鬼囚森森轉輪宮由子持其頭羅拜死
灰色入地冰霜秋猶畏長城公濃眉深炯眸正氣齊東
南羅殍空山邱盡瘁貽善寘嘉名靖邊籌猛虎渡大河
馴雉棲中牟茲民載寧一於始孰此謀孰謂公好殺公
也僑亮流事長命已迫跡在精尙留請公迴靈颺永寧
無復憂颯颯新旗旌海風吹戍樓

王秋塍餞送錢獻之赴西安云識字推揚子通經擬服

虔宮商精辨審輪軾細參研謂以新刊詩音表及車制
考見示也獻之通許氏書工小篆甲午中副榜官乾州
州判以偏廢引疾時松文清督陝甘重其學品至臥榻
問疾索未刊著述以史記補注對時文清有伊犁將軍
之命曰塞外不能事劖劂當錄一副本原稿必寄子也
後江都韋書成謫戍與獻之爲同歲戍滿南歸以原稿
屬付獻之至文清督兩江獻之書成已先死文清皆賙
恤其家獻之所著已刻者詩音表車制考外有說文斟
詮十經文字通正書新斟注漢書地理志皆版衍其從
父晦之著述亦未全刊刊有敘例曰詩古訓爾雅釋文

補廣雅疏義說文統釋兩漢書辨疑後漢書補表補續
漢書藝文志後漢郡國令長考三國志辨疑邇言曰可
廬十種獻之駢文包慎伯謂其亞徐庾間作長短句如
送巖道甫歸金陵渡江雲云春來君正去天涯離思煙
樹繞冥冥驪歌催唱處灞岸攀條遙向馬頭青三年同
客悵分攜日斷歸程遙羨卻江關詞賦名重庾蘭成行
行冰消渭水雪霽梁園正遲遲晝永盼到日花飛草長
攜酒聽鶯畫船絃管秦淮路記舊游興尙飛騰書一紙
平安遞到寒廳時獻之伯兄禹美教授江寧託寄家書
故未闕及之

鎮洋汪敬箴宮庶庚寅舉京兆試辛丑第三人及第赴
禮部宴之日得花兩枝故事如此有句云三爵許聯宗
伯席雙枝獨占曲江花保和殿朝考一甲三卷另封進
呈有封函特達文章貴之句丙午未散館典試江西其
尊人持齋少空丁酉嘗典試此間亦佳話也戴石士督
學楚北歿於安陸舟次介弟蓮士辭免代任學使之命
敬箴輓石士詩碑豈矜敦實銘須著穎濱謂唐賈敦頤
敦實兄弟先後官洛百姓刻石頌美人號棠棣碑用事
甚切王子請假南歸已未詔修實錄者兩載復引疾陳
乞止足之致時論高之子彥博亦能詩有養泉齋詩鈔

大興李維寅句云亂山藏虎氣匹馬入松風文安紀曾
藻句云蛇香過草濃于麝螢火流天大似星皆官粵西
時詩

英山金蘭畦司寇始爲刑部郎時章佳文成公奇重之
事無巨細必得司寇亭擬方畫諾舊例監守盜限內完
贓得分別減等後一切不減奏如舊阿克蘇錢局章京
侵用餘錢吏議絞情實駁奏以爲官員侵欺不得比引
平人竊盜之條以虛斬爲實絞請改如律以書生明習
法令三十年閒終始不離刑部風貌秀整兩頤著黑子
如豆毫數十莖長與須等嚴冷峭直撫江右連劾五十

餘官後稍稍奏復之以嘉慶壬申薨於位郭頻伽挽詩
有人疑削瓜面我識養苗心之句頻伽嘗館其家所以
敦誨之者甚厚也

嘉善何文煥刻有歷代詩話及唐詩消夏錄其讀史小
識金元明詩話未梓手定詩文詞無補集其哀仙云學
仙慕長生也長生人而今安在哉其有影響彷彿蓋強
死游魂爲厲耳藥石旣以斃命上昇之說乃更慘毒此
乃邪魅陰攝以去飫血飽肉矣小說家往往有籍而人
不悟哀哉惱佛云奉佛將以祈福福則來世害則今生
矣夫佛之徒不耕不織不工而飽而食煖而衣凡百器

用備有國者國以蠹有家者家以耗害哉文士之學佛始也於聖人之道未之有得也及衰者才力竭矣旣不能有所發明爲後學師乃託佛以文其陋更可惱也儒禍云士苟不能有濟於天下國家徒以空言爭論者厥禍刑無赦何則虞帝誅共工孔子誅少正卯處士而橫議孟子以爲大亂也且空言無已黨錮之禍起僞學之禍起門戶之禍起唐韓文公明王文成公偶一論道學者猶非之經世謀略章句儒能幾及乎新莽王安石託經學以禍天下嗚呼罪不勝誅已極似皮陸小品文煥及見諸草廬曹慈山精小楷自幼孝謹不爲華靡遨放

事慈山嘗謂其詩文不如書書不如人

聞川陶造圖宋德祐末奉勤王詔集義兵拒元謁文丞
相于軍以功授將仕郎宋亡戒子孫勿仕元作忠孝堂
藝菊千本自號菊隱居士同殷源趙孟僊稱秀州三義
張楷端如有菊隱祠詩端如本生父源濬陸舫有寫韻
樓集所後母葉有霜閨吟姑晚英有迎霞樓稿端如詩
曰雪泉詩存所與唱和者趙凌雲漢階有筠亭詩鈔桐
鄉巖光祿銘書有石帆詩鈔宋景龢蘭城有閩川泛櫂
集曠浮山人稿

錢文端爲母陳太夫人寫夜紡授經圖得蒙 御題二

絕洪稚存爲其節母太夫人寫機聲鐙影圖海內名人
題詠殆徧姚文僖尊人以家計久客於外文僖兄弟六
人女弟二人皆沈太夫人督課卒於庚戌及文僖大魁
天下爲粵學使迎養尊人而恨太夫人之不逮養也作
課兒圖以寄其悲馮伯木題詩有寒宵佔畢不成眠一
粟青鐙疑故紙仍明忍性更動心可絕放僻兼邪侈之
句謂太夫人嘗舉孟子此二句爲勸勵也

長甯趙希璜渭川在潮陽李南礪縣署時南礪教以聲
韻之學爲校古韻標準後官安陽知縣重刊是書其泊
韓江句云仗劍游非南十八昨行舟附李龍門謂南礪

也

朱梓廬剡川書院答人問詩云生心而起如其面此事
分明不易窺見果知因通妙解積多成少忌常師巧餘
力外殊難說意盡言中未是詩書卷仍教捨筏了性情
詎似刻舟爲門人楊蟠跋其詩謂先生嘗言詩文雖小
技非深入甲裏不能工喜盤硬語不蹈襲前人一字而
閔閔有恤人之心時溢於言外雖元道州韋左司不是
過也今觀其詩如天下官民依岨邛無小人君子莫養
貧逋尙耐催科拙春作良知望歲勞虎威東子假裝面
鼠技奴兒工數錢扶良須拔侵苗莠療病難剡貼骨瘡

遲收幸飽今年飯早計須償去歲糧遇民如兒吏如伴
手攢疾蠹其敢忘有司云不爲已甚是良箴近學模稜
頗用心投鼠誠甘須忌器從禽良快怕逢林事方掣肘
科條縛人尙吹毛翻覆尋佛法依來都餓死有司讀律
莫教深皆可見其廉平之治去廣靈時縣之人識與不
識累日紛紛懇留且欲赴訴於上官諸生十數輩送至
蔚州之暖泉村暖泉人復爲設餞堡門外遲回久之而
別皆見於詩其表姪吳榕園上舍摘其少壯詩句如南
湖書舍云窗落風帆影牀通水鳥呼夜行云荒沙明閃
雪細路曲盤絲客舍云慈母縫衣身上綫癡兒索飯夢

中聲酒樓懷太白云先達非無宋宣撫微時早識郭汾
陽潼關云黃河折角水白嶽東腰雲永壽道中云川原
古爾國風雪小涼州鑄鼎原云鼇戴一峰圓拔地螺盤
千仞曲通天剡谿云斜日紅欹半帆面平雲青閣數峰
頭又云紅葉稠時山色喜白鷗眠處草情芳學舍遣懷
云因病早衰敢稱老爲貧卑仕不成官落花云春來春
去留雙眼多病多愁老一身暑夜云隔衣深刺蚊何毒
掠案橫行鼠太驕臨安懷古云酒飛不灑黃龍府濤怒
空翻白馬江西湖云怕問橋名郎信斷愁看山影妾身
孤新構小軒云自愛廉隅方角柱未孤風月直櫺牕七

里龍云山戴帽時滿瀧兩帆張弓去一灣風又云星垣
無屬孤名客江水幾時避姓嚴語多清新而先生自謂
此須細改乃可存不以入集亦可見其晚律之細矣題
東野集云霜清轍山骨水清鑑石髮夜蟲晝不鳴冬花
春不榮徑險無坦步絃急無緩聲冰心豈發熱薑性豈
作甘有窮如孟郊其詩固應寒器量生是隘遭逢復抑
之勁根迸石鱗那有穠華姿格幽敵韓豪詞警異僧瘦
俗腸塞腥肥爭逐海畔臭苦藥美於回瘡疾藉以救雖
非萬里流沛然決江河掬露以浣手所珍不在多小魚
彭蠡之嘲得此爲之一洗

安谿李惠圃中丞清時爲文貞公從孫抑亭太史子以翰林出守禾郡梓廬總角受知乾隆丙子丁丑間中丞守宛留梓廬讀書官舍累官河道總督調撫山東沒後東人思之祠祀濟寧姚公立德有記載州志丙申梓廬重過兗州有感云銜感茫茫久益哀春風五馬記曾陪古之遺愛誰其祀客竟何成此又來萬里海山雙淚缺半生杯炙寸心灰不知夾道青青柳怎度秋霜二十回語極眞摯錢百泉次韻云九原不作絕堪哀世路悠悠泛泛陪可柰船脣鞍背倦彌思王翰李邕來偏多虞坂眞憐驥豈少桐材竟作灰況復年華同逝水滔滔東去

骨重回越十二年己酉梓廬都下逢李二孝廉本璿追述中丞遺行感賦二首云夫子中和抱負全七閩閒氣發山川清如冰雪溫如玉胸有江河骨有仙人誦新碑雙淚墮家承舊學一燈傳入籟入細無遺憾早歎今時見昔賢人推接代安谿老我識前因衛水神宛轉鬚眉山下像從容語笑酒邊春論文商略到千古知己平生第一人國史他年采家狀幾行述德媿鋪陳自注謂辛巳夏謁衛水神廟仰瞻塑像酷肖夫子鬚眉光彩無毫髮差至今如在又嘗代本璿草家狀上史館其於師友風義可以追配古人矣

乾隆丙午臺灣林爽文之亂前諸羅令陳良翼已陞嵩
明州知州緣疾留至是城陷賊劫之去忽一人熟視之
振臂大呼曰是舊官街民聞救曰莫殺好官得不死詭
稱良翼眷屬者皆獲免青浦莊士民爭迎良翼良翼曰
我舊官能起義殺賊者聽約束一時得二千餘人隨總
兵柴大紀收復諸羅權縣事乘城守禦凡六閱月圍解
吳澹川時客節使幕敘林匪事有曰直待鄭人思子產
始知秦法誤商鞅又云三十五人齊面縛爲公求死不
求生爲良翼作也良翼字卦峰蘄州人癸未進士嘗繪
守城賞番歸隱三圖自述守城顛末爲三生瑣談陳虞

部詩編次曰諸羅守城日記三十五人者謂難民許懷
等大紀以爲賊黨付縣吏駢誅良翼鞫得實白於柴申
救再三終不許不得已以已戮報而陰縱之事覺以縱
賊論法當死許懷等父兄戚族盡縛三十五人以來丐
盡戮之以全良翼巡撫徐嗣魯據實奏聞獲寬宥黃梅
喻洽存諸羅行云莫殺好官勦賊易得好官難諸羅城
大如斗城已復城可守倡義者誰舊官爲首受官約束
同官難家家爲官送米飯昨日天上下將軍徑攻不備
屯如雲義兵迎之齊掩殺盪掃狂獠祛海氛 九重褒
語蓬萊殿往者未有來者勸諸羅縣嘉義縣諸羅改名

嘉義已詳前集祝止堂贈卦峰詩有云孫恩作賊亦分明不殺清官殺墨吏又云人命在我掌握間肯以殺人上官媚紀其事也

韓城王文端公早歲居貧爲書記以養嘗在尹文端陳文恭兩公幕府辛巳殿試列第三 純廟親拔第一時西域底平 御製臚傳詩有西人魁榜西平後可識天心偃武時之句入軍機時與和相同列介介進退和雖厭公亦不能奪其位 睿廟親政遇事持大體竭誠進諫然獨居意常歉而不憚每言獨恨二字爲後世所譏問之卽其姓名也爲伊墨卿己酉座師墨卿三師二友

詩云韓城夙夜盟忠貞人如太華當秋清受知愈深意
愈下每思後世譏姓名繫予賞音出焦爨不及東門疏
傳餞何期謝病更趨朝倉卒鞭鸞死猶諫自注云師薨
之五日澄懷諸老扶乩公降壇大書曰某事實在公等
案文端以壬戌予告歸里甲子八月秩御製詩額珍物就
賜其家入都謁謝乙丑正月陳德之事急入內面對力
言德爲庖廚之賤安敢妄蓄逆謀此必有元奸大慝主
賄以行明張差之事殷鑒猶存敷陳無隱越三日薨於
京邸嘯亭主人謂某相急治此獄草率完案致有癸酉
之變 睿廟深思公言特賜祭焉墨卿所謂某事當卽

指此

桐鄉汪淮蘭儂有小海自定詩五言如負琴松影白洗
藥石泉香醉眼開囊劍歸蓬及塞鴻風欺黃葉冷雲壓
亂峰斜獨鶴偶同夢閒雲亦滿船折葦有時響微鐘不
可尋霧傍斜河白秋容短鬢爭七言如漸少飛花仍送
客未堪斷酒況禁春樓高盡放孤雲入山暖不知何樹
香天爲孤花留晚照山將疏雨洗秋痕擺脫畦畛置之
樊榭集中如驂之靳子東村學博嘉穀江村見月云猶
是故園月光輝分外清鄉心春夢短江影暮潮生獨飲
不成醉孤懷孰與傾歸休吾早計敢說別離輕亦尙不

失宗法

上元談泰星符以丙午舉人爲南匯教諭嗜學博古有
桂林書屋詩話四卷尤精天文厯算從學于錢少詹

詹贈之序略云歐羅巴之巧非能勝於中土特以父子
師弟世世相授故久而彌精而中土之善於數者儒家
輒訾爲小技舍九章而演先天支離附會無益實用疇
人子弟世其官不世其巧問以立法之源漫不能置對
烏得不爲所勝乎宣尼有言推十合一爲士自古來有
不知數而爲儒者中法之絀於歐羅巴也由於儒者之
不知數也予少與海內士大夫游所見習於數者無如

戴東原氏東原歿其學無傳歐羅巴之俗能尊其古學而中土之儒往往輕議古人蓋天之學當時以爲疏今轉覺其密七曜盈縮損益之率古法與歐羅巴原不相遠其爲彼之所矧者不過數端而其說亦屢易少詹此論可謂先得我心同邑學歷算者有陳勉甫懋齡而階平所造爲深

沈芷生進士清瑞讀書強記詩文祖禰齊梁出入四傑庚子暨陽書院諸士朋試於樹人堂學使劉文清命十二題分詠吳中古跡不數刻交卷文清誦之擊節嘗與長洲張邦弼青城吳江趙基開仲崇明張詒景謀吳縣

顧禮琥西金長洲王芑孫念豐吳江石韞玉執如爲碧
桃詩課卒于乾隆辛亥執如爲刻詩文詞及韓詩故二
卷其書戰國策後謂劉向序曰中書本號或曰國策或
曰國事或曰短長或曰事語或曰長書或曰脩書撰書
之人向未之詳也田僖傳贊蒯通者善爲長短說論戰
國之權八十一首戰國之文殆通之所爲作也曰爲短
長說斯短長長書脩書得以名焉矣曰論戰國之權斯
國策國事事語得以名焉矣若其篇數不合則餘卷錯
亂相糅舛向固已言之

毛海客年少有詩名拙齋中丞國泰爲戶部屬時兄事

海客比撫山東在其幕最久其雨夜宿張夏枕上口占
云冷雨敲窗帶恨眠重思昔夢欲淒然燈紅酒綠聯牀
處此事沈吟已六年蓋嘗同拙齋宿此時拙齋久作泉
下人矣明王季木考功寓居濟南著齊音百首海客棲
遲海右有續齊音百首懷高士晉字麗明明諸生明亡
隱山中居鑛村著有易訓輯要年八十預知死期至期
沐浴而卒高念東贈詩有和靖比來翻舊本梅花不種
種荷花之句海客詩布襪青鞋道自尊焚香讀易閉柴
門高風想見懷居士徧種荷花繞鑛村

金人兵薄濟南有勇將關勝者善用大刀屢陷虜陣及

金賄通劉豫許以帝齊豫誑勝出戰遂縛于西郊送至
虜營百計說降以罵賊見殺豫僭立有醉民者佚其名
罵曰汝是何人要作皇帝大宋何負于汝豫怒殺之海
客濟南雜詩建炎往事不堪題劉豫么膺也帝齊忠惜
醉民誅劍下勇憐名將縛郊西河邊殺慙生鱗角城上
風雲暗鼓鼙太息八年空僭號鵠山荒墓草萋萋

毛海客荊州客感詩百里迴車未入秦伏雌烹後奈長
貧廿年夫婦常離別數口蠶鹽獨苦辛蓬鬢但餘椎後
髻牛衣猶擁泣時身謝娘久已拋吟筆那有新詩寄遠
人海客配吳若雲絳衣素工詩有香雪閣詩鈔海客素

貧出游久未嘗有所及絳衣不以爲累困于操作吟詠
殆廢旣知簡州禦賊力戰及于難絳衣盡出賻幣獨昇
歸葬江南且舉先世之喪其他行事有丈夫所不逮者
孫生甫屬姚春木爲製詩序當海客死事之先僕王誠
閒奪其頂帶謀脫海客不可旋俱戰沒始壬子海客從
惠瑤圍征西藏墮積雪中幾死賴誠久弗去力持得活
至是復從遇害亦足紀云

吳江史冊崖善長有秋樹讀書樓遺集朱梓廬謂爲竹
垞檢討之派客畢尙書幕值川楚用兵指情類事篇什
爲多其襄陽紀事云霸上眞如戲枋頭悔已遲裹糧煩

轉戰卷甲費窮追漫礪王孫劍虛擧鄭伯旗莫鷹焦爛
賞史筆有微詞時永都統總統湖北軍務與恆將軍並
晉宮銜賜雙眼翎旣而官軍屢失利景安於事多所爭
執永與明將軍不協戰迄無功大營駝馬亡失大半永
被逮入獄詔以惠齡代之秋帆銜命南行總理苗疆善
後故爰有檻車徵鄧艾節鉞付班超之句其竟落魚門
冑難歸白狄元則謂提督花連布戰歿青溪事也上元
王鼎襄戊午在大梁作云正恐人南竄兼愁盜北還忽
聞丹水賊已據石門山嵩洛風雲地襄樊形勝閒莫台
青犢血直濺魯陽關午谷投戈入雞頭駐馬看妖星懸

太白烽火照長安地勢秦中險羣公奔命難思量防鋌
走忽作壁門觀乘機每不早追逐意何之以此爲長策
兵戈有歲時羣凶皆自得軍士不堪疲寄語雍梁帥朝
廷望罷師鄖陽新轉戰白骨徧山河設策無朱雋誰能
斬白波老成歎彫謝

阿公福公海
公奎公皆亡

烝庶命如何悵望秋

天表空吟隴上歌於當時用兵情形可見一斑

汪鐵君上舍中饒爲雲壑殿撰從父行依殿撰至滇南
學使幕暇卽刻爨聯吟編其詩爲滇游小草丁未秋日
曲陽再試古學殿撰以五色詩命題且先拈韻以示諸
生鐵君亦用其體作秋懷詩五首一時呼爲汪五色青

云箱傳故業媿前人雲路蹉跎廿六春衰柳西風雙眼

暗敗荷南浦一衿陳蹤隨帝子江峰影夢入明如塞草

塵回首家山真似髮挑燈疊紙寄頻頻黃云槐花八度

逐人忙開口兒童笑欲狂幼婦詞窮碑上絹仙翁塵斷

枕邊梁餐英泛酒鄉心急四兄歸擁被開衙宦趣長二兄

仍發山右落葉千林斜照淡士衡家問轉傍徨赤云城邊遮

斷望鄉眸數道躔經隔斗牛韓奕豹來蠻國貢時滇省有蠻人

貢豹之事琴高鯉趁洞庭舟昨附水程孩提若保心尤摯滋

明年已六齡寄墳埴全荒淚未收先慈窀慙媿玉川無

破屋竈前跣足婢還留白云風風雨雨室生虛文戰工

夫寸鐵除却戒常知圭有玷郢歌多恐雪難如明光受
采歸天質淨業參禪想太初蓮社同游零落盡接羅狂
興更愁予黑云華陽西去水茫茫墨守甯教戀故鄉聞
村有陝右之行已敝貂裘蘇季子半焦琴尾蔡中郎匪烏幻迹
林投屋如漆前程海盼航攬鏡自知鬣髮換瓠瓜未與
湟緇妨

惠天牧先生視學粵東人比之白圭振鷺錢裴山嶺西
使滿還都留別詩有圭鷺聲名慙老輩雪鴻蹤迹過三
年之句裴山已酉二甲進士第一選庶常改主事直軍
機其提督廣西學政在嘉慶戊午時官戶部員外郎庚

申升祠部郎中十三年以光祿寺卿偕文秋潭按事山西小憩堯城廟簡秋潭副使詩云素心昕夕其關山應勝戎衣匹馬閒秋潭從征秦中亦曾過此也回京復命正值心壺給諫錄用詞館是日召見陳謝

仁宗曰汝家又添一翰林當時召對臣工每詳詢家世魏春松以三年二月由刑部郎出守揚州 仁宗召見於養心殿垂詢家世謂汝是讀書人家春松敬謹奏對因寫讀書人家圖以誌恩遇若錢氏自東畬太守以進士起家香樹司寇而下圭組蟬嫣科第門才久爲 帝心所深悉更有加矣裴山在軍機章京上行走多年出

撫粵楚庚午辛未間 天子方重用之遽以病卒于安
徽官舍與阮文達蚤相友善復以同榜成進士有一女
曰德容母程太夫人慎于擇婿松文清譽阮公子祐于
太夫人遂締姻焉文達刪存其詩爲綠天書舍存草六
卷刊于廣州序謂一星後曙古人所悲微雲抹山賤子
何忝亦一時興到之語

吳郡石鈞遠梅訪葉橫山先生故居云罷官當日追陶
令設帳他年得鄭元謂鯀谿尙書也自鯀谿傳法橫山
主盟吳下蘭泉西泚師說相承西泚博學多聞而唐宋
溜澗斷斷未合其序遠梅詩集祖陳忠裕詩衰於宋元

明振之之說謂詩體至唐始備宋人務求離於唐人以爲異然元遺山已詆蘇黃爲滄海橫流元則非唐非宋變而不能成方汲古閣刻元四大家詩惟虞道園略有丰神餘多柴棘明則軼宋元之沙礫而進乎唐矣門戶之見何其深也遠梅詩如翠屏洲雜詠云我心如月影常印清谿白愛爾不通潮只抱幽人宅柴門到谿斜谿水到門住記取故人家沿谿多竹樹蘭泉司寇比之沙斗初張崑南朱適庭庶乎相近翠屏洲爲王豫柳村所居柳村詩如江空多寒雲掩映蘆花白漁父持酒來共拂磯邊石月明池塘空寒水媚幽篠宿鳥忽驚人孤飛

入紅蓼規格亦略相似遠梅惇名義重然諾平生與陸
梅垞有師友之誼梅垞歿能恤其孤刻其遺集遠梅子
嘉吉有聽雨樓詩孫渠有葵青居詩錄潘鄭菴師刻爲
石氏喬梓集

江都布衣張鏐老薑詩如客來兒當僕天冷酒爲衣路
近還家易年衰負米難花移夜景分燈看簫咽春聲帶
雨聽自檣艇子延秋色閒與鄰翁話夕陽魏卜臣所謂
夜狻晨鶯徒工迸淚春花秋月祇解傷神昔潘雪帆歿
于揚朱老匏作詩弔之老匏名冕其絕筆有書空當子
孫之句老匏歿老薑弔其墓云書空久識子孫艱破冢

蕭條亂葦閒一代風騷留遠韻百年哀怨失歡顏詩成
紅淚鵑難化骨冷青楓鶴不還三尺殘碑一尊酒夕陽
人弔沈家山其氣類相同故言之悽惻如此

京師古藤若珠市街金藤吏部後閣明藤珠巢街漁洋
手植雙藤皆有名康熙甲子朱竹垞自禁城移居古藤
書屋其地在宣武門東海鉢寺街爲金文通舊宅蔣京
少黃俞邵周青士先後寓此惟竹垞較著經義考及日
下舊聞皆此時所著藤二本下有大池廣半畝旁有奇
石林立古樹掩映己巳遷槐樹斜街有藤花又讓別人
看之句乾隆末趙味辛居之馮仁寓爲賦古藤書屋歌

後爲順
德會館

王暢甫馬蘭雜詩九邊皆隘口蘭峪劇峒堯戰蹟餘秦
漢民風雜薊遼馬駝通絕域鼙鼓送前朝失算嗟明季
監軍半寺貂土風仍北地火禁最東陵破砦資防候疏
星代戍鎧布鞞邊校樸騙馬塞兒能奧壤饒生產山棉
復幾陞守陵封帝子視版命皇孫霧結蓂花大雲披蒼
草繁圈中熊自鬥樁外鹿常奔不必遷豪族方知 原
廟尊坦腹江亭上羣山涌乍晴層城半邊雨鱗瓦萬家
聲花不依時發松常破石生戍兵供廟祝清磬落空明
戍旗收夕照笳吹入邊愁石屋多稱塿塼房卻號樓虎

驕猶避熱鷹健不關秋俛仰蒼茫意誰知近帝州塞月
高難落關雲冷自飛邊聲生夜櫜霜氣變征衣土竈烹
茶苦官廚拾菌肥班生有奇願投筆未應非袁伯長馬
石田不是過也母弟聽夫官呂堰驛巡檢率鄉兵禦賊
墮水賊鉤得之罵賊死善騎射嘗自熱河馳一晝夜達

京師

檀默齋居滇數十年以傲罷令自號廢翁爲農部瑣錄
華竹新編及騰越蒙自浪穹順甯廣南凡七志所著錄
純駁相閒要皆自出機杼不肯寄人籬下其滇海虞衡
志分上下卷以配范石湖桂海志標目悉仍石湖之舊

滇之巨政惟鹽與銅故所志爲詳乾隆乙卯語師荔扉
曰有以三百金購刻是書者予其許之乎荔扉曰果有
三百金則翁可歸矣後購書者陞丞粵東旋卒此事中
止嘉慶甲子荔扉始刻入二餘堂叢書方默齋掌教成
材書院趨之者用師生禮相見荔扉獨以呼鄉大尹者
呼之對坐一粒齋豎義送難默齋曰吾不意滇人中竟
有吾子荔扉曰十步之內必生芳草滇之人謝客閉關
不求聞達有倍於予者有數倍於予者翁矜其所見而
忽其所未見是以予爲遼東之豕也旋投以句云同是
楚人滇較遠采詩知不薄菰蘆乙卯荔扉奉檄入都默

齋和蘆字韻亦以荔扉之相呼者呼之曰安知其不選
江南辛酉荔扉銓授望江抵皖寄以詩云江南山水尋
常事真與先生作長官而默齋已歿於江甯旅邸矣默
齋撰穆天子傳十四卷疏中辨河源萬餘言甚奇欲合
注大小戴記未脫稟好學勵志急朋友之難溘人士毀
之者曰恃才凌人自蕩於繩尺譽之者曰弘覽博物慷
慨悲歌有公而楊用修氏不孤宋于廷從官滇南以忘
年訂交有呈檀山長萃四首云先生多道氣江左眞師
儒昔爲一縣令今作公家徒不以窮愁身貶損道德腴
遺編了不釋投老性命俱文詞盛波瀾欲救當時愚有

時露狂詭盡改凡形模邊陬地荒僻學問不可孤草堂
得相見意境殊恬愉議論在一世文字非自娛卽今訂
往復待與窮根株世俗日滋異禮失難具論皆由綴文
士意不求古人我讀曲臺記篇第猶可陳代有章句儒
精義終沈淪譬若周道砥而多塞荆榛默齋老居士注
禮追經神刪除俗師說還此二戴真不教終委棄耳目
千秋新周王好巡游紀注莫可踵寂寞千餘年巍然出
尸冢筆墨殊古籀破碎益臃腫欲讀口如鉗尋義心更
朦古書有通塞抉發開眼孔字疏復句櫛妙詞若泉涌
辨窮大荒西變怪實此總奇文出奇情舌作心藁悚試

看宇宙閒此義得幾種文章世所同立言存其人窮愁
不著述垂老空江濱先生髮已皤猶寄萬里身點竄六
藝論盡洗陳言陳文辭追楚騷奇迂益悲辛西南萬山
中老屋圍荒榛山阿有山鬼含睇意復噴淒涼一時話
千古誰能鄰

滇自范眉山發明龍淙洞爲雜詠十首以紀之康熙丙
子蘭谷和尚溥畹開花紅洞 御賜法華寺額及 御

書墨蹟甚多增十景爲二十二景尹文端總制時法界
寺雅集和吳頴菴學使詩有仙源流洞口石乳垂山房
之句檀默齋謂石湖評桂山之奇宜爲天下第一峰無

延緣平地突起玉筍瑤簪森列無際山皆中空下多巖
洞滇山中空巖洞則無山無之宋自玉斧一畫遂棄滇
黔又棄安南西失甘肅東北不能收燕雲十六州南渡
而後北使者以盱眙爲第一山後且以荆門州太平州
爲邊境石湖雖嘗使北北待南客禮貌甚輕未能縱其
徧游宜其以桂山冠天下使見滇海巖洞之奇必旋其
面目矣

翁覃溪題石帆詩卷云歷下城西夢宛然羸提衣鉢石
欄邊玉堂陰合花拈處迦葉相依廿七年謂石帆尊人
秀峰司庫也秀峰早歲卽能詩年十七爲生員中乾隆

二十五年舉人初充內務府筆帖式久之借補御園織
染局司庫織染局近玉泉山暇輒放舟游憩形諸歌詠
方舉人需次可得部寺司務及筆帖式資深亦可游擢
撫仕皆以貧告庚子以後遂罷禮部試邃于易占人吉
凶皆奇驗以五十九年卒趙億孫爲作家傳謂其自奉
簡約晚猶習勞詩如山氣著人涼蟲聲入夜苦月明鐙
漸昏松花落如雨驚起鷺鷥飛且踏秋煙往不見打魚
人但聞荷葉響不知月已上但覺秋無聲瞥見螢飛過
花閒數點明皆極輕倩可知梧門濡染之所自

桂未谷題錢松壺集云萬里逢錢七支離散蕩人惟餘

一枝筆寫徧楚山春客裏黃金賤尊前白髮新幾時開
老眼看爾出風塵松壺畫贅初刻於隨園再刻於南陽
武林道光庚寅弟子程庭鷺序伯重刻於吳門後得松
壺自定本頗多增刪其畫憶一書亦松壺所手授綜爲
一集刻於庚戌其非題畫之作坳焉序伯爲松圓裔孫
以李長蘅墓在嘉定自號蘅鄉中年以後又號窮菴子
祖慶稚蘅亦善畫有練川名人畫象小傳

東武王賡言簞山寄贈牟陌人廷相詩登山必登高臨
水必臨深明知無同調時還理素琴夜半秋風生蕭蕭
松桂林鷗鷗生腐鼠鳳鸞若不知松柏值春夏不見歲

寒枝山中多白雲卷舒聊自怡
陌人棲霞人福山王氏
嘗爲刻其周公年表

徐闔齋琉璃河詩已迴北斗通天漢
如帶西山繞帝城
覺羅桂文敏公少卽矜重無豪貴
習爲詩文有法則樂
與寒士接其始祖曰索長阿爲

與皇帝第六子 高皇帝兄也四世祖龍寶天聰時識
滿洲蒙古及漢字通五經曉高麗語賜號巴克什入儒
林傳巴克什者譯漢卽通儒也崇德七年與滿達海征
錦州攻松山陣亡世襲騎都尉徐闔齋贈文敏詩開國
儒臣重傳家忠孝長謂此其尊人餘堂治戎襄陽及督

防鄖西邊卡文敏常隨侍行營闔齋時入都統永保幕
有和恆觀察丈寄示鄖西軍中詩及送桂孝廉入都序
闔齋名鏢慶原名嵩以孝廉從軍曾收蘄州梧門祭酒
寄詩有云春鴻雪堂悄濛濛望煙翠闔齋和作云江郭
蕭條落木初退官移寓卽吾廬偶緡舊篋半日坐重見
故人千里書邊塞頻年憂盜賊偏隅幸際樂耰鋤雪堂
煙翠濛濛裏儻有高文慰索居謝事後作也闔齋爲健
菴尙書元孫其伯父柱臣依高文端幕最久文端公子
文勤公書麟以節相在楚嘗檄闔齋隨營屬以章奏其
哭紱庭閣部詩所謂憐才兩代事垂死一封書者也文

勤患噎隔卒垂危時欲強起臨敵遺命以軍裝殮云當
爲鬼殺賊以閩齋在軍出力擬同巡撫保薦病中尙寄
書問訊云

凌次仲爲遺山撰次年譜在北平翁氏烏程施氏之前
其讀元遺山集云神京喋血竟生還忍死重過石嶺關
一寸秋毫成野史百年老淚灑空山身經北渡流離際
才與東坡伯仲間文獻中州盡彫喪賴君大手記完顏
許石華題次仲校禮圖有不從江戴霑牙慧高密功臣
屬此人之句石華次仲中表也

翁正三先生藏有李希古禽魚鱗介長卷佛行方題云

造化無窮出筆端。翺飛蠕動與盤桓。至人大道毋羣物。
漫作徐黃粉本觀。頗見妙理行方。乾隆閒由成都副都。
統出征廓爾喀。厯官駐藏大臣。哈密吐魯番辦事大臣。
名佛智。

歎吳澹泉學於海峰。朱子頴爲海峰刊刻詩古文。請澹
泉讐校其紫石泉山房詩鈔。皆五言三體手鈔。以付門
人鮑雙五者也。句如年荒爲客苦。親老別家難。日隨眾
峰隱。人與亂雲寒。論心思少日。分手惜殘年。俱見清切
其爲金輔之修撰志墓。謂姚姬傳嘗曰。國家經學之盛。
在新安古文之盛。在桐城所著禮箋一書。詳稽制度。卓

然可補江戴之缺必傳於後始登第時齒盛名高扶掖者眾乃獨浩然勇退杜門著述有諷其復登朝者笑曰富貴者一日之榮也所謂夏日之裘冬日之簑時過則無所用之者也君子縱不獲爭光日月或者猶得比壽正陵乎遂不出爲能得其志之所存矣修撰受經學於江戴深於三禮嘗招澹泉館於其塾訓其少子童孫漏三下往往猶相與講學論文不輟故澹泉集中考定士禮諸文精深明確於冠昏喪祭類皆有益於風俗人心而能得聖人制禮之意修撰謂獲得木而捷魚得水而驚士之有明師賢友也猶百鳥依鸞皇而毛羽因之改

色也豈不信哉

瓜爾佳慶亭大令積善所居曰晚香別墅近梅檀寺藏
有自南唐保大以下古琴十六枚趙味辛詩主人今陶
潛出處與之一曾栽河陽花慕極彭澤秫簪紱早恬憺
衣冠尙真率時揮南唐琴獨抱東籬籬每當花放時置
酒鮮虛日其風致可想嘗刻其大父靜逸先生經義紀
文達爲之序

桂未谷愛溫飛卿波生野水雁初下風滿驛樓潮欲來
之句倩友畫扇庚戌成進士時年五十有五登第詩云
蛾眉十五嫁王孫老女妝成也倚門莫誦樂游原上句

夕陽空自怨黃昏丙辰出宰滇之永平羅兩峰爲作戴
花騎象圖校說文數十年爲義證五十卷又繪許祭酒
以下至二徐張有吾邱衍之屬爲說文統系圖因題其
書室曰十二篆師精舍嘗集錄古印文以廣韻次之爲
繆篆分韻既客都門聞瑛夢禪先有編錄同安邑宋芝
山往訪夢禪以所得歸之其題桂字銅印冊子云遺文
繆篆苦搜求桂炅全同看快收廣韻桂炅看快四字同
姓余編繆篆分韻亦全
收此四字今見朱文單字印吾宗姓氏喜長留桂氏世爲曲
阜聖廟灑掃戶故自署曰瀆井復民其集日晚學者自
謂所學者晚未能治全經成一家之言也其詩話同席

錄序謂少時喜與顏運生談詩又喜博涉羣書遇前人說詩與意相會一皆鈔撮運生亦日與散帙爲樂日不給繼之以燭久欲詮次旋以事各罷去旣與運生隔闕余亦兼營他藝比來運生挈舊鈔見就謂我兩人皆老又將遠宦不及時論定是散錢滿地無貫也復與把卷相對區處成書開卷曰總括次之以六藝根柢關係諷諭體格宗派聲律妙悟造詣品陟本事疏義攷證匡正博議要言以騷賦附焉都五十卷運生謂未谷固不以詩名然與吾編錄詩話至老不輟卽自號專家者或未必如未谷研討之深云云今其稿本不知在何許惜梧

生在北無從問訊曩嘗爲人題說文統系圖云小學專家得桂玉人文海岱勝吳閩篆師十二應重繪莫但雲仍數懋堂想見乾嘉全盛時篆秋琢研盡經師時流愛學鮮卑語誰解孤心繼老落伯熙表兄玉稱之

海鹽吳熙太沖丁酉舉人生長澈浦取海中山石颿以自號詩如輓族祖燈菴云平生深自許老死竟誰憐新僕云歡笑看誰面飢寒誤汝身梅花云寒林側帽人如畫靜夜聯牀夢亦香俱可誦所爲永安湖竹枝詞於宋常棠明董穀兩志而外摭摭見聞括以百詠如阿儂生住小杭州谷水東來向北流九十九峰青不斷煙中自

棹木蘭舟總角兒童挽袂行籬門絡繹拜先生自從里
有蕭夫子戶戶春風誦讀聲棗花落盡杏子肥郎來索
取白苧衣萬縷千絲未成疋懊儂愁上郭家機紅鰕青
鯽作羹湯下酒還輸海錯良妾似鱈魚長抱子郎如沙
虎本無腸均有鐵史遺韻朱笠亭爲題南湖載酒圖云
詩人高士湖邊住吟興高時載酒來安得人閒逢鐵遂
一聲吹卻海雲開文謙自來湖上好山圍樹綠水平隄
春光亦會詩人意楊柳舞風鶯亂唳元顧阿瑛啄花鶯
坐水楊柳之句爲鐵史所賞明許雲村偕董從吾謙孫
太初引郎官湖之例名此湖曰高士湖故樊桐山人引

以爲喻也

笄繩齋立樞爲在辛侍御後人負奇氣好植名節幼賦
長相思云長相思在塞北朔風凜凜寒徹骨深閨戶不
開寒風透骨來況在陰山外紅旗半夜摧夢魂搖搖向
君處江水浩蕩不知處從君有夢欲還家積雪塞斷夢
中路鐵梅菴其王子座師也謫戍新疆繩齋毅然往從
於萬里外有義俠風積雪夢中之詩若先爲之兆亦異
事也

乾隆五十四年阮惠踞安南叩關謝罪國王黎維祁棄
國來歸安置京師其舊臣黎侗等四人堅不薙髮易衣

冠且言國王弟維祉與其宗黨舊臣屯聚自保義師甚
眾欲出關圖恢復而阮惠改名光平遣其子光顯入覲
修職貢擊敗維祉之師來獻捷 高宗以阮光平旣歸
順錫封無吏張理而黎侗等流離播遷不以盛衰爲去
就忠於所事特勅光平送出維祉妻妾弟妹無俾失所
事未行及嘉慶七年阮光禛復滅於舊阮 詔黎臣懷
故土者隨維祉遺榭歸國舊阮者黎氏甥農耐王阮福
映自陳爲黎氏復讐旣滅新阮遂以越南名國上元王
鼎襄題安南黎侗北行叢紀云日南郡裏戰煙橫海上
孤臣入帝京舊德猶思丁部領新疆盡付李南平心摧

市掾回戈日淚墮盤江跋馬行十載黃沙書一卷何須
青史爲留名江邊父老泣黎桓沱水東流去不還赤手
尙思扶社稷丹心無計保河山金戈十萬方酣戰魁髻
三千已入關生死何由歸閒道摩天嶺上擁峰巒楚囚
不改舊時衣對泣新亭亦可悲下瀨戈船何日渡伏波
銅柱古今垂漢家自用淮南策蠻觸何勞王者師信國
忠貞蘇武節千秋同調不同時阮光平以篡奪受封祝
釐入覲班親王下郡王上賜紅寶石頂三眼花翎金黃
色蟒袍四團龍袪命在乾清門侍衛上行走而人心未
定篡黎十餘年卒以不保足以昭鑒戒然中朝恩禮逾

常亦福文襄實左右之託於推固綏撫之義以惑聖聽也

阮文達視浙學由嘉興按部湖州謂多士曰吾於禾中得二士焉吳澹川登高能賦吳芸父制器能銘芸父海鹽吳東發也著有羣經字攷石鼓讀及續漱浦詩話等書山舟學士爲立傳其尊道堂詩有詠印泥云印印將焉印紅泥印得之丹砂原井出蒼艾若鑿治細汰姑需待精研且震追苞苴南土擬搏埴攷工儀調以通明液

通明麻名見拾遺記

盛諸潔白資紫雲留一掬絳雪凍盈卮黏近

光堪借敷腴字可摹鈐封當紙縫揭璽倚闌絲信本中

央土爲從四角施

釋名印信也廣雅印爲也

慣居年月上

宋元絳驗券年月居

印上決龍聿誣田事見宋史

長與姓名垂蘸去青麟髓浮來赤鳳脂

合符真是爾

秦漢印有作一字曰尔者亦有作鈔作坵者並古文璽字見馬氏玲瓏山館印譜

倒用不關伊凸起珊瑚榦凹成玉樹枝塗鴉添市券行

押注公移朱黑分先後

墨浮朱上爲偽契亦見宋史

方員中矩規潛

泚羅子母渙汗徧官私荻盡灰旋滅壺傾汁易虧口銜

書仿鳥尾曳紐鎔龜柔順功占巽文明色取離含章深

醞釀因付總無爲極見雋雅徐雪廬謂其誠篤如張考

夫通博如顧亭林詩之高潔又如吳野人李杲堂其子

本履詩畫巢詩稿附刻以傳

乾隆甲寅管緘若由農部郎中軍機章京改官侍御趙
收菴有詩志喜云詔選清曹整法冠故人今喜上臺端
要覘風采從平日能重朝廷是此官意鬱青霞時未晚
威生白簡晝應寒鄉邦遺烈猶堪遡慙媿田郎勉志完
緘若和作云裏行初換惠文冠差信平生始進端目論
共榮爲右轉心知難稱獨斯官從辛得氣薑拌老到晚
方華鞠耐寒珍重故人期勉在白頭介節矢終完緘若
少讀史慕汲黯朱雲之爲人已酉庚戌閒和致齋營生
壙於昌平奢侈踰制緘若賦詩以牧牛菴爲比旣擢御
史則大喜夜起徬徨中庭搆疏稿未成而仍留軍機處

命下故事部郎直機庭改御史卽罷直或經軍機大臣
奏留其體制仍如司官不得專達封事時致齋用事緘
若每論前代輔臣譏切無所避致齋微有聞而章佳文
成公方倚之如右手期以大用不欲其擊姦獲譴亟
爲奏留旣獲請緘若謁文成自言媿負此官文成知其
意慰之曰報稱行有日耳何必汲汲以言自見耶緘若
以嘉慶三年卒四年朝廷行大賞罰已不及見矣緘若
成進士于文襄實爲總裁未嘗獨求見以所能自異所
謂自信始進之端者此類是也而文成之保全善類其
用意尤爲深遠收菴哭緘若詩晉國勳威許結知謂文

成公也

癸丑英吉利入貢吳縣范芝巖編修卽事詩爭傳滄海
使重譯款重關聲教欽諸夏懷柔到百蠻郵程嚴遞送
貢市恤長艱俾覩軍容盛防閒重若山芝巖未弱冠受
知學使夢文子乙巳登館閣校書武英纂修國史己酉
以親老陳情終養後不復出所居有洽園故以名其詩
稿

長洲尤祖望以明經爲學博卓薦得縣令瀕南其蒙自
雜詩八首云自昔炎荒阻甸要淫沔浣遯肇根苗好人
怒獸民難靖火種刀耕地不饒遙指岡巒連絕域始通

冠蓋自前朝輶車無怪蒐文獻四百餘年歎寂寥風俗
從來與化移居方物土與隨宜根留白薯連畦種穗割
紅蓮滿甌炊綵繖扶慵妝半面蘆笙吹暖酒卮可知
樂國春常在雜處無勞別漢夷洗盡弓刀戰血斑秋原
斜日氣蕭閒括資有土官千戶阿焚無城長百蠻靈跡
爭誇龍落水腥風怕說虎依山劇憐一片南湖影近納
瀛壺襟帶閒蠻方殊俗遠難徵景物遷移勝槩增雨送
玉魚雙撥刺煙開石馬半飛騰新詩愛詠雞街荔古寺
閒尋鹿苑僧濟勝待扶南詔杖滿山無處覓紅藤編氓
新隸十家牌估客砂人戶甲排爨部文書尊木夾寶山

名字豔金釵祈晴不用丙丁帖趕集常輪子午街誰識
前賢安撫意古銅繡澁土花埋世守夷官各土疆峰嵐
如甌水如湯地從丁喇分三猛部析思陀有六鄉夜雨
空山鳴蛤蚱春風小楹餉檳榔詩人驚歎惟松屋麗句
居然琢鳳皇列隧通衢早閉門心香一炷送黃昏蠹雷
聚處催殘臘牛鐸喧時趁曉暎鳥夢梨花尋舊市客愁
明月挂前邨土風記取星回節縛炬先招睽詔魂賭呪
河分定界初蓮灘水涸見紅蕖伏波久立將軍柱杜魯
猶傳都尉書一自款關來象馬至今服賈有舟車交岡
舊是防邊地旦到時清亦晏如以親老得請歸嘗游鐵

梅盦節帥幕府

朱青雷爲海愚族子作畫頗師海愚王禹卿題青雷爲
邢魯堂作把臂圖有忽憶長安朱子穎長髯健管寫松
風之句子穎天才超逸於繪事不學而能然每見舊時
所畫以爲不可存而易亦所謂漸成非頓者其先大夫
倫瀚以詩畫供奉內廷於此事固家傳也

高響山別駕廷樞爲文良公孫亦工詩查麗中灘江集
有題其詩集一首云一官蟬蛻鬢霜侵尙有新篇唱好
音經世年深思退鷁臨池功到暮來禽峻嶒骨露封侯
相綺妮詩多愛物心君是勳臣舊門第肯貪廡仕墮清

箴

朱梓廬嘗稱戚馥林病中句百年終有死四海況無醫
以爲雖山谷無以過馥林與梓廬及蔣春雨皆從學於
蔣石齋少耽吟事老而益工意真體潔遂承禾中詩派
年五十八病絕而蘇自號餘齋幼依母氏居嘉興陳園
其外祖王玉亭司農所僦居也九歲始別去乙卯再過
已爲鄉人攢葬所園中亭榭無存惟假山半壁柿一株
猶舊時書塾前物感賦云抱書就塾此山亭卅載蒼涼
感再經亂冢禽呼車載板荒池草蔓馬兜鈴垂枝夏果
成羣摘啣穴秋蟲下學聽躑躅歸舟已曛黑早防燐火

照來青衍石給諫其甥也爲之誌墓稱其至性淳篤衍石奉母喪歸時馥林年七十矣握手哀號是夕病病八閱月竟以不起云吳思亭爲作像贊有肌肉盡削氣清空其詩其貌將母同之句生平爲詩數千首自刪過半編爲寶硯齋集八卷

范崇簡完初能詩兼擅繪事漁洋詩翩翩濁世佳公子只數揚州范十山卽完初曾祖吳江陳赫贈完初詩兩窮相遇兩情癡島瘦郊寒各似之海上神仙春已老古人心血我能知調饑賢到齏鹽婦交際狂呼大小兒爲恐挪揄欺路鬼頻年不作遺愁詩羣山離合風雨晨南

呂坐對風雨濱狂花病葉且行酒古木怪石能飽人屠
沽以外無名節餓死其閒有鬼神此意相遺深一飯王
孫礫礫我跋跋謂以舊作夷齊廟漂母祠韓侯釣臺五
人墓詩及自繪江行風雨相詒也赫字家心吳江人嘗
從江良庭游並訪朱梓廬受詩法有詩云布衣三代士
菜味萬家春一片太平色千絲靈雨辰角聲雅語亂粉
面竹苞新漸覺人情好都忘客舍貧性情境遇自謂與
完初相似遂與定交其海陵雜詠云冒巢民亦讓名高
范十山真意氣豪我到誰爲東道主曾孫崇簡一窮交
又嘗記禾中鐵工辭魯哉有聽雪齋詩集以雪後春歸

樹花前客到門句得名錢補履以其業爲字蘆墟吳獨
游縫人也皆能詩欲以三人同列獨行傳又謂筆工孫
逢價不貳或不持錢不計多少與之與坡公所稱賣墨
者潘谷同用坡贈潘谷詩韻弔之其亦有厲世摩鈍之
意乎著有小瓊海詩十五卷與同邑邱鼐長春草廬學
詩繁富相埒二人皆奉彭尺木學說故所作多涉禪宗
未爲超詣

金衍宗序沈雙湖司勳頤綵堂詩謂蘭泉少寇稱穉翁
詩率然而作信手便成不復深加研鍊吳思亭嘗力辨
之少寇與宗伯談藝過從而所言如是甚矣言詩之難

此論足以是正琴德之誤司勳詩十卷爲錢心梧勘定
其文則乾隆乙卯手自編排爲十六卷心梧謂自嚴滄
浪論詩曰妙悟曰入神後人不喻神悟之所由致輒曰
詩以道性情何必博聞於是率臆點筆空疏鄙俗之不
免而曰吾性情存焉爾此竹垞檢討之所深斥也吾觀
嚴氏之說講詩有別材非關書也詩有別趣非關理也
然非多讀書多窮理則不能極其至是雖嚴氏又何能
廢書檢討自言所得曰予中年好鈔書通籍以後集史
館所儲京師學士大夫所藏弄必借錄之歸田以後鈔
書愈力暇輒瀏覽恆資以爲詩材於是緣情體物不復

若少時之隘吾郡前輩言詩多宗竹垞此雖序頤綵堂一家之詩而詩家便易疏蕪之習亦庶乎知所挽矣

錢辛楣跋徐侯齋墨蹟冊子云余家貧少臥具往往不能留客今觀侯齋從李秋孫假臥褥一席以待其姪爲之失笑古今人何遽不相及也南城吳照南詩山中臥具恰容身留客囟囟假近鄰愛殺竹汀錢學士一般風味是清貧

臨安胡壽芝七因少從梁聞山大令學書謂聞山愛書生紙每作書輒先就榻睡去醒則揮十餘紙極迅快再書則再睡否則止七因與魯斯論書得四人首聞山大

尹師次石菴相國次李司馬寶齋次喬別駕耿甫謂相
公每爲言作態是書家一大病又曰劣處見本領司馬
少讀書僧寺寺儲磚瓦百千輒反覆書竟又言桂未谷
作書遲緩一刻祇成五六字

論隸得四人曰未谷及呂龍潭培夏芳原之勳翟文

泉云
升

松文清自西藏旋齋裝十餘馱途次遭賊掠過半自此
不蓄行李嚴寒則假衣于人每日累心者宜淨盡督陝
時七因嘗在幕中有詩二律云忠貫神明替否勤齷然
氣節志徇恩不虞炙手遭丞相直教皈心訪世尊萬里
遠行須事定六年久戍耐聲吞儻教樞地摸稜過漸盡

冰山枉斷魂特詔歸途壁壘開秦中漢上展風雷活人
幾類邊羅漢憂世何須范秀才勦撫仁軍委曲民逾
兵感政恢台知公不計功勳事名在金甌省卜枚嘗令
草奏請安撫大使銜卽賊壘招降七因爭之不得乃呈
詩曰婆心佛眼厭戈矛果爾能行殺運收賊譎自知難
曲赦兵孱已悔誤前籌挺身事見劉京兆至壁降歸裴
桂州造逆卻思宋備詔不同九姓撫無由謂丁巳夏福
制軍在老木園招降屢叛宜總統在大成寨用劉清說
往撫被給焚掠糧運幾致大營失事九姓則用唐鐵勒
九姓畔契苾何力拜安撫使捨特勒歸獻事也文清得

詩笑曰方欲以君爲介何選懦乃爾在行閒每被酒坐
七因帳中見柑輒啖曰此洗心湯也盡十餘枚始已及
得旨帥伊犁行抵上谷解所佩牙簽袋寄意七因謝詩
有事大叻心膺謀深感輔車之句

胡七因以書生便弓馬三省教匪之役由祖舫齋司寇
薦之明帥久在軍中嘗懸鞬挺鋌身親行陣其蔣時南
漕帥詢軍前事云師老希功口舌餘賊中來去一籃輿
報籤舊日青衣侍欲屈前官問起居川賊主計王三槐
東鄉縣僮胥也劉刺史清舊宰其邑有清名用是屢往
招撫致墮賊計後始不復議撫其二云惠公頭敵恃雕

孤再世捐軀事可吁難得不平長總鎮慰情只博塊珊
瑚惠公嗣忠烈大將軍明瑞奉詔率墨爾根甫抵營石
花街之失前隊乘霧進獨被創而殞越日公祭總鎮長
春疑翼長伎心遂相嫉德帥厲斥乃止然感其意夜遣
小史撫安之貽以珊頂此摺奏上厯陳捷勝殊批不值
失我惠倫也將士靡不感泣其五云參知名位卅年崇
肯計人功與狗功翻用淮西近囊鞬斗教名將愧涼公
紱庭節相以參贊德侯新立西川功不能抑損輒佩刀
迎之候愧謝云云有齊二寡婦行謂齊王氏襄垣人名
聰兒少孤隨其母以走解往來襄樊主府役齊林家林

悅之納爲妻先是太和劉之協來楚以邪術煽誘林入
夥授過願呪斂根基錢林遂爲襄鄖總教號大師父流
傳廣且速川陝匪徐添德冉文儁張士隆苟文明輩皆
其耳孫也以氏收萃女流稱二師父焉乾隆甲寅事敗
之後之協遁無跡誅林等十餘人氏年未三十遽祝髮
爲優婆夷時道齊二寡婦賢矣乙卯冬姚之富高均得
等以苗疆用兵欲乘虛起事給以爲林復讐實挾之號
召其黨也三年流竄接仗百數十次陳前未嘗一見氏
戊午三月六日明德兩帥率虓鬪兼馬自川過陝七晝
夜追及楚鄖西之三义河蓮花峰日暝危迫氏痛詈之

富不聽早散致死憤投厓下死之富亦繼隕命梟其首
七因鞠其女甥陳元兒道氏嘗語之富曰我爲復讐出
今憊矣度不如志且汝每阻我見眾事成能奉我耶祇
供世人姍笑耳志早散去我死當返故土云云意旋襄
規逃匿也氏兵中已蓄髮囊有髭二誓不再適所傳偶
姚之富誣耳其謂追勦流寇與攻擊戰陳迴殊宜慎者
三曰炆營謂軍中夜驚曰摸樁謂以一二入副營
械馬衣自相擊殺曰迴馬鎗謂賊已敗去忽將勦騎返撲
糧無算官兵方散坐蓐食多至潰敗以六時
奔逐心神羸頓所致亦閱歷有得之言

雪橋詩話續集卷第六

雪橋詩話續集卷第七

遼陽楊鍾義撰集

吳興劉承幹參校

歐陽礪東乾隆甲寅舉人詩凡十卷陶文毅以道光六年彙於淮陽其手定三卷鄧湘皋刻之沅湘耆舊集王益吾祭酒刪存爲二卷復爲傳一篇慶蕉園中丞山居春曉圖云玉河風暖朝初嗽黃鸝三請窺春園蜿蜒細徑轉平麓中有謝傅城南墩先生廣廈庇萬里下指海微難爲藩誰言揮斥八紘手戀此十畝藤蘿垣溪山檢點出豪末粉本妙入荆關門青楊之昏白楊妥閭里近

接炊煙昏乃知至人寄物外出處不以形骸論簪纓豈
必異寒素跡所偶涉非心存東廳鴟尾高蹲蹲九重已
著新巢痕待公功成訪黃石會有虎魄生松根有灑氣
流轉含章內映之致律句如破屋夜涼知雨過空林鴉
噪有僧歸干點亂山縈象驛一痕殘雨下龍城五夜夢
回秋塞外一天霜在雁聲中爛雲挂枝不肯去獨鶴穿
陰時自歸想見擗冠草屨吟嘯自如後村詩劉季晚可
憐擊筑悲沛豐我老斷恐怕眠身等枯蓬礪東景風閣
詩洞口題名尙儼然後村詩句劇清妍休將擊筑憐劉
季未信枯蓬便自賢亦雋語也

蔣礪堂相國十齡入泮後四十八年檢得童試卷面浮
籤一紙裝冊徵詩金岱峰重游泮宮詩有輸與浮籤佳
話在玉堂爭和相公詩之句

丹徒張崑北郊酒樓呈年丈瘦生云惆悵公孫已白頭
興酣猶唱小梁州酒闌更話征西事落木蕭蕭萬里秋
瘦生名汝鄰雙峰從孫也崑尊人此亭秋夜淩江閣與
瘦生談往云征西往事不堪論淚點深宵劍有痕九夏
冰霜眞國士卅年塵土舊公孫綠車天上恩難再短褐
揚州道自尊一語請君重勘卻種瓜何必不青門瘦生
善畫此亭題其山水幅有如此古人眞未遠董源半幅

在江南之句

蕭山王以除爲族弟南陔中丞題所藏醴泉銘云醴泉

翠墨半珠沈誰向慈仁寺市尋鑑古精嚴題北海

孫退谷跋

定爲宋拓傳家珍重抵南金規連架洩神光閱鐵畫銀鉤武

庫森莫愛家雞輕野鷺本來滴乳在山陰其論書法謂

香光論書貴奇宕瀟灑此爲神明變化者言耳學者當

履蹈規渠不得縱放昨臨星鳳本十三行悟率更誠懸

筆意武庫森嚴全本大令皆馮池有得之言

大興邵壽民司勳先世系出餘姚二雲學士其叔父行

嘗受業門下過二雲雙藤移舊居有感云故廬重過輒

沈瀾幾爲中朝惜史官甲第人多徵辟少玉堂才易著
書難空傳絳帳流風遠猶賸藤花壓雪寒預恐花時倍
惆悵夕陽紅處儘誰看其己未正月十八日書事云一
掃雲霾蹟青陽歲萬重炎威初寂滅天罰尙寬容猶勝
然臍敗爭看繫頸從宏羊烹此日會使寢邊烽詔獄綸
扉去驚傳赤棒呼聞收大丞相如縛一庸奴北寺通侯
泣西曹法吏趨卻留吟句在解歎月輪孤彷彿黃頭餓
隨身無一簷苦依幽寺冷愁變畫堂深七尺珊瑚樹干
叢珠玉林粉侯仍賜宅故第不堪尋複壁金難揜重幃
玉亦殘生營石翁仲死斂白衣冠鈔豈同瓜蔓喪惟賸

柳棺淒涼蕭寺裏鬼火不禁寒未亡應亦族僥倖武安
侯專閭鞞刀誤分茅帶礪優恩原推肺腑功豈出兜鍪
錫末材尤下隨人作楚囚投匭紛如許螭坳儼豸衣宮
中三篋滿檻外一鐙微此日簡章密當年封事稀曹唐
已仙去身後有光輝曹唐謂曹劒亭侍御嘗疏劾和致
齋家人倚勢僭擬至是追贈副都御史劒亭有清碧園

吟稿

姚晉堂職方丙辰廷試直發和相之姦閱者駭然置榜
末寓水月禪林有感云霜風一以勁眾葉日凋槁羈旅
惜流光方悲搖落早有僧操長竿撼樹如剝棗豈徒葉

盡脫枝條摧不少問僧意何爲苦厭落葉擾一舉空其
林免使晨夕掃卻憶長夏時中天日杲杲羣僧憩樹下
競愛清陰好有客入室游貌古語亦潭問知主僧父思
子見性眞嗟彼出世者尙有骨肉親余生天地間何獨
爲鮮民松楸三千里蒲柳半百身年年感霜露荏苒秋
復春行當投劾歸結廬與墓鄰家山豈無夢醒淚徒沾
巾雅澹稱其爲人魏默深稱其居京師三十年故事部
員於其鄉人之有到部者許同鄉官具保結各有例規
謂之印結費又外任官至京於其同鄉同年世好之官
京師者各留金爲別此二者京官賴以自存習爲常公

獨一無所受取與之嚴自不可及至比之湯陸而深造
自得過之則尙待論定也其己酉選貢爲南厓相國督
學淞江所拔取集中詩如過崇效寺觀紅杏青松圖卷
云國初諸鉅公清吟諧鳳吹次讀文正詩一灑西州淚
生朝感賦有廿載憐才意師長仰考亭及東閣風流遠
西州涕淚橫之句論者謂先生生時贈公恍惚見浮屠
紫皋入室紫皋者贈公方外友也訪之已示寂而先生
卒之日辰又與紫皋同當時風氣往往墮於彼教如此
嚴樂園以嘉慶甲子十月丁李太淑人憂由漢江南歸
先是朝廷以洋匪滋擾粵東浙閩洋面焚掠瀕海州縣

粵東山寇竊發潛相勾結命陝甘總督那文毅移節廣
州肅清海氛適樂園謝定遠篆手書招佐幕府事復書
葬親事畢來粵至則就途中見聞所及論列甚詳一切
捕盜章奏檄文胥屬治辦文毅偵緝內河劇盜以斷洋
匪內應海口設立礮臺礮卡堵禦聯絡沿海居民修築
寨堡防守嚴懲姦民接濟洋匪勢漸窮蹙乙丑八月從
文毅出大虎門剿賊購綫離間洋匪黨與廣設賞格誘
降賊黨互相猜忌計擒會匪教首李崇玉招納粵洋賊
首黃正嵩等投出洋匪五千餘人分別歸農入伍戢首
聽命閩洋賊首朱潰密請符幟約降會文毅內召不果

後閩粵大府踵行其策海洋蕩平皆文毅與樂園本謀也樂園嶺南呈繹堂總制詩戈船橫海舊登壇幕府相依尙素冠丞相舍人容魏勃將軍門客愧任安曾憐誓墓情懷切敢憚從戎道路難銅柱卽看銘越秀蒲帆會許挂湘瀾

南河自明季逮國朝破敗決裂斬文襄爲河臣而大治其持論以築隄崖疏下流塞決口有先後而無緩急數語爲綱領在事十年其子治豫彙刊其奏疏八卷張留壘靄生撰述文襄與幕友陳天一問答之語爲治河述言張齊嵇高諸公繼之安瀾順軌百有餘年至嘉慶間

復壞百文敏嘗謂海寓承平國家閒暇借要工爲汲引
張本借帑項爲揮霍鑽營河員皆執袴浮華工所眞花
天酒地蓋至是舊規全廢黃強淮弱豐工邵工睢工鄒
工王營減壩蘇家山陳家浦馬港口疊次漫決河身中
飽淮水南趨歲漕四百萬石待之以行顧此失彼無十
年二十年不旁決者河督陳鳳翔得罪遣戍羅山黎襄
勤世序代之修靳張之治以束水攻沙蓄清敵黃爲急
其束水也主於繕隄防海口接築長隄使水不散漫而
滌淤有力其蓄清也謹守五壩使清水長足糧艘得以
浮送而黃河隄防之守則又恃乎閘壩於是請建清河

黃河北岸減壩及徐州之虎山腰減壩以洩異漲而保長隄而黃河暴漲隄工奇險則又於掃前拋碎石以護之淮泗賴以無患者十餘歲其掃前拋碎石也工員利歲修不樂此舉謂碎石漸趨中浚將塞水道不及四十年必當爲害襄勤曰不及四十年河流不復在此矣時爲道光元年至銅瓦廂之決凡三十五年碎石阻塞水道之說絕無其事而河流北徙言果驗襄勤以後膚施張井芥航亦其亞也芥航以長於治河破格超用不能盡行其志而始終赤心榦事規畫釐然其聞詔一首云當門非種總宜鉏水旱何堪少定居闕下屢聞哀痛詔

朝中誰上治安書功名舊薄高司諫經濟常懷陸敬輿
積歲杞憂徒一歎身家回顧計全疏芥航字儀九一號
晴棹晚自署畏堂

鄭慎親王烏爾恭額有石琴室稿蒙古王蘊樸齋能詩
畫任庫倫時以甘蔗酒遺王樸齋下世後王賦詩懷之
云平生師北苑遺跡比東丹校獵吟何壯籌邊政更寬
應知桑落薄遙寄蔗漿寒洗盞將狂酌懷人慘不歡

水煙出蘭州者佳或以他煙屑和燒春爲之味稍劣其
吸煙之器用銅下盛水處如鳧腹管上聳如鶴頭末銳
如鶴觜下另有小孔形上仰插銅管寸餘以納煙從上

吸之則煙從水中過汨汨有聲而火性稍殺凡三四吸
卽插管吹之煙燼再納如初乾隆以後始盛行於市肆
間石門鍾南溪上舍洪有詠水煙壺十八韻至旱煙則
前此吟詠爲多伏讀

宣宗養正書屋御製詩并序云新韶多暇獨坐小齋復
值春雪初晴園林風日佳麗日惟研朱讀史外無所事
倦則命僕吹煙管吸之再三頓覺心神清朗耳目怡然
昔人謂酒有令德我今稱煙曰如意嘻樂則樂矣不污
於流俗哉爰抒中懷戲成八韻刻木初成管鐃銅首尾
分目端縈竹霧鼻觀度蘭芽吐納香偏馥升沈意頗殷

凝時疑海滋靄處出山雲空腹輸簧奏垂囊喻佩紛雪
寒祛每驗煙瘴避曾聞故物思遼水餘情靖楚氛肥甘
雖戒口遣興喜隨君此潛邸時作也吳仲雲尙書謂念
及楚氛且以汚於流俗爲懼聖人之情見乎辭也

孫季逵句梁冀初誅四海清朱雲何事更輕生爲北江
戍邊作也不如吳山尊詩詔許自新 天子大奏非直
達小臣疏山尊詩如喜蘭雪至云天意憐吾輩人言竟
不然那知相見始直比再生年會少疑多積才難愛易
偏賞心欲無語秉燭認華顛知己天涯在悲歡本不情
雲山殊跌宕風雪又縱橫樹立憂時晚浮游望賊平與

君皆有母未敢去來輕均極沈著

江寧侯抑菴雲錦劉寄奴墓詩寄奴織屨眞計窮曾指
祖墓欺孔恭青烏家言有王氣遂疑符讖歸江東那知
轉眼數十載此身寂寞埋蒿蓬楚元二十有一世王孫
久降爲吳儂引參軍事敢殺賊下邳已足酬勳庸退還
京口志興復海內正待甦疲瘵熟知桓元是篡竊乃視
前轍追其蹤若從兩人論優劣未知草澤誰英雄盧循
饋糗在益智食之卒莫醫夢夢上公班劔不足受竟從
月酉占運終禪文點竄汗青史千言屢述公之功當時
競誦周召德後嗣直呼田舍翁葛鐙繩牀匪法物但以

忌諱苛臣工文書千品避莫怪襪祥術數原家風我從
高樓望佳色日氣正映扶桑紅虛無指點說邱隴懸知
樵徑盤穹窿來朝擬辦雙屐齒儻有擣藥遺榛中筆舌
互用大雅之材梅伯言其甥也稱其手山谷集吟哦深
思不少輟後得氣疾不能高吟病榻上猶引手作勢故
所作益富功益深其意錢歎云貧家升合謀糴米方薄
暮妻寒抱溼薪兒嗷待含哺有錢二寸許得飽已餘裕
晚出提筐人攘臂市門遇古有意錢戲此或類相附筍
籃剛一握有物罔不具香囊間紈扇中亦雜巾履此或
持兩螯彼或臥雙兔買之倍價償頭掉不肯顧但指物

所須勝負憑一諱持去不論錢有手妙於素虛往而實
歸此計良非錯雖然一戰敗有鐵可再鑄如酒一中之
聊爾識其趣青蚨小於榆文不辨泉布何圖擲地聲竟
爾敗金注還看籃中物充物自如故兩手縮袖間欲立
不得住探囊餘一錢爲兒市糖舖以文言道俗事可以
砭貪警癡番禺黃蒼崖明經穗城新樂府白鴿廠云金
錢四散飄空濶一一青蚨隨白鴿就中聚鴿張茅棚虎
視狼貪藏眾猾十間標廠開堂皇萬室愚兒日趨謁不
怕如鑪官法烈差胥兵弁相鉤結千字舊文爭拾掇藏
鬪射覆空情熱鴿來鴿去飛煙滅廠中陷設營金穴出

塵鷹隼來何時一霎平蕪灑毛血用意略同

貴雲西宗伯管公屯詩煙抹衡茅古木昏居人道是管
公屯故山有恨黃巾滿滄海無家阜帽尊藜榻一編還
獨賞草廬三顧莫同論泠泠廢井牛闌外寂寞荒苔印
月痕鮑覺生蘇秦詩手遏秦兵十五年蘇家季子亦豪
賢如何洹水盟終敗至竟陽城學不傳

謂鬼谷

六國印歸

窮巷改千金財散故人憐初心未必關天下恨少河南
二頃田吳山尊過東河弔陳思王詩魚山寂寂暮雲昏
千古才人此備藩遺枕當時寧有夢然其何苦太無恩
風騷眷屬傳詞賦家國危疑在弟昆太息親賢求自試

菰蘆旦暮厭輪轅皆能不落科曰

程春廬府丞密齋詩鈔淮陰懷古云五十年間兩呂氏
雄者祖龍雌者雉隆準乃公可柰何日夜惟思易太子
蕭曹文吏自愛身安劉者勃亦少文辟陽嬖媿不足道
何人當敵樊將軍雲夢歸來後車載不殺封侯意有在
得非付與如意王正畏娥姁橫四海可憐鴻鵠愁良弓
淮陰竟鬻長樂鐘青衣一醢諸將盡羽翼詎假商山翁
歌風臺上暗涕流四方安得此猛士功成狗烹人彘續
神器還歸美人子筆仗極爲駿邁春廬己未第春官授
兵曹入樞密晉貳廷尉出丞奉天通才績學尤長於輿

地在方略館纂修西域圖志及校勘遼金元三史凡古
今沿革建置異同稱名淆舛疏證如指掌紋預修會典
自謂生平精力盡於是書

博羅何相文兵備南鈺有燕瀆雪迹集句如百年往事
摩銅狄三摘前修付鐵掘近抱何斟同叔寶年來不飲
似公榮胸有積卷不涉浮靡嘗見金仲蓮舍人處唐子
畏自書詩稿據而有之邀同人賦詩紀事自跋云初見
此卷丐而勿與固請乃可猶懼仲蓮之悔遁有他也亟
書數語志之而後乃今爲吾家物也其好事如此

止齋司空吉綸和舍里氏有雲水集二卷句如雲吞京

口寺春上海門潮短至宵如歲喬居水抱門皆佳其葦
村云中男花布襖大戶土樓門寫村居如話洽亭宗伯
有與司空論藥一首謂司空好病輒數日或數十日不
出門素解醫性多避忌凡藥性之有偏勝者輒屏棄不
服以故服藥多不效梅翁見而嘲之云云蓋借藥以論
用人時方同戍吉林也

陳恭甫自京赴嶺南云木落先聞朔雁哀花開未逐鷓
鴒回莫驚人似青山瘦萬里風霜負米來慈線寒衣久
愴悽倚閨又隔嶺雲迷香鑪峽上空林月照見饑鳥挾
子號吳荷屋惜母灘夜泊云惜母灘頭夜泊船四山雲

樹晚秋天可憐游子梧捲淚灑向風塵十九年語皆眞
摯錢坤一壬戌三月五日先孺人生日痛成云籠翩思
飛孰與哀哺雛未返母先摧茫茫縱使重霄徹杳杳難
將萬古迴廚下米薪如手辦堂前風雨莫花開讀書兩
字從頭誤直悔男兒墮地來考坤一生六齡失生母鞠
於母朱夫人就塾讀書饑寒出入得之母教爲多

孔荃溪布政昭虔爲擧軒先生哲嗣乾隆壬子翁正三
試曲阜童子拔取第一不墜家學工詞善隸韻學尤精
詩曰鏡虹吟室集陳橋云旌頭影颭黃塵起帝座星高
壓營紫十萬精兵齊倒戈殿前點檢作天子君不見桓

公撫枕氣蓋天九錫猶待河朔還寄奴虎視意亦久移
鼎終遲入關後欲速誰似香孩兒鐵甲早換黃袍歸敵
兵壓境盡虛語人心天意誰能知自古興亡事無據路
人莫指龍飛處他年二帝蒙青衣銜璧牽羊此中去詞
意警拔宜其爲吳蘭雪所推嘗爲刻紀行詩名曰扣舷

小草

金華方海槎元鷗從朱介斐學詩三十七舉於鄉年五
十始成進士官工部腳鞵腰綬隨白面郎後見堂上長
官累裊高座僚屬手文書執筆擁前伺候顏色翼一識
眄以爲寵傲睨同列有喜色海槎不耐此所爲終日閉

門嘗於內城購屋一椽瓜架豆棚接於繩甕某郎官贈
詩曰先生懶與人酬對自聽微蟲語豆花嘗自爲漫吟
先生傳有鐵船詩鈔二十一卷樂府四卷閒述絕句云
上了龕香未上鐙庭前閒自曳枯藤萬般人事回頭懶
仰數歸鴉喚不應阮文達序謂其修潔如姚合其孤往
如方干此境非京曹官所有也

嘗見何夢華鈔戴剡源逸稿一冊題云嘉慶己卯十月
十九至廿七日錄於無錫常州丹陽丹徒舟中漕船
擁擠不能前進悶甚悶甚夢花居士何元錫識時往揚
州謁阮宮保阮公祝嘏出京赴粵督任也剡源古詩如

古來韜禍徒舉足遭羈絆誰令從貴游百歲榮辱半浮
生方雞棲諸事付鴟彈自然無鼓搗今不費鑪鍛律句
如閑知忍餓勝忍辱老去避名如避仇皆足見其高致
夏津既兒年七歲馳生馬四出刺探騰越驍捷幸卒不
之逮也秀水汪竹橋見而詫絕汪筆山爲賦夏津小探
馬歌云夏津小兒齒未毀使馬如風捷如鬼偵望夜出
朝馳書桑影不移能百里雲屯車騎行河壩令嚴士寂
誰敢傳戟轅潛伏伺馬首雷鼓一動牙旗翻巷填轂擊
弓劍亂列礮碎笥馬騰旋攫身飛起八尺強萬騎前頭
出流電起起介夫老馳驚怒策前追意相妬掉頭笑謝

無乃勞一道塵開不知處邊氓牧獵作恒業生男馬韉
死馬革斯人東土特豪俊十載蕃雛減顏色徒手驍騰
尙如此鋒鏑橫行終不死蛇矛丈入三尺刀著手何難
了蛇豕昨者軍書遞亟程宵氛未盡欖槍橫此兒偏裨
安得效早聽甘泉捷書報詩筆俊拔尙有康古豐玉之
遺

石門顧文學修字仲歐號棗厓舊居橫山中年爲人訐
訟阻其進取遷桐鄉之烏戍鬱鬱以老性好蓄書與鮑
以文徐北溟校勘參驗仿鮑書之例刻讀書齋叢書有
詩曰小築前溪第一灣豆花籬角且怡顏曾留穠綠嘗

開徑祇愛丹青不買山高臥如游三島外置身卻勝五
車間茅齋終日供消遣笑看溪雲似我閒嘗用東坡游
張山人園韻疊至三百餘篇曰百疊蘇韻詩

郭祥伯燕巢云客舍所居室燕來巢其梁胥宇日三而
得地梁中央泥塗翅羽溼零落芹泥香初壘若半壁再
壘如懸囊落落震仰孟深深女承筐積累得所就下上
何翱翔福過禍已伏勢高趨必傷馮藉一不當一聲如
積牆喁喁語刺促涎涎飛倉黃觀其遷怒意疑若人無
良主人見之閔謂燕胡不明我試言物理破爾芥薑胸
羽族三百六小大各有行楚雀出自谷戴鷲降於桑鴻

雁或水宿餘或入穴藏乾鵲善作室雄鳩偵其空倒挂
者杜宇寄子他巢中其餘諸瑣細未易更僕終木處畏
風雨露宿虞羅罟憂患不自安靈明乃以生獨汝百不
畏鼓翼東牆東朝出主人門暮上主人堂偷心乘懈力
傾覆所以丁從來天公意益謙而虧盈百鳥常勞苦爾
何逸其躬何況天下事依人不足強榦宇不自立雖堅
豈可長疾顛固有道何乃不自量馱聞主人語條通膠
固腸乃睇以臆對主人言非唳從今識得喪不敢復怨
望呼我徒與侶修葺門倉琅高秋展毛羽遼廓還海邦
此詩瓣香昌黎義兼比興世徒賞其輕俊小詩非眞知

頻伽者

嘉興王惺齋居椿樹衢爲康熙時譚舟石宅竹垞詩所云樹根同讀五車書者也惺齋嗜震川文謂葉裕母銘等作可泣鬼神校勘韓集至易簣前一日猶命子尙繩改定順宗實錄中二字尤長於推步史漢韓非孫可之歐曾王諸家文集錢文子補漢兵志皆有校正子尙珏字若農頻游登萊間以四庫館議敘縣丞發廣西謝蘊山招入志局薦升西林知縣凡服官地方多教其子弟作文登科第者數輩辛酉冬錢裴山廣西學政任滿回京與若農同行途中酬唱甚多嘗題其蓬萊閣讀書圖

云君家世讀蓬萊書壯遊還上蓬萊閣閣中富有千卷
藏把卷高吟樂復樂朱簾一舉滄波翻齊煙九點几案
環觀書何啻望洋歎眼中雲海空漫漫神山海市不可
見閨風隔斷金仙面司空城旦人間書讀破難教凡骨
換日觀門高獻賦歸一官落拓隨鸞飛瘴海十年學讀
律天風猶夢吹羅衣我生足未履東海曾到娜環窺記
載誰知風輒引船還金簡玉書空好在讀書無福生可
憐舊游回首都茫然瀛洲只在青箱裏畫圖留與清門
傳錢麋山詩枯桐攫醪無關妙別有移情海上船題若
農詩稟句也

嚴修能居石冢村德清蔡漫叟訪其尊人太學茂先值
抱病使修能出見方四歲能據案作擘窠書爲作長歌
贈之漫叟名環黼字拱其有細萬齋詩鈔其偶成二十
一首皆論本朝人詩可見其宗仰所在略云北宋南施
有定評荔裳不獨氣縱橫君看詔獄詩中意變雅何曾
怨誹生殘照西風白下門非秋非柳意難論那知庾信
江南賦黃竹青荷總斷魂改亭詩筆氣輪困慕古憐才
有性眞王李鳴壇交誼薄一杯重奠眇山人遠戍烏籠
吳漢槎詩篇淒婉似悲笳由來傲物招時忌莫以江東
獨秀誇鈍翁少作近三唐老去吟成別瓣香願作雲龍

媿韓孟一時名目有王楊文定休休愛士誠詩篇瑰麗
韻琮琤鳳毛解賦高軒過長爪通眉太瘦生詩瓢酒盞
送迎忙紅豆詞人太守堂莫向溪山惜殘夢官齋隨處
熟黃梁鴻博交推國士名羨門詞氣最和平夕陽秋水
滕王閣便是開元劉長卿范陸皮毛誤後賢正聲已斷
雅琴弦狂瀾砥柱中流在四卷原詩內外篇宋初崑體
足吟哦別調流傳漸近魔龔俗無人聽韶護翻將正格
詆西河冬郎才調擅香奩琢句清華仗整嚴讀到風懷
二千字母將白璧惜陶潛論詩往往愛憎偏賴有青門
辨古賢何李諸家光燄在騷壇無地列松圓文人自古

愛幽鏤東野何妨喚作囚一派蘇門詩百態爭教滄海
更橫流秦郵湖畔苦吟身百藥風流邁等倫十五人誇
簪笏貴流傳文采更無人江山風月少年游都下稱詩
第一流名士青燐千古恨祇今誰記沈方舟文定謂合
肥李容齋相國鳳毛謂子孚青丹壑丹壑康熙丁亥移
居永城卒年五十二提要謂年未四十而歿誤也所著
野香盤隱二集外有道旁散人集五卷爲甲申至乙未
作

禮世子希濬字篆菴禮親王汲修主人猶子立爲嗣舉
宗室賢書第一嘗偕其亡兄葦菴名希沆者從鮑覺生

游秀羸多文詩筆韶麗以愁病早世主人屬覺生序其
遺稿覺生感舊詩云春去綠雲捲塵池聞雁呼幾年埋
玉樹何處覓金鋪

君沒後主人奪爵

句好多零落才高竟鬱紆

士安頭白久揮涕序三都綠雲禮邸齋名也和菴宗伯
瑚圖禮爲覺生壬子京兆座師丁未翰林大考遷官掌
詞館領封圻自西藏辨事歸仍典秩宗時長公玉折歸
時有遽以告者驚悼致疾未幾遽卒擇之庶常廉能英
年力學與兄淑之少司寇廉善戊午己未鄉會試皆同
舉爲科名佳話由庶常改官恚而卒淑之司寇性孝友
奉母赴熱河都統汪母病請回京不及代而行雖鐫級

不顧也由曹郎厯詞苑掌院事後擇之二十年卒年才四十有八 睿廟嗟悼曰逝者如斯朕復何人可用皆見感舊詩中

己未一榜以武威張澍百瀾爲最少詩文鉅麗由庶常出宰滇蜀有強直聲在黔時滇撫初頤園過縣從者索金則扶之百文敏異焉使署遵義和文敏詩諷以獎拔廉吏蔣礪堂相國其甲寅鄉試座主也問蜀事對曰公入境卽舉劾屬吏震動然如所舉某守賊某令但佞佛耳豈爲賢乎蔣默然退又上書主講蘭州大旱與那文毅書言振事戒遲緩戒拘方戒遣使續黔書外著姓氏

五書補輯漢皇德傳魏周生烈子以下關隴著述數十種及世本風俗通諸書諸葛武侯集皆已刻鮑雙五懷百瀾同年詩不見張平子侵尋十載餘軼材今代少強項幾人如歸去仍爲客飢來且著書秦關三百里風雨媿巾車舍弟同尊酒官衙話日斜青雲君最少白髮我先華花絮風離合關河雨怒嗟一繩西雁去相憶又天涯道光辛巳雙五客其弟大荔官署百瀾自西安冒雨相訪往還三百里信宿而去也

乾隆丙午江南榜第三名韓廷秀令馬平以官事雉經卒朱南厓相國有哀韓馬平詩第四則李許齋方伯也

鮑雙五悼許齋詩第一清名海內知無端挂樹忽長辭
憤如負石申徒狄冤甚償金直不疑地下同歸眞白首
人間見嫉是蛾眉覆盆何幸天光照更許桐鄉歲奉祠
魏曾容太僕襄乙丑進士初仕洛陽令官雲南開化府
時獠人與回民交鬪互相鬪殺制府屢欲進勦曾容固
請無用兵入獠窟勸諭夷酋感悟卒縛罪人十輩卽就
夷地駢戮之夷人股慄不敢動嘗言 國家威德如此
得其道而善理之實無事用兵革周張虎懷舊詩垂老
官滇南蠻人頌諸葛夷回欵交鬪牙競奮猱猱偶或失
撫綏氓庶必遭割先生入虎口竟以邊亂略紀其事也

東莞海月巖有宋趙東山刻石詩云架巖鑿石好規模
不學桃源舊日圖亭作人稀林鳥樂錫飛天老野雲孤
雨餘石井泉深淺煙淡虎門山有無說與山靈莫分別
從教仙窟著浮屠東山號野仙系出濮邸宋亡不出往
來海月巖法性寺李黼平繡子有和韻詩趙玉淵國亡
後隱溫塘朝夕拜文丞相畫像繡子溫塘茅屋歌云春
衣愛作溫塘客南渡遺民留故宅苦竹叢蘆一千頃蒼
涼天水傷心碧丞相初歸開府時參軍正贊勤王策五
坡兵敗鼓聲死猿鶴蒼黃鹿何擇當年遁迹東官東大
海雲屯升黑龍兩崖插漢天險失河山一角斜陽紅舉

家北轅難再辱青珊竄伏荆棘中金支玉葉問華胄尙

留海月窺行蹤

趙東山

遂有四族翼九宗田橫尙保三齊

封留侯系出韓諸公先師黃石後赤松惜君不收反正
功甘作詩客號秋蟲遺編哀怨誰忍讀禾油葛誕吹酸
風一姓再興曾有幾隱身合住煙江裏文山雖往面猶
生碧澗難填心不死西登大漁東甲子歸去血染溫塘
水溫塘水咽故籬門忠義榴花別有村總勝鷗波亭子
上游人齒冷趙王孫譚玉生謂爲表微之作

阿都隸西昌縣土官安氏本河東土司之後世守其地
嘉慶中酋安定邦死子幼穉未能承襲世職以其妻都

位加權攝長官司事位加年甫二十餘率屬奉事惟謹
有節操夷俗男女素無別位加以少年孌婦能貞潔自
守寢所以夷女十六人環衛之錢唐吳曼雲大令嘗從
觀察使巡徼至其地爲作阿都行紀之曼雲秋漁太守
子也名存楷字端甫乙丑進士與仲雲尙書早歲皆以
詩鳴有硯壽堂詩李申耆序稱其自抒胸膈不名一家
侍養成都時從楊蓉裳習填詞丁丑攝事蒙城錄舊作
爲一卷附詩鈔後與姚春木爲文字交其懷春木詩有
云賈誼有才偏不偶次公雖醒亦能狂曼雲歿後春木
題其詩後有云阿翁書到付遺詩展卷驚看小極時蓋

其時秋漁太守尙健在也光緒丙戌文孫子厚刺史重刻於鄂中吳筠軒廉使爲曼雲族子有鐵花山館詩稿八卷其論詩謂劍南心游萬里關河外身臥一窗風雨中語極惻楚至平生所學爲何事後世有人知此心則頗激昂自負激昂亦無非惻楚是能知放翁者

天長程趙人孝廉虞卿嘗從治亭宗伯於瀋陽寒沙水淺車聲澀古戍兵閒戰壘荒出關作也同邑王雨春亦能詩大別山望郎官湖句小艇僧孤渡寒林鳥對呼沈文起學博作爲詩文積有卷軸胥口伍相祠云水犀飛翼泛黃溝河上歌殘付屬鏤墓檟魂銷三戶客宮楮

煙冷五湖舟沼吳赤舌原天意伯越蛾眉與鬼謀莫更
揚波騰怨氣姦諛今古貉同邱京口魏忠壯勝廟云健
兒身手捷黃腰宿將軍鋒碎阜雕玉帳草淒淒郟鑿壘靈
旗風卷伍胥潮陣雲砂堰塵猶起戰血淮隄鏃未消絕
痛田橫島中客霜笳嗚咽楚魂招吳中文丞相祠云玉
帳前時建節堂綵旄此地近神鄉紅羊劫短驅南檄白
雁聲高促北裝一死三年心計久孤臣四海涕痕長留
生委贄陳生竄柴市身亡宋始亡同時自雲芬侍郎外
惟海寧陳均受笙情解橫發略與之近

陳受笙唐駢體文鈔成於全唐文刊行之後略備前槩

頗捐恒見其松籟閣詩抗今切古黝然戛然詠史云楚
蜀縱橫戰壘高西南民困轉輸勞平安火絕書常燬機
速房深筆自操邊將頗聞悲蕙苴詞人新賦伐櫻桃豈
知捽去謀先決不用重藏膝褲刀贈吳騎尉賺云脫險
歸來賸一身回頭烽火照西秦相如諭蜀文誰草班掾
封侯夢未眞逐隊聊尋拋壻戲望門難作斷裾人城南
野寺花新放莫負年時婪尾春他如膺滂苦自爭門戶
嵇呂眞能共死生太白雲煙荒舊社繁臺游獵過餘年
均工

益陽諸生賀光黻雪畦嗜學耽吟多幽靜冷峭之作劉

家坪云殘景下嶽背夕陰蔽數里枯茅風槭槭碎石路
齒齒溪流亂黃葉上有數家市行李未到門店媪先色
喜晚炊淅脫粟井汲烹野芑寒星入破壁眾水納幽耳
宿連雞棲旁夢豁虎聲裏平生禽向心勃勃方未已卽
此經險艱修途慎前趾雪夜云山風漂頑寒向晚雪亦
劇一飽幸有餘惻然念鄰宅呼童攜宵鐙畦路印初迹
叩門謦語遲濺濺衣袖白吾村舊瘠土歲晏半荆棘庇
寒豈無心响溼顧以力地墟温苦茗閒話慰幽閭鄰旣
舉家歡我亦終夜適吳野人後此其嗣音

番禺陳大經新齋蘭甫京卿尊人也父理問君性儉天

寒進狐裘假言其值曰今年狐裘賤理問服以過其友
且告之友熟視歎曰子孝則裘賤也理問爲詩有云有
兒能養亦忘貧其先意承志雖困乏而奉養豐腆不使
父母知如此

巴里坤爲額魯特地乾隆十三年平定準噶爾始設鎮
西府其地在雪山之陰五六月間西北風起卽雨雪爲
塞外極寒之地典商鄭姓者山右人也每於歲之季冬
疊雪爲冰鎧廣長十餘丈其內山原樓閣玉屏石壁几
案人物悉搏冰爲之照以燭自元夕至十八日城鄉士
女全集觀者如堵上元金德榮以江華令謫戍紅山就

館鎮西居停圖毅堂太守屬作歌記之書付鄭商黏諸
壁有云鼇山拔地一千尺飛閣層樓跨其脊其下殿宇
鬱嵯峨其坳浮圖耀金碧長橋臥波何蜿蜒西接清虛
小洞天有佛番腹據石坐有獅弭耳當門臥琪樹花開
四照明絳霄雲擁羣仙下北張六六頗黎屏映帶左右
光熒熒搖窗的皦金荷小長廊一桁晶毬繞火樹銀花
匝匝開絕無風信起黃埃川原夜色明如晝士女車聲
響若雷信塞外一奇景也

南雁李吟香上舍墀之祖好聚奇石中有一石棄作階
砌歷有年所嘉慶壬申梅雨盛行吟香見石上有字痕

澣濯讀之知爲東坡所題王晉卿煙江疊嶂圖詩僅存
十行自開林麓斷起至桃花流水止凡一百四字間有
模糊不可辨爰嵌諸壁間題曰蘇齋次東坡韻作詩紀
事並搨碑分貽徵詩新會伍青田大令得搨本亦次韻
紀之伊墨卿守惠州修東坡故居得硯於墨沼製甚古
石微赤背一方印篆刻德有鄰堂四字上一軾字行書
如世所傳帖尾樣宋芷灣爲作德有鄰堂硯歌

武進管孝逸大令繩萊詠史詩屢抗匡衡疏難容汲黯
狂頻遷右丞相來逐左賢王垂老星關外迴心玉殿旁
旌旄猶坐鎮終竟勝投荒前時妄男子帶劔入龍華遂

有封諂禍徒深伍被嗟上林搜十日左輔逮千家窮治
原無貸恩須一本加桂觀初興役飛廉又降仙庖人宣
室宴振子水衡錢減膳書頻下宵衣度不愆何堪青史
上曼情有文傳蓋爲瑪拉特文清公作也嘉慶十六年
文清以兩廣總督協辦大學士旋以內大臣吏部尙書
召明年直樞廷十八年授東閣大學士出爲伊犁將軍
二十一年夏始召歸朝行在是冬署江督二十三年春
至京上將以明年東巡而是夏久不雨奏請停止謁
陵革大學士職公素忠直凡燕游警御之事乘間直言
略無所避數躡數起乾隆間爲和相所嫉舉以駐藏論

國事往往隕涕初 孝賢皇后從 純皇南巡崩於濟
南行宮及回京 皇四子謁見不敢喪服被切責旋薨
未有子四十五年南巡回鑾至涿州有僧攜男子投訴
言是 皇四子遺體以服中生子不敢留展轉寄僧舍
生十四矣遣問 皇四子福晉福晉懼不敢質言大臣
亦無能辨真僞者公後至奮然曰此僞也遂以民劉六
之甥郭二格詐稱皇孫定案誅僧戍郭二格於伊犁沿
途官吏供張厚郭二格指揮徵索多不法福文襄由喀
什噶爾至京奏言之改戍黑龍江五十二年公時辦事
庫倫先以在戍稱皇孫覬惑厄魯特事具奏翌日卽縛

出絞殺之落颿樓集紀之甚詳

福山鹿木公上舍林松從高密李少鶴兄弟學詩以清
切爲宗春日村居云一夜風兼雨林花寒不開客稀村
店閉米賤海船來野寺煙微動溪橋春暗催依然好光
景樵唱白雲隈舟次岳陽云天低洞庭水客散岳陽樓
漁浦誰家笛巴陵獨夜舟占星盡南極看月下中流知
有湘君聽孤吟聲帶秋高密道中感王熙甫侍御云憶
在京華日直聲天下聞謂余獨殊眾此士可論文身後
聲名出生前諫草焚擬尋舊遺迹隔嶺斷歸雲送客歸
河南云遠道暗風雪南歸衝曉寒典琴別燕市攜枕過

邯鄲世味老方覺閒居貧亦安河聲與嶽色再出料應
難均極蕭曠無腐語亦無泛聲熙甫名寧焯官御史章
奏得大體爲少鶴高第弟子少鶴罷岑令旋里熙甫有
句云野性能閑辭縣易江程多勝到家遲馬平葉鶴巢
時哲亦少鶴門人贈人句如詩於人共瘦家較我尤貧
沈吟今日別珍重後來書取徑甚隘不失清真

嘉慶二十二年松文清以武英殿大學士署江督承張
文敏之後徐海淮揚大水新任總督爲孫寄圃巡撫爲
胡果泉請給沛縣一月口糧文清北旋行至邳州百姓
遮道哀號特以聞於是總督續以邳州銅山宿遷蕭豐

等州縣災傷入告一體撫恤周止菴詩漢使星軺未卻
回流離雁戶久堪哀民難自裕三年蓄天豈能爲合例
災破牘虛傳良吏補歡聲剛值令公來直將饑溺聞堯
禹始是熙朝上相才上相謂文清也寄圃督兩江久以
道光甲申河決高家堰被議除名官翰林時和相欲羅
而致之門下不之應風節亦有足稱者嘉慶乙亥英吉
利入貢其使不能行三跪九叩首禮廷議以其崛強遣
之寄圃適述職京師 召見垂問面奏乾隆五十八年
英夷貢方物使至京已不能效中國禮其大班曰司當
冬嘗於廣東巡撫廳治拜領賞物弓身俯伏臣親見之

譯者曰俯伏者夷禮之免冠頓首也今入貢之使卽廣東之司當冬未有謹於彼而驕於此者如其妄有干求當折以天朝之法度如其歸心恪順不必責以中國之儀文其言甚爲得體道光四年

宣宗幸萬壽山錫宴七十老臣於玉蘭堂繪像者十五人文清及公均與焉文清以都統銜休致卒年八十四寄圃以故相賞編修里居十年卒年八十二

丹徒張治虞孝廉學仁青苔館詩酒邊白髮隨春長
外黃河入夢來氣格致爲清穩與吳樸莊鮑野雲錢鶴
山王柳村應地山顧弢菴號京江七子

劉醅甫句細水爭蟲咽孤煙讓鳥飛亂草催人去閒花
背客休極見隱秀

李巽甫方伯恩繹罷官歸自號佃芸每折紙手錄五子
精粹語及名臣言行黏壁間一室徧滿階庭雜植花木
讀書外拄杖逍遙以自娛與湯文端善文端過飲攜游
龍杖爲贈賦謝云游龍異青黎國風賦隰有近水濯清
姿臨風似弱柳十月霜雪來晚節氣獨厚化爲九節杖
握入賢人手手自植此杖翩然臨甕牖目賞薜蘿陰小
飲杯中酒道味裕談次不覺傾聽久瀕行贈此杖感謝
拜而受導以逍遙游豈第矜衰朽草木有臭味相投亦

非偶同憐勁草心忘懷步林藪履道得坦坦良止免或
苟自從別江湖風波夢覺後枉羨持竿人甘作支筇叟
試問御龍氏安于倚杖否桃竹學化龍又誰執其咎不
如此杖佳相期慰白首文端以道光壬寅乞休亦留居
京邑也布被脫粟每日晨起鈔諸經二百字寫抑戒詩
至數百徧佃芸自奉儉約晡後率素食篤好讀易其風
味略相似

烏什城南百餘里山頂有唐王寨山坳柳樹下出泉屯
工資以灌溉薩湘林心太平室詩古蹟唐王塞靈區柳
樹泉雖無佳景物而有大山川回部莊分野夷人帳插

邊孤城懸北斗漢志尉頭傳

顧蒹塘揚子雲洗硯池云秋室當年少俗塵郎潛不厭
在官貧元言覆瓿終傳後白首懷鉛卻美新市井已更
王氏臘鶯花猶屬漢宮春墨池有水嘲難解惆悵先朝
執戟臣詩筆極爲娟麗嘗見其評張南山詩所取如白
月藤花下春人楊柳邊春江流客夢夜雨滴鄉心雞犬
與兒女出入爭一扉空林吹暗風老樹作人語恬禽無
競音孤花有悽態風裏綠楊春二月曲中紅豆月三更
一生不幸稱詞客萬古能豪是酒人槐陰經院靜雨氣
紙窗寒中歲功名銷短鬢大江雲樹寫清秋西風吹漢

水秋色滿江城有官仍作客無病不妨貧作宦半年生
白髮看山一路到黃州小亭不夜長留月老樹非春自
著花暖風晴日荆南路門巷家家有杏花亦皆以清婉
爲宗

高郵夏玉延寶晉之官絳州留別錢衍石給事云士夫
忘大戒不賤乃憂貧深念知何事孤標見此人杜門方
導竹舉扇每驅塵何術堪爲吏從君問拊循剋日相辭
去征塗首太行贈言思蹇老在位感王陽風雨稽程久
雲山引興長移書容我達民瘼未應忘命意遠俗尤足
見給事高致

郭蘭石廷尉芳堅館題跋鑒別精審其詩文爲書名所
掩五言如梯田隨澗轉水碓隔雲喧崖歛石讓道沙逼
水爭門絕句如層層接澗灌梯田草草團蕉結數椽滿
地菱花山子噪兒童閒倚竹根眠荆扉鱗次逐江開江
上涼風亦快哉最好環隄萬楊柳蕉衫蒲扇聽蟬來皆
能指事造情不爲空綺子錢齡號驚復道人官浙江同
知亦嫻吟詠有吉雨山房集武林歸後築室於瓢湖山
中著有周易從周楊雪滄感舊詩墓門宿草漸成茵大
理家兒是古人惆悵研朱同點易文章憎達郭山民
唐之中葉士子各立朋甲至有東西甲之名東呼西爲

茫茫隊言無所知也施非熊志感云浮沈里社儘荒唐
橘蠹才游大蕙篁幾見省臺登袞袞徒勞朋甲走茫茫
繭絲縛蛹何時了窗紙鑽蠅底死狂世界卽今原廣大
可能撥霧見天光鄉曲儉荒之狀摹寫如生沈文起序
陸祁孫黃壚感舊集云僕少寒苦無交游之素酒醴之
歡偶然期集嘈噴鷓鴣市井臺屣握齷冠襟降心爾汝
稍涉書語艷然掉罄抵案擲櫟不惜破面較非熊所狀
尤爲不堪自九品中正之法復興至欲恃此等人物爲
鄉國之俊民與安危之至計豈不愼乎卒之爲姦民所
煽碎我金甌右軍所謂三祖壽樂器虺瓦弔孫家兒打

折議會之立不啻火將然而投之燧也

桂文敏有園在海淀張茶農詩丹王宅畔楊家井淀水
沙溝錯路蹊人已云亡圖亦廢夕陽門掩亂鴉啼樊山
南去楚江開天問招魂字字哀爲語園丁勤灑掃雲車
風馬有時來其重游麟導河歌呈鐵梅菴制府云金灣
以南汶港多一道中出揚洪波相傳宣女產神麟往返
謁墓導此河年深沙積水日窄遂令湖流洩不得下河
七邑釜底居浪蹴麤花高百尺去年今年水勢同田廬
坐待奔湍衝監河北望束雙手 天子南顧迴重瞳詔
書特命制府公便宜行事惟成功一壺五竅定秘筭疏

瀹排決齊施工車輪碌碌雨分霏畚鍤劫劫雲舒布河

寬五丈深半之亦直亦折理孫屬

周禮讀若注

立碑分界勿

愆素丁壯歡呼官不怒水患銷弭水利饒三十四里通

江潮鹽河利舡漕利艘七捺八捺定深淺一石一板稽

長消蟻穴難潰邵伯堰鐵牛永壓陽侯濤沸騰漫掉談

者舌要已澹災湯沃雪國帑罔費民毋勞用之有道經

云節平蕪無復波濤痕依然桑柳圍村村長我禾黍畜

雞豚又我父老蕃兒孫痛定思痛聲復吞家家自招漂

沒魂從容奏績今制府治惟師古不泥古大書深刻河

之許縱有龔王難繼武

龔王皆國初有功於此河者見揚州志

那文毅撰

梅翁神道碑謂其於河不浚海不增隄堰斬復曩利去
今害河以從軌蓋指此也

周凱芸皋善山水嘗爲松岱亭鎮軍作端溪品硯圖戴
醕士侍郎爲之引首芸皋畫後復題七古一篇

瓊安傅竹莊大尹玉書以孝廉終安福令著竹莊詩集
輯貴州耆舊詩名黔風錄十二卷刊於嘉慶丁丑子碩
園明經汝懷繼之析前明人詩爲舊聞錄六卷國朝詩
爲鳴盛錄十八卷又增輯黔風演數卷道光戊子阮文
達以大閱駐節貴陽陳詩索序一刊於貴陽再刊於大
定嘗主講黔西萬山書院鄭子尹贈詩云鳴復度渭水

客子意不放遠望披瓊天山川鬱孤愴十柏增感舊解
后忽神王讀書真有得生色睽而益四顧水西山頓覺
此席壯當年竹莊公晁采照十兩老鶴見雞羣龍章想
姿狀風花湧寒食幾日陪履杖菊苗罄新製筍菹倒陳
餉再留我何惜未肯速官謗承乏復幾時歸塗待重訪
十柏者吳蘭雪刺州日於東山建王陽明祠俞尙農以
陽明生日率州人舉祀事燕於十柏山房子尹曾觀禮
也其後莫子偲增輯明代黔詩弟芷升復輯本朝黔詩
嘉慶癸亥禹門廷尉福申倡城西文社先後偕鶴舫相
國二十人謁鮑覺生從游稱弟子時惟相國及鐵麟荔

巖已舉於鄉餘皆諸生也每鄉會榜發多獲雋者甲子
鄉試則那崑崙峰岳魁中峰三福藹堂恒安謚齋福保
緒堂五人丁卯則鍾祥雲亭銘德禹民永泰清園毓書
雲橋榮第顯堂宗室奕溥醴注乙丑則鶴舫相國捷禮
闈入詞館戊辰禹門登賢書己巳禮闈崑崙峰緒堂皆以
知縣用謚齋任中書崑崙峰兩試皆旗元辛未荔巖出宰
楚北顯堂歸班待銓禹門醴注並得館選甲戌雲麟翥
青成進士出宰秦中丁丑張圖南頡雲聯捷入農曹清
園同榜庚辰慶辰樞之亦雋南宮惟吉雲布藹人早逝
禹門好讀書初入詞館見講讀廳舊貯周櫟下同書欲

擴充之於書肆獲祥耦漁所輯同書拾遺爲之增訂曰
續同書八卷而顯堂爲之序禹民一字潛齋以已巳進
士由編修出守廣信出都途中書懷云離家不慣慣思
家百道潺湲激淺沙此念未如流水靜春來猶自憶桃
花不無玉堂天上之感

禮烈親王所乘良馬名克勒國語謂棗騮馬阜青驥尾
者此馬腹下旋毛如鱗狀或曰龍種也翹駿倍常所向
無不如志嘗以病蹄自跑出泉洗創輒愈人目其處曰
聖水云王以順治五年薨馬亦旋斃汪茗文爲作克勒
馬傳舊無畫者嘉慶辛酉汲修主人屬張船山補圖翁

正三楊蓉裳吳蘭雪皆賦詩述之湯文端題詩云真人
龍飛黑水鄉駕熊馭虎鞭羣羊雄姿偉榦鍾天潢天產
神駿佐英王王之躋勇人莫當汗馬百戰先戎行魚皮
烏拉葉赫疆大燾奕奕夜生光薩爾濟山吉林岡明兵
號二十萬強翦滅此食五日糧馬首所向皆披攘有如
駿駁吞虎狼鼓鼙之聲灌雷碾火牛燧象走且僵騰槽
躍櫪獨奮揚鬣尾森豎目裂眶橫突鐵騎衝刀搶凌躡
厓澗猶康莊跑土出泉湔愈創安平聖水流如漿是真
月駟星精房王騎箕尾歸雲閭馬聞躡躅神沮傷絕餐
紅粟枵酸腸王生馬喜逢孫陽王死馬願從秦良嗚呼

節烈士不常何乃馬也思斯臧昔無畫者今畫裝圖成

高

王問張陶傳以汪

琬

按圖讀傳言能詳身高七尺丈咫

長腹毛螺旋耳角芒海裘之色浮丹蒼黃金鞍鐙紫絲
韁屹立紙上猶軒昂自昔騏驥呈符祥堯侯赤文軒飛
黃降及漢魏嗟志荒侈陳上黨飾敦煌昭陵片石摹初
唐迄今讀畫珍琳琅我朝受命天溥將負圖告期運
會昌彪鴻翊衛都一堂人旣雄耿蛟螭翔物復倜儻風
雲驤白山莽莽江泱泱靈氣所蟠不可量薦之郊廟歌
宮商遠邁吉日車攻章

英樹琴相國早躋巍科歷事三朝供奉內廷之日久聞

見極博其恩福堂筆記紀恩遇述先德誦師說臚列掌
故如數家珍或評騭詩文書畫而不言神怪不道鄙瑣
亦司馬公涑水紀聞歐陽文忠歸田錄之亞也道光戊
子謫戍龍江旣作卜魁賦錄其詩曰卜魁集令子奎照
奎耀隨往奎照有龍抄紀事詩計一千四百九十六字
有云朶顏韎鞞舊稱雄遼宋金元幾更霸龍江蓋肅慎氏遺墟漢鮮卑魏勿吉隋黑水靺鞨唐黑水府宋契丹遼上京金扶餘路元開元路明朶顏衛皆其地俗凜尙識
古留遺地險益徵今控駕舊皆沙漠爲達呼爾等游牧
之所嫩江卽老温江源出宜呼爾山在龍江南興安嶺
下經查克達奇山之東額勒克爾山之西循墨爾根城

北抵卜魁城西千四百餘里與松阿里江合盛京通志
作諾尼江蒙古謂腦溫爲碧諾尼也內興安嶺去城百
餘里爲孔道外興安嶺去城千餘里北抵俄羅斯界先
是俄羅斯內侵肆掠築城于雅克薩又南據呼麻拉康
熙二十二年伐之彼退保雅克薩大兵城艾渾拒之二
十八年圍其城割田麥示儆始懼請釋兵棄雅克薩城
去遂更西距千餘里立界石于昂班格里必齊河之東
而北以山爲限二十五年城墨爾根三十年議城齊齊
哈爾村以中阻嫩江遂城卜魁齊齊哈爾舊站去十五
里今站移于城內故亦稱爲齊齊哈爾城實兩地也初

將軍駐艾渾城後于墨爾根設參領卜魁設副都統分
兵協鎮康熙三十二年將軍移駐墨爾根而艾渾改駐
副都統三十八年將軍復移駐卜魁立副都統于墨爾
根今尙稱黑龍江將軍者仍舊名也達呼哩索倫屬俗
誤爲打狐狸其人射獵爲生挽弓皆踰十石歸化後頗
以武力自效近有仕爲近侍者俄倫春人不食糧視進
貂等次給賞其俗戶出丁以竿量身足五尺者卽歲納
一貂皮上書打牲人名分別三等紬簽黃者雅法哈俄
倫春紅者摩凌阿俄倫春綠者索倫達呼爾物也日出
早入遲故晝長夜短夜不昏暗似日在地中返照者或

謂天高地當盡處故也

煦齋先生卜魁集夏日吟自注
卜魁長夏昏於亥初二刻明於

丑正
二刻

歲五月布特哈

漢語虞
獵也

貢貂選進後大開互市謂

之出勒罕華言會也遠人皆來在卜魁城北十餘里畫

沙爲界各部落人駐其北商賈官卒游人駐其南中設

兵禁俄羅斯人則秋盡始來百十爲羣一官統之禿袖

方領冠高尺許頂方而約其下來文二函一彼國字一

蒙古字貴官與商賈名並載焉樹琴先生有出勒汗歌

張詩船題卜魁集詩云讀到卜魁城一集前身坡老氣

盤盤七千路等珠厓遠十二聲傳黑水寒帝眷羈臣教

子和詩開絕域覺天寬龍沙雪色關門月歸載恩光滿

錦鞍集中有龍沙十二聲詩也

烏拉草產黑龍江冬日用以鋪鞋尋常結繩爲用劉松嵐詩所謂革履不裝綿其中實以草者也煦齋先生龍沙物產十六詠之一云不似柔莎種冰天獨可淺鋪之紛擘絮織亦說從繩難報三春日休誇千歲藤牛羊頻踐履茁壯遍溝塍其謂每年商攜重資來黑龍江一帶收採木耳販至江浙取汁染絲熟者爲菜葢絲非此染不生光也

山陰謝照壽嘯亭主人句樂事曾傳爲善最賞心惟愛得書多照字裕齋甲子舉人以景山教習授山西陵川

令丁亥需次都門寄硯瑞蓉堂比部宅其題瑞中書英

詩臺云扇仙山館綠雲涼疏雨聲聲到筆牀一桁蘿軒

留好月

閩峰少宰有蘿月軒集

要他清韻續清光清詠宜於得地

偏中書君日興翩翩東園詩境探難盡媿少眞州記與

傳秋老園林落葉繁高齋宵靜月當門定知有鶴披寒

露立聽清吟傍樹根蓉堂治亭尙書子雪舫閩峰少宰

子也

書賈王興福者撫州東鄉黎墟里人父槐瑞習賈佐族

弟某販瓷器於都門弟歿盡售其貨載櫬還以子母悉

歸弟婦挈妻周及一子一女至武昌歲壬戌貧窘日迫

遠出莫知所之興福甫三歲迨年十七開小書肆以養
母既受室白母欲尋父行有日矣母病卒歸葬東鄉其
族瑞川賈於滇蜀之交曰會理州興福郵訊父消息戊
子冬得復書知於庚辰冬歿於永北距會理十七站瑞
川爲營殯於白鹽井官山興福間關抵會理居三日瑞
川歿遇中表某指示父殯函骨回里與母合葬時道光
庚寅四月也陳雲伯爲作王孝子傳廣豐徐白舫客江
夏令曠琴仙署見孝子年四十許質訥無文白舫系詩
傳後云飢驅萬里子三齡黃鶴樓頭淚雨零目斷白雲
何處望霜花一夜隕萱庭天涯海角夢難尋扶櫬家山

飲恨深耶縱生還孃不見團圓莫慰九京心孤苦他鄉
其女夔十年服賈鄂城居白鹽井畔秋墳塌血灑滇南
一紙書行行那顧旅囊空甘擲兒軀瘴海中夜泊君山
神示夢平安助汝滿帆風鬼嘯荒山白晝迷負骸安穩
返江西一抔合葬松楸側月落雙鳥不住啼昔日京華
返弟喪乃翁高義泣媪孀天生孝子歸殘骨多少羈魂
怨白楊初瑞川荅書聞卽啟行有楊商憫其囊乏慨然
贈金風義亦足多也白舫名謙嘉慶辛未進士有悟雪
樓詩存

文信國綠端蟬腹研修廣各三寸餘受墨處微凹底圓

而凸象蟬腹沿左邊至頂刻謝皋羽銘其文曰文山攀
髯之明年疊山流寓臨安得遺研焉憶當日與文山象
戲譜玉躉金鼎一局石君同在座右銘曰洮河石碧于
血千年不死萇宏骨款識皋羽二字行書隨園舊藏以
贈曾賓谷吳山尊嘗爲賦詩紀事

凡花皆可烘惟桂花喜寒不耐火炙吳山尊唐花詩直
將家火占春先窶室生涯絕可憐眞汞難成偏作猶高
才早達或無年生香不藉冰霜力買笑專添富貴緣獨
有小山愛清冷花農袖手竟無權

儀徵汪全德竹素贈高塚詩許班戚里通經早豐沛勳

田負米貧瘴徼愁生新白髮中原家感舊朱輪張衡虛
撰屠龍說李廣空閒射虎身今日崑崙關外別一生湖
海重何人匹馬秋風蜀棧高嘉陵江水濺征袍將軍意
氣虛籌筆從事勳名未夢刀千里檻車收鄧艾一時帷
幄信劉陶只今夏國儒冠老霜鬢天南首重搔採當是
高恒家子弟竹素詩如寄家兄桂林云昔從京雒望交
州有弟他鄉竟白頭天海歸來如斷雨關河重別又深
秋蕭條邊月空江鼓零亂風鐙下水舟莫說登臨尙年
少桂林山色古羈愁白溝河懷古云宋金遺蹟舊淒涼
煙樹無情接大荒南渡江山春闕絕北來車駕水蒼黃

琴師尙抱興亡感宮女都憐黯澹妝莫道君王不顧頰
東風愁爲杏花長均饒情韻

許周生配梁恭人德繩沖泉少空女也有古春軒詩詞
鐙下寫玉篇云百和餘香裊篆煙鐙籠蠟紙照殘篇一
章急就窗前課往事沈思十載前有女兒適於汪早卒
遺女端恭人鞠養之授以詩有明三十家詩選其姪孫
女端汪遠孫室有列女傳校注皆恭人爲之序杭有章
娘者故隸山西裴中丞家通曉音律從師學琴以轉授
女公子中丞與高相國姚尙書密戚也每會集使章娘
鼓琴無不激賞其後嫁尙書僕某中丞歿後隨其夫流

轉武林傭於人任煩辱之役偶至恭人家爲鼓琴恭人
感其事譜金縷曲四闋以傳之其一云簾捲東風冷正
花前鶯聲漸澁半凋紅影花外惜惜藏楚弄玉手明徽
相映彷彿寫熙春麗景忽作清商翻怨調似秋空翔雁
飛無定沙塞迴夜霜警一時四座無言靜斂絲桐逡巡
再拜細陳萍梗憔悴朱顏今已矣夢斷紅樓金井更那
望知音傾聽柳絮浮雲根蒂杳枉嬌癡閱盡繁華境訴
往事意悲哽詞旨悽惻不啻華屋之悲青衫之淚也

乾隆間雜技有罈子王者爲撮弄老手三子皆世其業
烏程人朱錦山能陳二十四種樂器於前以口及左右

手足動之皆中節又能奏各種曲閒以拇戰等聲並臻
其妙自言舊嘗給事和相邸中將敗先一年辭去嘉慶
乙亥趙億孫於吳興席上見之仍藉舊業餬口也爲賦
長歌云長檠高張月正午太守開尊謝歌舞何人奏伎
向筵前一藝能兼眾長取是時寂無談笑聲座上客皆
傾耳聽忽然悲笳迸空出雜以金鼓鏘然鳴此時無論
絲與竹直併百骸歸手足又喜無論宮與商盡收萬籟
藏喉吭乍如競渡中流戲東舫歌殘西舫繼已覺前行
聲漸遙旋驚後隊紛謹諷俚曲盲詞無不擅耳畔又疑
爭拇戰五花八門信足迷貫蝨承蠅知久練自言少入

悅生堂給事曾叨眄
曙光早識冰山難倚仗
預歸故里獨襄羊
挾伎營餐聊自便
山郭水村游跡徧
亦有朱門倖
免人繁華夢裏誰先見
其時有卿憐吳人初歸浙
中大僚後爲和相所得未幾和復敗
或云效綠珠之節而錢唐陳文述卿憐曲又似仍還故鄉者
億孫題其小像三絕句云
省識春風祇畫圖
似聞慧業比人殊
舊時響屨廊邊住
嫁壻端應西子湖
笙歌葛嶺幾朝昏
量盡明珠價
莫論無柰楊花易漂泊
又隨風去墮朱門
十首吟成薄命詞
死生蹤跡費猜疑
可憐碧玉年猶小
兩見瀛波清淺時

碧岑女士江珠鄭堂妹也以多病號小維摩偕鄭堂受
經於汪大紳余古農歸吳縣吾半客學海以嘉慶甲子
卒半客檢其詩藁付諸梓人鄭堂序略云碧岑生秉淑
質長益貞純諳習內則之儀隱括傅姆之訓定省寢門
夙嫻四德出就家塾日誦千言邃於七經兼通三史八
線九章辨中西之術五行三式究王遁之奇乃不櫛之
通儒掃眉之畸士也嘗謂河內女子昔傳泰誓之篇鄭
氏家奴亦解衛風之說况貞順采自詩書訓誠本之曲
禮者哉詠柳絮之因風人誇聰慧頌椒花於元日自負
才華徒事篇章不攻根柢是不知無本之木推之則折

有源之水挹之不窮也至於繡茵替於深閨織鴛鴦於
當戶抑又末已於是分剛柔之白課晝夜之程校元朗
音義十三經讀未重說文九千字欲明訓詁先求爾雅
蔡謨不識彭蜺田敏不知日及學之陋也遂精研郭注
博採舊聞釋玳瑁爲釵解竿旄從竹雖終軍之對鼯鼠
進士之問天雞不能擅美於前矣又因女史圖不傳婦
姒訓久佚今所有者惟中壘之傳虎頭之圖貞淫並著
乃彤管之董狐善惡相彰洵青閨之金鑑就王回之本
補大家之注解故通經兼採韓嬰外傳稱先稽古博參
秦漢羣言惜乎屬草未成遺文零落云云女士詩云紅

豆流傳頗有名抱書兀兀類饑傴媿予質陋文思薄敢
道蛾眉不讓兄謂鄭堂也絕句有云好名祇恐因名誤
爲語山中少箸書是見道語

雍正元年遂寧張文端請假旋里 世宗頒賜黃玻璃
瓶高尺有五中插紫藤天然如意一枝嘉慶甲戌文端
六世孫問安恭紀二詩云巧樣玲瓏紫蔓枝玻璃瓶捧
出丹墀似卿來去都如意 天語分明手賜時宸翰天
書奕葉藏告身如笏燦盈牀兒孫六世甘清白寶物還
騰萬丈光問安字季門少舉於鄉以事母就校官後船
山一年卒弟耆山爲刻亥白詩鈔於杭州其爲法時帆

祭酒梧門圖云草堂負朝暄高梧蔽秋井機杼鳴夜寒
詩書足光景時序紛代謝蕭然遠塵境散學午炊餘庭
隅過清影感茲榮木陰情與蘭陔永露重明月來援琴
動深省雪窗課讀圖云陂淀繞村郭空林集寒烏風色
宵愈嚴皚皚雪壓廬糝徑人迹絕杜門清有餘寒衣手
自成刀尺忘勤劬尋常作複幃語兒且著襦歲晏鐙熒
然夜長惟讀書韓太淑人勵節教子與祭酒寒檠永慕
之心傳神阿堵間矣王椒畦稱其詩語淡而味腴節短
而韻長不似船山多杯酒間率意之作

曾賓谷以乾隆嘉慶間任兩淮都轉最久道光二年拜

巡視淮鹺之命自 憲廟後鹽政多用旂員惟孫文定
嘉淦方勤襄維甸及賓谷以漢員特簡例殊內府秩並
中丞時以爲異數趙良甫廣陵感秋詩云鹽筴繇來有
重臣孫方以後命重申三朝權法推劉晏卅載民心戀
寇恂財賦終防淄蝨聚度支久賴轉輸均要知大計持
平處不在輶車益算緡賓谷以六年夏召還京師

元和朱豐芑訓導少從竹汀詹事游以六書貫穿羣籍
咸豐初獻所著說文通訓定聲加國子監博士銜秦淮
襍詩云往來拋網捷于梭雪白銀鱗起碧波元武水軍
都散盡秋風齊唱打魚歌清流如綫碧迢迢劃破鍾山

山下樵二十四航關不住秦淮依舊兩迴潮英風颯颯
卷靈旗血影斑斕有石遺黃夫曲曲青溪三十六不知
何處小姑祠詩筆亦復秀雅

海州許石華喬林月南桂林稱海州二許月南中年奄
逝著有易確穀梁釋例四書因論宣西通算牖五種梓
行其詩選入胸海詩存石華以丁卯亞元出宰榆山丙
戌引疾歸以經義治事主講淮海間自訂弇榆山房詩
略十卷其論詩有云到得性靈歸醞釀還從訓典絕根
荑又云百家縱有新花樣六義原同一性情右軍常侍
帖凡四十五字有開元二十五年牛仙客及裴耀卿跋

尾順治中 世祖賜聊城相國嘉慶甲戌石華試禮闈
相國後人和軒中丞繩勛時官翰林出相展玩爲賦五
古一章

鄞陳僅餘山厯宰陝之紫陽安康其論編查保甲之法
謂新建十家牌實以當時三泐不靖民有戒心順民之
欲故其事易辦若編審久廢遷徙無定而遽行十家連
坐之法將訟獄繁興官民交敝南山諸瘠邑平時已入
不敷出邑宰雖賢安能歲棄數百金以求不可知之效
環數百里之境政無鉅細悉叢於長官一身簿尉校官
皆爲冗贅而反寄耳目於邈不可知之鄉民徒以文法

相約質欲其不虛應故事難矣且一保長所屬幅員數
十里牌甲百十人輿馬酒食奔走之資筆墨書寫之費
將誰出欲花戶不累得乎日久玩生奸宄孽芽其中相
與齟齬之憲司又時以文法掣其肘其不爲安石之保
甲也幾希謝鶴齡云南山當以團練行保甲嚴樂園云
山內州縣只可行之城市不能行之村落爲治之法要
在因地因時難爲刻舟求劍者道也其慨然有作五首
言之洞中窾要其第五首云風俗日以替徵辟難再行
十室有忠信邈矣三代英百里賴一官耳目疲獨營況
值文網密動輒彈章攫紛紛置牌甲將以氓治氓拔十

不得五轉啟閭閻爭刑賞交扞格指臂艱使令文告多
奚爲徒使斯人驚何如挈宏綱一切歸簡明持之苟無
倦歲計當有成可謂執要之言世之守方臨證執律求
情者曷亦返其本矣餘山嘉慶癸酉舉人

長洲王嘉祿井叔訪陳碩甫不遇云林杪眾山暝人家
煙色昏不知溪上月已照竹間門落葉響雙屐寒梅香
一邨美人隔秋水獨立對潺湲碩甫先世崇明人祖浩
遷吳下居南園薛氏掃葉山莊也少就江沅鐵君治小
學段懋堂自巫山引疾歸流寓閩門下津橋招之受學
嘉慶戊寅入都得交高郵王氏父子與郝戶部懿行胡

戶部培翬胡觀察承珙金貢士鶚以經術相砥礪未幾
客杭主汪小米家著作半成於此時於毛詩最爲專家
嘗語戴子高曰說經貴守師法出入旁雜爲道之賊自
魏晉下陋儒類自謂集大成而不得經旨之彷彿語楊
見山云高郵王氏三代經學皮架無唐以後書學貴精
深奚汎濫爲精乃通深乃靈無入而不絜千載之心晚
年避賊居無錫芙蓉山同治癸亥卒於上海龍華郁氏
年七十有八

蘄水陳太初修撰詩姚鏡塘謂諸體俱佳五古尤勝寒
溪寺云靈泉秋在朝寒谿秋在暮寺門開夕陽落葉閉

斜路卻聽流水聲寒色上衣屨霸圖歇千載亭館化邱
墓獨憐僧與佛終日坐深樹空山一鐘響曳杖吾亦去
同時稱詩江漢間者有潘四梅刺史煥龍劉孝長學博
淳四梅輓何子畦觀察云石勒未經夷甫戮費禕誤受
郭循降丹畦雲南師宗人爲倭文端道光乙未科所荐
士兵備徽寧爲降擒李兆受所戕諡文貞

嘉慶庚午鮑覺生視學湖北安陸李遠山訓導在其幕
中公餞詩有萬里江聲吞大別一天秋色落巴陵之句
覺生時有楚南之行也遠山名道平著有周易集解箋

疏

淮寧張永祥當川楚教匪亂率鄉勇三百人破賊五千
於盧氏縣論功得把總銜棄之歸阮文達撫豫効力麾
下材勇冠其曹文達撫浙時海氛不靖令教習溫台寧
諸營槍法屠孟昭宰儀徵聞其名延至署捕治巨梟幾
盡長軀修髯諸技皆長而槍法尤絕倫故以鐵槍得名
趙良甫爲賦鐵槍歌贈之稱其謇訥恭謹不類武夫

黔平溪鄭氏取竹作洞簫分寸節度皆合古製其聲清
越聽之有雌雄家傳此技數百年矣其造時必夜分萬
籟皆靜亦當代之奇製也宋于廷平簫曲云幽人小住
黔山麓玉作溪流雲作屋夢回猶記聽雲璈一夕參差

出深竹分荆裁量寫最明虬龍欲舞夜蟄驚會窮濁微
清商變無奈清風朗月情江湖萬里秋風發又聽簫聲
思飛越金釵綠鬢總飄零曲終已瘦相思骨寂歷蠻煙
罕見人祇憑烏咽度蕭晨何時攜向滄江畔吹起深潭
萬萬鱗

于廷臧叔子禮堂挽詩云志士天所貴達德世尤希湛
湛北江濱賢哲生崔巍臧君閩左儒昆弟人所睇束修
靡毀玷閒言息庭闈孝德迴常傳顏閔或庶幾家傳拜
經業夙昔師難兄雅故耽吾好小學殊有名巫山亦卓
犖珍藝尤研精往往揖讓間後起前師驚讐校騎省書

抉發倉斯情京華我顛顛握手晤君伯因君叔也賢問
訊似疇昔陋巷方古人蓬蘖遺世迹同時華屋貴輩流
動千百幾人飭內行議論繁何益造物報有時豐嗇理
難計得君伯兄書言君逐川逝不朽自平生哀悼已一
世烈烈秋霜侵巖巖朔飈厲裊裊緬幽貞東望側揮涕
叔子字和貴高祖琳明經通古學爲閭百詩所重和貴
師事伯兄庸究心六書故訓之學父繼宏久瘡惡寒身
潛溫被母章危疾刲股和藥私禱嶽祠減齒延壽以毀
卒年僅三十庸初名鏞堂字在東于廷懷人詩蕭然樸
學世誰稱盡削繁枝據上層滿座儒林看奪席幾家師

說得傳燈馬肝轅固原難食鹿角朱雲折未能羨爾讐
書如斷獄何時徧錄剡溪籐

于廷管謂困學紀聞引譚苑雍熙中校九經史館有宋
臧榮緒梁岑之敬所校左傳諸儒引以爲證孔維謂不
可按據杜鎬引正觀勅以經籍訛舛由劉石之亂學士
多南遷中國經術寢微今並以六朝舊本爲證持以難
維維不能對按臧岑校本定由僞託如蕭琛漢書之類
孔維疑之爲是鎬等橫詰不足憑也其舟中讀書偶述
云羣書失要義流俗乃好奇點畫窮校讐紛若抱亂絲
典籍傳中華三千年可追何來日本書唐本售厥欺語

助意所增寶之儕鼎彝反謂師儒傳中有脫誤疵何殊
舍康莊委折就路歧昔有梁蕭琛班書古本遺至今考
同異徒足生詬訾當眾貴所見單行乃便私臧岑校左
傳史館留雍熙斥彼不足據卓絕思孔維于廷嘗言學
爲考據如拾瀋莫益於用卽此意也譚復堂謂阮刻注
疏乃古骨家當亦非漫語

宋芷灣糧儲已未入詞館乙丑大考二等所作 帝京
賦爲時所稱出守曲靖署永昌平灣甸賊匪士民立碑
道光元年辛巳元旦二首云九天闡闔啟元辰日繞龍
鱗拜舞新萬里孤臣重下淚其傳 堯穎類高辛年華

回首此蹉跎十載蓬萊夢裏過記起玉皇舊香案天涯
老吏白頭多

芷灣望雨詩云便不關人事何能責上穹太平無坐得
凡百有憂同又云耒耜銷兵氣桑麻愛此身由來愚百
姓全仗飽爲人可謂深于天人之際在永昌與應試諸
生論文五首云五花一出立長風萬里先驚汗血紅俗
士畫皮兼畫肉神雕行氣直行空銀鞍錦帕非無用虎
脊龍文自不同漫道樂歎多閉目悶人頭腦是冬烘日
向箏琵琶苦用心誰知山水有清音一聲立鶴雪明樹百
道飛泉雲滿岑豈必枯僧同結屋得來雲境獨彈琴洞

庭自古鈞天奏過客恩恩只不尋環肥燕瘦兩難描一
髮相移百豔消文字古今無死法高曾規矩必分條林
泉風月招高隱宮殿旌旗賦早朝莫遇齊王偏鼓瑟更
逢嬴女不吹簫翦綵爲花也自多荒園無景奈春何山
當選勝峰峰立水見深源浩浩波俊鵲盤雲風下上神
魚入海雨滂沱紙鷲芻狗空蕭索聽取詩人賦伐柯三
分人事七分天此論雖通未盡然但乞金丹來換骨豈
餐玉屑不成仙花香九畹無雙士水味中冷第一禪爲
報瘴牛休飽啖莊生意得棄蹄筌蓋自道其得力所在
也可謂金鍼盡度不同英雄欺人

震澤張鐵夫海珊慕邵康節之爲人自顏其居曰小安
樂窩澹者欲不近名律身以黃陶菴不妄取不飾已過
不面譽人三事自矢潛心讀易間以詩歌道光辛巳舉
鄉試第一以暴疾前卒詩如夜宿翠微禪院云空堂坐
清敞孤鐙炯相對到此聲塵絕直教耳目廢清談雜寤
寐夢醒兩不背了了午夜心縱之虛空內山水本清真
世故何遮礙缺月上東嶺寥寥聞松吹妙香樓望太湖
云負厓出明靚開軒納昭曠眾水積太古彌天動奔浪
清空但一際駭變有各狀客心與造物往來互相餉卻
顧身憑依端然一榻上逸獲見餘暇隨任得平放本非

澹蕩懷元是山水藏合同乃以化不作內外相詞意皆
一片空明了無塵滓其人品大類姚鏡塘詩格亦與之
相似

管異之借居歐氏園芟草有作云借得荒園寄此身斫
將蕪穢出餘春暫居也合除荆棘免使鍼芒刺後人極
有意

上元顧秋碧文學懷三垂老羈棲其才哀豔有然松閣
詩鈔雜感云朝陽出杲杲爍火一時熄乃其陰曠時星
斗并韜匿熒熒燐火青睽睽黍鐙碧孤月爭撼搖萬鬼
助噓嗚老鴉啞然笑妖狐作人立吐燄非不高寒景動

蕭瑟天雞一以唱奄然滅無迹穴地已足悲附草復何
益始知魑魅光不敵太陽力日出羣動起醜惡分萬端
乃其廣坐中面目多沮慚乃其伏枕時肺腑終不安一
出便蹉跌庶可無後患小喜副幾幸滔天肆波瀾初心
頗易厭晚節良足歎安得萬間厦爲爾謀饑寒種松得
美蔭種枳多刺傷栽培亦豈異施報偏反常此輩最可
恨此理終易明松直鮮阿附枳曲隨低昂心孤迹易遠
植弱患豈防卑棲丐雨露稍稍見終芒風雲會遷變觸
手成披猖前車固宜戒嘉賓焉可量奈何斬噓植自謂
無否臧多情乃天地庶物親扶將惟其心無私是以春

風揚魄亡日月瞽氣盡風雷瘖天行邁屯難人力非所
任偉茲志節士欲挽虞淵沈寤難誓宏濟元化同斟酌
成否固難必獨此區區心精誠感天地頃刻開重陰北
山負愚叟東海填冤禽身世豈不在此意天所歆此數
詩深得比興之義孫更生亦能詩

道光甲午懷寧陳世鎔雪鑪錄汪平子余伯扶少雲兄
弟暨江爾維季持之詩曰皖江三家詩鈔季持詩曰七
峰詩稿其單行本則倪濂舫所刻也錢東生壬午春襄
校禮闈得季持文詫曰是浸淫於古者也出闈後見其
詩文詫曰此非今人之詩古人之詩也季持旣歿東生

序其遺稿謂其直抒胸臆高者近李太白孟浩然亦或
取資乎孟郊亦有時似皮陸引杜詩眾中每一見使我
潛動魄之句而深憂其無傳其滇中新樂府謂滇中女
子不習輿轎家製小繖垂帛爲簷出輒持蔽障其面有
古遺風焉裸夷不豫議婚春二三月縱男女山中彈琵琶
聯臂頓足歌以相悅累日夜不散旣乃約爲夫婦如
不獲當卽多逃匿山谷相抱以死夷俗嫁女重索媒儀
昇大石於庭必得金相當者乃許石旁置斧鄰來句減
者數輩取斧鑿石譟呶阻攘不知更幾百鑿而石小如
拳才敵數金而已夷夷住水濱喜浴腰下繫桶裙人水

漸擊而上委蛻肩臂浴方未罷裙隨下垂出水則已施
著如故云與拜都恩隆星伯善有贈星舫五言古一首
星舫卽星伯英夢禪孫有坐君羣玉峰清輝竟可擊皎
如琛璧姿增我蒹葭感之句可見其妙年裘縐於此不
凡

魏默深爲海州吳興孟歲貢銘墓謂海上吟詩到白頭
吳東陶外君其傳與孟有筠齋詩錄十卷殊不足觀道
光庚戌吳縣蔣棨渭遇溪有苔岑集之刻長洲陳基竹
士味清堂詩三卷馬鎮濟于半間雲詩二卷錢瑤鶴子
霞焦尾編二卷元和吳均藝卿霏玉軒詩二卷蔣遇溪

萬壑雲樓詩二卷吳郡毛永柏素存小紅薇館吟草四
卷思無邪室吟草三卷小紅薇館拾餘詩鈔四卷大率
皆隨園末派也

宋吳架閣揚字叔瞻文丞相起兵踊躍赴義率巨室積
錢粟備軍需意甚感激傾動一時辟禮兵部架閣文字
空坑敗後遂浮沈鄉里不出信國與架閣率札三通珍
藏東鄉吳氏者且三百年後忽失去吳蘭雪爲架閣裔
孫篤念先澤請翁覃溪想像信國筆意重書成卷前後
題者甚夥蘭雪彙刻爲表忠錄

張南山爲洪筠軒別駕題小停雲山館圖云圖中詰經

人筆紹容齋祖遠懷溯羸劉奧義析鄭許上下四千年
前後廿四部讀史費參稽遺文雜魚魯其間有闕疑每
賴金石補搜討君精勤一一鍼貫縷筠軒刻有傳經堂
叢書自著者爲禮經宮室荅問孔子三朝記注夏小正
疏義管子義證筠軒讀書叢錄平津館讀碑記未刊者
有諸史考異其校正之穆天子傳竹書紀年刻在平津
館叢書經典集林漢志水道疏證刻在問經堂叢書筠
軒名頤煊臨海人詁經精舍之翹楚與兄坤煊地齋震
煊櫛堂號三洪

常熟趙次侯宗建所居爲瞿忠宣東皋草堂舊址有銀

杏樹卓筆峰皆瞿氏故物有東臯紀勝圖詠其詠樹云
旁支柰絕中興望一木原知再造難詠石云底柱末流
心不轉補天殘闕力難操切合忠宣時事葉茗生極稱
之

嘉定黃潛夫日知錄集釋博采諸家疏說傳注名物古
制時務者條比其下定本刊于道光甲午其子宗魯聘
于胡三子宗英聘于葛潛夫故後數年二子相繼殤胡
矢不他適歸黃氏素多疾以歸寧卒於母家年十九葛
聞赴亦卽病亡年十三潛夫尊人石香屬程序伯畫女
貞木兩株作雙貞圖茗生爲作嚶城雙貞詩

韓桂舫司寇得請歸老蔣礪堂相國作詩贈之有一舸
秋風仙眷屬句因作秋甌仙眷圖司寇文懿後人也

歸安諸生孫憲儀爲遲舟編修辰東子館京師鄭氏數
十年自題卜兆圖有宵來空有夢足繭萬山中之句卒
後葉潤臣爲刊秋士詩存梅郎中爲之序盼仲兄二山
泮中消息云大梁驅馬過可到信陵門自灑男兒淚誰
邀國士恩謝池頻有夢姜被不同温身比殘碁局斜飛
一角存自注兄
工奕寒食旅感云土淺淹親久兒哀飲恨長
更堪鄉井棄况復墓門荒弱息留南國松楸悵北邙卅
年寒食節多是淚痕浪半世嗟如許殘生未可知伯昆

言在耳後死責難辭已絕表岡望仍虛誓墓思傷哉清
白吏生葬兩餘悲詩中嘗稱三友謂張淵甫吳西谷及
伯言也

棟鄂端節公瑞元治亭尙書子道光元年舉於鄉以恩
廕官比部嘗從昇勤直之甘湯文端鍾仰山之閩楊介
坪及仰山之楚之黔與滇特芳山戴簡恪之直隸禧仲
蕃瑚淡如之粵時

宣宗在位久熟於情僞自京師以及十九布政使司民
風吏治之濇雜窮檐部屋含冤負釁呼號赴闕 上必
立遣重臣馳傳周厯窮治端節追隨輶篋強申枉多

所平反由嘉興知府官至福建布政使歷烏什辦事大臣辦哈密大臣事調駐藏大臣科布多參贊咸豐元年改湖北按察使權布政使二年十二月城陷殉難其家人先其死死之事最烈著有十六研齋詩鈔如鶴去一亭寂花開孤嶼清耕牛偕犢過山雀帶雛飛皆有清迥之致

林月亭學博伯桐雜詩天下有治本民命在衣食沃瘠生有地貧富耀無極君子重修名賤者必勞力自從戰國來四民罕常職欲耕非先疇欲學非舊德而况舟車通輕易離鄉國百事不肯親一飽何由得丹砂比黃金

難從虛牝塞所以賈長沙上書三歎息天柱灘云三冬
走千里重裘猶未試半日上一灘朔風忽然至難易皆
有數顛倒似相戲來舟急揚帆駿馬初脫轡去舟爭繫
纜鷺鳥未舒翅險戒冒垂堂珍防投重器且住亦爲佳
莫作留連刺舟人語喃喃須禱南風賜我聞便大笑天
公難博施無屈卽無伸有歌宜有詈江舟日無數一葉
身原寄鴻爪偶東西雪痕那有意霎時到彼岸歡極無
餘思漸入是佳境難進尤古誼時來會相送遲速竟何
異惟有詩酒歡不被石尤累臨流欲放歌禦寒且酣醉
前程有天在吾心乃無事方將乘長風而爭尺寸利再

拜謝江神躁競非吾志月亭於學無所不窺修本堂遺
書未刻者甚夥而其詩取逕平易頗近白陸卒於道光
丁未年七月

張南山詩所患是兵還似盜但求無罪忍論功卽沈方
舟普天皆赤子不殺是奇功之意小醜無知終惜命重
臣有守亦需才卽劉伯宗到今眞取義自古所難才之
意紀文達於古北口旅舍見壁上詩愛其一水漲喧人
語外萬山青到馬蹏前一語及乾隆壬午撥房得朱子
頴放榜以所作爲贅此詩在焉以爲雲中路遠巴山色
樹裏河流漢水聲不是過也不知邵兼山孝廉送王耘

渠入蜀云秦樹碧分鴻爪外蜀山青到馬蹏前乃在子
潁之前

壁勤襄公星泉由河南陽武縣累擢大名守道光八年
奉使西域不四年而帥南疆殫心力籌善後大旨在添
兵招佃嘗畫擔秋圖貽許玉年題云昨夜西風太寂寥
舊籬新圃燦瓊瑤秋光爛漫閒收拾和露和霜一擔挑
蓋韓魏公以晚香自勵之意玉年題壁參帥詩稿有肩
事心逾勇淫書氣自平之句又有壁參贊畫虎歌

蔣子瀟中河南乙未鄉榜詩曰春暉閣痛慈母之苦節
身羈旅而不克盡養也心折於前明李獻吉其弔北地

詩云一肩直抗漢唐秦折後干將氣少倫車笠偏多陰
雨怨文章本屬起衰人

天下山皆發脈崑崙惟泰山來自海外見李榕村集盱
眙王子和望岱詩東去雲根穿渤海西來山脈別崑崙
其都梁耆舊詩謂戚琿緩耳以明經需次縣令善詩有
笑門集黃九煙酷愛之有奇才之目施端教匪莪官指
揮詩多集句鐫有唐詩韻滙詩歸韻別施愚山爲撰墓
志李嶠瑞蒼存爲漁洋弟子弟嶸瑞霄鄰有歸來藁毛
俟園教諭藻鄧嶰筠爲鐫遺詩緩耳婦翁王鼎子逸老
亦能詩按諸人惟蒼存較著

江寧何兩人宗伯直軍機處逾三十年由章京直上樞
堂前惟戴大庾盧德州二公併公而三小心謹密不言
溫樹卒謚恪慎登清涼寺江光一綫閣句云半壁斜陽
雙塔峙滿山秋草一僧歸

曹儷笙相國賜第在西涯博露菴嘗借居之花松岑尙
書贈以詩云半畝閒房孰主賓移家新與鷺鷗鄰窗前
兩岸芟荷雨門外一溪楊柳春酒盞常招江海客笙歌
能遏往來人雙雙紫燕如相賀又向雕梁盼壘頻松岑
奉使至滬英人購得其詩集刻本屬寶山蔣敦復以夷
語譯之寫寄其國亦一奇也

通潞徐綱伯孝廉維城古意云欲織鴛鴦錦心長忘手
疲經年不成匹錯恨是單絲文采雙蕖怨香紅宛轉妍
經秋不成藕渾不似湘蓮頗得讀曲歌遺意

清河吳稼軒比部昆田原名大田道光甲午郭佳相國
以軍機大臣工部尙書主順天鄉試出其門庚戌十月
與耆介軒同時褫職咸豐乙卯稼軒將出都詣辭時久
罷相家居語稼軒曰黃河在汝家此次豐工之決又費
鉅帑塞之實不可恃吾曾兩使南河相度地勢河必北
徙非人力所能強也河身內高於外者三丈有奇而北
路濱河者西自徐邳東自海沅河水皆屢經決溢復決

必於山東直隸界將來隨勢規界耳汝幸識吾此言比
抵家而銅瓦廂決漱六山房集書其事以爲料事如神
不盡出師生之私也稼軒詩如寄乍浦沈寶甫云詩帶
栖皇色人眞抑塞才亂離兒女累笳鼓死生哀夜月看
遺挂春風問劫灰不須吟太苦妖蜃散蓬萊頗與魯通
甫相近

本朝宗室相者十一人琳寧勤儉祿康奕經敬徵文憲耆英

禧恩文莊載齡文恪靈桂文恭福錕文慎麟書文恪崑岡文慎覺羅相

者六人巴哈納敏壯伊圖文儋勒德洪吉慶長麟文敏寶興文莊

富察氏相者九人額色赫文恪阿蘭泰文清馬齊文穆

富寧安文恭福敏文端傅恒文忠福康安明亮均文襄

托津文定鈕祜祿六人陳泰忠襄對哈納文端訥親達訥黨

阿阿里衮襄壯和珅伊爾根覺羅五人莫洛忠愍伊桑阿文端

阿爾泰三寶文敬德福費莫五人温達文簡温福勒保文襄訥

爾經額文慶文端章佳五人尹泰文恪阿克敦文勤尹繼善文端

阿桂文成慶桂文恪瓜爾佳四人剛林車克文端桂良文端文祥

忠納喇四人明珠查郎阿瑞麟文莊全慶文恪赫舍哩四人

希福文簡索額圖嵩祝英桂文莊舒穆祿三人佛倫徐元夢

定舒赫德文襄高佳三人文定斌文端晉文勤書麟索綽

絡三人英和麟魁文端寶鋆文靖馬佳二人則圖海文襄馬爾

賽他塔喇二人則蘇納海襄蘇凌阿喜塔臘二人則邁

柱文來保文佟佳二人則慶復裕誠文烏雅二人則兆

惠文官保文博爾濟吉特二人則文孚文琦善文漢大

學士則高陽之李桐城之張常熟之蔣海寧之陳無錫

之嵇錢唐之徐諸城之劉常熟之翁稱盛焉煦齋協揆

家世貴顯少有異才和相欲壻之不可頗銜之乾隆癸

丑殿試恐爲所中乃變易書體得免道光八年寶華峪

地宮水滲逮籍遣戍姚石甫詳紀其本末而稱其風雅

愛才六十壽日獨取劉孟涂詩以張堂中潤峰相國在

上書房嘗問業於更生居士視師海上舟次毘陵爲作

曉讀書齋文集序明太傅由內務府總管授宏文院學士佛相國由駕部遷中允尹文恪由閣讀授侍講寶文靖由祠部授侍講文文忠由僕少授詹事福文慎由選部升庶子麟文恪由都統充掌院學士皆滿缺其漢軍特改館職者則周有德由貢生授宏文院編修郎廷佐由內院筆帖式遷祕書院學士劉兆麟由官學生授祕書院編修王繼文由官學生授宏文院編修皆順治間以後則不復見矣漢軍大學士亦國初爲多潘湯之范應州之鮑甯文毅李忠襄蔣文端金文恪蕭永藻白潢雍正以後則高文恪其位張文和允隨黃文襄楊松門

楊勤懋廷璋李恭毅侍堯馮文肅張文敏蔣礪堂徐蔭
軒可俛指數也

道光庚寅回疆再擾許玉年從提督固原楊侯赴軍營
戎馬籌邊西歷萬里有西域詠物詩二十首一曰土雨
西域無大雨或竟終年不雨草木萌動率驗之以風風
有時挾土淨澄如霧物更暢茂謂之土雨一曰明霜霜
如密霰日中閃爍有光過午乃止寒氣凝結而成也一
曰樹窩紅水河西喀什噶爾千餘里有地皆樹曠與天
連翳不見日一曰鹽池迪化州南池長八十里風擁鹽
出堆纍涯畔如山商賈運載不絕無分官私一曰紅柳

漢書西域傳顏師古注云檉柳河柳也今謂之赤檉枝
榦皆紅一曰白楊中榦直上如立竹旁枝無橫出者一
曰夏草夏草冬蟲生雪山夏日葉歧出類韭根如朽木
凌冬葉乾蠕動化爲蟲入藥極熱一曰雪蓮生雪中潛
往採之則得一聞人聲倏不見矣一曰沙棗類棗而小
味甘微澀肉似細沙一曰胡桐漢書西域傳孟康注胡
桐似桑而多曲師古曰亦似桐不類桑要以孟康爲確
其樹徧生沙灘或數千百里成林但可作薪回語胡桐
譯言柴也夏日液自根流出如琥珀爲胡桐淚師古謂
可汗金銀者是也一曰孔雀漢志罽賓國產孔雀罽賓

近于闐故回疆往往有之一曰天鵝絕似鶴惟嘴與掌
似鵝耳晝夜在水中鳴聲清越以長一曰紫柳菊柳樹
生花色紫纍纍成穗小者如拳如杯大者如升如斗若
伊犁柳花則色綠而小如藥矣一曰白桑椹色白微有
黑點絕似蠶腹味甚甘八城處處有之回夷多取爲糧
或釀爲酒一曰芨芨草漢志曰息雞太平廣記曰席箕
其草冬枯而不萎高四五尺性至堅韌以之織物其用
如竹惟喀拉沙爾城東特伯勒古產者實心可爲箸一
曰莎莎柴有木盤生土中回夷取作薪一曰沙雅梨西
域梨甲于天下今庫車屬之沙雅爾產尤佳一曰哈密

瓜種極多以表裏俱綠子少者爲最瓢紅黃者次之而可遺遠久蓄要尙不逮南八城所產爲尤佳也一曰葡萄大宛傳宛左右以葡萄爲酒漢使取其實來種回人謂葡萄爲奇石蜜食乾隆時移根禁苑有 聖製詩注云魏文帝詔寧北西國葡萄石蜜石蜜之音頗近回語豈當時亦曾見此耶一曰普爾錢回疆以赤銅鑄錢曰普爾一當五每五十爲一騰格回性喜藏盈千卽窖之雖貧甚不取用丙戌庚寅賊連擾鈔暴幾盡玉年少喜作山水花卉嘗仿司空表聖詩品作畫品二十四則出關歷塞外諸城見西域紅柳彌望戈壁時於高堂巨壁

及尋丈縑素欣然命筆薩湘林自官蘭州以至輾轉於喀喇沙爾烏什哈密諸鎮之地與玉年交最久嘗爲題所作孤山補梅圖卽次其邁陂塘詞韻玉年卒於安西湘林爲作家傳

嘉定錢氏師承諸賢可廬旣勤十蘭旣之及二雲匪石尙之豐芑皆以實學相切劘吳縣孫和伯義鈞從李尙之游治鄭氏禮許氏書及九章三統四分之術其尊人壽之明經亦出詹事之門所居吳郡迤南東郭里志稱爲小滄浪明郭雲故第嘗請業顧南雅南雅壽壽之詩有追風有驥萬事足聽雨論交十載心之句華亭布衣

姜燠下榻東郭園中和伯繪事得姜爲多芳及音律陳
石士自製樂府恒屬和伯訂宮譜其爲沈匏廬題閉門
覓句圖效卷中潘舍人曾沂雙聲疊韻體云嘉禾饒清
曠習靜此郊居夾徑森竹木陰翳生園墟靈貺邀簡翰
耽吟聲唳晤松風雜林籟冥贈皆瓊琚焉用翦枯蒿裙
屐從友于賤子羈江國蝮蝎甘轅駒星終輟吟弄門無
長者車扶伏同屈蠖沈潛伴僵魚結契旣零落古處聊
容與及君隨旗鼓角韻相歌呼斗酒載未晚弗復嗤吳
歛又有句云不辭鷓鴣卑棲志且逐魚龍曼衍來卑栖
亦以疊韻對也

武壯公烏蘭泰字遠芳從征張格爾立功累官廣州副都統從養尙阿征粵西賊往羣帥中最高稱忠勇與向欣然不相能賊久困於永安州武壯軍西南欣然軍東北咸豐二年二月賊潰圍出犯桂林先是公言東路祇壽春一營宜益兵爲之備而欣然力主兵法圍師必闕之說請開一隅以縱其出策遂不用至是果從缺處犯壽春營突圍東竄所過無防兵公追至古東沖進至仙迴嶺之大崗以追賊遇伏中礮歿孫和伯弔以詩云臨賀郡南震金鼓壞雲如山壓樓櫓彈丸之水斗形城穴蟻社鼠紛縱橫上相籌邊駐旌節龍驤虎賁俱從征鄴都

李郭歎師老遷延孰把櫬槍掃元戎安坐敕受降填坑
鑿隧飢鷹颺窮追軍帖今何迫壯士長驅峭匪阨已教

踞險失任囂誰使捐骸喪烏獲同時永安死事者有總
兵長瑞小泉長壽希彭以追賊龍寮嶺歿于陣瓜爾佳
氏喀什喀什辦事大臣死張格爾之難塔斯哈之子也

王定甫詩兩長好兄弟忠烈出先代謂此

孫和伯安徽陷賊巡撫蔣文慶死難詩蔣尉龍山輕死
盜巨先牛渚失援兵謂署按察使張熙宇督兵小孤山
先潰也文慶字蔚亭隸漢軍嘉慶甲戌進士累官安徽
布政使王侍郎植爲皖撫振裁清查皆倚以辦

文宗登極侍郎首薦公逾年遂代其位粵賊陷漢陽燒漢口船盡爲所掠脅從始盛陷武昌東下賊鯨蔽江數十里江督陸建瀛潰自九江輕舟過皖城遣人報曰賊衆不可當制府已歸守江東公遣飛騎邀入城及江不見舟而人心去矣時周文忠奉朝命助守安慶不時進而以書來盛陳退守廬州之計公太息曰旦夕望若來同死守乃教我走乎退將安往自裁不殊遇賊被害建瀛以制府統兵趨上游沿江守兵皆視上游聲息一夫輕退不恤其他旬日之間兩藩隨陷建瀛矜而褊意氣甚盛公舊爲制府屬吏牽制錯迕以至陷敗蒼黃魯通

甫謂壽春鎮恩長有治軍之長建瀛奏調爲行營翼長
公抑於統帥不能力爭臨敵變易將佐客兵不足爲用
欲經營戰守嬰城爲一日之拒豈可得哉當建瀛統兵
迎剿周文忠心知不濟乃藉口留討鳳穎諸盜亦不能
稍資應援和伯詩周郎陸弟無勲業楚尾吳頭有戰爭
益兩譏之

譚仲修宰合肥時最錄邑人徐西叔學正子苓戴子瑞
學博家麟王謙齋典簿尙辰所作爲合肥三家詩鈔西
叔一字毅夫居巢湖之濱龍泉山號龍泉老牧乙未舉
人與朱默存暨謙齋有三怪之目師事姚石甫咸同之

際天下大用兵淮南異軍特起兜鍪貂蟬百十而贏西
叔故客池州守陳源充所游江忠烈曾文正戎幄與英
果敏爲昆弟交薦古自得卒投老故山以竟其業詩尤
極其詣力果敏嘗爲刻於潁州其遼陽尉歌贈永將軍
云銀潢秀揭天中衢將軍英勇雄萬夫早師黃石晞孫
吳龍孫鳳子天馬駒偉略欲銘狼居胥威聲遠震醫無
閭里門拳曲壯心熟杯酒豪談目眦裂遼陽大盜工作
賊峻法如山索不得海風打船浪花舞將軍捉生如捉
鼠古人開邊重首功白奪人頭懸腰中將軍不殺眞英
雄三尺之法定爲例峭格崢嶸刀筆吏可惜將軍方盛

年一般閒散頻投置部曲銷沈賓客稀林花峭蒨亭臺
閱騎驢學制野人裝射虎愁逢灞陵尉座上常容脫帽
人帳中妙選彈箏伎金刀夜語星辰動牀頭猶作沙場
夢胡蘆陰底勤抱甕有時撫髀還一慟弄粉研朱作花
鳥風流愛寫湘江草餘技猶教十人了去年洋舶犯中
國垓獸釜魚突猖獗誰縱長鯨入大壑坐使中原氣全
奪黃金臺高白日暮露車便下桑乾去躑躅悲歌月將
曙此乙巳公車時作也

西叔聞高謝塵喪歸云素輅遲回問首邱失羣燕雀也
嗚啾羈魂應識還鄉樂重壤難埋沒世憂同學幾人知

叔度賢妻可解謚黔婁寢門舊淚春衫透潛德無名來
者羞謝塵名凌雲隸學官弟子籍世居廬郡城外北關
學博行狷少許可丁酉擊家去之巢湖之姥山丁未春
客死東村門人贖金以斂而歸其孥西叔爲作哀詞
揚州之陷以咸豐癸丑二月先是賊圍長沙朝議以陸
建瀛扼九江賊窺武昌建瀛棄險失地以梁山蕪湖防
兵遁歸江寧湯雨生嘗上戰守方略陸笑而不用向忠
武援兵至則城陷九日矣時

文宗命江蘇撫臣楊文定倉場督臣楊殿邦分守揚州
賊旣陷江寧鋒益銳有土人江壽民陰款賊括金縉三

十萑曾賊求緩師全城實爲自肥計揚人以款之足恃也爲所紿賊至淫掠焚屠無一人脫者陳星台久陷賊中乙卯冬從廬州逸出與徐西叔相遇於三河行營爲作今夕何夕行紀其事其記戊午廬州再陷謂撫軍福濟起家翰林喜筆札爲人嫗而熒聽藩司李孟羣有能聲恒寢於煙居中柄事多其姻族少年亦無曲筆

道光乙未番禺侯康君模與弟度子琴同舉於鄉時稱侯家兩經師君模史學尤深著作等身治穀梁傳考其涉於禮者爲穀梁禮證放裴松之注三國志例注隋以前諸史其成者後漢書補注續一卷三國志補注一卷

其讀史詩如云唐虞不可追且莫談揖遜誰與襲其名
作俑始魏晉紛紛爭效尤廢興會不瞬中惟唐宋朝逆
取守以順能開忠厚基終享昇平運典午祚雖長兵戈
苦屠鬻或云牛繼馬呂嬴宗已紊誰言天網疏施報理
堪信臣職固當修君權須自振咄哉燕王噲欲學堯授
舜質直疏易肖其爲人阮文達嘗令與周秩卿孝廉鄭
萱坪明經胡稻香茂才同輯四書文話

論詩絕句原於遺山其後論書論畫論詞洎論印論茶
論瓷各擅其勝劉燕庭篤嗜金石曾積五千通錄爲金
石苑所著泉譜爲古泉苑道光戊戌檢所藏古泉按時

分詠得絕句二百首同時金椿毅刺史著晴韻館古泉
述記翁宜泉比部著古泉彙考錢同人著古泉著述考
瞿木夫得古泉研山以名其館著古泉補正厥後戴文
節有古泉叢話呂堯仙有運甍軒泉譜鮑子年有觀古
閣泉說沈講虞有泉寶所見錄李竹朋有古泉滙談古
泉者自嘉道以來乃精前人著錄如張端木錢錄金忠
澤古錢錄方嵩年錢譜宋振譽慶凝父子續泉志張崇
懿錢志新編馬昂貨布文字考倪模古今泉略多不足
信

赫舍里冠九廉使如山和朱草衣荆江夜泊雜詩云鵲

尾煙青火正然被池寒嫩不成眠春妨花老宜遲放月
怕雲生宵久眠姑射仙人原好潔維摩天女愛逃禪銀
釭顧影增惆悵豆蔻梢頭又一年無定芳蹤託短檣櫓
聲柔到月深宵心枯敗芰慙游鯨首亂飛蓬擬病雕淚
汐本難通水涸喘絲肯使逐風搖湘波已冷靈飛渺空
覓精魂拾翠翹爲誰再鼓爨餘琴星隔銀河煙抹林弦
索易傳思婦怨箏琶偏動冶郎心搗殘蜥蜴期牢守繡
出鴛鴦費苦心聞說滄溟無限恨輸他精衛化冤禽拚
將珍唾破閒魔安樂何須雲錦窩嬾學時裝梳墮馬愛
留本色掃修蛾慧根生怪塵寰少情種翻教癡障多團

扇秋風休浪擲好將清潔問青娥情韻纏緜得美人香
草之意非汎作香奩者可比廉使戎戎進士由起居注
筆帖式陞授贊善大考與諸王監試者言語齟齬被糾
罷官其兄忠壯公多山殉難武昌憤起從軍積功領郡
爨琴再鼓嬾學時妝自是感遇之辭非同綺語

葉東卿家藏書籍金石甚富嘉慶壬申仿作漢建初銅
尺平安館蘇齋文選樓各藏其一翁阮皆有詩蘇齋並
題其尺櫝云鄭君禮注費人猜未得周遺矩樣來今日
手量銅式出班劉竹引爲誰開寶匣熊熊氣躍龍河豚
米老膺何從從今不攸明枚釋箱篋長收古鼎鐘子崑

臣使相爲英人挾以浮海時贈公尙在潤臣侍讀亟思
侍親資出爲浙江試用道吳昆田詩所謂青紫隆隆成
一跌佞賢藉藉說三期不堪我友天南望白首高堂墜
露危也中途聞兄絕粒於五印度死邑邑抵浙病牕遽
卒潤臣官內閣久於書無所不窺所爲敦夙好齋詩高
潔清深春暮游龍樹寺云酒社詩壇事已陳游蹤獨感
鬢毛新荻蘆天遠思歸權門巷春來少畫輪三尺湛盧
悲黯淡十年肝膽委風塵孤懷難向山僧說愁見飛花
滿四鄰嘉道間閣中如姚鏡塘學峽李蘭卿彥章吳蘭
雪嵩梁陳範川鴻墀湯茗孫儲礪徐星伯松吳西穀清

皋端木鶴田國瑚退直琴尊以商榷文字爲樂至是均
先後下世京洛風塵江鄉烽火憂時念亂時見於辭其
荅丁頤伯云朝回越巷數相存一紙新詩慰語溫縱酒
頻年悲孔顛聞雞中夜憶劉琨仙山不少靈根植滄海
無端惡浪渾私誼國恩兩惆悵幾回攬轡向郊原則崑
臣辱國以後作於酒爲大戶嘗於廠市見宮僚雅集杯
十具價重莫能致也賦詩紀之蓋康熙朝湯潛菴沈繹
堂郭快圃王昊廬田子湄張敦復李山公朱卽山王阮
亭諸公同官宮坊造銀杯十鑄宮僚雅集四字並飲者
人名字號籍貫大戶湯文正公小戶則王文簡公也

當塗唐瑩子瑜自號熙州外史道光丁酉舉于鄉有用
世才厯主敬亭中江潛川廬陽書院兵起向欣然檄辦
轉運於小丹陽庚申避地襄漢間大府禮敬任以筦榷
庚午歸受志局聘省志成書選授懷寧學師主鳳鳴書
院光緒十年卒年七十有二其七十書懷云少壯空拋
日月梭老來將壽補蹉跎殘牙落臏雙螯健短髮羞遮
兩鬢皤辛苦爲誰營燕壘癡聾應早入雞窠臣生甲子
從頭數七十光陰一刹那出手名場再得盧升庭三歎
有遺珠文章未許窺鸞掖慷慨曾經問狗屠况水黃巾
紛寇盜扶風絳帳罷生徒城防潰後鄉圍散愁絕南飛

繞樹烏窄袖單衫捧檄行秣陵城外漢家營非無馬服
軍中將惜少龍驤水上兵六代黯消金粉氣 九重思
聽鼓鼙聲人材搘柱談何易蒿日時艱愧此生陽羨歸
來又鄂州雁行分半守林邱親朋別我淒涼色江漢驚
人鬱勃流不是書傭闌入幕幸無錢癖強持籌交情最
憶徐元直陟屺橋邊舊酒樓烽火千山一洗青跳波水
族起滄溟然犀直與人相逼驅鱷原非事不經表餌金
繒填欲壑衣冠涕淚灑新亭平倭誰繼襄文業惆悵乘
槎有使星白髮生還願未違皖城留滯竟忘歸丹鉛莫
糾編書謬笱斗寧辭食祿微春草弟兄悲遠隔曇花兒

女惜芳菲一樽自效千秋祝松菊常存苜蓿肥

江都孫定夫大令崇禮送小帆閣學吉明之葉爾羌大
臣任云脫將宮錦換征袍前隊軍門日月高楊柳春歸
羌婦笛旌旗光掩赫連刀漢庭西極來天馬周室明堂
貢旅燧中外一家逢聖世此行原不犯秋毫頻年回紇
久輸誠新開提封第八城天子知公能教戰古人謀
野重敦耕頗聞充國籌邊善快靚汾陽壯業成他日八
州資作督通城定與卜先聲音節頗爲壯朗吾鄉小湘
大令文焯從戎曲云玉門關下飲蒲萄霜氣稜稜逼戰
袍醉後渾忘家萬里枕戈笑看月如刀亦有唐人遺意

至云夜半驚聞傳羽檄將軍頃刻破完顏則未免趁韻
矣

易州有木瓜海棠春花如海棠秋實如木瓜而小甘泉
李楚珍易州雜詩微材亦何幸聲價滿京華秋老碧垂
實春深紅著花來從三輔地分入五侯家尤物終難棄
臨風莫漫嗟謂都中貴家取以饋遺也近歲節菴前輩
于役 崇陵嘗以見寄

善化孫子餘侍讀著有蒼筤集詩十卷文十卷畚塘芻
論三卷河防紀略四卷鹽漕錢幣河渠兵制多所論列
粵賊出湖南數上疏言得失方粵事起賽尙阿受邊必

隆乃往視師邵位西爲十不可之議請上之格不行師
果無功被革遣嗣賊躡河南北賽尙阿徐廣縉並以寬
旨赴軍前自效子餘言兩人督師失律罪大不誅且用
之無以申軍法示天下風采暴露其自江陵舟行達常
德感事云靜夜臨滄流東望不見月槭槭蒲葦鳴恹悞
肅毛髮操舟者誰子昏黑倏出沒狐鳴荒社間塘突來
劫奪獵人張高罝捕斬豈可脫此曹安居日負耒事耕
垆甘此鈇鉞誅苟冀旦夕活朝廷法寬大在盜義必殺
士師柄三尺哀汝不得拔汝罪將誰尸無辭眼有血荒
政古所難撫綏寧不勞日春一石粟不救萬腹枵婦子

相提挈連年無定巢國家憂度支百蠹剔紛囂寧知聖
人意廣大如唐堯疾苦苟上聞優渥不終朝不見比歲
詔惻怛傷哀號及茲獻當亡尙可收羊牢持之更須臾
骨肉生蓬蒿地力有必盡天險非可爭北人昧溝洫南
人勤畚耨強奪蛟龍宮闢爲畦與町懼其反侵軼隄垵
連長城室廬聚婦子畚築土木興咄此下澤居何異長
平坑萬死易一飽徼幸終何成作歌諗當軸庶爲知者
聽指事造懷有以自尊其體

年例臘八日中正殿送崇呼圖克土囊事排當極爲烜
赫以麵作鬼怪狀送至神武門西棄之謂之摺巴荅索

綽絡文靖公詩云雨華峻閣插青冥法鼓金饒震萬靈
佛意去邪期務盡鴛鴦橋畔送巴苓文靖集十二卷率
多漫與絕少完篇其小詩間有可誦者海淀雜詩云碧
水紅山罨畫廊菊花澹冶桂花香忽逢開寶閒鸚鵡絮
絮風前說上皇松樹畦長擁釣磯水光山色晝依稀風
鬟霧鬢人多少疑是前明舊浣衣閱武樓前秋草深重
陽天氣屢晴陰玉峰塔影如招手待我登高鸞鳳吟

北人爲金石之學者大興之翁偃師之武階州之邢雨
民武威之張介白皆爲世推重他如素蘭畦廉訪多藏
漢銅器以及虎符鵠印欄具帶鉤弩機泉布搜采甚夥

查恂叔得嘉祐石經周官殘本疏其原委訂其紕繆作
嘉祐石經考徐星伯西域水道記于漢唐以來碑刻皆
錄全文並記尺寸于燉煌搜得漢沙南侯獲碑唐索勳
碑李氏修功德二碑邊袖石及南樂段筠坡錫由嘗佐
沈匏廬撰常山貞石志滄州王侶樵國均著滄州金石
志宛平楊翰息柯著粵西得碑記一卷李光庭著吉金
志略四卷通州劉孝廉錫侯得唐李丕墓志並於潞河
東得唐瀛州景城主簿彭君權殯志銘爲之跋尾證明
東漢漁陽郡治潞萊陽趙北嵐嗜金石自署所居曰百
漢碑齋初涓園有吉金所見錄十六卷翟文泉著有隸

篇四十五卷益都楊栩與桂未谷郝蘭皋友善有徙建
北齋臨淮王碑記棲霞牟農星房有鄭固碑跋日照許
印林有永建五年孝山堂食堂題字釋文格伯敦考釋
海豐吳子苾閣學有據古錄及金石彙目分編魚臺馬
鐵橋星垣有漢碑錄文嘉慶中安陽袁氏于清涼山修
定寺得唐宋金元石刻十種刊入安陽金石錄補遺偃
師段襄亭嘉謨宰武功輯武功所有碑碣銅器爲金石
一隅錄大谷溫元長忠善濰縣陳篋齋介祺均富收藏
篋齋彝器沙器周印漢印秦詔版漢魏六朝造象皆至
數百件王正孺師好古晚出賞鑒尤精嘗謂商器父乙

父辛等款識舊說爲作器人名阮氏謂爲作器次第攷之曲禮外事用剛日內事用柔日鄭氏注內事如宗廟之祭是陳氏注剛日如甲丙戊庚王柔日如乙丁己辛癸按彝器有作文父日辛烈考日庚等識則甲乙明爲紀日無疑其滂喜齋商周彝器歌謂近人釋齊侯罍得週黍叻三字韻學家附會爲周七韻甚于說古無歌麻者及得齊侯中鬯則又爲逆黍始三字七韻不能成爲定論矣以此知古器文字不可強識誤會如是尤塙論也伯熙爲劉平國碑釋文與張文襄異數字李仲約侍郎以所釋爲當爲詩讚之有鬱儀重出更生在手釋新

碑字字香之句闕特勤碑在三音諾顏之哲里夢光緒
丙申他塔拉文貞公訪拓寄伯熙伯熙爲之跋尾自記
其少時讀四庫提要卽省識此碑嘗作詩送表兄鄂特
薩爾巴咱爾郡王用特勤字周蒼生見而詫之余乃繙
提要以示云云王文敏謂仲約於雙溪醉隱集牋引二
句誤釋兩字當爲洋照本模胡所致伯熙不復拈出蓋
傷心仲約之亡也黃仲弢前輩謂意園跋尾精博碑題
云故闕特勤猶他碑之稱故某官也文云君諱闕特勤
者沿常語書之避不成詞耳日照丁氏刻是跋於移林
館以印本見詒今文敏文貞先後成仁仲弢楚澤行吟

亦幸不及見辛亥之亂當時視伯熙起草者今惟沈乙
盦及余在矣

姚梅伯當古選丁篇云治世寬邊屯戍兵糜天粟日月
供惰閒精銳久不蓄鈴馬西門馳軍符下神速三日限
起程一夕四郊哭大弁神倉皇列戶選壯丁父老索子
代弟幼兄還行富戶百金贖貧者迫重刑重刑萬難活
往戰或免生北風吹纛雲整整列腰箭營門傳鼓聲白
日氣爲變親朋難語別僅許道旁見瞠目若死僵不知
淚如霰願生弗力强强力致不祥安知與國事此志宜
激昂丈夫不從戎邱首慙國殤樹立在此行離析安庸

傷瘦馬引云城中無一馬一馬在城下骨瘦手卷沫流
赭力茶無爲意亦捨我聞韓王御馬如御龍其馬肉骨
青方瞳橫槩斫陣飛如熊入陣馬白出陣紅人血浴尻
難汰洗箭瘢入骨蹶復起西風一夜八百里但見奔雲
過關紫近聞此馬沒陣死特續馬圖進天子天子下淚
園人愁淒霜颯颯蓬蒿秋眼中之馬長廢棄拄足城根
齧枯地當年玉勒黃金鞍噴薄天精軼房駟未料人間
有危事吁嗟乎爾羣三十遭鬼屠爾馬雖瘦能完軀昔
者騎者今何如爾不見將軍脫甲南剡趨涉山無馬乘
竹輿讀此二詩可見道光中葉武備之弛

林文忠以燒煙事至廣東與鄧嶰筠尙書均緣是遣戍
壬寅臘月十九日嶰筠招同人集雙硯齋作坡公生日
嶰筠倚百字令慢詞文忠及一飛河帥各有古詩嶰筠
亦作一首文忠詩云中原俎豆不足奇請公乘雲游四
夷天西絕塞招靈旗下有荷戈之人頂禮之公生距今
八百有七載元精在天仍爲斗牛箕命宮磨蝎豈公獨
春夢都似黃梁炊粟荒天遣作箕子此語足壯羈臣羈
當時天水幅員窄瓊雷地已窮邊陲天低鷓沒山一髮
祇在海南秋水湄豈如皇輿西控二萬里烏孫突厥
悉隸吾藩籬若將壯游較今昔恐公猶恨未得周天涯

崆峒之西公所夢恍見小有通仇池導公神游合西笑
何必南飛載鶴尋九疑所嗟公身屢徙復招屏官屋欲
傲猶阻於有司合江之樓白鶴觀居此新宅無多時寄
身枕榔啖諸芋南冠九死眞瀕危吾儕今猶託代舍憶
公倍感皇天慈謫所一生過也得公言曠達眞吾師南
陽詞人涓玉卮鞠膾先製神絃詞懸公大瓢笠屐之遺
像誦公羅浮儋耳之新詩公神肯來古伊麗白鹿可跨
青牛騎冰嶺之冰雪山雪照公堂堂出峨嵋長松塵洗
鶴意遠眞有番樂來龜茲試著紫裘腰笛臨風吹使公
空中一笑掀髯髭

承尊生冰蠶詞浣溪紗云夜讀還如上學時西州門外

草萋萋秋墳莫唱鮑家詩紙閣燈紅人影瘦蘆簾霜白

雁聲低序謂幼時夜讀畢每課小詩爲丁丈仙坡所賞

寒宵把卷情事宛然先生歸道山已十年矣此卽舊句十年彈指水流遲冬儼若與吳彥長表弟醉後話

舊戲成云青青杏子賽頭皮憶爾方纔十歲時儘日貪

嬉書不讀紅揉雙眼跪先師王子和家有老嫗總角時

善能調護嫗年七十時子和有詩云茅檐一帶夕陽堆

知我街南放學回一笑書囊門首接探懷更出裹蒸來

三君於幼時情事皆能寫真至馮公山詩養疾放間騎

白鶴瀟瀟偷空捉蒼蠅寫羣蒙頑劣之狀亦復如繪若

黃仲則入市詩則尤別有懷抱也詩云生平入市顏常
仰譴訶往往愁官長喧填騶從除道來呼聲直欲緣雲
上居者罷市行者停一一低欄過旌仗人多路窄卒難
避頓觸淒涼幼時事蓬頭敝履書塾歸正值天寒凍消
地道逢中丞鹵簿來失足墮溝顏死灰吞聲飲氣哭不
得歸語阿母肝腸摧卽今依然窮乞骨那得車前八騶
列此身憔悴甘已矣萬一宜酬親苦節前途且語車中
人但逢小兒莫怒嗔家中各有堂上親更揩雙眼勤物
色此輩頭角難爲馴錢慈伯嘗言七八歲時冬夜溫經
課畢入內其母蒸飯以待貧無侑飯之物母曰白飯如

棗花香何用魚菜又云兒時隨大父寢老人藉秋白梨
潤肺纍纍置枕間睡覺時竊噉如飲金莖露人生此時
此樂又烏可再得哉

徐子苓四君詠爲吳江陳克家梁叔山陽魯一同通甫
曲阜孔憲彝敘仲平定張穆十洲其通甫一首云通甫
倣儻姿材略龍川亞奮筆俯羣英原原述王霸白雪和
者稀青萍售無價行歌易水頭問年各悲咤威遲病碧
駮夢失瑤池駕狂飈捲疾裝訣語戀僧舍荒岑淮陰城
苔磯老堪藉翩翩七尺軀釣魚應多暇通甫乙未舉人
粵賊踞金陵時有謂先攻金陵築長圍劓賊腹心肢體

自然散落者通甫謂賊之初起數十輩愚妄人耳脅從
既多遂出梟桀招紳科目之無恥者閒廁其間指示引
導於是教則參以泰西軍制略仿周官軍帥卒旅官雜
取漢宋諸色目僭立制度然未有立國之勢宜先翦其
枝葉張角死而飛燕黑山熾仙芝殛而黃巢尙讓橫迎
祥滅而自成獻忠狂皆由賊基未立合散無常殲厥渠
魁則各自雄長益多樹敵莫若專收旁郡營繕耕戰練
習水師使沿江諸賊入穴金陵則成功可望其後大兵
先攻金陵築長圍何桂清以爲旦夕成功未幾潰裂蘇
浙淪陷桂清伏辜文正東征舟師下壓直踞安慶指復

金陵一如所論爲文昌明洞達切於事情邳州清河兩志尤爲世推重同時盱眙王效成約甫能爲賈董之文名不出州里通甫嘗序其文而悲之

衛藏自康熙季年設王官以大臣鎮之打箭鑪外悉設郵站和泰菴西藏賦外松湘浦相國顏惺甫尙書有紀事圖詩王我師馬若虛諸人則從事幕府作爲篇什道光甲辰乙巳間姚石甫再使察木多爲康輶紀行十六卷亦有詩歌貴筑陳息凡以丁未使察康郵草所紀謂蕃僧前藏達賴最尊後藏班禪次之在京章嘉又次之餘如昌都扎雅各部呼圖克圖轉世悉如達賴班禪並

有諾門汗之號其寺院則堪布主之地方蕃民則昌儲
巴主之悉喇嘛也諸部喇嘛不下十數萬蕃民供養敬
禮亦特隆藏中各部設營官次則爲頭人皆管理地方
有磔巴熱傲諸名目其護送行旅者爲鼓操悉蕃民爲
之惟昌儲巴僧俗皆有前藏更有噶布倫及儒本定本
等官蕃俗呼駐藏大臣爲安本駐臺文員爲破本武員
爲馬本兵弁則呼爲甲米蕃女挽手蹋歌且舞胡絃羌
笛和之名曰跳歌莊自打箭鑪至西藏歲時跳以賽神
盛暑於柳林納涼皆靚飾冶容醉後跳舞蕃官貴人聽
者往往擲賞如內地劇戲蕃地不產五穀但種青稞狀

類大麥夏種秋穫蕃民屑青稞爲麵手捏而食之名曰
搯粃更搗乳酪爲酥油和茶作飲謂之酥茶茶皆運自
內地有竹襠線絨之別蕃地無蠶桑織牛毛爲布麤者
爲穉子次爲大綿納哇極細爲璿璿以米星爲最貴諸
布色多敗紅或青白二色間有綠者男婦僧皆服之名
曰褚包其塞上秋懷詩秋入千山露氣凝太平烽火冷
於冰蕃兒居積多成賈老卒偷閒半似僧成館風清頻
放鴿亂峰日落自呼鷹幾聲鐃鈸雲中寺壞衲常燃五
夜鐙是時作也李恭勤世傑章谷蠻村云碉樓鐃鼓醮
番僧競跳鍋莊鬧夜鐙脰骨吹筒觸鱗盃旛竿插徧最

高層謂喇嘛吹筒以人脰骨爲之銀鑲髑髏貯水供佛
佛事後以布印番字經呪揭于高竿徧插礪樓上及山
谷間子舊有鈔本西藏志四卷敘事頗翔實

魏默深詩如豈無妒蛾眉流涕服邢尹感此大化奔懼
爲造物腐均見理趣其所評陳太初廣州雜詩國家待
楨榦吾敢私桃李各有天地身攀附寧非恥縹緲羅浮
雲暉暉映紫水水上有至人自稱白沙子一鼓碧玉琴
千載音未已謂守已教人之法皆在其中蓋別門下士
時所作也

徐雅樵孝廉元勳七里瀧句云山如作親將舟裏樹欲

成龍挾雨飛

劉楚楨經學名家詩慕三唐臥疴雜詠云今年苦多病
及此仲冬月慙無五斗祿何爲腰欲折窮悲僮僕慢慢
我孤且拙泯氣屏聽聞癡聾得善攝慙無惠及人溫言
聊與說幸茲病少間中心忽如結譬如百里程九十防
趨蹶平心憶險艱頓爾消煩熱病中良友來驅病勝於
醫豈伊病能驅意愜情亦怡良朋旣遠隔會合乖前期
幸無念病夫各保歲寒時憂來急自解解去復奚之亦
知解無益不解又何爲離騷志士憤蓼莪孝子悲人當
疾苦中痛思父母慈已矣復何道太息懷憂思病人喜

晝眠夜半結遙想暗雨滴深篁空廊落葉響覆衾冷似
鐵反側殊勉強飢寒老病危少壯吾堪仗望曙如望歲
冬夜病人驚老僕睡方熟對之生善情奇想入非非聊
與慰平生心勞苦轉側不覺漏頻更病苦輕生死何論
功與名羣鼠何跳梁欺我臥牀帷裂我架上書銜尾相
娛嬉檻虎不在山轍鮒不在池困窮欺辱至奚憎羣鼠
爲朝景不上窗小閣叢篁裏何以卜陰晴日出鳥聲喜
人臥畏牀衾晨興慎步履方其疾病時冥心如止水今
復理書策如飢見甘旨堅志擁百城顧盼壯心起學人
之詩所謂無事模鐫自然聲振者也

陳蘭浦京卿少喜填詞甲辰下第歸方以廣文待選取
杜詩語題之曰鏡前細雨詞并舊作都爲一卷選任河
源到官兩月卽告病歸而粵賊起矣旣而賊踞金陵以
先世本上元人凡甲辰後所爲詞併前作題曰憶江南
館詞以寄意壬辰九月之望程春海吳石華登粵秀山
看月同賦水龍吟後十五年蘭浦與許青皋桂皓庭登
山時春海石華皆化去次原韻云詞仙曾駐峰頭鸞吟
縹緲來天際成連去後冰絃彈折百重雲水碧月仍圓
蒼山不改舊時煙翠只長林墜葉西風過處都吹作秋
聲起此夜三人對影倚高寒紅塵全洗珠江滾滾暗潮

銷盡十年前事欲問青天素娥卻似霧迷三里賸出山
迴望鐙明佛屋有閒僧睡其補重陽疊前韻云是誰前
度登高蒼苔屐齒留巖際興來此日也堪重詠玉山藍
水菊有花時蟬無聲後漸疏林翠正危闌縱目夕陽紅
處看城郭炊煙起忽覺秋心浩渺倚西風螺杯新洗憑
高釃酒而今只願八荒無事容我蹉跎長騎款段少游
鄉里便傾壺醉倒山空人靜學希夷睡則念亂之作也
其與陳懿叔書云十五六歲時好爲詩張南山先生時
教以詩法先師程春海侍郎爲言近人詩多困臥紙上
灑呈所爲詩大喜曰此能於紙上躍起者時年二十六

嗜好益多小學音韻天文地理樂律算術古文駢體文
填詞篆隸眞行書無不好楊浦香謂曰東坡所謂多好
竟無成不精安用夥君之謂也乃稍稍減損爾來并小
學音韻亦皆輟業惟讀經史自道所得力謂學當以經
爲主云

嘗於扇頭見貴筑黃子壽先生五言二首邱垵訪羣木
蹠涔索吞舟格限先自拘何以副所求軒房隔紗幔面
牆隱長途障蔽苟不去空自矜離婁求綆援墜井尋梯
防下樓補牢猶未晚慮善先諮周水火異升降金羽殊
重輕物各適其性焉能互爲營曲木畏繩直夜禪憎燭

明忌諱苟相觸讒嫉由之生目不睹電灼耳不聞雷聲
神志各專屬視聽兩無驚其尊人觀察公輔辰敏於政
所至有政聲微時恒飢窮太夫人屑糠粃作粥粥恒不
充鄰有孔先生者貧而好學兩家恒不舉火庭有桃樹
飢則禩庭中桃呼觀察公共啖其家人分奉太夫人觀
察公讀書有疑義輒倚短牆呼孔先生共語析之孔亦
志行高潔士也

會稽孫蓮士廷璋詩文葩豔尤工填詞舉己酉乙科入
資以知府候銓應辟參勝克齋皖中軍事不得意浙撫
王壯愍辟掌書記時軍事急餉不繼浙西嘉湖諸郡已

盡陷餉獨特寧紹壯愍先與將軍瑞昌劾罷團練大臣邵文靖燦以王副都履謙柔愿易制特薦之督團練專司越餉以濟軍而越人已疲甚副都不能爲越紳爲效奔走者類貪污多飽私橐壯愍婁檄餉不如額遂積與副都鬩副都劾壯愍侵官擅威福蓮士旣爲壯愍所委任又與副都故交銳意解紛以爲餉可籌而民不病乃返越以巡撫檄行事越諸紳大怒激副都出疏劾蓮士及浙吏三人以爲巡撫爪牙壯愍亦疏劾越紳四人爲副都黨相持 朝廷下其事於學政張文貞錫庚而桐廬知縣倪某復訐蓮士索賄冒功事于副都露移巡撫

壯愍遂并疏劾蓮士請褫職按治復下其事于學政及將軍讞未定而賊破紹興杭城繼陷巡撫學政將軍皆死節副都逸去論者謂浙事之壞由紳撫之交訂餉事其樞紐也蓮士與潘文勤爲學正同年取其亢藝堂詩玉井詞陳珊士壽祺王孟調星誠之詩合刻之爲越三子集

王定甫咸豐元年正月十九日齊集 慕陵禮成哀紀
二首云玉宸新籙萬方傳榆柳生時薦几筵易水潌澗
蟠壽域長山迢遞溯靈泉勤思卅載神常在永慕雙宮
德倍虔期禮倖陪朝士列聖哀猶動九原天憶從雉尾

識龍顏十載親逢國步艱
秋雨薪焚愁瓠決春風干羽
惜苗頑廟堂繼述眞無忝
郊壇尊崇遠莫攀計日昆侖
還告捷永將弓劍奠荆山
時林督師道沒潮陽賊氛方
惡也

句容陳立卓人少隨父客揚州讀書能求是從梅植之
授詩古文詞得其義法從凌曙劉文淇授公羊春秋許
氏說文鄭氏禮於公羊用力尤深成義疏七十六卷他
著作有爾雅舊注白虎通疏證說文諧聲孳生述句溪
雜著由辛丑庶常改刑部授曲靖知府道梗不克之任
卒於同治乙巳其題曹葛民石屋著書圖云手我一編

鑽燧經三科九旨發蒙局董何絕業分明在老去蹉跎
兩鬢星謂所編公羊疏甫脫稟也

咸豐王子六合徐彝舟太守以檢討家居與權縣事温
紹原北屏倡率城守留辦團防北屏素得民心戰守皆
民勇屢撼賊鋒以小邑當其衝多方應之民樂爲之用
皆出死力其和北屏軍中紀事原韻云太真威令重如
山百里巖城鐵牡關妖窟羣驚犀火照廉泉早卜蚌珠
還當門赤棒能行法崩角黃巾漸革頑回憶兩番征戰
處親援桴鼓左輪殷宗岳呼爺不敢名山頭草木盡疑
兵星連流火宵然炬霧鎖長江曉破營錫命頻聞天語

寵投醪久識士心傾樓船燒斷千尋鐵渾濬爭功事已
明下蜀街頭甫罷兵四郊又賦捕蝗行空拳欲識珠成
米眾志猶鎔鐵作城歲計庚桑居畏壘宵深王莢問君
平萬家齊下和南拜救我慈悲佛再生強弩三千學射
潮壯猷欲馘慕容超微文偶觸參軍怒寬議終邀聖主
朝圖報益教心耿耿飛書不覺夜迢迢餘情更續金荃
集义手吟詩興未消北屏大興人以伯祖屏山官湖北
漢黃道遂家黃陂賊自起廣西殘全楚突江西順流數
千里陷江寧揚鎮相繼失守六合逼金陵西接滁來賊
至輒敗破賊九洲擢江寧知府以道員用留駐六合

賊畏之如虎有紙金陵鐵六合之謠六年中大小數十戰戊午九月城陷死之李越縵詩云鐵鑄孤城枕賊衝危疆喋血十年中一官強項成名將百戰銜鬚作鬼雄可惜睢陽終死敵更無玉璧爲旌功彈丸眞作王羆塚從此江淮保障空彝舟以是年七月授福寧知府謝恩勤政殿

文宗詢紹原年齒起居及防堵事甚悉回里擬述天眷以告北屏而已不及矣彝舟爲揚州丁劍溪作從軍行謂朗州舊帥立朝有本末在軍中食不甘味刻刻以滅賊爲念卒以任使非人僨事獲罪朗州不知何指

陶臆香每飯後必三千步行之四十年至八十餘猶健
文宗嘗以此詢之有句云八十年華朋輩少三千步履
聖人知

雪橋詩話續集卷第七

雪橋詩話續集卷第八

遼陽楊鍾義撰集

吳興劉承幹參校

成廟御批果勇侯楊芳摺曰楊發田大武汝須加意管
教俾他日皆成有用之材發以都司戰歿揚州平湖張
海門輓詩云親從西海縛長鯨曾使周郎浪得名久惜
侯封遺李廣并無詩史紀花卿屢生髀肉身先老一擲
頭顱世始驚憶得酒壚談往事佩刀衣袴尙錚錚先
皇丹筆畀通侯愛惜人材詔語優輦下箋章論宿將關
中豪傑厲同仇徧陽縣布城垂克趙壁傳餐鼓忽收田

九判官今在否可能一劍把恩酬

楊至堂河督以增聊城人道光壬午進士藏書最富構海源閣藏弄多舊本所歷訪問名士學人輒延之幕中官河督時禮延包慎伯問治河方略慎伯已七十餘矣性樸直議論有不合輒呵責背譏至堂聞之無幾微拂忤所刻書延高伯平主校勘任開歸道時適移任匝月餘而河決尙留汴辦嚴未行至堂籍在任所得三萬餘金移交後任云吾幸得免然河決則吾未豫事之過也敢享其利乎後在清河時粵賊由南而北倣擾中原清河四面潰壤所轄之境晏如僉以爲厚德所致周弢甫

詩下士或尺寸必與其討論搜奇及搜勃蓄異矜瓊璠
煌煌海源閣吞吐納百川津逮伊何人吾昔窺其藩文
孫鳳阿舍人嘗以楹書隅錄見贈

吾鄉姚氏昆季秀出秋士子連而外子文先生文喆有
紅鹽館遺詩孔宥涵有題感逝圖二十一首其幽巷煙
蘿一首爲秋士駕部作也詩曰充間有詩書抱膝有歡
喜出門巷無車入門牀無米君坐昇平年兀兀復如此
後死閱離亂老淚滴溝水秋士幽曠之才能以窮死得
此詩可以無憾矣

丹徒韓叔起爲詩用已意孤直道上盡滌嬉游酬應綺

靡奇怪無益之辭其閱小倉山房諸集四詩痛斥詩家
積習嘗謂海內論詩相合者惟朱伯韓王子壽強賡庭
耳遺恨云太息忠靈竟不歸老臣一去直言稀史魚尸
諫精誠竭劉向心丹嗣續非慟哭遺章沈劫火淒涼舊
迹掩朝扉夜臺冥漠無窮恨魂魄猶應傍紫微此爲韓
城王文恪作文恪以道光甲辰自河上還朝四月戊申
晦暴薨時穆相妨賢病國林文忠坐罪廢虎門防撤海
氛益熾公造辟陳詞力爭不可得退草疏請罪大帥責
樞臣樞臣百計沮傷使之憂憤危苦比懷疏趨朝待漏
直廬中遽自磬效史鱗之節疏卒遏不上孤子沆材智

下無以成公之志馮林一志墓之文亦不敢一道其隱
愍曲痛雖愍飾之贈視常例有加而孤沈大節幽抑未
彰直至

文宗卽位如距斯脫 御筆數百言斥穆耆二相罪狀
吳本深紀事詩天地重光元氣正風雷一動聖威戡是
時作也

西華門外靜默寺有沛天上人傳石刻望谿宗伯所爲
文而昆明湛恩書也宗伯供奉 內廷時嘗在寺居而
沛天爲寺住持有儒行親愛先生先生亦重沛天爲之
傳咸豐丙辰孫琴西太僕見其石在後院檐下臥塵土

中勸寺僧移庋庭閒識以詩云一月招提無過客偶向

荒檐見片石蝸絲蟲迹浮黃埃每有游人誰拂拭階前

偃僕試讀之知出桐城文章伯海寬沛天名出家兄母依

我舉問僧僧不知宗門遺事久茫昧我輩文章誰惜之

先生昔解南山獄曾與禁廷脩史局兩眸漆黑冠布緇

幾箇黃門常笑睜當門想爲便朝趨亦復愛此僧廬居

曲臺論高世不取幸有海寬尙可語旣死乃復傳以文

亦欲此僧傳萬古中朝大官字塗鴉煙煤紙色交傾斜

曷不陷壁收此石後有君子能摩挲我昔喜讀望谿作

何幸僧窗同所託雲山潛霍不可見晨唄宵鐘每相續

卻憶當時韓退之苦將材調惜靈師太僕時入直上齋
授惠邱諸子讀居靜默寺所居園廬則當塗尙書食筍
齋屋後土阜有柎程侍郎所爲賦者丁巳授侍講故事
庶常編修謁見前輩用白名帖升中贊講讀謂之開坊
又須徧拜前輩而更用紅帖其紀恩述懷有姓氏新教
題絳紙之句亦前人未以入詩者

新庶常拜前輩用白帖四通未留館者則

一紅
一白

唐威恪以乙卯殉節武昌少年豪放詩多豔體紀事云
可禁流水惜年華幾日當空一片霞看著芳香看著謝
春風愁煞碧桃花離離花竹雨初晴半晌清風傍檻行

行近小窗知睡穩湘簾如水不聞聲其揚州紀事詩記
姑蘇王雲孃三月廿九日偶作云容易韶華又九旬斜
陽冉冉故依人天公每苦無情思尙自消除一日春亦
有致

定敏郡王載銓爲葉東卿入室弟子潤臣少與同學咸
豐初元潤臣贈詩有云願留召伯甘棠愛莫論淮南桂
樹篇有小雅詩人風切剝微之意定邸詩曰行有恆堂
集同時瑞愍郡王奕誌有樂循理齋詩集秋日懷笠耕
先生萬里班超頭已白幾時博望使重回亦饒情韻
玉田蔣箸生舍人慶第曾宰章邱爲丁文誠所賞異光

緒丙子文誠總制蜀中欲攜之入幕以病辭有友竹草
堂詩文集其至正銅印歌序謂豐潤耕者所得其文西
蕃篆大如今州牧印背左鑄遼陽等處行樞密院斷事
官印篆卽此十二字右鑄中書禮部造至正廿五年六
月日考元史百官志云國初有征伐之事則置行樞密
院爲一方一事而設則稱某處行樞密院斷事官掌決
處軍府之獄訟至元元年始置此印爲至正廿五年造
則洪武建國之前三年也歌云至正之年一方銅山岷
拾得初磨礪文曰遼陽行樞密篆紐斑剝餘青紅憶昔
元綱弛十葉瀛國公子何萋萋黃河挑動石人眼紅巾

競起紛交訂濠州眞人手三尺樽桑鼃采升天東林兒
九四豎子耳吳楚戰伐聲摩空近畿邇時罕巨猾專閩
胡乃煩元戎斷事之官佐軍府察辭蔽訟求民中將毋
羽書日旁午將士攜貳無和衷望風奔北棄甲仗一軍
覆沒成沙蟲土花已蝕蒙古字鐵券正紀開平功佩金
凡流詎足齒庫庫特穆差英雄當年鑾輿老漠北劈正
零落明光宮百年一擲傳國璽何論此物輕如蓬臨風
拂拭爲三歎激昂論古心無窮詩特俊偉箸生子志達
爲余乙未所薦士嘗以是集見贈

洪右臣給諫堵城弔吳甄甫制府詩山下浮雲作陣過

秋風吹恨滿關河時艱雷口屯温嶠事去壺頭困伏波
鬼哭荒原聞敗鼓農耕戰地拾殘戈蕭蕭廢壘寒鴉散
落日招魂帶女蘿文節受知

成廟由詹事至開府不及三載善知人撫浙江江忠烈
公忠源方令秀水

文宗登極求賢特疏薦其能督雲貴胡文忠時守黎平
保擢監司曾文正則戊戌典試所得士咸豐四年以兩
湖總督擊賊致命先是檄文忠帥黔勇來會勦書約文
正帥水軍夾擊巡撫崇綸枝欲死公趣戰急又事事沮
擊軍械輜糧不時至進薄黃州壁堵城賊至眾潰投塘

水死之時正月十五日也吳仲雲先生有死誠得所才
堪惜讒不能行事最難之句蓋忮者誣以不知所往而
聖明鑒其忠忮者卒以他罪獲譴范膏菴會葬文節詩
不堪元夜月長照古黃州

咸豐三年九月粵賊陷田家鎮上竄巴河黃州郡城遷
徙一空庫無餉城無兵太守金菊仙度不可守爲書別
親故賦絕命詞三首有云命婦投繯日雙珠爭後先泉
臺忠烈魄相待已經年先是賊陷武昌公配汪恭人暨
二女同日自經也時府署燬於賊方移治考棚見近階
有井試以長竿得水五尺曰此足了吾事矣及賊至懷

七首刺賊斃一人遂冠服赴井死事聞贈太僕寺卿門
下士黃鈺爲之傳太守之死也包上舍長庚購得其屍
停棺年餘貧不能歸葬上舍鬻田以經紀其喪親教其
孤洪右臣爲賦鬻田歌

青墨卿中丞視學江蘇序許石華詩謂江左自沈歸愚
宗伯本溫柔敦厚之指導揚詩教學者咸奉爲正宗或
苦其持論過嚴而終無能出其範圍自是平允之論武
昌余承柱弔中丞詩危城堅守幾經時不死封疆死法
司呼籲可憐庚癸迫精誠終達聖明知三軍涕淚生前
感萬姓悲歌歿後思書罪書功青史在孤忠耿耿自昭

垂

大定章子和閣讀永康少失怙恃生甫周生母謝安人亦歿鞠於繼母湛安人見其成進士改庶常而始歿子和悲慕無已繪雞聲燈影圖以誌痛一時題詠甚廣鄭子尹爲之跋以爲古之人於爲父也妻者卽母之而盡子道不必其生已也於爲夫也子者卽子之而盡母道不必其已生也故周公制喪服經無君母爲庶子庶子爲君母之條非闕也不杖期章爲眾子眾子兼嫡庶爲之者兼父母若妾不得有眾子爲其子得遂見後條則君母爲庶子具此矣齊衰三年章父卒則爲母杖期章

父在爲母此服通貴賤妾子有以厭降不得三年及期者可以君母包其母是爲之並兼嫡庶則庶子爲君母具此矣若然君母庶子之名特以其異出析言之其爲母子所當盡之道與生已已生者無二也服不可別出又無可別出此周公準禮順情以制經垂教之精意也自世道衰天理之公微人心之私盛爲君母者曰是非吾生也子焉而已而爲庶子者亦曰是非生我也母焉而已於是雖有母子之名而母子之道渺盡其實矣余嘉安人之爲母吉士之爲子皆能盡古人之道而合乎周公之所以教世之爲君母庶子者聞茲風其慈孝之

本心或可油然而起也乎其論甚核高雲客早失怙恃
家中落庶母徐孺人有志行艱苦相倚者數十年雲客
亦母事之惟謹春秋八十高阮懷爲賦燕喜篇有毛裏
雖有殊恩勤同一眎之句尤足以敦薄俗

文宗卽位之初選翰林中善書者以小楷縮鈔朱子全
書成帙以供乙覽嘉興吳仰賢牧騶詩冠禮三加後謳
歌四海初春風長樂樹乙夜考亭書政本先宮府軍需
問積儲宵衣十一載軒夢感華胥

王定甫十刹海看荷遂游高廟四首云鏡瀾斜角錦香
殘閑覓西涯舊倚欄十五年來重一醉亂蝸聲切似相

關柳暗荷深路不知水花紅盡匯通祠鐵櫺關底前朝
水須爲遊人住少時十笏僧寮好面湖荷香吹送嫩涼
俱老僧卻斷紅塵事洗薜烹泉教阿奴城闔歸路柳沿
隄淨業山門夕照西曾是相逢油壁處參差花葉與人
齊曩在春明與章佳立庭都護屢作高廟之游三復是
詩有舉目河山之概

定甫乙卯書憤詩吾 皇承金甌聖智神清明百工思
亮彌四海觀昇平如何嶠西縣黃巾起徼民元年辛亥
春我從丞相行六月朔四日桂州入元旌是日賊返走
中平還紫荆震威千里外追逐可成禽況我有前覆象

州曾駐兵何爲金雞戰偏師匿州城大令敢輒撓諸軍

亂旗槍六月四日賊由中平百丈還走入紫荆是時向

紫時駐象州總兵某帶兵千人匿不出戰與烏威聲猶埒勅兩軍相先後及賊青山坪一戰賊

負嶠恃險螳臂撐雙髻轟後戶宣墟廠前庭十日豬崽

奪蝥弧夜先登向師剿奪豬崽峽遂得雙髻山險將軍落天上卷甲勢

豈停悖哉都護誰不鼓從而鉦雙髻山既破我軍欲星夜進某都統執五不可

花雷走羣兇風門奮空霆逆全等不三日盡弃花雷茶地諸巢遁出山踞宣墟我軍

至十六日復破風門坳斷後賊宣墟賊爲巢四圍踞谿塍圍師豈不周

向後烏前營半月又蹉跎孔村惜虛聲自茲烏向隙賊

逸由雙鵬向密請大帥飭南路進移營而孔村日報勝仗半月紫營猶在甘里外賊得從鵬隘鵬化

兩山閒遁烏南又三匝北師氣徒增官村怒焚舟一蹶憤且

嬰同瘦向師敗官村以不得接應幾覆軍遂胸發疽賊得徜徉去濠州蹋塹坑

南師逡巡及塗詈聞蚩倖桂林時已震先出魁士與瑩

姚瑩蠢茲彈丸邑賊備原可乘其如南北師奔甲同執冰

從容賊溝壘彌月經營成王怒始赫然帥旗肅親征九月

初九日督師奉寄諭切責始出桂林省城師行百里駐都荔息搶攘十月日

將晡軍門來渥頰病餘走偃僂一旅請南荆中樞夜集

議詰旦軍為驚果然孟明將指揮藐鯢鱷一戰龍潭復

再接橫嶺清飛騰十三捷萬眾謹雷鳴十月向提軍病起來營請得楚

兵獨當一面督師悉以北路委之遂有韶潭諸戰直抵州城之下奈彼負固力豈能徒

搏勝中軍憤且前見賊賊愈輕況令南北師轉益水火

爭羣旅又募充如蝸蟻沸羹待彼竄而擊斯言豈無徵

壬子歲除大帥至軍前屢攻弗能破向老乃爲此論或頗笑之矧當積月雨賊計空瓶

罌攻堅詎弗力鋌擊殊未懲二月始生魄龍寮夜開扇

三伏計已虛追擊猶當能古束尾而擊賊尸戮如京前

徒雖出險荒繳失倉虜我復兩翼前張敬修劉長清若張晉

誰令霧雨中山蹊鼓而升兵家有死地大覆巒山陘坐

看釜中魚又成跋尾鯨一朝廢四鎮殘卒歸伶俚二月十六

夜賊窮極走古束冲我師追及大勝迴憶夏洞泉在大師立

營處慘傷血流聲三日僅收台恍然如醉醒時危眾說進

決策將誰憑扶荔幸先著孤城據危傾吾師甫成列賊
至前綏迎荔水一交戈賊徒西北併榕城誰備禦倉猝
兒倒縶咄哉將軍寵閒道窮郊坳崎嶇龍西路雨夜雜
徒乘免胄及國門羣呼聞角崩須臾賊虜至叫嘯萬目
瞠至今桂之人援師疑神靈守攻一月餘癸水流臊腥
向老師徒北行既守荔浦旋復閒忠亦有江郎師源水衷

道疾趨赴省城先賊至守幸完

來結期賊謀始大絀宵遁復牽繩城中臥王羆久矣病

莫興誰令追師弱戲若驅羣蠅五月湘源哭孤城慘零

丁小堅大之破詎爾溝壑經乃我萬師及城中火熒熒

蓑衣渡頭船蹙若亡六颺

四月一日賊去桂林撲全州
追兵僅七千人又弗能力援

全守禦極堅迨和鎮春領大兵
至城已屠矣然賊走極窘也
東方天馬空蛟鱷又滄

溟此賊最狼狽飢颺折翅鷹
蓑衣渡賊幾被殲東走
滿江阻夏漲

有庫乃虛承經歲說邊防楚山空峻嶒粵師雖踵及疲

敝亦可矜三月營道師圍攻如缺薨秋來健隼翮肉伏

重騫騰柵桂路千餘寸尺多鋒劖指揮儻如意火炎是

騰螟跋前而疋後手足胡凌洩
賊撲永不遂而竄踞道自夏徂秋後逸出擾柵

桂閒下灌等不得聚殲可惜之至
八月圍星沙分軍賊渠獍妙高一峰

踞羣咻聚蚋蟬熊湘十萬家比屋明宵鐙誰知完玉璧

猶藉將也榮嶽麓對江出客來話圖經圍師又一闕賊

走眾目矜自此勢成逆高原逸奔麇可憐師楚粵千萬

費水衡兩月憶城中日夕雷霆轟歸來性命得忍復思

兇凌

長沙之圍賊渠蕭朝貴自柳率眾先來死焉向師病起至自粵而城守完而賊得復竄又以嶽麓不

守我師遷延不成圍也

江漢幾波濤霍廬悉荆榛長江千里翻石

城百雉傾吳頭楚尾地三載廢犁耕渡河萬羆豹閒關

乃邢沼妖氛數翕睂鬼髮遽鬚髻禍難斯云極青天誰

可擊去年秋風利戈船聞結矧巴邱始微蹶郢鄂旋崢

嶸直下收斬黃居然高屋瓴莽蒼列城復飛揚殘捧零

快哉師墨經此舉何觥觥溢浦及春早江波暫涸渟況

當滬瀆還黔池亦波澄急羽海中到威聲傳楚庭河北

又疊捷連鑣翦梟翎林李

林鳳祥李開芳

兩賊顛西街正天刑

險渠埽其穴功孰稔侯京又彼夾江壁戈矛戛砮碎餘

皇鼓鼙振坐拔三山青北路旣蕩平便南師躍俾儉瓜

揚輿版牘徽黻整垣閎憶從軍事來喜氣茲芽萌人家

買香醪田老蓄肥牲朝廷懸上賞五色備統紘樂部習

歌曲八音譜韶韻南風忽不競一蹶盜瓶甌建業天下

雄師中誰實丁我知眼中白翹彼糞上英未見趙括敗

幾能馬謖爭連城走奔電萬眾愁飛螢坐使江州甲孤

拳徒努睛橫空長妖燄瓦缶復碎訇樓櫓旣不前豺狼

計環生東窺黃石壁南泛鄱湖萍可憐全功失徘徊星

渚船巍巍楚材雄數月翔湖汀古來重樞機一失百殆

形彼狡計漫出燼餘得炎蒸鴟張又楚粵蠕蠢及鄙鄙
烈士擬上章屨功當擊捭道途切齒言害身宜決癭幸
叨 聖人鑿褫奪快羣憎頗聞臨淮師壁壘氣若烝鼓
行下襄河眼空蔑狸狔蕪湖又連勝兩載虎穴凭湖內
重結束橫戈酌宮亭乾坤大幹旋拭目數豪英餘于下
自鄙因人本磴磴生更無聊殺匣慙青萍儻其燕然
勒猶能橫吹賡何時奮突管起舞須酌酌論功罪亦誅
誰能逃刺黥擬杜北征於兵事頗爲翔實其擬古諸作
亦皆具體少陵自謂詩不工顧好爲之當其爲之不顧
於人惟欲其意之自得而已時方窶艱天下騷然惟其

一切所爲必求徇乎人之好惡而壹至此亦見道之言也

孫琴西太僕督府沈公挽詞云漢法文無害秦風武克剛如公宜耆皓蚤譽况龔黃吏牘牛毛細僮書馬足詳有才方世用何遽惜淪亡吳楚猶分轍芻蕘屢獻疑兵因屯駐弱財以算縉衰弧矢威終用花門事可危未知天下計輕作管中窺船官垂七載肺病輒三秋重幣求奇器遺章尙鐵舟心眞匪石轉事恐與生休卻恨中行說精微爲虜謀最愛資材美猶須記覽全豈聞宣政世不讀建隆編制節雄三鎮通家託二天

公會試出
舍弟門下鑄磨

都未盡生死一潛然文肅幼時母林輒夜令獨趨闇處
已卽從之弗使知以練其膽性沈毅有識於世所怵蔑
如也咸豐五年由御史出守江西不數年超擢開府以
謂亂源所導自乎吏治吏治不飭兵端不息於驕兵悍
將無所假貸而懲猾吏尤力歸里任船政事及治兩江
五年所誅殺以數千計謂去一豺狼則鹿豕之脫其牙
角者不知凡幾淮徐伏莽爲之一清光緒五年卒於位
琴西謂金陵清涼山麓舊有一拂先生祠祀宋監門鄭
公俠己卯春有受當道意旨者請以閩二林公配食辛
巳得江寧續志則所謂當道者亦與末坐口占云一拂

清風自渺然如何簪組集羣賢今年更比去年好又有
困來郎罷前意似有未慊者挽詩亦有微詞要之遇事
能斷巡臺一役尤爲外人所讐服也琴西嘗謂永嘉經
制之學開於鄭文肅至文節陳公集其大成通今知古
最有裨於實用葉文定公上孝宗劄子云今日之患兵
以多而弱財以多而貧挽文肅詩第二首頸聯卽用此
語自謂慕水心爲文平生科第宦亦略相似而退居
皆自建康則其尤相似者

陳梁叔受業於潘四農力學能文嘗有句云百年飽看
無窮事只有生前酒味真庚申閏三月金陵師潰梁叔

時管記室張忠武所死焉吳本深追悼云健句陳梁叔
多年思暮雲亂中聞死賊別日語從軍枉管元瑜記難
求孟浩文尙憑眞酒味遙酌一哀君

克齋刺史慶安治安寧州有聲己未回匪攻城募州人
禦之城陷死難吏目杜鴻金同死吳仰賢牧騶挽詩云
曼纓長劍手彎弓聞道連然士氣雄頗解父兄呼僕射
可能子弟似江東城危官已成孤注寇狡兵先約反攻
萬眾投戈臣死職握拳未洩寸心忠赤手誰扶大廈顛
叫闐聲厲徹雲天貞魂直傍羅青塚

前朝州人
死忠者

殺氣難

消太白躔九死不忘臣有母一棺歸去橐無錢荔丹他

日宜祠廟配食無遺小杜賢

楊果勇侯孫恩柯恩桓俱能詩恩柯山莊句青山不用
閒錢買曝背南榮看飲牛貴陽王勇壯後四世五忠王
健臣禮乾集唐云名如有分終須立詩到窮元更覺難
天池子在靈州東北百五十里道光甲辰錫後安赴京
兆試經此有紀事詩云夜投天池子僻在長城窟荒邨
四五家沙漠無垓北窗前馬伏櫪風裏駝鳴圓欹枕未
成瞑叩門聲何疾女子拭面啼男子腳不韞云來諸健
兒戍邊榆林卒供億罔敢匱粢糧如盜頡感悅使吠虜
不者徇以扶聞之投袂起瞋目憤所切出與健兒言于

爾實有缺天家畱員長啟宇到回紇邊防日益重負戈
匙休歇倦言結襦儀戚戚新昏別水萍與兔絲引蔓事
况習旣不以家爲而忍自挑達歌者同母弟封侯爛助
闕豈無將相種所賴精神刷健兒聞我語髣髴中心慙
相顧輒引去若獸走殲狻吾亦從此逝瘦馬踟殘月主
人迺愛客男婦道遮迤卻攜所嬌女髮亂顏如雪長跪
齋涕洟狼藉粉黛濶夙夜恥行露此志敢弗揭鴻雁哀
磬磬中谷泣以愒湛恩汪濊時遐陬易蠶胼庖丁闔導
窾牛刀誰善割平生胞與意相對惘然失記取甲辰春

三月十五日

潘鄭菴師官少農時屬秦宜亭繪藤陰書屋勘書圖後
安都護爲題四十韻云漢設校勘官厥職故非細準以
中古文字字參同異同異豈足辨于是辨名義非唯名
義然以酌古今制非唯酌古今參兩見天地乃知天地
心所託在文字文字之不正天地失定位所以四部書
眞本集中祕劉向任經傳柱國任方技東觀有馬融蘭
臺有傅毅佐之劉駒駮嗣得伏無忌折中用延篤解詁
推盧植炳炳文林館博聞齊宋繪郁郁麟趾殿年少周
姚最洎乎顏師古下焉訖蔣乂檢正七經疏上言首李
至用是唐宋後往籍復大備故凡儲校精書以多爲貴

必發廣內藏窺見緘滕密爲政宰天下讀書宰萬世既
近天子光斯救古人弊自非侍禁中鮮能善其事吳中
潘內相司徒掌邦計舊珥貂七葉坐擁書百匱金石唯
臣爲羔羊自公退祖庭垂葛藟繁陰覆梁欂沉復異聞
多輒舉詩禮對鄭箋溷釋文分流別涇渭坊記諸篇闕
探源資補綴潛研堂說雌黃無妄下魯魚抑亦次豁然萬卷
破遂使羣書治東京鄭司農春秋汰篇表上下二千年
題銜茲克配吳門考證家何氏實先輩南齋楷法工自
寫諸書記心畫與眼學誰云不堪貳此境良足羨此事
誠非易羣言散萬殊千秋凝一睇秦老畫有神片紙無

窮意何必歐陽公詩圖篇十四歐陽文忠詩譜序春秋
史記本紀世家年表合以毛鄭之詩爲詩圖十四篇結
語用其語也越縵先生亦題五古一首略云東吳治經
藪惠氏爲適傳九經徧制緝古義遂以宣書勘梅傳僞
易抉虞義偏折衷康成氏一掃性理禪良庭與古農高
弟追淵騫△注復孔籀鉤沈補唐賢嶽嶽褚員外士禮
窮鑽孳力闢君善謬功在賈李先復以王光祿段大令
繼之爲六君子西莊嘉定人後居吳門懋堂亦由金壇
遷吳門

高伯足年十七舉咸豐辛亥鄉試計偕入都寶於故協

揆宗室肅順之門肅順用事數起大獄顧頗禮士及事
敗往來門下者皆自異獨伯足有死生之誼嘗爲中興
篇云 冲皇受賀朝明堂國有元老平南疆鍾山九隧
迅雷捷掃穴萬馬眞龍驤五年荆襄畫地勢一旦揚越
通天光遂連長圍舉京觀轉策飛將窮飄颺假息周星
不更貸長鯨短狐從滅亡景風協律開慶典亞相金印
題紫囊介弟虬服最輝映次列圭璧銘鐘旒采薇采薇
詠未已汰遺部曲耕資湘別留艤艫置十鎮率然首尾
江防峻侍郎威略湖海知霆軍轉戰兵無頓七閩督師
匡復才西征宿將宏農儁尋常躡履牙帳間開府連圻

對昌運肥淮壯士起中原一旅平吳竹當刃文致太平
武定亂王民執虜同虎奮北塘要盟我所銜八城白帽
猶犯順程杙應歸黃髮翁艱難念自先朝進

文宗詒謀深且奇默禱申甫當傾危翰林潘卿諫台趙
薦疏但入皆鎮頤侍臣故有造膝請首贊大計承疇咨
口銜兩江授楚帥所爲社稷它何知烏虜受遺左軍桀
倏忽謀逆丞相斯君親無將與眾棄不濟則死忠成欺
國家除惡方務盡功輕罪重誰敢疑謬哉區區擲要領
不睹告廟分封時況論成敗雖人力亦喜神明扶正直
當時曲突豈與賓此日登壇動高職垂瘍將士勛業雄

嘗膽君臣憂辱極范燮陳誠戎馬前葛亮抗表禽蠻役
吾 皇治統茂康宣紫光劍佩新顏色台輔宜宏退讓
風法宮日養恭儉德鳳鳴河清莫虛致普天率土還耕
織人生有命佐中興明哲兼垂後賢則意以中興將相
皆 定陵飭拔之人而肅順實啟沃其閒其城西二首
云連雲列戟羽林郎苑樹依然夕照蒼一狩北園盛車
馬再尋東閣杏冠裳滸蘭苦污生前佩炷麝能升死後
香赫赫爰書鑄愆史天門折翼夢荒唐唐寵冠親賢料遽
衰致身胡取亟登危將軍清靜歸醕酒公子聲華誤繡
絲坊樂入筵天慶節殿材營第水衡司十年風誼虧忠

告江海堙流此淚垂感時觸哀可以見其志矣

高伯足懷人絕句有云熬煉含菽老爲儒經舍連雲雀
啁廚咫尺名園渾萬里海瀕偏著董江都謂劉融齋中
允熙載也融齋以道光甲辰通籍咸豐癸丑

文宗召對稱旨命直上書房徒步無車馬 上問所養

對以閉戶讀書賜性靜情逸四大字同治三年視學廣
東一介不取引疾歸主講上海龍門書院十四年所著
書有持志塾言藝概四音定切說文雙聲疊韻昨非集
自經史文章至於聲律詞曲靡不通曉胡文忠嘗以貞
介絕俗疏薦俞曲園謂頻至上海數談諧無疾言厲色

招之飲雖醉不亂初不覺其藐然高厲也

滕謹亭軍門家勝勇捷善戰年三十官徐州總兵益以
勦賊自勵辛酉捻匪擾山東隨都統伊興阿追擊至汶
上凡六晝夜不解甲力孤援絕兩人皆陷歿時二月七
日也段紫滄年丈廣瀛詩與我同兄弟時艱仗汝才驟
聞天折柱直似地奔雷箕尾歸何處風沙慘不開無由
見顏色笳角暮生哀識汝當行伍同舟吾所期生爲百
姓福死負故人思天意方興甲 皇恩特賜祠精魂應
殺賊陰雨見靈旗紫滄以癸丑進士累官河南糧道句
如世人尊將略吾意在循良濃雲滏陽樹落日太行山

千古武功開涿鹿三邊雄勢接飛狐皆有氣勢

王立生名治模浙江龍泉人爲諸生家貧從其親友習
刑家言者來湖南高才讀書下筆數千字嘗以質巴陵
吳本深嚴削之不憚益勤余外王舅李蔭庭廉訪延入
幕廉訪意氣軒豁立生以肝膽許之兵起廉訪再守寶
慶有先後守寶錄皆立生所與籌畫客死寶慶年止三
十餘長沙丁果臣繼在廉訪所丁巳春武昌賊退起立
生旅樞取道身送之浙本深立生輓詩云居官不知治
賓友仗刀筆讀律未曉文據坐傲佔畢越人黨徒盛窟
穴禪處蝨脂膏罄吏俸莫可免三黜吾傷此已久思欲

較名實豈知有王君才盡儒者術君本諸生流厄窮常
抱膝濟時事則已何必躬輔弼楚南天岳州洞庭我洋
泌尺書忽及門著稿山嶽舉躋與陰庭翁相駿用羣逸
先後寶郡略君所筆書疾我但聞君歸不得旬月日聞
門有書到道遠思逾密何時已復來兩耳信鶻蟀窮山
竟已矣孤魂旅啾唧嶺盜跳險初幕籌甚周悉寇張君
則亡藏掩十六七眾才今角露品第誰甲乙矧乃詞賦
優文采復稀匹江湖道猶阻蛇豕縱橫出歸喪計安從
丁子獨膠漆青楓湘浦暮靈舸春蕭瑟城頭夜吹角山
鬼莫迷失

江歿叔詩不知身得歸何日且譬生來居此州貧能適
志還須福天與勞生自不閒分從亂後相看老不博閒
中自在貧登高便有偏安地與賊如何共戴天皆宋體
之佳者歿叔詩宗昌黎山谷以諸生入資爲浙江候補
從九品捐升縣丞未五十而歿其謂紫陽書荆軻爲盜
似太苛蓋由太史公列之刺客先已失實豫讓國士酬
知不能救智伯之亡昔人頗有譏之者太史公列入刺
客亦是此意論極透達

海寧許楣辛木狼山路賓王墓詩蛾眉氣燄已煙雲詞
客精靈尙此墳一檄汗顏唐宰相雙阡把臂宋將軍

宋金

將軍應墓

亦在此山但知神器當歸子肯惜奇才更擇君九死終

依曹孟德陳琳抔土黯斜曛神力極爲完足其鄉勇敢
糧勇歎諸作亦在白傅張王之閒詠史云吾愛魯男子
善學柳下貞齊桓殺子糾忽死夷吾生尼山豈妄許中
自有權衡小儒非所知但當顧身名才美縱如管溝瀆
寧自經豫讓報恩子其識非國士失身范中行復爲知
伯死偉哉昔狼曠見黜不知已轉以死自效不從私恩
起獨惜先軫賢失士乃如此菹醢非偶然假王寶禍始
所以張子房不出帷幄裏楚漢苦戰爭各欲爲帝耳雄
猜固主性慮患亦其理不解明高皇乃復殺文士李陵

雖生降心跡固可案自知罪通天一矢不向漢齊梁造
僞書出語何憤悍一讀河梁詩義可君臣貫子卿非知
心安肯友畔亂戰國重食客其客皆爲身餘智謀及主
珠履充上賓博徒賣漿者寧死甘賤貧信陵獨得之存
魏卻強秦區區馮煖智市義以奉君豈有諸葛公不如
魏延智難與諸將言偏安本天意出奇必敗亡徼幸何
可試順天哲士謀逆天忠臣義譙周爾何知乃敢建降
議隆中抱膝時久識終三分祁山仍六出盡瘁自在人
志能殉社稷湛也堪爲君禪死惜不早議降誤庸臣先
主遺祠廟譙周長子孫王祥魏孝子仕晉爲三公豈伊

臥冰人不能效孤忠唐虞有禪讓口實貽奸雄賢者惑
其名馴至五代終大書莽大夫筆不下禹功爲將在軍
中君命有不受金牌召臣還將已非吾有岳侯忠孝人
兵書讀豈苟後人咎班師引此不去口勝亦跋扈臣敗
爲畔逆首宋高蓄篡心檜如鏡取影苟不逢君惡世豈
無趙鼎還師出矯詔盡信吾未肯卽還胡勿問一笑堪
齒冷乃知實帝意假手佯不省孔明不遇劉終不從曹
孫景略心晉室未免仕苻秦右侯事石勒罪狀猶代陳
張元志仇宋彼哉勿復論身踐中國土矧可外國親雖
以論體入詩讀者當知其用意所在

長興錢江字東平負才而狂遨遊公卿閒咸豐末江北
軍興副都御史雷以誠防堵河上出京旅費實取足於
江會總精臺轉餉不繼江以算縉之術進用其策軍需
告充遂益無忌憚芥視幕下客于是齟齬者眾一日江
倚醉語侵以誠以誠大怒卽席斬之而以江妄陳圖讖
奏上聞者冤焉吳仰騶爲作哀東平云白鹿表鸚鵡賦
能令公喜能令公怒古來狂士多殺身全者天幸亦有
故錢生錢生策何疏軍中但獻平準書一朝頭顱席上
落才人短氣賈兒樂噫吁戲猛虎不可狎毒龍不易馴
藤蘿倚喬木俯仰難自伸君不見簾鉤鉤冠劍在手杜

陵幾不免虎口汝曹使酒亦何有江初與潘四農魯通甫及臧紆青善紆青負志節通術數以弟畜江時時誠之曰君疏狂不檢閤於知人終當以此賈禍卒如所言施補華均甫爲作傳謂釐捐之設賴以給軍而病商擾民無終極江之殺身天所以戒首禍也鄭子尹抽釐哀云東門牛截角西門來便著南門生吃人北門大張橐官格高懸字如掌物物抽釐助軍餉不論儂紬十取一大賈盛商斷來往一叟擔菜茹一叟負樵蘇一嫗提雞子一兒攜鯉魚東行西行總抽取未及賣時已空手主考烹魚還滷雜一老弱街心唬噫吁噉貿束布者不

能得一匹羸售卧鹽者亦不得贏一升釐金大抵恃商
販欲入閉門焉可行村民租銖利有幾何況十錢主簿
先奉已縱得上供已微矣乃忍餉爾餓豺以赤子害等
邱山利如米嗚呼貫率括率有時可暫爲盍使桑兒一
再心計之因錢江事並錄此詩以見釐捐之害

子尹有五孫種痘作二首自注引陳鼎滇黔土司婚禮
記龍土司卽左傳龍人裔於周爲漢上諸姬楚滅其國
俘而放之南徼遂成今龍家苗其俗最忌種痘痘者百
無一生常因一兒痘而延染一鄉竟絕嚙類者求其不
痘一受孕卽不與男處則所產者決不痘故大家設室

老專護其事小戶卽其姑嚴護之其孕也今夕受胎明
晨婦眉閒卽有一縷紅絲隱隱而現每晨婦人見姑與
一室一見卽知立爲移置別室夜加扃鑰日夕隄防至
七閱月胎成方解嚴其詩有云此實前聖教於經微而
彰三代彤管法女史職所當妃嬪所當夕月日書之詳
有身退金環側室閒同藏載震卽載夙周公頌先姜豈
緊不諱祖固曰夫婦綱古人用意精胎教何齋莊況此
關壽命能無大爲坊毛鄭讀書多遺文本周商禮失守
在夷何必傳高堂引生民靜女傳箋及正義爲證亦閑
家者所當留意也康熙閒

仁廟命江西巡撫考送善種痘醫二人新建朱純嘏與
馮選種試苗皆效隨授御醫直內廷出使各蒙古凡爲
聖子神孫天潢戚畹種痘又旼天行自出者奇變雜療
應手愈晚著痘疹定論一書其學本於明清江聶尙恆
力闢諸家膠執痘屬心火之說而胎毒蘊於命門一語
沈沃田序其書謂爲破的之論痘之爲疾不見於靈素
荀卿非相有所謂蒙俱斷菑植鰭色如削瓜面無見膚
無須麋禹跳而湯偏堯舜參牟子未聞以疾而易美惡
者則三代時無痘明矣宋元以來始見於方書朱氏所
云馬伏波征武陵蠻病痘而卒從此毒纏中國按後漢

書馬援傳暑甚士卒多疫死援亦中病卒則援之死由暑疫烏得強以痘實之以重誣古人沈鄭皆大師石儒因並錄之以諗來者

咸豐丁巳興化李福祚學山集其先世手澤與鄉先輩撰述及四方賢士往來邑中酬唱之作爲昭陽述舊編三卷其辨紀文達如是我聞紀任子田書扇事之誤謂任公立身行己不媿古人故老傳聞其從父封君絕無姬侍爲得其實又記任蕃牧生題姚太宜人綠窗吟草百字令云綠窗詩句是色絲少女總根至性比似梅花冰雪裏秀絕翻成蒼勁毒霧哀牢蠻雲越睽淚眼隨天

盡烏私耿耿寄愁弟妹諸詠今日萬里歸來丁年皓首

否泰眞天定

否泰關天意詩集中句也

馬角烏頭眞解事都眞孤臣

折證節相家門窮荒忠義心事圖如鏡歡情傾寫使君
重與拈韻姚太宜人卽松門相國孫山齋臬使女以子
姚德豫官浙江知縣封太宜人也其事詳第五卷

奉命大將軍印爲我 太宗授睿忠親王以入關者定

鼎以來藏皇史箴未數授人癸丑九月以粵匪北竄擾
及畿疆命惠親王綿愉爲奉命大將軍僧忠親王爲參
贊九日參贊出都王以是日受印及銳捷刀銳捷刀者
道光己酉 宣宗以賜定陵佩用與白虹刀俱係金桃

皮靴非特賞不能用也嗣以河北肅清生禽林鳳祥李
開芳兩賊首致闕下印仍奉歸史宓惠邸繪有受印圖
自題七律一首林穎叔王定甫嘗在巡防均次韻應教
定甫詩云赤舄丹心勵永肩靈符自昔倚親賢禡牙九
日霜旌健凱樂三霄繡斧全版築煙塵收北地夾江金
鼓震南天休言從事多微淺圖畫還叨姓字傳

莊忠械序湖東集謂古今詩人不經變故居憂患之境
而憔悴於邑必不能有合於國風小雅之旨徵君以湖
東名集而託始癸丑者意在斯乎徵君甘泉范凌霽膏
菴也膏菴自道光甲午始至京師三罷棘闈四經寒暑

咸豐初元舉經明行修以亂不復應徵其憶都中雜詩
二十首云鳳城襟帶擁三關百里居庸列翠鬢不爲勞
人換顏色朝朝暮暮有西山清時底用念防秋繡甸芳
春草木柔忽聽春流鳴漉漉萬峰晴雪下廬溝上元簫
管徹崑崙宣武坊前冷趣存夜漏傳籤人乍定爲猜鏡
虎立朱門春宵苦短夢難終到枕箏弦攪半空莫道東
風狂似虎偏能高唱叶絲桐禁林草暖綠雲平弱柳穠
桃入畫清無限斜陽金碧外玉泉山影落昆明豐臺焚
尾最多姿素面凝香獨冠時解道燕支無用處何妨濫
賤看西施一尺黃魚特進鮮朱櫻粒勝火珠圓王瓜入

市錢三百不數江城四月天萬柳堂前柳幾行承平文
物溯平章更吟雨打新荷句暮景瀟瀟起嫩涼瑤樓深
處鎖煙霞寂寞蒼髯羽士家猶記簫聲吹午夜空庭細
雨落槐花御河清淺路誰諳鴛瓦參差映蔚藍十丈蓮
開風顫葉金鰲頂上望江南團扇家家寫素紈梅羹相
與佐朝餐青蠅自悔趨炎苦轉戀冰山片刻寒九衢車
馬似雲流雪椀晶盤欲報秋底事紅塵飛不到夢魂清
在樹閒樓西風鱸膾客心違幾度思歸未卽歸莫訝寒
衣催太早燕臺七月已霜飛琳宮三五帶城隅水閣深
深儼畫圖一樣蘆花照頭白可容清影泛江湖紛紛木

葉下亭皋欲插茱萸轉鬱陶閒殺重陽一杯酒黑窯廠

外自登高徐陵宅裏驚才擅鮑照庭前彩筆橫夜半殘

芻飼羸馬兩家猶有讀書燈

先後館徐梅橋尚書鮑梅友比部家

關東休

歎食無魚哈密瓜瓢繡不如更有年頌新鹿脯乞來須

倩魯公書紅鑪温酒及三升欲熱枯腸轉未能一局棋

殘清漏滴離愁挑盡歲寒燈黑貂裘敝且盤桓惜別休

歌行路難最是琉璃河畔水照人清淚落征鞍江東處

士髮蕭蕭金榜無名慰寂寥何日長楊能獻賦鞭絲重

過石闌橋自序所謂江湖而有魏闕之思者也嘗與張

石樵吳讓之汪硯山李冰署王小汀張午橋黃琴川郭

堯卿馬濟川黃子鴻姚仲海諸人聯詞社曰淮海秋筵
集

蔣鹿潭東淘雜詩甘泉李肇增冰署謂不減少陵秦州
之作官鹽曹十年不合以事去戊辰道吳江檣舟垂虹
橋一昔卒姬人黃婉君徇焉譚復堂錄其詞最富謂咸
豐兵事天挺此才爲倚聲家老杜推挹甚至復堂於師
友閒嘗稱醉慰農詩歌博大超逸用山谷精華錄故事
讀定爲藤香館詩刪錢唐吳子珍論兵主李廣文主蘇
軾詩主中唐爲刻待堂文九首詩二十篇秀水楊利叔
私淑桐城之姚鉛山之蔣長水沈先生維鐫婁江姚君

椿有汲菴詩文存楊聽臚爲包安吳女夫以知府官河
南時羣搶去來靡常奉使宅郡老母方至開封未入城
寓居黑岡一夕賊至母夫人抗節死難越日聽臚還賊
已去憤痛仰藥刻行汀鷺遺二詩詞近百篇丹徒莊仲
白有周易通義易緯通義東莊讀詩記靜觀堂文蒿庵
遺集復堂稱其哀憤託於樂府古詩回曲其辭以寓意
至倚聲爲長短句皆是物也山陰王眉子工小詞尤精
駢儷文字錢唐王松溪詩近百篇雅好比興皆爲復堂
推重至所稱龔公襄治諸生業久不遇閒以策干大帥
不能用遂好奇服流寓上海歐羅巴人語言文字耳目

一過輒精咸豐十年英吉利入京師或曰挾龔爲導死
上海定菴子也

穆宗踐阼商城相國首上疏更正祺祥之號改元居正
議陳孚恩何桂清之獄張錫嘖明堂宗祀之疏無所阿
徇嘗館李愛伯於家課其幼子卒於同治丁卯愛伯參
次行事文其隧道之碑次子允臣戶部文俞恬靜好學
以回避歷補工部主事刑部員外郎愛伯譔文勤碑文
尙未上石而允臣遽卒愛伯輓以詩云東閣傳經早含
香侍玉京外郎三署轉任子一官輕自足閨房玩羞爭
闕閱名彼哉誇食飾臨汝與安成及我聯吉笠相親獨

過羣一言知什襲十載愈殷勤志業期孤子音容斷莫
雲賜阡碑未立淒絕又銘君

孔宥函江上集丹陽留柬銘東屏云擁棹雲陽驛河梁
壓縣門道途狂客左節鉞武臣尊練水城隅寺平陵塔
外村故人渺何處明月滿孤樽東屏名銘岳字瘦仙瓜
爾佳氏隸漢軍旗道光乙未進士嘗宰江西之東鄉以
記名道援浙陣歿予世職有妙香館集戊午江浦軍潰
宥函時在戎幕總奏記臨難殺賊力竭殉焉李冰署有
哭宥函詩六十韻卽題所著江上集詩後

祥符周文之先世著籍山陰父保定公解官後仍居越

中辛酉舟泊吳淞口遇警夜話云老去鴻毛一擲慳
樓晚飯說時艱東南地盡天浮水西北風高浪卷山萬
里碓碓來島國一朝禱祿守江關諸公珍重垂堂戒潮
打孤城只等閒節鉞巍巍鎮上台一時龐薛盡庸才吾
曹寂寞扁舟在天地淒涼同谷哀夾岸萬人風雪走寒
江一道賊兵來吳淞父老休悲咽人事貞元理可推先
是庚申四月賊陷蘇州巡撫徐忠愍殉焉總督何耕雲
自常州斬關出泊舟常熟常州常熟相繼陷耕雲以罪
被逮辭覲堂晉巡撫兼權江督駐上海龐文恪卽家起
爲團練大臣至上海策規復覲堂精於鑒別多藏宋元

以來字畫碑刻公餘展開摩挲意甚有得團練諸君連
日爲紅裙之醺以暖鋒鏑文之新樂府書畫局內應局
抽釐局三首文主譎諫自比杜陵其庚申同王慶元至
滬謁帥四首云中丞利市一朝開木難珊瑚養禍胎回
鶻部人相詬病歎魚門客盡奴才枕戈歲月兒童戲巢
幕心情婦女猜更有風流團練使時來讀畫一銜盃天
地茫茫祇一浮江山終不產驂騮世間怪事無一可海
外狂奴有九州澤國獨當天半壁島夷渾是水諸侯一
枝梅在頰紆策羞煞中朝將相流夢寐提戈到潤州東
南天塹此襟喉一時家國無窮恨萬古興亡不盡流鐵

襄江山眞失計金窩醉飽太無謀男兒馬革尋常事不
斬樓旛死不休鷹揚卽將強崑峩帳下曾無曳落河滬
瀆江灣猶好在繭絲保障欲如何千軍酣讌紅裙醉萬
室流亡白骨多安上門邊圖不了時時醉發楚狂歌時
逆氛徧江浙滬上一隅爲餉源重地大帥擁兵集餉一
旅不發堂皇之軍畏人千里反側之戎在吾臥榻厥後
曾文正督兩江以舟師畀李肅毅浮江而東攝巡撫事
始從上海以次剗復常熟蘇州溟趙藩樾村題文之醵
室詩錄云已溷漁樵憂戰伐未磨忠孝鬱風騷益其幽
憤孤愁感懷紀事之作爲多文之名沐潤號柯亭丙申

與弟源緒復之同榜進士諸弟星譽昀叔庚戌翰林官
兩廣鹽運使有鷗堂贖稿詩一卷詞二卷日記三卷星
詒季貺官建寧知府有竄橫詩質季貺喜收藏異書著
錄數萬卷多宋元舊槧及乾嘉諸老精校善本句如水
深將爛麥暝至或蘇蠶負手仰看樹無心錯過橋深樹
半藏塔野橋平視山支路循牛跡林風辨唳聲轉燭窮
花態緘茶養露香巖偃筍懸出樹枯藤代花鐘先雞趣
曙秋縱隼盤風皆樸屬微至絕少塗澤

竹垞老人析券云竹垞老人雖曾通籍父子止知讀書
不治生產因而家計蕭然但有瘠田荒地八十四畝零

今年已衰邁會同親族撥付桂孫稻孫兩孫分管辦糧
收息至于文恪公祭田原係公產下徐蕩續置蕩七畝
并荒地三分均存老人處辦糧分給管墳人飯米孫等
須要安貧守分回憶老人析箸時田無半畝屋無寸椽
今存產雖薄若能儉勤亦可少供饘粥勿以祖父無所
遺致生怨尤倘老人餘年再有所置另行續析此炤康
熙四十一年四月日竹垞老人書見析徐尙賢盛黼宸
按年譜桂孫娶于徐稻孫娶于盛也後載區圖分數共
計四十二畝二分面書桂孫二字紙墨完好咸豐辛酉
沈韻初出以示客張懌齋爲賦長歌懌齋名與烈蘭渚

侍郎師誠孫官翁源縣殉難予世職有雲來山館詩集
其伯父仲甫中翰爲之序

同治三年四月蓋屋克復之前日禮堂將軍多隆阿卒
於大營予謚忠勇林穎叔方伯詩偃月城垂克流星矢
獨當將旗春黯淡列帳夜踉蹌百戰靈陰護三軍氣蹶
張鼠奴期盡磔遺恨未禽王忠勇蒙古人世居齊齊哈
爾城咸豐二年以參領帥黑龍江騎兵隨僧忠親王平
高唐州連鎮及馮官屯各賊巢五年從都直夫克武昌
漢陽復黃梅廣濟七年攻拔小池口楓樹坳獨山鎮八
年復九江破石牌每戰親帥鐵騎陷陣敢死士隨之刀

既接斫賊如瓜擲首陣外直夫督師揚州疏舉公自代
尋補授福州副都統各軍在太湖者悉歸節制十年克
潛山十一年攻克桐城宿松舒城遷都統擢荊州將軍
同治元年五月擒匪逼西安詔赴陝督辦軍務七月大
破賊於荆紫關石馬寨武關山口捉馬溝太平山三角
池十一月逆回圍同州擊其背二年連破諸砦克高陵
涇陽肅清關輔當解同州圍時有上策請馳扼涇原勿
令逆回踰隴者不能用至是悍酋藍大順陷盤屋馳軍
圍之親上礮臺擊鼓督戰忽爲礮子傷左目而鼓音不
絕是夕藍賊成禽公以創甚卒於軍傷疾篤時昏迷中

頻呼殺賊無一語及家事生平不識漢字遇公牘使人
誦以聽爲指瑕而易之輒精當與直夫將軍並爲黑龍
江部諸將之冠惜無人仿戴叔能作邁里古思公平寇
詩也

薩爾圖果敏公英翰以舉人起安徽州縣豐頤皤腹能
騎射馳突健鬥淮北兵飢賊橫崎嶇血戰屢禽賊酋雉
河之役外援絕矣輕騎突圍出合諸將之兵以褫方張
之寇朝廷錄其功自宿州一歲四遷至皖臬徐西叔癸
亥寄英廉使霍山行營云武陟峰前戰氣高兼天岳色
擁旌旄漢廷將略歸虞詡淮甸長城倚石苞曾奉清言

知榦局屢煩折簡到蓬蒿磨崖曾趁春風便濡染中興
汗馬勞其刺宿州降巨盜數萬西叔爲作方略記及受
降碑陰銘旣撫皖屢平劇賊移督兩粵未幾被劾罷論
者謂巡撫張某欲取而代之事多疑似明年起用烏魯
木齊都統卒於關外時太夫人尙在

咸豐癸丑江寧駐防闔城殉難將軍祥厚寬甫副都統
霍隆武參領常錫齡靖之奎光益之協領伊伯訥芝亭
驍騎校善慶積卿馬甲福林一桂死者萬人賊犯六合
時西域人雷公八者姓達名掄元率眾戰歿把總包定
國者隨徐州偏將率兵五百人援浦口兩獲勝戰卒以

眾寡不敵歿於陣尸岬立如生定國鎮江人寄居淮安
上元諸生張炳垣繼庚陷賊中上書向欣然提督請爲
內應事洩乃引賊黨中之最悍者數十名誣以同謀翦
其羽翼以是賊內有隙炳垣亦輟尸時丙辰三月也其
置毒於餅餌中以進事覺捶死尸投水中者武昌朱九
妹也九妹美而才賊陷武昌擄至舟中守以女賊不得
死至金陵有廣西少婦爲僞女官見而憐之廣西婦頗
知書亦良家被擄者長九妹九歲兩人相遇患難中情
好甚至賊中女子能文必應試不試者女官知不舉者
皆殺九妹不應試廣西婦亦匿不報爲老賊婦所覺以

告首逆楊秀清磔廣西婦而掠九妹入僞宮治庖九妹
欲殺楊逆苦不得近一日置毒食中以進楊逆嗅而不
食窮治知九妹所爲捶死投其尸於水時年十八賊中
女子無老幼皆呼姊妹以行稱不著其名字亦不悉其
家世時有虎將軍坤元字子厚四川人總兵嵩林子年
少從軍屢著戰功擢官至總兵加提督銜年未三十嵩
林守溧水失之坤元請於大帥願復此城贖父罪數日
果克張忠武圍鎮江城急賊結捻匪來援眾十餘萬坤
元殲之於皋資遂克鎮江復溧水後進攻秣陵賊營先
鋒執大旗者陣歿坤元執旗先登賊礮中顛而死上元

孫文川徵之皆有詩紀其事時亞墨理駕合眾國人華
爾爲中朝將官守上海松江每戰必勝同治壬戌閏八
月戰死慈溪徵之詩有契苾原爲唐健將日磾曾作漢
功臣之句當時異域尊親戈登卜得祿皆以蕃將爲我
用勒伯勒達耳第福皆以從攻紹興中火器死照總兵
賜卹其嗟哉華爾行云亞墨利加州有愛育士迭國去
中華三萬餘里其國之人皆泰西諸邦所遷徙背英吉
利苛政自立日富以強有華盛頓創爲傳賢之法法最
良行之數傳民和世康其國左右皆大洋旁峙落機大
山萬里長我 皇咸豐十年其國之人華爾慕化而至

值亂賊披猖殺人肝腦塗地華爾曰嘻我夷兵官也今
見官軍乃兒戲彼亂賊人人得誅之吾雖外臣願爲朝
廷敵愾嗟哉華爾憤不顧身大吏言於朝授以兵五百
人華爾教以泰西陣法坐作進退無遑巡飛礮中敵無
一生遂克松江守其城克寧波留其軍又克周浦金山
無不以一當百海上處處聞威聲 皇帝嘉之拜官副
總兵華爾感激願屬籍受廛世爲中國民彼金日磾契
苾何力往矣今有華爾乃能繼漢唐蕃將成功名下略
潘鄭菴師在南齋垂四十年咸豐丙辰以侍讀入直同
治癸酉典順天鄉試以磨勘處分降調甲戌正月賞編

修仍在南書房行走光緒元年九月恭送

穆宗帝后梓宮奉移山陵有詩恭紀云丁年侍宴玉皇
家親見真龍馭絳霞自運樞機平禍亂更通琛賚達幽
遐重華雲斷蒼梧野九月霜淒白柰花廿載再逢真不
幸侍臣和淚入風沙自注謂咸豐丁巳六月待

文宗宴同樂園命

毅皇帝出見侍宴諸臣臣蔭得瞻仰天顏自是每歲皆
得見惟辛酉在熱河未獲扈從云云甲申以舊所刻諸
書彙爲滂喜齋叢書四集復彙刻功順堂叢書功順堂
者庚午十一月嘗賜御筆直良功順四字額也文勤論

書不喜宋高宗而亟稱蔡元長

粵逆陳金缸三水縣人業植桶紅巾盜起金缸嘯聚三水英清閒與其黨鄭金劉超等眾數萬陷開建及廣西懷賀二縣踞之僭偽號逼民蓄髮四出攻剽咸豐十年經官軍擊走復由潯梧竄陷信宜縣城擾及羅定高廉各州郡同治二年特命提督崑壽督師高州申明約束不十旬而克之逆黨斬金缸以降餘眾胥平萍鄉文樹臣爲賦排律四十韻

丁文誠中條山訪閻丹初司空云中條山色靜分明知有賢人隱上清繞徑柿林秋氣肅到門竹影夏寒生相

逢白髮傷遲暮共嚼青蔬感世情我媿抗塵君抱潔要
將晚節證前盟文介撫山東文誠時官布政使與之志
合爲治以綜核稱晚年再出長農曹躋真相開源節流
政策頗涉苛碎世多譏其執拗然陳臬湖北時先君爲
之屬直道事人乃獨承其嘉與在戶部嚴覈名實下教
諸曹郎分日入謁尙書坐堂皇旁一司官執簿唱名堂
下聲諾如點隸呼囚者然李越縵時官江南司手書疊
千言責其非政體不當辱朝官而輕量天下士伉直激
切若昌黎與張僕射書走筆付持牒吏文介得書頗善
之事遂已亦非不能受盡言者惟撫東時黃崖山事果

於殺戮不無可議黃崖山在肥城山前後止一徑號爲
深險時擒賊縱橫齊豫閒土民及士大夫之流寓者多
移家入山避之會有妖人張積中父子亦結寨居山中
以邪術惑眾斂錢文介聞而惡之招之匿不出捕之其
徒素不軌率眾相拒格文介怒徵兵萬人圍而焚之居
者先爲張積中所禁不得出千餘家均殲焉事平以盡
從逆入奏實則其徒及私梟三百餘人與官軍相距而
已韓叔吧黃崖山謠云黃崖何高高中有妖人巢妖人
但斂錢那解藏弓刀黃崖何密密櫛比多寓室可憐唯
一徑旣入不復出中丞捕妖人健兒樂燒焚馬後載婦

女馬上馱金銀淒淒復淒淒婦女掩面嘯初不識妖人
見謂妖人妻中丞奏 天子妖人盡磔死人死無一降
黃崖竟若此此詩可謂得風人之意矣

侯官林小岩汝霖官仁和典史咸豐十年二月粵賊陷
杭城死事甚烈越七年杭人移葬之孤山和靖墓側吳
本深詩孤山處士葬梅旁後死忠魂近岳王只道梅花
不留種遠孫新家一家香

婁縣張夬齋爾耆家傳畫學本生曾祖昫曾祖紹祖皆
以善畫知名乾隆中南巡時昫嘗進畫賜采鞞賜錦堂
所爲名也祖查山學博有擁書堂詩館姚一如方伯家

春木嘗從受學自岐山至寶雞作云破曉煙含遠岫昏
雨餘淺瀨漲沙痕青蔥一派江南景十里平疇第五邨
後村石屏之亞也尊人柳泉太守傳研堂詩亦多題畫
之作夬齋爲春木門人其輓韓綠卿中翰謂與樗寮先
生均富藏書見絳雲樓藏本雖斷簡必購凡有黃蕘圃
題跋者無不購置聞韓氏收藏至今無恙

乾嘉以來揚州碑石出土者阮文達得漢厲王中殿石
汪容甫得射陽石門畫像秦州夏退菴學博得宋將仕
郎姜諤墓石因自署宋石齋嗣復得唐咸通隴西李君
誌石梅蘊生得貞元淮南擊討副使田府君仇墓誌其

門人田季華得杜夫墓石汪孟慈得大中六年萬夫人
石沈與九上舍齡得唐米氏女墓誌銘蘊生獲石畫像
載碑王句生爲蘊生題其圖云副使有窆穴久閉臨灣
原華胄溯陳仲潛珉刊貞元夫鏃鬪土出吟篴吹火捫
江都昔建節裘帶經戎旃威落梁李膽智整關張軍入
汙保純德累爵彰殊勳歸喪阻涇北山光留孤墳憬然
式前猷允矣告後昆封樹輦石返洗剔匙泐紋翩翩兩
參軍翰藻都絕倫兩參軍謂田仇誌石之書人及撰文
者也句生客浙江學幕咸豐十年城陷衣冠自縊於清
波門戒壇寺有舍是集聲遠堂文集其兄西御茂才以

揚州城破後與羅茗香楊季子均絕食死於家范膏菴
爲賦三哀詩

黃樹齋司寇解組後游吳越嘗慨然曰海內將亂禍不
在民而在官官不在下而在上善於粉飾卽易於糜爛
之機也捐館不一年而江南遭兵燹矣見黃文涵子湘
舊雨集子湘澧州人童時嘗讀書於秣陵張靖逆侯故
第之安園宰邳宿能完城殄賊去官後從戎粵西庚申
避地海上己巳卒於揚州

馬佳東山少司馬寶珣辛丑進士由戶曹擢左贊善辛
亥分校順天鄉試桐城方昌翰宗屏出其門下光緒癸

未以使事游華嶽猶子葛民方伯時官大梁闢芙蓉西
館以奉杖履宗屏呈五律四章云昔遂登龍願斯文沆
漉親廿年成契濶一見話艱辛屬望傳衣鉢傾懷接几
茵每慙推獎分幕府尙依人許史聲華貴嚴徐著作繁
五雲依畫省三戟列高門南國輶軒早東都節鉞尊成
陰桃李盛樛櫟未堪論象教邊庭款龍文使節持星霜
數晨夕雨露被恩慈立馬秦關險移舟洛浦遲清秋登
華嶽天爲放晴曦忽賦高軒過梁園雁影秋棲遲芙蓉館
地瀟灑竹林游河上仙槎近天中使節留崆峒長倚劍
拂拭重琳璆東山尊人勤直公昇寅兄夢蓮太守寶琳

均有詩集夢蓮嘗牧定州宗屏題其夢迹圖所謂中山操宓絃憂民若飢渴頗聞眾春園禱祠萬家悅者也

吳本深詩大難新除法治隆講筵開御禮儀崇宗臣曾拜先朝疏歸效今皇保傅忠同治初元良峰相國

由盛京侍郎擢大司空在宏德殿授讀時作也相國講宋儒之學身體力行曾文正以見過自訟言動無妄推之道光三十年二月應詔陳言辨君子小人之分顯

廟嘉其切直旋由大理寺卿換班新疆復上敬陳治本一疏咸豐四年以侍講入直尙書房旋予外任至是充院長晉綸扉進所輯書賜名啟心金鑑同治六年有請

罷正途入同文館奏八年有大婚典禮宜崇儉以光聖德奏十年卒諡文端公昌明理學弼成中興之治其謂立國之道尙禮義不尙權謀根本之圖在人心不在技藝瞻言百里而論者竊病其迂至今其在總理各國事務衙門行走以困之張文襄廷對時爲公賞拔尤持異論請削門生之籍繇今觀之當時自命爲救時幹濟者視公之所謂維大局彌隱患固羣目爲迂濶而訾謗之矣吾不知易世而後其得失竟何如也公烏齊格里氏有倭文端公遺書

嘉興吳聚泉萃恩爲牧騶觀察愛子未弱冠卒小匏菴

集後附刻其南湖百詠一卷中如沈壺張鑪沈珪墨曹
用筆皆資談助宋時嘉禾人用對膠法墨成堅如玉石
墨工名手自潘谷陳瞻張谷之後珪與金華潘衡不媿
古人墨銘曰沈珪對膠十年如石一點如漆宋時杭秀
閒有曹用筆見稱於世明張鳴岐住謝洞善製銅爲鑪
無不精絕項墨林見而異之招居城中名遂大著國初
沈存周字鷺雝鍛錫製壺多雅馴以僧伽帽爲上次蓮
花次桃核凡雕鏤詩句姓氏圖印極工又有黃元吉善
造茶具稱黃錫至巢端明孝廉鳴盛繞屋種匏瓜凡十
餘種室中所需器皿莫非匏者尤遺逸之高致也

表伯靜泉司馬恩綬先祖母汪太淑人妣也工詩愛畫
爲先大夫畫蘭題句有云節晚蘭初放偏當冷雨中謝
庭凝早露楚畹悴芳叢不遇栽培力難憑造化功得天
原自薄莫漫怨秋風薄宦湘漓崎嶇終老遲暮之感情
見乎辭

俞巾山視學中州以罍誤罷歸流寓姑蘇壹意著述曾
滌生相國題所著羣經諸子平議云聖祖曠千禩微言
久歇絕六籍出燔餘諸老抱殘缺尙賴故訓存歷世循
舊轍從宋泊有明軌涂稍歧別皇朝褒四術眾賢互標
揭顧閻啟前旌江戴紹休烈迭興段與錢王氏尤奇傑

大儒起淮海父子相研悅子史及羣經立訓堅於鐵審
音明假借課虛釋癥結旁證通百泉清辭皎初雪九原
如有知前聖應心折俞君一何偉奎步追曩哲盡發高
郵奧擔囊破其鏑君昔趨承明鳳鸞與頡頏輶車騁嵩
洛康莊誤一跌子雲官不達草元更折節文囿芟天葩
經神供清醲龙言頗觝排諸子亦梳抉復從羣賢後森
然立綿蕝嗟余老無成撫衷恆悒悒閱才不薦達高位
徒久竊茲編落吾手吟覽安可輟巾山治經宗高郵王
氏之學與文正沆漉一氣也文正言王氏精於古音謂
字義多從音生經籍多假借字皆古音本同也每於句

調相同者取彼釋此謂之句例又戒不得增字釋經皆從虛處領會其立訓必有確據每譏昔人望文生訓或一字而引數十證其反復證明乃通者必曲暢其說使人易曉可作懷祖先生及文簡經說提要

同治壬戌李越縵詮次柯山游賞之事爲蘿菴游賞小志一卷吼山陶文簡讀書處越縵尊人竹村先生題壁云雅有清名爭國本微嗟禪學累宗風游花明禪院云竹磴陰時攬石氣溪梁斷處落鐘聲越縵大父司馬公亦能詩其聲字韻云四山樹合添雲色半壁泉飛作雨聲州山吳氏園句云秋深野店多沽酒歲熟人家早閉

門魯墟絕句云鑑水家家多種柏稽山處處盡栽楓老
來檢點閒風景霜滿江天樹放紅其記辛丑八月 宣
宗六旬萬壽越中張鐙特盛時太平日久海內富樂越
人漸習華侈與蘇杭埒極力繪日月之光報功德之盛
城中江橋筆飛坊至東昌坊大街十里塵肆鱗櫛各出
鐙樣以工巧相尙鸞迴鶴聳雲實日華又盡出奇器寶
物青鼎綠彝玉屏珠簾以及古書名畫珍禽異獸瑰草
奇花之屬無不護以欄楯夾道列觀入夜則星火漸繁
笙歌迭起而各寺廟中復結綵臺舞榭標雲矗霞敷金
散葩絳天百仞繁曜綴空游人多飾香車寶馬一片光

明錦繡中釵鈿咽嚮袿襦薰甚真謝康樂所謂路曜便
媚肆列窈窕者至九月英夷陷寧波犯餘姚越人倉皇
四遁久而始定自後乙巳十月 孝和睿皇后七旬萬
壽慶節鐙事已減曩時再至庚申六月 文宗三旬萬
壽則越中已爲賊所擾烽火危急不能復舉此議矣觀
此則時僅廿年而盛衰之際已自渺然至今而銅狄摩
挲其感喟又將何如也

鐵嶺董茂秦工人物以菩提紗一葉寫十六應真像乾
隆間嘗進御陳朗山菩提紗詞所謂試嵌櫺眼待紙襯
盜青妙寫羅漢也朗山爲徐鐵孫門人論國朝詩心折

竹垞論詞推竹垞及樊榭系原鐵嶺生長海嶠值戈甲
搶攘轉徙兵間感時撫事閒以詞發之張德甫廉訪出
示文烈公家玉寄內蘭石便面法曲獻仙音云幾葉湘
蘭一拳媧石孤影曩時誰伴挽日虞淵同時義士收拾
國香零亂歎物與人千載模糊古愁滿更淒黯是盤楹
黑虬精魄還繞定蒼梧翠華宮扇吮墨寫同心想殉井
鴛釵應見好付新題把丹青遺恨重展儘山河彈指紙
上血痕難浣文烈行狀載公軍敗時泗水至一家門外
倚楹倦寐主人夢一黑虬繞柱乃盡出家財復佐募軍

云

馮川以同治丙寅卒官於皖南平生宗仰柏峴喜論

工楷隸魯通甫爲友人狀節母求魯川書刻諸石

笑何幸而得書通甫之文吾書可不朽矣生前刻有

微齋詩李夢蘭栞其遺文吳稼軒稱其詩古文在咸

豐間實無其匹爲人高亮孤介不肯隨時丙申通籍官

刑部堂官留之本部不使得御史謂部務倚重實仗之

出守廬州權皖南道旣卒署無眷屬篋笥中止舊衣十

數領而已無以爲斂同官醵金斂之其清節亦足傳也

那拉文恪公全慶爲恭勤公那清安子服官幾六十年

由翰林躋卿貳尙書歷六部都統歷八旗廣東視學新

疆換班三次降調兩任協揆錫滌硯題閩珊侍郎 阿彥

達

寒鐙雙課圖有云茲圖書後者唯兩相國壽謂文恪及鶴峰相國載齡也光緒五年以刑尙協辦重赴鹿鳴年七十九歲前此若阮文達潘文恭皆在致仕以後未幾卽拜大學士所遺協辦 上意屬顏札尙書景廉以宗室文恭公靈桂先進力讓之文恭以戊戌二甲一名通籍皆年逾八十

升竹珊嘗以其尊人在夔府時所書楹帖刻石裝潢成冊滌硯題五古一首有云事親無不愛至於珍手澤事君不自愛極之裏馬革相同結意誠無競秉心慙所性

非爲名懇懇在悃悞伊誰一以貫吾友升方伯抗疏數
千言凶門鑿西域時竹珊以滇南藩司抗疏爲伊犁參
贊壯哉行也光緒戊子爲駐藏大臣查明藏番界址到
藏開導督飭停戰撤兵藏番具結停戰忽又私犯敵營
以致全行敗潰委弁力阻印兵撤回失地會議邊界藏
番如期撤兵分起歸牧印兵撤退催議定約以迅速赴
邊挽回藏事深明機要奉旨嘉獎有藏印邊務錄二卷
卒諡恭勤竹珊卓特氏文誠公富俊孫也

道光丁未會試李文忠與沈文肅皆出孫藻田學士之
門在籍治團練時過巢縣明光店題壁詩云四年牛馬

走風塵浩劫茫茫賸此身杯酒難澆胸磊塊枕戈試放
膽輪囷愁彈短鋏成何事力挽狂瀾定有人絲鬢漸凋
旄節落關河徒倚獨傷神巢湖看盡又洪湖樂土東南
此一隅我是無家失羣雁誰能有屋穩棲烏袖攜淮海
新詩本歸訪煙波舊釣徒徧地槁苗待霖雨閒雲欲去
尙踟躕旣貴後詩不多見其重棗嘉祐足本孔叢子序
云孔叢子一書隋書經籍志始著錄注陳勝博士孔鮒
撰晁公武因漢志無孔叢子欲以儒家孔臧十篇當之
又牽合附會以爲卽孔甲盤盂書李燦王謨紛紛辨詰
攷書中紀鮒之歿固不得謂爲鮒書又有紀延平延光

中事又安得謂爲孝武時之孔臧書也陳振孫以爲孔氏子孫記其先世系言之書蓋近之矣攷詰墨篇以孔子卒時證白公作亂之事斥墨子爲虛造而雜訓篇記子思從夫子於郟之語以年攷之亦不合不幾郵而效之乎其書王霸雜用如欲以無用之貨弱人之國固疑非聖人之言至欲割地賂秦以爲嫪毐功則雖縱橫之士亦羞舉其說謂孔氏之徒而計出於此恐不然也在隋以前惟水經注泗水篇引孔叢文其文亦與全書不類它書未有援引者朱子謂孔叢文氣不似西漢子則謂多魏晉以後人語如僞孔傳僞家語之類然古

昔嘉言至論亦往往存於其中故司馬光作通鑑楊簡作先聖大訓多采取之文中有小爾雅一書猶弟子職之存於管子亦攷古者所不廢隋志作七卷晁陳志錄及文獻通考所記並同明鍾惺去連叢子及詰墨小爾雅并爲四卷不知何人并爲三卷何氏叢書復并爲上下二編足本之傳於世者甚寡宋嘉祐中宋咸注成表進本尤不易邁錢遵王得空居閣臧本尙是從元人所鈔重錄者陳君襄夔迺得宋槧本而什襲藏之近復重雕以廣其傳子嘗謂宋槧古書日就亡佚獨賴好古之士珍護而棗播之是亦守先待後之一端因嘉襄夔之

舉而爲之序此文翔實雅馴當是其門下士吳肇甫輩所爲也

李仲約侍郎自古北口入關經居庸至宣化府雜詩壬辰視學順天時作也永平郡樓作云漁陽東郡古藩屏城闕蒼堯鎮渤溟嵐氣宵深連海白燒痕春暖入關青天臨碣石星分尾地接巫閭屋建瓴且喜興中烽火靜麥疇殘雪潤郊垆順義縣懷古云牛頭山畔石槽西故壘當時化縷隄恩重杯池營第宅勳銘街塔紀招提傳聞白海屯軍盡想像紅橋戰馬嘶重向陁羅臺上望翠岑千疊總淒迷宣化道中作云左臨虎北右飛狐舊國

千年憶霸圖絕塞關山秦上谷極天嵐采漢軍都明昌
廢苑生禾黍統漠荒臺長樺榆樵牧不知兵燹事沙陀
斜日覓湛盧多倫諾爾懷古云上都宮殿概煙霞巡幸
年年說帝家龍虎平臺稱捺寶鴛鴦名樂近亨嘉陪京
四達興和路恨事千秋晷忽又惆悵聲明剛末造鋪張
文集徧中華七絕七首云過街石塔儘欽岑泰定三年
鑿字深書法畏吾兼蒙古去聲眼明誰是顧亭林一統皇
元志不虛熱河八到採無餘當年傳是樓中物世上還
疑有此書興中故郡令公祠苦被寧人笑十姨卻有錢
唐厲樊榭爲繙原父集中詩昌平山水記堪徵斷發殘

當十四陵南北並時論紀載千秋文集有崑繩說與憑

誰更不疑倒流山水太離奇元明兩代哀行錄異事無

人解入詩

倒流水在懷來縣東十里

冶鐵關門布蒺藜銜枚宵畏大

金知甲申三月居庸道不用迂途札八兒萬口喧傳士

一杯東西青塚各千秋豹房內傳凋零盡

延慶州志引武宗外紀李

鳳葬居庸關土人名白墓

不怪人疑綴白裘侍郎於金元史事西北

地理最爲精研讀此諸作可睹一斑其灤陽試院題畫

云熱河秋景總如春綠意紅情色色新衙署上頭行

殿近消閒誰似畫中人虎北巖關斗可摩難逢敝法小

坡陀灤平縣畔灤河側一幅橫屏似此多德勝峰頭十

八盤宋人行記歎巘岼 熙朝驛路紆徐甚新館雕窠
景一般前明猶有舊墩臺千里松林嶺路迴今日昇平
無界限 行宮深處萬山開此則略見風致所爲和林
詩自爲之注可與所爲朔方備乘札記西游錄注相參
高陶堂詩桃源一諫官摧挫青蒲中宛子善智人氣幹
吾黨雄謂尹杏農耕雲也由儀曹官臺諫封奏月數上
咸豐戊午以與設夷館議力爭不可痛哭於朝故相肅
六銜之會科場獄起以內監試被議去位之河南贊毛
文達公戎幕久之補河陝汝道光緒二年河南北薦饑
三年大旱西路尤甚以憂勞殞當 文宗巡幸木蘭杏

農寄書責肅以南仲李瑄汪黃王振語多憤激固未免
書生之見也杏農當夷事起疏凡八九上陶堂詩云樞
運蠹不生在物惡先腐狡彼西來獒狺狺我中土百越
虜大將威信兩未舉巧盜其子弟使抗兄與父珠厓謂
縣絕析木非外戶赫赫細柳軍奄忽變虎鼠竊聞啟堯
憂池臺輟鐘鼓何爲金張館不廢清夜舞周人傷板蕩
六月師再睹橐街無顯誅長纓那得取時議絕支離魁
綱仗神武桃源昔十疏慘愴天不語同治庚午曾文正
於津民滋事緝兇賠堂朝論毀譽參半清議尤以爲非
善乎李文忠之言曰此等案情若不交兵必須如是持

平或謂津民可用不宜摧抑試問庚申之變洋兵北上
津人有從後助戰者否如南省團練動稱數十萬絕無
殄滅一股髮捻之事 朝廷選將練兵製器設備爲百
年自強計兵將器械均能與外人敵到處皆可一呼萬
應則民心乃真可恃平日不求武備臨事能無張皇李
愛伯庚午書事詩孤憤千秋在狂呼一擊中夷酋方喪
魄廷議急和戎殲敵誠非易要盟豈有終宋金殷鑒近
幸莫倚成功華夏瞻山斗安危仗老成出師良有待執
法太無名竟墮織兒術難全義士名虛傳持重議晚節
付公評當時士大夫憤諸國之憑陵多譁然欲戰皆局

外之見耳

新城陳學受懿叔能古文與弟廣敷最友愛嘗謂吾兩人落拓不遇而令子鶴服耜輩得志吾以小新城陳氏之衰矣高伯足懷懿叔詩相逢嶺海支離叟翠盃融丹句道經心識中田門戶好谿山雲物富英靈子鶴名孚恩在 成廟時賞有清正良臣扁額累官吏尙同治壬戌以肅黨謫戍新疆伯足寄懷詩攀弓墮灤水徵衛到神畿非常迫事會艱哉此從違豈伊踐阼是堪揜矯制非亮無中立心奚陷滔天爲驚風卷顛木觸林必同摧兆先穎川濁憂甚晁氏危從容海澱夜料禍故不疑萬

里戍烏孫舉家冰作糜東望極酒泉黃河聲正悲分死
得滌盪臥邊足委蛇九州馳赦書枯骸噓成肌孤臣奮
再造荷戈督鼓鞞沈冥一障守炤曜天山陞功罪兩煙
滅僂笑貽世資云云哀怨之音意多結轡

馬穀山用進士爲安徽知縣常在兵閒連擢至開府同
治七年移督兩江九年七月二十六日校武署西偏事
畢步以還署甫及門賊自眾中躍出擊之中要害昇入
而氣絕事聞詔加太子太保入祀賢良祠諡端敏安慶
江甯本籍荷澤皆建祠命卽金陵置獄務究根株而賊
所承特細故覆按亦未能深究周苻農詠其事前後兩

詩自相函矢卒亦莫能明也興化趙鴻書小樓教場歌
云鳳城遙下武都泥萬姓親瞻夾道齊褒卹大臣關國
體石頭城畔建新祠蛟螭擎攫碑三丈高擎銅獸標銀
榜莫教鬼語互啁啾定有靈旗來颯爽燐火熒熒入夜
流寒雲黯淡古昇州淮南誰遣戕裴相降客何緣忌敬
侯秦淮一水東西逝此中應有傷心淚嗚咽寒潮傍晚
多分明爲訴傳聞異重臣移節駐江南刁斗森嚴萬帳
寒風雨長江新設鎮鯨鯢海上久安瀾鍾山七載無烽
火儀鳳城門宵不鎖絲竹東山感謝公風流自昔惟江
左尙書辛苦選材良閱武親臨內教場種柳堂開休浪

擬華林馬射並流芳材官技勇羣相角金鼓聲聲相聞
作帳下俄驚一客來天邊瞥見寒星落千金匕首血花
斑此際恩讐詎等閒聶政從來無識面荆軻原自不須
還滿城僚屬爭相訊劍客從容承鞫問三尺爰書尙未
成又傳闔內紅兒殞豈有瓊林璧月吟門前何苦說韓
擒無情怨殺臙脂并女伴淒涼淚滿襟當日烽煙連皖
豫江頭記得潛行處良人同日竄荆榛賤妾何羞齊相
御轉眼升沈事渺茫使君節鉞耀錢塘飄零四海爲家
客也向西湖泛小航相逢話舊情難遣蛾眉展轉驚重
見恩怨循環一晌閒羅敷枉用多留戀鳥不高飛亦可

哀渾忘辛苦賊中來誰憐婀娜天涯樹強向侯門苑裏
栽侯門深鎖春光好一夜西風吹樹倒歌舞方酣禍變
生呼天一哭天應老浩蕩長干鼓浪聲愁心重疊恨難
平春蠶已死絲仍縛粉蝶成灰夢未醒一聲河滿向誰
訴紅顏畢竟將身誤寂寞香塵罨畫簾鈿蟬零落歸何
處白楊蕭颯暗寒煙天半游絲劇可憐一世勳名成夢
鹿兩情縹緲化嗁鶻轉眼豪華經曉露六州一錯誰能
鑄北渚新添渺渺愁西陵錯認亭亭樹星使明年白下
來優揚典禮逮泉臺不知年少三河客底甚滄溟作巨
魁卽今海上仍清晏孫恩戰艦無人見幕府峰頭夜打

鐘蔡洲西去江如練尙書祠畔草旋荒松柏凌秋又幾
霜鎮日牆邊竄麋鹿何年墓頂集鴛鴦草茅聞見殊難
據議論終須信當路臆說非關商隱詩罪言妄效樊川
賦閑坐凭欄酒一杯偶提往事重低徊白門楊柳藏鷗
早江水滔滔更不回吳牧騶磔鼠行亦感其事而作也
懷寧彭孝女字詠春景州牧豫卿女也孝慧通書史割
股療母者再母卒誓以身殉喪百日詣母殯所開福寺
佯爲禮塔酬神者登絕頂遙拜呼母自投塔前塔高二
十丈肢體無稍損惟脫雙履若或解其絆者昇以歸遂
卒舫其篋得手書立誓不移語慰家人河間紀偉菴道

其事山陰陳錦爲作墮塔吟伯熙祭酒亦有詩云鈴語
淒淒怨夕陽人天難覓返生香落花再轉空王劫怛悵
前身午夢堂曹碑班誠久低徊日日香芸伴鏡臺腸斷
阿翁應自悔教兒何苦讀書來

庫雅拉友竹女史齡文道光中隨其尊人嵩中峰鎮軍
宦游楚皖間中峰任衡州副將時延彭雪琴主家塾竹
友及門數載歸烏佳氏忠善亭侍衛未一載而寡嗣子
吉順榮帆由筆帖式官刑部直樞垣遷直隸口北道皆
友竹丸熊茹蕖教養所致光緒甲申榮帆爲錢絮香詩
稿一卷時剛直在嶺南軍中爲序其簡端榮帆余姍家

也

意園林亭極勝牡丹尤各色俱備己亥春杪余以換官
出都伯熙治具祖餞賞詠竟日偶讀愛伯先生翠樓春
贈伯熙一詞亦初夏招賞牡丹作也詞云曲檻留春華
軒敞夏當年朱邸分賜香塵隨步徑還隨處雕欄堪倚
小山纖峙又飛閣流丹迴廊縈翠重簾底綠楊垂處亂
花橫砌最愛千朵嬌紅似絳幡朱節舞鸞飛墜天風環
佩響更深院沈沈歌吹豔情誰寄正鈿匣裁詩金燧添
麝人微醉錦屏雙影折枝橫髻是詞作於癸酉伯熙尙
未通籍後半闕謂其閨人及令妹皆能詩也愛伯自號

霞川花隱生霞川者越地水名李氏先宅臨橫河遂益
南關臨直河兩旁居人頗種桃李春時花開舟行其閒
遠山映發煙水爛漫每至晨霏夕暝之際立紅橋上望
之層絳閒素迤邐若霞蓋閒居之樂歌詩之興水邊林
下斯時爲多故以自號兼以名詞繪有霞川老屋圖

錢曉庭大令聚朝爲籀石後人庚申三月挈其女卿藻
避亂山中卽以寓廬景物圖付左芬所畫小冊有松竹
蘭筍木筆芍藥及雪裏桃花題句有云屋西舊種數竿
竹喜見春來新筍生爲語兒曹休掘取日長留得午陰
清卿藻適朱肯夫侍讀迨然肯夫悼亡後追感墜絃益

懷侍研愛伯爲題長亭怨一闋云恁重檢玉匳佳事粉
指痕留露華猶溼老輩風流傳家畫本媵丹碧漫驚烽
火攜嬌女山居蕭瑟竹屐練裘曾侍硯芸牋親擘愁說
婿鄉回首處鶯脰淚痕堪挹種松人去便雪裏穠桃都
折付蕭郎彩筆相思重證取花紅圓月況着蘭筍森森
仍是綠陰時節肯夫爲久香侍郎子丙子進士

餘姚黃蔚農爲黎洲晁孫學昌其世精算法著有測地
志要交食捷算五緯捷算方平儀象等書金華程黻卿
亦爲此學皆庚午舉人也李萼客侍御題張子平同年
行字荷鉏帶經圖云伊昔歲在午同舉何紛紛黃君旣

老宿程生亦精勤共闡九章祕觚綫論續紛又答王子
裳同年詠霓見贈之作云昔秋舉進士同歲多魁奇潘
鴻朱兩年少漢詰确不移黃生

以周

治易禮屹屹忘朝

飢其餘十數輩俱好深湛思庚午浙闈典試者爲李仲
約侍郎得人稱盛前此丁卯一科張文襄典浙試兩榜
人才可以相埒後此如戊子己丑辛卯關防不謹致見
彈章識者知科舉氣運之將終矣

同治己巳六品藍翎太監安得海稱中旨遣赴蘇州采
買段匹自潞津泝運河南下建龍鳳旗幟所經爲之下
莫敢發者丁文誠時撫山東檄吏追捕至德州執而鞠

之七月二十九日奏論置於法隨從太監蘇拉鑣手斬
絞發黑龍江如律 聖神明斷命下如所請焉部官某
某以利嗾御史德泰上言修復園居按畝加稅 詔旨
切責張治秋尙書游海淀作云博做離宮地艱難 列
聖心鯨波滄海動龍馭鼎湖深御道猶存昔游蹤其愴
今 先皇有遺慟頡利未成禽車駕罷巡幸封人廢埽
除蒼梧春不返離黍感何如喜抑中官侈言懲御史書
嗣皇躬節儉莫更議園居光緒己丑文達以編修召
直南齋朱蓉生和文達詩有聞道上林游獵美肯將詞
賦薄相如之句於時園淀工作頗興而鐵牌之訓已漸

不如從前之恪守矣文誠督川以丙戌薨于位遺疏言
外洋和約萬不足恃止可以安爲攘不宜重外輕內
皇上指日親政應請舉行日講以裕聖功近賢人君子
遠宦官宮妾勿以財用不足而進言利之臣勿以時局
多艱而行苟且之政 兩宮動容嗟悼焉

崇陽傅鐵椽燮鼎有我泉集山邨云蒙密松陰日未斜
旋聞犬吠得人家西風滿地墮如雪無數山邨茶子花
林文忠督滇黔日查辦漢回互鬥事各誅其渠魁不苛
不縱杜逆文秀亦在案內文忠憐其小有才特貸一死
後文秀倡亂據大理府十餘年岑襄勤討之同治癸酉

生禽以歸吳牧騶觀察詩負固巖關險稽誅國法寬此
邦今厭亂上將昨登壇泝水樓船渡蒼山鐵騎盤舁中
非力鬪生縛杜回難東道通來久西人困未蘇頻年竭
膏血一旦送頭顱擁土希蒙段攻城鬪墨輸大風傾蟻
穴槐國夢醒無文忠昔治獄憐汝出幽囚也識胡雛異
而寬漢吏收豹文潛黠鼠墓洞躍長虯流毒連諸郡山
川百戰愁節鉞全滇寄中丞戰績高烽煙三迤淨帷幄
十年勞山市通蠻布秋闈試鵠袍昇平新氣象籌筆倚
韋皋牧騶由壬子庶常改官滇南值回患孔棘故多興
感時事之詩

每歲黃花魚出順天府以九尾進呈敕付御膳房吳牧
騶詩海舶齊環丁字沽網來石首賽銀鱸黃封一騎燕
山早九尾鱗鱗敕御廚

孫琴西太僕評姚慕庭詩沈鍊峭拔惟有過於幽窅如
江通湖水白樹補斷山青語匪不工然如此刻畫恐爲
晚宋江湖一派試看杜子美蘇子瞻摹寫景物便有天
地開闔萬象森列之概云云慕庭詩曰幸餘求定稿其
讀吳公可讀遺疏感賦云挺埴鎔金萬品舒 先皇大
澤徧扶輿無端一疏傳江介始信當時衛史魚宮詔分
明出禁庭專天哀痛感羣靈異時中外齊翹首扶杖蹇

衣掩淚聽芙蓉仙闕紫金魚都是先朝壤地儲宮史若
傳調護事吳公前有廣尙書三峽樓遲百拜篇雲陽山
木未渠憐只今明月青山夜獨抱深情聽杜鵑玉陛金
鋪散曉光鈞天一醉夢難長誰知十部龜茲外別有人
閒萬寶常數詩能不失後湘家法

半龔隱士炳咸居龍爪槐名所居曰天倪閣慕庭登覺
羅炳咸小樓云竟歲閒門掩尋秋得暫過地偏浮碧遠
樓敞受青多調古琴懸壁人稀砌長莎登臨動鄉思江
上有卷阿

光緒己卯孫琴西以太僕內召感事詩有但愁致主仍

無術鄉詰周官有舊編之句謂其鄉乾涓諸老多爲周禮之學也哲嗣仲容謂詒讓自勝衣就傅太僕君卽授以此經旣長以爾雅說文正其故訓以禮經大小戴記證其制度遂博采漢唐宋以來迄於乾嘉諸經儒舊詁參互證繹以發鄭注之牀奧裨賈疏之遺闕成周禮正義八十六卷仲容著書滿家已刊行者有周書斟補周禮三家佚注九旗古誼述古籀拾遺墨子閒詁札迯可謂勤矣

毅皇帝宮車宴駕有御馬悲鳴於景山林樹之間卒以不食斃黃公度烏之珠歌云北風雨雪門不開景山暫

作金粟堆黃竹歌停八駿邈一馬鳴訴悲風哀此馬遠
自流沙至鐵花滿身黑雲被將軍甫奏天馬徠雄姿已
有凌雲意鳳臆麟身人未知內官頻促黃門試天顏一
顧喜出羣便入天閑登上駟春郊三月楊柳絲九衢夾
道飛龍旗臥瓜吾仗引金鉞霓幢羽葆隨黃麾烏皮鞞
聲地橐橐龍紋蓋影雲遲遲十五善射作前導親王貝
勒相追隨中一天人御飛鞚躡電追風塵不動黃鞵朱
氍鍔金鞍顧影不鳴更矜寵路旁遙指衣黃人側睨龍
媒神亦悚沙平風軟四蹏輕不聞人聲惟馬聲銀花佩
盼露黃帶紅絨結頂飄朱纓少年天子萬民看望塵不

及人皆驚鑾儀校尉獨惆悵輕車步輦空隨行從官爭
費千金產苦索飛龍求上選奚官善相阿敦調有此神
駿無此穩一朝忽泣天花雨目慘雲冥愁楚楚都是攀
髯不逮人并鮮慰情勝無女萬花淚濺柳愁含御牀不
掃空垂簾六宮共抱蒼梧痛萬國還驚白柰簪多時不
見宮中駕一馬悲嘶夜復夜自蒙拂拭眾人驚奚啻黃
金長聲價青絲絡頭伏道旁反因受寵叢譏罵何如死
殉侍昭陵風雨靈旗馳石馬 先皇御宇十三年金牀
玉几少晏眠黃巾甫平白帽擾戰馬每歲從周旋望騅
禮拜木蘭返十年往事猶目前中國未集弓劍閱豈獨

此馬哀呼天卽今兵革猶未息羣胡化鬼擾西域王師
出關萬虎罷眾馬從人同殺賊汝獨一死報君恩吁嗟
龍性固難測烏珠烏珠努力肯飽食諒汝立功能報國
張文襄扈從上 定東陵作有云保冲奠兩代付託完
八紘天步已清晏聖善功莫京重紆聽卑訪祇益受寵
驚絳灌託殊遇終賈非爲名撮壤亦何裨負乘徒殫精
文襄官翰林嘗蒙召對 孝貞顯皇后眷睠尤逾恆等
也

武昌范鶴生舍人同治壬戌分校會試得張文襄卷亟
薦上以溢額被落力爭不得深用憤悒癸亥復與校事

填榜得文襄名仍出舍人門下出闈王少鶴奉常貽書
有此樂何止得仙之語舍人喜極賦詩四首云十年舊
學久荒蕪兩度春官媿濫竽正恐當場迷鷹鼎誰知合
浦有還珠奇文共說元才子完璧終歸蘭大夫記得題
名初唱處滿堂人語雜譁呼苦向閒階泣落英東風回
首不勝情亦知劍氣終難閱未必巢痕定舊營佳話竟
拚成一錯前因遮莫訂三生大羅天上春如海意外雲
龍喜合并一謫蓬萊跡已陳龍門何處認迷津適來也
自驚非分再到居然爲此人歧路劇愁前度誤好花翻
放隔年春羣公浪說憐才甚鐵石相投故有神此樂何

應只得仙太常箋語致纏縣早看桃李森佳植翻爲門
牆慶夙緣名士愛才如其命清時濟治正需賢知君別
有拳拳意不獨文章豔少年末章答奉常奉常亦嘗三
校禮闈也文襄和作云十八瀛洲選惟公薦士誠不才
晚聞道因困轉成名已賦從軍去重偕上計行天知陶
鑄苦更遣作門生滄海橫流世何人惜散材欽奇爲眾
笑湔祓有餘哀疊中憑摸索孤生仗挽回韓門多徹喜
應恨不同來楊峴浙江舉人亦壬戌被薦同爲先生歎賞者今科不復應會試十載栖
蓬累輪困氣不磨殿中今負展江介尙稱戈一介雖微
未平生恥媿媿心銜甄拔意不唱感恩多後來科舉之

罷文襄實力主之錄此以識舊時風義之古

文襄過華山詩亂世酣眠澗谷幽承平策蹇汴京游救
時悟主都無策終是神仙第二流此意竊所未安若如
所言則不爲馮道必爲王通至一行傳中人皆修無用
之業矣陶貞白早結劉宗晚交蕭衍所謂救時悟主者
亦安在哉其誤盡四首之一云伯厚多聞鄭校讐元金
興滅兩無憂文儒冗散姑消日誤盡才人到白頭南渡
積弱鄭王固不當任其責至謂二十年來都下經學講
公羊文章講龔定菴經濟講王安石遂有今日此亦偏
宕之言諸侯放恣處士橫議競以機智勇辨濟其詐而

天下亂矣非講學者之罪也

鄭寒村甲寅聞變句云倘憐嫠恤如蟲獲流品先除滿
漢名國初已有此論考宋人記開寶用相皆北人藝祖
手書碑於政事堂有南人不得坐此之語其後介甫用
事呂蔡繼之果亂天下其意見似偏然祖宗之法輕議
更張其害遂立應廣雅堂讀宋史詩南人不相宋家傳
自詡津橋警杜鵑辛苦李綱虞允文天祥陸秀夫輩
追隨寒日到虞淵此爲光宣之閒融和滿漢而發也乾
隆初杭堇浦言滿洲官督撫者過多因以獲譴全紹衣
謂王魏公寇萊公力持北局不過以王欽若丁謂南人

而扼之耳其人良可扼其說則未公也自唐之陸元方
父子及宣公最爲南相生色而並以南人作相者曰鍾
紹京張曲江姜公輔皆名臣卽宋後來之杜祁公李忠
定公非南人耶然則今之持南局者亦猶此失矣明彭
時以王翱左袒北人而調劑之斯爲大臣秉公之道若
焦芳則眞小人也紹衣詩曰 至尊御皇極平衡歸大
中黨部何所樹我見何所容最爲明論至謂乃若宗國
胄多以喬木雄翼則幸附鳳鱗則幸攀龍日月之所近
風雲于焉從不見豐沛人屠販感奮庸則吾又有說焉
俞理初嘗云太古至春秋君所任者與其開國之人及

其子孫慮其不能賢不足其治則選國子教之上士中士下士府史胥徒取諸鄉興賢能大夫以上皆世族不在選舉故管仲必下於國高孔子不列於季孟周單公用羈鞞公用遠人皆被殺 本朝立賢無方世家豪族不如周之強選舉登進不如周之隘周人能安之而近人乃多異議則國子之教不如周也夫滿漢之並用勢也用滿人而不惟其才則末流之失也自漢至唐莫不用豪族而以功名子弟間之魏之九品中正上品無寒門下品無世族王莽改漢族而敗南族由晉北族由魏禪受之君並其臣受之易代則且有然矣況夫開國功

宗身經百戰而遽以漢人南人加之於喬木世臣之上豈可得哉雖然巨室誠不可不倚以爲政而不學無術有服在大僚覘其才智乃出於輿臺僕隸之下物極必反游談者遂倡公羊譏世卿之說祖青城均貧富之謀而覬覦及於天位禍患中於齊民自缺額不分陽子而陰靳之貴胄假以爭事權僉壬奉以恣玩弄馴至綱紀蕩然大盜因之以移國祚非成法之足以召亂而貴族之難與其政也賢者率不用用者多不學又何與立之有哉斷斷以代馬越禽相較所見亦誠小矣

張文襄北五將歌一曰廣州副都統烏蘭泰一曰湖北

提督塔忠武齊布一曰西安將軍多忠武隆阿一曰科爾沁僧忠親王一曰塔爾巴哈台參贊大臣署伊犁將軍錫綸塔忠武以長沙協標兵三百人爲親兵後皆立功名童添雲彭三元劉士宜畢金科皆部下健將戰歿者楊岳斌鮑超黃翼升李成謀李朝斌皆三百人之內楊長沙協湘陰汛千總鮑從向忠武至廣西轉至湖南以餘丁補長沙協兵多忠武部下則金順善慶長順穆騰阿王可陞曹克忠雷振綰從忠王征討者則陳國瑞善戰而最桀驁服王忠誠奉令唯謹張曜宋慶皆承指授成功名塔爾巴哈台一帶內哈薩克屬我外哈薩克

屬俄阿爾泰山喇嘛提噶扎拉參曾賜呼土克圖驍勇
善戰科布多塔爾巴哈台一帶蒙古皆附之有眾十萬
屢與俄邊人戰錫子猷深與結納相爲犄角俄人侵軼
者輒禽治之俄深忌兩人屢言於朝求斥去之遂疊經
吏議革職暫緩離將軍任文襄詩云匈奴象人射郅都
楚祭北門爲黔夫敵國所惡我所寶羊陸市詐將人愚
邇來閩外盛材武敢戰內寇怯戰虜何況羅刹逞睚眦
六國同聲畏狼虎一自昆彌叛不朝王庭十載淪天驕
狡黠老漁伺便利盜據甌脫容逋逃豪傑陷賊能自拔
習慣沙場從結髮賢父戰死沙州城桓靖美諡榮忠骨

賢兄博學高名起武達文通一門裏國難家讐在西域
孤兒甘赴邊城死絕遠無如塔城孤斗入斯科環雜胡
藩籬外收哈薩克犄角內結呼土圖匈奴未滅家何有
閉壁不許通妻孥墜荒起疲變重鎮鄂博一步誰能踰
西鄰責言眾積毀熱血未冷霜盈顱玉門望斷敵人喜
刀筆糾摑紛紛起私交不責許田鄭市租獨苛代郡李
恩寬僅殺飾終儀柳翼淒涼歸萬里二卵棄將古有之
長城頓壞今已矣鼓鼙聲壯磬聲悲我 皇聽之思者
誰屯田未熟征夫老界上來爭帕爾碑時張勤果在山
東借洋債六十萬爲私用身後事發戶部爲奏請籌款

償之亦無譴責子猷卒後戶部劾其借俄商餉五萬前後奏報不符撤銷卹典誠事之不當於人心者矣

文襄李文正故宅詩獨樂園中花藥荒思賢重上讀書堂誰編元祐初年事且喜諸郎尙有康高陽佐兩朝膺上謚若云涑水則未敢知康亦不知何指其拜寶竹坡墓云子政忠言日月光清貧獨少作金方市樓一棧良鄉酒那得魚頭其此觴用魯宗道事恰合

徐樂云天下患在於土崩民多窮困重之以邊境之事推數循理而求之民宜有不安其處者矣不安故易動易動者土崩之勢也吳昆田嘗謂土崩之勢旣兆非慎

簡守令收拾人心無以爲治吾竊歎爲知言張文襄讀
史絕句唐明皇一首云正本安邊有大猷空談吏治免
園流請看安史蕃回亂枉費顏元典郡州此詩用意我
所未解疑與于次棠中丞齟齬而發

平江杜仲丹孝廉貴墀紀行詩習家池畔倚亭闌春事
無多夢易殘碧色漢南隄上柳蕭疏今向汝南看

陶子珍越中世家肆力漢學詩如草色遠開盤馬地菊
香清照捲簾人江頭楓葉銅樞雨牀背簾衣粉檻鐙皆
以明麗爲宗

黃再同編修爲子壽方伯子聞海南洲道西陲事賦誌

云露布傳西塞關中徧凱聲伊涼今課種回紇亦歸耕
十載謨方定千軍愾共平惟憂新部落積侮釁還生劫
後居民少蕪城燬火幽贍軍蕭相國減食武鄉侯薪束
憂郊秣醪瓶乏水投就糧空有策無敢代持籌功名誇
絕域遠出玉門關虜遁颺風疾途迷雨露艱去農尋食
返亡卒授衣還西嶺冰霜結寒深莫敢攀瀚海沙如海
人煙自古空半年青鳥信平地白駝風轉餉危逾戰跳
梁計每工誰將諸將苦一爲達宸聰南洲名海英從左
文襄十餘年謂關外沙漠無水草轉輸皆須挈帶安西
西去遂爲戈壁灘流沙如海凡一千八百里乃至哈密

名瀚海一名旱海沙中難行者四十里風極狂其來惟
白駝知之風將至則伏地以鼻埋沙中人效所爲乃免
爲此風吹去近邊六月卽雪人蹤車轍轉瞬卽掩行者
皆恃方向爲憑偵探往來輒須數月乃達雪山西連藏
皆雪結成累高則崩六月化水橫流哈密城中布糧甚
富產鐵亦足用而任事皆樂于在內運出左公左右竟
不敢言賊渠白彥虎挾眾數千逃出關攻破纏頭國王
城虜王而行今眾有萬餘人關外往來蹤跡不定張宋
諸軍于安西作屯田計半兵半民兵僅本年之食民爲
存糧規畫頗善然一民給十五金爲馬牛具費費盡田

禾未及熟民仍逃亡兵一名給五月餉三季衣以其餘
爲牛具費多領餉得衣而逃問其故則關外人欺客兵
客民如斨一輒須錢六百客主難相安也皆南洲語觀
此可知西域之成功良匪易矣

崇陽楊氏羣季各擅詩才鳳巢明經邊感云慘淡窮邊
殺氣黃西來烽火接甘涼雲圍瀚海雕成陣路斷冰山
馬失行平日駐師勞上將一時空國徙名王憑君莫話
殊方苦鼓角中原百戰場闢土開疆二百年建牙專闔
屬親賢敢輕沙漠無人地自是中華以外天莽莽草堆
紛置戍荒荒戈壁競屯田八城絡繹輸軍實久費司農

大府錢昔聞廟算決西征聚米山川悉虜情使者班超
馳絕域將軍李牧出長城九龍大雪朝移帳萬馬平沙
夜蹋營北漠南庭同請吏祁連草木寂無聲敢議珠厓
罷挽輸山河尺寸息皇圖聞聲尙有驚弦雁望氣曾無
集幕烏地入安西屯鐵騎平連直北控雕弧回軍合破
黠戎膽橫海長鯨正伏誅充其才力可以追配華亭兩
兄小滄眉洲均爲王子壽鄧獻之諸老所稱眉洲過蒲
縣題獻之荻訓堂詩云蒲城自昔奔重耳霸氣銷沈只
斷碑風月且談吾輩事河山都入使君詩梨花寒食春
村路香草離騷故國思八百年來論吏隱東城笠屐放

衙時漢庭有詔方求吏楚客行吟正惜春才大爭如知
已少官清還似布衣貧頻年征戍窮輸輓下邑農桑賴
撫循所要羣黎歌蟋蟀不勞諸將畫麒麟

鄂卓太守海濡由比部出守臨江辛巳居太夫人憂以
毀卒董沛覺軒挽之以詩有行囊祇賸詩篇在之句時
宰清江爲之屬也

董覺軒己卯春感云燕趙高區舊苦寒河東移粟轉艱
難妖躔甫解黃天厄慘象偏逢赤土乾井里蕭條民氣
索租庸蠲卹帝恩寬鄰封又報宣房決沁水橫流勢浩
漫岷江直下海門來吳楚聯疆亦歲災深谷變遷蛟蜃

起危林棲宿雁鴻哀循良誰溯龔黃傳補救難言鄭白
才樊口一隄爭利病詔書諳切尙徘徊交州飛羽警郵
傳旌旆逍遙救不前萬里投荒秦謫戍一軍下瀨漢開
邊願平林邑師宗慤忍罷珠崖議賈捐區畫得中非易
易滿枰碁著要爭先玉關馳馬草蘇蘇狼燾花門種類
殊回紇舊通西突厥康居新匿北單于將軍鄭重天山
箭使者經游地海圖無恙金甌留缺處窮邊落日奈桑
榆皇華一例渡重瀛博望乘槎鑿空行聖代原非矜遠
略友邦應共洽歡盟估帆競卜回圖利機器能窮格致
精猶道金山傭作苦好從諸島議流氓岷鄉關東去接扶

桑驕抗元明勢漸強察罕輿封籌郡縣全羅邊塞達舟
航空傳邢宋紆鄰難尙冀譚俞固海防自昔明州原貢
道雲山回首益神傷所謂緯嫠獨歎匣龍自吟

光緒丁丑董覺軒成進士以知縣分發江西己卯分校
鄉闈得士爲同考十六房之冠填榜日作云登場校射
侯懸中萬六千士爭彎弓矢鵠者退得者進百中之一
稱豪雄華堂沈沈席三嚮羣官列坐中西東重行左右
北爲上環而伺者摩肩胸吏據南案執筆侍使者手折
糊名封標簽一一認徽記朱本墨本相符同長箋三尺
潤三寸姓名籍貫書精工傳觀旣周乃填榜撫部逐次

親題紅王前盧後判高下豈藉韓陸交關通時維九月
日辛巳微雨灑道天冥濛堂前森列八巨燭粗如人臂
光熊熊羣官少休具餐飲饜飫醉飽多歡悰僕夫撤筵
吏重寫解頭一唱收全功洪鑪轉運大匠力良鏐精鐵
歸陶鎔黃河滾滾自天下織鱗巨鬣都成龍羣官起立
各相揖行者送者儀肅雍轅門鳴礮健兒奮護榜而出
聲殷隆想當節署三日挂傾城觀覽行憧憧摹寫逼真
猶想見兩校京闈時情景

覺軒演番部合樂辭三十六首於藩部邊方彙括略備
錄之以見綏撫之遠其一曰天命真人起大東遼東舊

域早從風旅獒哨鹿諸蕃部娶婦來京燕犒豐

開國之初若長

白二部南北關四部東海三部皆遼金舊壤編入滿洲

惟混同江南使犬之赫哲部江北使鹿之奇勒爾部費

雅喀部不編佐領同於羈縻州每來京娶婦禮部光祿

寺供筵宴工部供薪芻著為令蓋其俗荒陋命娶內地

女以化之如漢唐

宗女下嫁之例 其二曰庫頁孤懸海島長健丁西渡

有舟航貂牲貢道殊遠隔使者權停普祿鄉

庫頁島在吉林東海

中迤長千里天聰十年曾遣舟師取其壯丁島長歲貢

以其地絕遠不能至寧古塔例於六月集普祿鄉將軍

遣章京往收之距寧古塔三千里今此

島為日本俄羅斯所爭覬而歲貢如故 其三曰書稱不

穀表稱臣統轄三韓舊比鄰莊穆入朝班第一古來箕

子本王賓

朝鮮舊為兄弟之邦奉書稱不穀 太宗以

崇德元年親征入其王京始稱臣納貢莊穆

王李倬朝見於三田 其四曰氈車歲歲入關來貢物頻

渡行幄位在親王上

將定數裁筵宴上元循故事使臣恩許右班陪朝鮮一

以年終併進 歷朝免貢物視崇德舊額僅存其五曰

元朝支裔徧龍荒南部威推察罕強親獻累朝傳國璽

帝教執挺冠諸王漠南蒙古林丹汗雄甲諸部為王師

宗封為親王位冠諸貝其六曰金幣分頒禮數殊穠華

屢降肅離車獅龍七寶歸天上猶想當年奉慰書科爾沁世

姻 帝室屢尚公主郡縣主其親王歲俸二千五百兩

幣四十郡王千五百兩幣二十他部落則親王二千兩

幣二十五郡王千二百兩幣十五也 太祖其七曰吉

蘭花馬擁鹽池元昊遺封列九旗應笑三邊籌戰成勝

朝蒿目望西陲河套部七旗有花馬池賀蘭部二旗有

雪橋詩話續集卷八

皇求恕齋

食之其地皆西夏舊壤其八曰秋獮灤河馬正肥風馳雲驟壯軍

威羣藩張幕觀行獵天子親臨大合圍木蘭秋獮為撫綏蒙古之盛典

內外札薩克皆分班隨扈圍場在多淪泊距古北口三百餘里其九曰和林南界接長

沙回紇王庭此建牙駿馬明駝逾九白北天星斗拱中

華元起和林即回紇建牙之所漠北蒙古喀爾喀皆元後也國初入貢以白駝一白馬八曰九自之貢

其十曰宮殿新開塔密河侍姬舞劍侍臣歌一門三世

稱勳闕功比西京衛霍多賽音諾顏為喀爾喀西部襄王策凌屢敗準噶爾威震漠

北世宗詔城塔密爾河建宮室如京師賜第王有侍衛衛綽克渾能一日夜行千里最立功王與之飲酒侍衛

日請王侍姬為奴舞劍奴請為王歌乃歌朔風高一闋王大喜以侍姬賜之王世子成袞雜布嗣守西藩其弟

車布登札布其子那旺多爾濟並其十一曰五千甲騎以戰多膺勳賞外藩莫與京焉

勢騰騫出塞經行兩月天俘得阿孃諸眷屬岳家軍唱

肉飛仙

青海蒙古羅卜藏丹津叛將軍岳鍾琪討之以偏師疾擣其巢俘賊母弟妹及諸首領斬級八

萬羅卜藏丹津衣婦人衣走入準噶爾

其十二曰萬木森森古戰氛秦軍

西上寇西奔闕與先占登山著不殪名王殪可敦

西城準噶

爾蒙古世強盛其酋噶爾丹據漠北屢擾邊界再駕親征賊走昭莫多大將軍費揚古以西師邀之摩

聖祖

步騎先據小山而以奇兵襲陣後賊大敗厥妃阿努死焉昭莫多蒙古語大樹林也明成祖敗阿魯台即其地

其十三曰大渠前導樹降旛兩路旌旗出玉關二十五

人宵突陣天風一掃格登山

乾隆初準噶爾相繼篡奪酋長薩喇爾阿睦爾撒納

等破關降高宗命班第永常為將軍兩路出師而以阿酋副班第薩酋副永常建舊燾先行諸部望風歸附

其汗達五齊擁萬人保格登山侍衛阿玉錫率二十五騎夜襲其帳橫矛大呼賊瓦解收降眾七千人達五齊

南竄烏什為回酋霍古斯禽獻其十四日狼子何能格野心漁當竭澤

獵焚林鳥孫城郭輪臺戍炎暘全消積雪陰準地初平分建四部

以降酋阿睦爾撒納為杜爾伯特汗噶爾藏為綽羅斯

特汗巴雅爾為輝特汗沙克都為和碩特汗已而阿酋

先叛噶酋巴酋繼之一高宗震怒命諸將軍分道搜剿

熏山網谷禽獸無孑遺惟沙克都不從亂為雅爾哈善

所坑沙克都夫妻宛轉帳中相抱而死於四部中實不

幸焉遂開新疆建伊犁迪化諸城堡與屯列戍同於內

地至今稱重鎮其十五日猶擁單于舊號尊天山遺種此孤存

東遷廬帳原行國禾稼兼收塞外屯阿酋既叛以杜爾伯特故部封三車

稜為汗獨執節不二遷其帳於科布多之東凡十四旗
蒙古本行國惟恃游牧杜爾伯特兼資耕種有屯田之
利其十六日枵腹閒關繞道行衣糧絡繹慶重生開都

河畔多青草牧馬春風兩岸平土爾扈特本準夷舊四部之一明季投俄羅斯

乾隆中伊犁甫定其汗烏錫巴以十六萬口南行爲哈薩克布魯特所截改由戈壁閒絕水草旬日始至伊犁僅存七萬餘口 詔給馬牛羊二十六萬糧茶裘布氈棉稱是以哈拉沙爲其牧地傍開都河兩岸水草廣莫俾建牙焉其十七曰一家經咒出天方伯克司城納稅糧萬

里盡歸都護節三通三絕笑延光 回部在天山南其祖國曰天方則在小西

洋乾隆中平定西域設西四城東四城最東三城皆以大臣鎮之回目稱阿奇木伯克自三品至七品凡五等

其十八曰玉山玉水孕奇胎自昔于闐採取來不道莎

車新建闐河神受享亦呈材 和闐古于闐產玉甲天下葉爾羌古莎車舊無玉河

自辦事大臣祭河神產玉遂盛嘉慶四年葉爾羌山獲大玉重者至萬餘觔亦一奇也 其十九曰

牲幣交通市易車暑寒徙帳本康居還看捐毒循休境

大勇鴻仁拜獻書 哈薩克左右三部古康居布魯特東西二十部古捐毒循休皆通貢市爲

雪橋詩話續集卷八

妻求恕齋

新疆外藩西部長阿濟畢奉將軍書有云如素賚滿佛
之鴻仁魯斯坦之大勇蓋皆回部舊汗之賢者故舉以
為頌 其二十曰嶺外星羅小國君大宛烏稔月氏分東

來一例頌文綺慰爾關河使節勤會典列朝貢之國在
蔥嶺西者以霍罕拔

達克山愛烏罕為著餘皆附庸部也霍罕古大宛拔
達克山古烏稔愛烏罕古大月氏今皆為鄰國所并其

二十一日雪山禪榻證前因不媿金剛大士身西北蕃

侯無異教熬茶齊祝再來人西藏達賴班禪世世轉生
不昧本來為釋教之宗主

後達賴以順治中入覲班禪以乾隆中入覲皆蒙殊禮

蒙古番人入藏熬茶膜拜頂禮各 其二十二曰金碧莊
部落皆達寺廟奉大刺麻居之

嚴大小招層樓傑閣聳雲霄誰知花雨續紛地尙有唐

時舊柳條西藏為吐番故都唐文成公主下降性好佛
贊普為建大小招寺規制宏麗金玉佛像以

萬計今尙存寺旁有柳亦唐時物鬱若龍剎舊制藏中
有公事駐藏大臣會刺麻及渠長議於大招寺近始改
公署 其二十三曰勒銘温雅最高巔樂隊新來震旦天

東部朝鮮西悉立百番歌舞應宮懸
廓爾喀古悉立國在西藏之西過温

雅山卽其都城乾隆中將軍福康安征之獻樂工象馬
納款軍前乃磨崖紀功而還今殿廷燕享之舞有朝鮮
俳舞有廓爾喀樂舞
蓋東西極邊之樂也 其二十四曰白象金樓黑水邦老

官屯外奉書降穹碑重讀前朝誓石爛江枯爾渡江
甸

初未受封自稱西南金樓白象主金沙江由其國入海
或謂卽禹貢梁州之黑水也乾隆中經略傅恆征緬圍
老官屯其酋以貝葉書乞降石爛江枯
爾乃得渡明靖遠伯王驥與緬人誓語 其二十五曰單

使經由普洱關遠輸象翠列年班春官不遣諸曹屬丞

倅舟車伴往還

南掌十年一貢由普洱府款關入境以丞倅伴送至京其歸也仍遣原伴官護

之安南緬甸暹羅蘇祿琉球則其二十六曰遠拓南洋皆命禮部司官送之省會也

第一洲三方鼎峙屢尋仇讎侘本是中原產北面輸忱

戀首邱暹羅國王鄭昭為永歷遺臣之後本中國人與緬甸安南皆世仇事天朝最恭順其二

十七曰萬壽筵開萬國春代身不敢貢金人灤河親預

山莊宴十闋登歌樂府新安南阮光平奪黎氏國以乾隆五十五年入朝祝高宗

八十萬壽宴熱河山莊班親王下郡王上賜冠帶受封光平獻頌詩十章其二十八曰新阮

恩恩十二秋黎甥依舊復交州越南改賜塗金印上藥

名香歲事修阮光平號新阮受封十二年而其子光瓚為農耐王阮福映所滅農耐故黎氏甥世

守越裳地號舊阮乞以南越名國朝議謂與尉陀同號改為越南國王外藩之印惟朝鮮用金餘國皆銀印以

金塗其二十九曰呂宋文棊錯壤區土生斑竹水生珠

風帆不避重洋險五載修箋貢上都蘇祿在東南洋舊分三部明永樂中

東王西王垆王俱入朝其三十曰中山一境最文柔侍今併為一定五年一貢

子頻來太學游三十六家官世守大夫名號古諸侯琉球

尚文王子及大臣子弟每入國子監讀書五年遣歸明初以閩人三十六姓賜其國國之大夫長史等官多其

也其三十一曰絕島舟航泊虎門蹶泔勺水舊知恩預

防鯨鱷無恬浪 聖祖煌煌寶訓存西洋諸國貢道由虎門蹶泔勺水荷

蘭國表中語也 聖祖有言島國互市廣東百年後必為中國之患其三十二曰鄧至高

昌叢爾城巡邊使節例郊迎前朝衛所俱停襲關隴諸

羌尙故名甘肅青海西藏番目稱指揮千百戶世世承襲使者巡邊不論高卑俱跪迎境上其

三十三曰王師深入兩金川豈比尋常蜀道難寶纍至

今歸版舟西封奚藉一泥丸

大小金川在四川邊外地絕險乾隆中再舉平定番

部震懾百餘年來蜀邊諸土司無反側患

其三十四曰改土歸流計絕倫滇

黔楚粵烈山焚風霆開豁深巖障糾縵南天覩慶雲

雍正

中總督鄂爾泰改土歸流之議桀驁蠻口一例革除雲貴湖粵之民稍息肩焉於時慶雲屢見滇省蓋祥徵也

其三十五云八排六對石嵯峨箐密林深洞作窠編戶

屢叨鹽布賞錦衣花帽出山多

廣東諸徭深踞嶺脊蔓三省邊界不設土官有

生熟二種編戶應役歲以鹽布給之

其三十六云計戈立社闢屯田一帶

山城樹作藩東海更添臺北府中興聲教迄諸番

臺灣中互

大山北路東路舊多番地近歲廣闢田廬深入其腹設

淡水新竹宜蘭三縣建臺北府以轄之別設恆春縣仍

隸臺灣府番有生熟二種如廣東之徭黎計田以戈稱鄉曰社皆其俗也

仁和吳子儒圭龔詩一卷爲伯潛前輩手錄龔齋學士
校刊同治戊辰嘗參恪靖軍事初師議由翼城山逕出
壺關趨河北以雪改道遼州出黃澤關赴畿甸比至靈
石度高壁嶺復以遼州嶺峻不可越遂出井陘子儒詩
有冒雪發介休卽事云冰援窮寇踰河朔雪引追師入
井陘王事艱難勞蓋念天心戒備佑 冲齡兵符分道
頻馳傳畿輔登壇故建瓴布幄宵寒程更遠嚴裝待曉
倚青萍其送柳堂侍御歸皋蘭云當時諫草避人焚抗
直何心天下聞冤獄雍州沈黑水狂名漢殿宥朱雲全
家未遂還鄉計五道猶馳出塞軍畢竟霜威懾諸將端

無車騎冒奇勳頗憶當時戎馬閒邢洛側耳痛傷殘

戊辰

睿有旭紅營至順德與鄉民鬪屠百餘人毒民誰劾呂文德坐法新收田武

安漫道玉關春不度早知金殿禮終寬乘驄會詔還臺

省萬口何勞惜諫官時柳堂以劾提督成祿事左官也

日本以櫻花爲第一品謬爲中國若有此花牡丹不得

稱王之說大者高數丈花朵下垂致如海棠有赤加婆

白加婆之名花皆紅白二色閒有綠者殊種不多也井

上陳子德政在俞曲園先生門下致四株盆栽俞樓下

曲園賦四律陶心雲馬幼眉皆有繼詠幼眉詩繁英高

樹墨江隈淺土苔盆亦自開邁種百年風草遠欣榮萬

里海花來姚黃魏紫齊非偶小白長紅楚有材比似蒲
桃徵漢使瑤枝還合上林栽芳訊加婆譯未眞俞樓三
月萼榭新應知東國龍頭豔願附西湖驥尾春矯矯倭
花誇兩浙茫茫仙種負三秦

謂徐市求仙事

櫻桃自是非常品

得半成名已足珍幼眉自號鷗堂居會稽小臯部嘗結
臯社其贈沈蒙叔景修云書體渾敦開別派推倒右軍
天下怪萬管爭摹古石工信手鐫劂如倒籛欺人之語
出英雄貴以拓跋追斯邕卻誤後賢倘規槩凹鈎凸畫
羣趨風誰把狂瀾挽旣倒秀水能書推沈老絕不矜奇
亦自奇晉韻唐法居然好昔年何編修浩浩書名壓九

州歐虞褚薛不願儔見君之書乃點頭云云足以箴砭世之好爲險怪者

故事修撰多外除監司其除郡守也自史漁村致光出守大理始何立之送漁村詩有藉甚龍頭傳故事翩然鴻爪忽新痕之句己丑王公定前輩以上齋出守潤州館閣尤以爲惜終於蘇州府任入循吏傳

金匱秦潛叔爲澹如都轉從孫嘗橐筆陵東嶽跨太行絕河濟汾漳有霜傑齋詩三卷其山右訪碑詩謂劉耽呂梁山碑在太原交城間呂梁山上志稱秦漢閒物可辨者六十字言禹治水事及舜世系北魏劉懿碑在忻

州焦氏出土未久盛行於時都下吳中多翻刻本北齊
崇勝寺碑在汾陽大相里顧亭林搜得之石晉史匡翰
碑在太原黃陵村朱竹垞始出之土中石柱佛經在太
原縣風洞相傳北齊所刻唐晉祠銘太宗撰在太原縣
晉祠碑文完具而剝剔失神唐白鶴觀碑在長子縣城
西北隅字半磨滅相傳虞永興書乾隆中邑令王巨源
構亭記之唐鐵彌勒像頌房璘妻高氏書在交城石壁
山寺自宋迄金再毀於火寺僧以所藏墨本重刻今亦
殘矣唐碧落碑在絳州州署又澤州司馬山碧落寺磨
厓亦李讓所爲與絳刻文異篆同金刺史許安仁有記

後毀於火唐高壁鎮通濟橋記及節度使王宰題記在
靈石照碑灘磨厓對峙乾隆中喬文與始訪得之嘉慶
辛未邑人梁中靖有記其南陰地關有崇徽公主手痕
碑碑文漫漶手痕尙存唐妬神頌李誼撰文在平定承
天山元遺山詩所謂當時大厯十才子爭遣李誼鑿陋
語者也唐文中子祠碑皮日休撰文在沁州文中子祠
舊在銅鞮故縣紫金山麓明萬厯中刺史俞汝爲移置
州城祠今不復存宋司馬溫公神道碑蘇文忠公撰書
額曰忠清粹德之碑則哲宗御篆也在夏縣西溫公墓
章蔡當國仆之金皇統中邑令王廷直得斷碑土中乃

摹分四石刊置祠壁鄧濂序其集所謂嘯月三垂之岡
躡雲九折之坂太行夜臥枕底峰孤獲鹿曉行馬頭雪
擁者也近人輯山右金石志潛叔固未之見

會稽王景瑗學博英濶祖國泰父銘兩世以能書擅名
學博以多病習軒岐術著醫辨如干卷令子止軒同年
繼香癖耽古硯撰硯銘一卷衡鑒所及搨爲硯景丁丑
游天童有天童游草其弟繼毅以光緒庚辰殉孝於鄆
之月湖止軒嘗司訓孝豐晚官翰林出爲河南知府未
補官遽卒早執贄於越縵堂越縵居諫職未言事止軒
相對痛哭亦贛直男子也

劉孟塗詩天才橫溢光緒丙戌哲嗣少塗爲刻遺集二卷皆亂後蒐集未入正集者送春七律至三十二首游仙詞七律至十四首皆感遇之作盱眙王錫元謂其駢體如與王子卿太守書出吳山尊彭甘亭諸人上則鄉曲之見也

思南程少珊同年棧林讀書南學時意園祭酒最爲激賞癸巳典試甘肅余送以詩云黃紙天題字未乾照人隴月躍征鞍魚龍夏走河聲壯華萼朝迎嶽色寒形勝三秦分肺腑良家六郡望衣冠花門定後弦歌起寄語榛蘭子細看借書賭酒年來慣周北張南論敢齊仗節

空同勞遠出閉門風雨總顏低賞音定使三明遇過目
從無五色迷痛飲與君期歲晚蒲桃歸遺壓霜蹠同館
十年過從最密癸卯三月再入修門少珊和前韻見贈
有漏舟焚屋吾何避之句蓋歎朝局之日非而惜素心
之遠去也辛亥冬嘗上封事以預修 德宗實錄羈留
京師書疏往還深慨比來廉恥道喪士大夫全不知節
義二字何時覲面當握手作西臺之哭乙卯病歿京邸
其好學勵品近時所希說文三禮均有論著當官制紛
更坊缺沈滯多由他途以求速化處之泊如也在實錄
館始終其事意園高弟樸學惟見此人余取明人語人

完代革輓之誠無媿焉詩不多作嘗言意在師其鄉鄭
子尹意園得多禮堂先生毛詩多識稿本叢雜屬少珊
爲之理董已成完書訖未付刻鬱華藏籍近已散落人
閒比從坊友見所售出書目與紫幢居士手鈔詩並在
其中爲黯然者久之

釜山在安肅縣西涑水縣東東臨峭壁中有谷甚宏敞
黃帝合符釜山卽此徐雲峪長史家涑水築黎雲杏火
亭于山麓繪有移家圖周泊莊刺史鳳岐爲作歌云雲
峪先生宦不達彈琴舊作王門客彈出高山流水音翻
然心向滄洲豁涑之水清且腴雲豁水峪煙模胡黃緣

百日住未足夢想釣艇依菰蒲可憐朝衫欲脫脫不得
倩人寫作八尺移家圖此圖誰施手燕南逸客先生徒
胸中邱壑雅相稱筆妙皴染神明俱但見千巖萬壑刻
轆而竒篠撐空樹樹紅珊瑚遠谿近澗一氣相鉤帶嵐
煙欲暝窮猿呼斑斑車馬跡何處來山幽得非葛仙翁
避地尋丹邱紛紛攜持雜負戴僕夫木末如獼猴丹雞
白犬馬犝牛長鑿短耙隨行輒前載山人後妻女全家
笑指秋山秋頗聞此地酒清冽已見青旆翻溪頭預飭
桔槔修笈簪香粳銀鯽充盤羞人生如此亦是樂何必
往取將相酬恩讐我見此圖長歎息我獨何爲戀京國

閒拋好景江之南白雲紅樹情何極野鶴昂藏迴出羣
先生退隱真遠識我頭有銜朝無籍自是不歸歸便得
男兒出處本無心至竟山林全本色春鷓秋蟀鬢催絲
藤杖櫻鞵更不疑釜山亭子他時就寄我梨雲杏火詩
光緒戊戌伯希表兄爲釜山之游有詩云我來爲釜山
釜山土一抔穉柏僅百株一松無匹儔軒轅朝羣后胡
爲來荒邱山顛有立石或者紀號留公玉圖不見金碧
佛宮幽林木無翳障傑閣凌清秋東望盡滄海百靈歛
來游至德在平易母以高深求伯希晚年常作近游往
來於徐河溝水閒也

南海羅西林武曹傳瑞未及補官卽乞假歸有小湖山堂詩文二卷其自題山堂圖云水田十畝書千卷欲解朝衣作老農胸次可想見也句如竹疏仍畏日松小不當風客心長怯夜多病每思家頗有清致小湖山者其先世所居綠潭大環岡畔地有梓橦二樹右爲旋澣岡林木幽邃西北瀆鬱諸水至此縈繞歸耕葺治爲此圖關季華學博爲乙酉同歲介石自守以張文襄用人賢佞並進堅辭分教湖堂之聘所著讀易劄記兼綜漢宋時見已意於萃九四大吉無咎言口訣義訓大吉爲大功未盡其義蓋聚之時不難有大功難在得正而大順

以獲吉耳

國朝年大將軍反是故凶處此爻者卽大

吉亦僅能無咎而已可不慎哉於否六二言古來大人

亂羣者眾矣自失其亨後悔何及殆於同光之際有以

見比應承乘者之未能否亨有爲而發詩如題志伯愚

仲魯同聽秋聲圖云天心釀太和氣象自森肅凜凜秋

有聲幾肇貞天復當其激萬竅造物爲讐服孤倡誰予

和有對乃非獨入夏暫披圖靜籟澄吾目二氣絕端始

四氣遞昭穆今古閱醅音文字罄山竹不言真宰愁噓

塊靖蠻觸元悒畫意存吾友此同讀山骨滌譁囂幽髓

不可剝清商一何仁根本見羣木珍重草堂人高穹奮

雙鵝金鸞被萋楚空谷翹芻束新詩餉潁濱諒入東坡
腹質厚峻雅自是儒者之詩

季華和譚仲修感秋百字令云生來愁病况驀然秋到
高樓夢醒亂擁氈氍毹眠正好輸卻箇人安隱絮柳鶯忙
嗔花燕老疇曩無心聽枕函清淚惜春時已偷搵贏得
桂嶺霏晴楓江豔晚待與春爭勝點綴湖山誰作主莫
誤鷗盟有定七夕星憐中秋月醉累我神形影孤松知
否塵寰何處先冷仲修詞家以爲相知不盡

荆門蔣則先同年楷以乙酉拔貢試令山左攝莒州遷
東平除莒州移平原再牧濮州刻有那處詩鈔四卷那

處者左氏傳楚子遷權於那處則先世居十迴橋橋東
始通舟楫入湖之口至今猶曰那陽口遂以名其居云
庚子李鑑堂戰死河西務紀以詩云亂民亂兵兩不戢
百官狼狽萬家泣于時津沽方陸沈傳召海城尙書入
尙書昔破衣波儒三退三起志不汙長江聞詔走且趨
不知有它知京都都人夢夢晝亦夜好瀝肝膽向天瀉
我有蝥賊我火之西鄰更無口可借尙書上殿何慨慷
不言蝥賊言豺狼豺狼怒發蝥賊喜都人落膽重復張
七月壬子成師出聞道楊邨已前失麾兵直向敵來處
敵人已據河西務癸丑甲寅鋒婁交先鋒左軍當前矛

晉軍同進同敗逃陳書未戰先魂消丙辰齊軍猶備戰
先鋒左右軍不見通州城下方不支通州城上揚白旗
尙書一怒不可遏北望觚棱心如削正氣浩然還太虛
汝曹胡顏尙苟活咸豐之季海波沸忠王雖忠難屏蔽
千年傾國疲一倭如倭十數當奈何眾寡強弱本不敵
何況壯老在曲直不才會受尙書知臨風遙酌酒一卮
死者已矣生者悲方叔召虎今爲誰鑑堂撫東時嘗在
幕中故有恕辭焉要其清節爲當世所希伯熙每亟稱
之未可與喜塔臘督部諸人並論也

汪退谷瘞鶴銘攷臚舉眾說翁正三復作辨證八篇陶

齋尙書爲精刊行世其駁上元程南畊之說甚辨然南
畊所云皮日休先字逸少後字襲美有悼鶴詩云卻向
人閒葬令威此瘞鶴之證又一詩序云華亭鶴聞之舊
矣及來吳中以錢半千得一隻養之經歲不幸爲飲啄
所誤而卒悼之不已遂繼以詩陸魯望和云更向芝田
爲乞銘此撰銘之證襲美爲咸通八年進士崔璞守蘇
州軍事判官自敘以九年從北固至姑蘇咸通十三年
王辰乾符元年甲午襲美正在吳中其年相合集內與
茅山廣文南陽博士詩皆不書其姓字又憶華陽潤卿
博士詩亦不書姓魯望亦有寄華陽山人詩與石刻華

陽真逸上皇山樵丹陽仙尉江陰真宰諸稱謂同所云
得于華亭經歲卒與銘辭合集內佗處稱丙戌歲庚寅
歲皆不書年號又非獨貞白爲然是銘疑爲襲美所作
於黃董陶張之外亦實有證佐惜陶齋刻翁氏補攷時
未及以此質之

庚子以後仄席求人適爲躁進者利用之資讀黃晉卿
有感二首云橘柚青黃照眼垂秋風籬落自紛披頗聞
玉食登蠻果不獨涪州有荔枝漢室需材拔隱淪販繒
屠狗各求伸可憐風雪南山下別有當年射虎人可謂
古今同慨吳正傳和詩有短衣射虎真堪樂莫恨將軍

老不侯之句柳道傳答危太樸書云比數十年學者大抵有自利之心而志日益卑道日益遠夫其自利之心根著于中則未得謂得未至謂至自高者恥於問自多者恥於求而若剽掠纖碎緣飾淺末已足以雄夸於制作之林而爲獵取名爵之資矣無怪乎積敗委靡而莫之振起也其言極爲顯切比來取新厭常務求通變纖碎淺末學校尤甚於科舉用者聽熒學者顰效而國無與立矣其殆道傳所謂安知五帝三王不相沿襲之說其流遂至於此者耶

海堧久滯歸計難成北望墓田澆山無日讀徐毅甫良

鄉塔上作云虛塔俯平郊
趺坐西峰對禪龕
炷晚香泥佛支斷臂
殘陽光未盡野廓數星大
蛙鳴深澗幽虹飲孤村
暖火雲氣合沓龍虎變
荒怪縈青疊嶂趨浮白
新水望望故山遙
目斷飛鳥外豈知先生所坐對者卽吾之故山
目斷鳥外不啻爲吾今日詠也
毅甫詩如寒鍾將雁聲宛轉自來去
春夢無次第已斷復還續
山空木石多索處斷人語律句如好句
斷自續奇文愛處刪雄縣云林迴山脊聳匹馬下
孤光峭壁雲雙縷晴天雁一行
經東阿云盤沙蛇拱月奪隘馬嘶風皆自得語
新建勒公遂同年爲少仲方伯之子
天賦穎異少日以

能詩驚長老落拓不羈卒亦成就甚小其依微一律云
恠得依微漏點清枕函邀夢兀難成春歸始信花無謂
夜短終疑月不情十二碧城迷處所兩三紅袖自生平
銀潢咫尺滄波迴奈此流雲葉葉聲以之追步其鄉樂
蓮裳吳子山差堪踵武

甲午乙未閒寓兵部窪中街叔瑟大令文械時相往還
以所作見示今皆失之頃得扇頭所書道旁李花二絕
句云嬌嬈綽約向誰開惟見邨農日往來落盡風前千
片雪無人解爲一徘徊車塵漠漠此經過其奈花枝似
雪何憔悴風前足惆悵始知愁貌感人多頗有美人遲

暮之感叔瑟漢軍張氏與余爲同門甲午迴避不得入
闡遂試令中州歿於王子

陳恪勤春日雜詩五首秣陵集中作也曲室郡西偏爲
園可接聯從人乞樹子帶雨種籬邊日出早蜂亂煙深
春鳥眠輒塵容吏隱此地有林泉院落翠沈沈蒼苔日
漸深階寒留碧井壁靜挂瑤琴快讀循良傳時爲吳洛
吟閒關銷鬢髮寂寞廟廊心懶惜逢人骨春多中酒疴
農桑慙臥閣風月戀吟窩任命知天大勤民仗歲和瘡
痍仍未起鳴雁夜如何四度雞棲地公餘必種花栽培
觀造化榮落感繁華老屋春宜雨空林晚帶霞營巢知

有處出入護慈鷄曲折成三徑紆迴隔短牆花深人不
到鶴立晝何長歸夢陶潛柳閒心郭象莊未須傳大藥
自有攝生方予以戊申守郡三年後園補種花木每讀
公詩追懷風操雖不能仰希萬一而所謂懶惜逢人骨
及寂寞廟廊心者亦庶幾近之恪勤初令浮石丁丑計
薦經督撫入告以違例報罷己卯奉取臺垣以任命贛
直沮于有司當事諸公陽爲扼腕予以光緒戊戌保送
御史未蒙記名次年卽乞外讀公送陳子文赴石阡詩
雁行十載神交裏雞肋雙輻慷慨中之句尤不能無沈
埋之憾也昔汪季青司城拈范石湖詩簿書遮斷尋詩

路陸放翁詩菱角磨成芡實圓倩曹待詔渭符爲書聯
句復作詩自解謂丈夫浩然氣摧折非所宜方竹使之
圓何異磷白圭菱角及雞頭物性本不齊吾將居吾常
窮達復何疑吾每誦以自壯及今思之等於夢影

楓涇俞氏鬻豚蹠最佳俗稱俞蹠汪篔溪世樟與汪潤
民雨宿桐溪聯句有鬻蹠姓著業藝李園畫界之句陶
齋尙書督兩江時嘗以進御 東朝昔宋皇子魏王以

江瑤柱獻兩宮時物進奉非常貢也後范石湖奏罷兩
宮進奉使蓋自古有行之者矣癸卯八月德音明年萬
壽不許鋪張臣工惟在盡職毋庸報捐廉俸張文襄朝

天集詩涓埃不及竭心肝懿訓光明戒百官聞道周公
稱萬壽但將王業述艱難紺髮無霜億萬春九如報上
本詩云深宮卻貢非無意十論還期獻美芹

近人刻鮮菴縵菴昆季遺詩爲二黃先生集憶余乞外
之浙瀕行時鮮菴舉文湖州規東坡詩語相勸意至可
感鮮菴以學士外遷年未中壽余輓以聯云羣飛刺天
楚澤行吟終不起一言規我西湖雖好莫題詩縵菴亟
爲稱許縵菴辛亥自武昌歸未幾亦以憂傷憔悴死李
文石明湖秋泛圖鮮菴爲題七言長句余爲作記今文
石墓草已宿獨所爲題北江舊廬圖之某編修巋然貴

壽豈所謂幹運元黃者固當神明湛然爲東海一老耶
雪橋詩話刻於癸丑續有所獲錄爲此編偶得一截句
書之卷末樓名詩話閣詩徵前輩風流謝未能破屋一
閒書萬疊殘煤秃管短檠鐙丙辰夏五寫記

雪橋詩話續集卷第八